

宿雨清幾句

朝陽晨帝城

望奔人樂業

瓊上踏歌行



全唐詩

十九

中华古典精华文库

全 唐 诗

(第十九部)

第六百八十一卷

卷 681_1 【感事三十四韵（丁卯己后）】

韩偓

紫殿承恩岁，金銮入直年。人归三岛路，日过八花砖。
鸳鹭皆回席，皋夔亦慕膺。庆霄舒羽翼，尘世有神仙。
虽遇河清圣，惭非岳降贤。皇慈容散拙，公议逼陶甄。
江总参文会，陈暄侍狎筵。腐儒亲帝座，太史认星躔。
侧弁聆神算，濡毫俟密宣。官司持玉研，书省擘香笺。
唯理心无党，怜才膝屡前。焦劳皆实录，宵旰岂虚传。
始议新尧历，将期整舜弦。去梯言必尽，仄席意弥坚。
上相思恁恶，中人诤省愆。鹿穷唯牴触，兔急且联猿。
本是谋谗死，因之致劫迁。氛霾言下合，日月暗中悬。
恭显诚甘罪，韦平亦恃权。畏闻巢幕险，宁寤积薪然。
谅直寻钳口，奸纤益比肩。晋谗终不解，鲁瘠竟难痊。
只拟诛黄皓，何曾识霸先。嗷嗷翻丑正，养虎欲求全。
万乘烟尘里，千官剑戟边。斗魁当北坼，地轴向西偏。
袁董非徒尔，师昭岂偶然？中原成劫火，东海遂桑田。
溅血惭嵇绍，迟行笑褚渊。四夷同效顺，一命敢虚捐。
山岳还青耸，穹苍旧碧鲜。独夫长啜泣，多士已忘筌。
郁郁空狂叫，微微几病癫。丹梯倚寥廓，终去问青天。

卷 681_2 【向隅】

韩偓

守道得途迟，中兼遇乱离。刚肠成绕指，玄发转垂丝。
客路少安处，病床无稳时。弟兄消息绝，独敛问隅眉。

卷 681_3 【社后】

韩偓

社后重阳近，云天澹薄间。目随棋客静，心共睡僧闲。
归鸟城衔日，残虹雨在山。寂寥思晤语，何夕款柴关？

卷 681_4 【息虑】

韩偓

息虑狎群鸥，行藏合自由。春寒宜酒病，夜雨入乡愁。
道向危时见，官因乱世休。外人相待浅，独说济川舟。

卷 681_5 【早起探春】

韩偓

句芒一夜长精神，腊后风头已见春。烟柳半眠藏利脸，
雪梅含笑绽香唇。渐因闲暇思量酒，必怨颠狂泥摸人。
若个高情能似我，且应欹枕睡清晨。

卷 681_6 【味道】

韩偓

如含瓦砾竟何功，痴黠相兼似得中。心系是非徒怅望，
事须光景旋虚空。升沉不定都如梦，毁誉无恒却要聋。
弋者甚多应扼腕，任他闲处指冥鸿。

卷 681_7 【秋郊闲望有感】

韩偓

枫叶微红近有霜，碧云秋色满吴乡。鱼冲骇浪雪鳞健，
鸦闪夕阳金背光。心为感恩长惨戚，鬓缘经乱早苍浪。
可怜广武山前语，楚汉宁教作战场。

卷 681_8 【李太舍池上玩红薇醉题】

韩偓

花低池小水泔泔，花落池心片片轻。酩酊不能羞白鬓，
颠狂犹自眷红英。乍为旅客颜常厚，每见同人眼暂明。
京洛园林归未得，天涯相顾一含情。

卷 681_9 【余寓汀州沙县，病中闻前郑左丞璘随外镇举荐…
感悟也（已巳年）】

韩偓

莫恨当年入用迟，通材何处不逢知。桑田变后新舟楫，
华表归来旧路岐。公干寂寥甘坐废，子牟欢抃促行期。
移都已改侯王第，惆怅沙堤别筑基。

卷 681_10 【又一绝请为申达京洛亲交知余病废】

韩偓

鬓惹新霜耳旧聋，眼昏腰曲四肢风。
交亲若要知形候，岚嶂烟中折臂翁。

卷 681_11 【梦中作】

韩偓

紫宸初启列鸳鸾，直向龙墀对揖班。九曜再新环北极，
万方依旧祝南山。礼容肃睦纓綬外，和气熏蒸剑履间。
扇合却循黄道退，庙堂谈笑百司闲。

卷 681_12 【己巳年正月十二日自沙县抵邵武军将谋抚…偶成一篇】

韩偓

访戴船回郊外泊，故乡何处望天涯。半明半暗山村日，
自落自开江庙花。数醺绿醕桑落酒，一瓿香沫火前茶。
(缺二句)

卷 681_13 【建谿滩波心目惊眩余平生溺奇境今则畏怯不暇因书…八字】

韩偓

长贪山水羨渔樵，自笑扬鞭趁早朝。
今日建谿惊恐后，李将军画也须烧。

卷 681_14 【自沙县抵龙溪县值泉州军过后村落皆空因有一绝
(此后庚午年)】

韩偓

水自潺湲日自斜，尽无鸡犬有鸣鸦。
千村万落如寒食，不见人烟空见花。

卷 681_15 【此翁（此后在桃林场）】

韩偓

高阁群公莫忌依，依心不在宦名中。岩光一唾垂绶紫，
何胤三遗大带红。金劲任从千口铄，玉寒曾试几炉烘。
唯应鬼眼兼天眼，窥见行藏信此翁。

卷 681_16 【失鹤】

韩偓

正怜标格出华亭，况是昂藏入相经。碧落顺风初得志，
故巢因雨却闻腥。几时翔集来华表，每日沈吟看画屏。
为报鸡群虚嫉妒，红尘向上有青冥。

卷 681_17 【卜隐】

韩偓

屏迹还应减是非，却忧蓝玉又光辉。桑梢出舍蚕初老，
柳絮盖溪鱼正肥。世乱岂容长惬意，景清还觉易忘机。
世间华美无心问，藜藿充肠苜作衣。

卷 681_18 【晨兴（一作起）】

韩偓

晓景山河爽，闲居巷陌清。已能消滞念，兼得散余醒。
汲水人初起，回灯燕暂惊。放怀殊未足，圆隙已尘生。

卷 681_19 【暴雨】

韩偓

电尾烧黑云，雨脚飞银线。急点溅池心，微烟昏水面。
气凉氛祲消，暑退松篁健。丛蓼亚赭茸，擎荷翻绿扇。
风期谁与同，逸趣余探遍。欲去更迟留，胸中久交战。

卷 681_20 【山院避暑】

韩偓

行乐江郊外，追凉山寺中。静阴生晚绿，寂虑延清风。
运塞地维窄，气苏天宇空。何人识幽抱，目送冥冥鸿。

卷 681_21 【闲兴】

韩偓

景寂有玄味，韵高无俗情。他山冰雪解，此水波澜生。
影重验花密，滴稀知酒清。忙人常扰扰，安得心和平。

卷 681_22 【漫作二首】

韩偓

暑雨洒和气，香风吹日华。瞬龙惊汗漫，翥凤碎云霞。
悬圃珠为树，天池玉作砂。丹霄能几级，何必待乘槎。

黍谷纯阳入，鸾霄瑞彩生。岳灵分正气，仙卫借神兵。
污俗迎风变，虚怀遇物倾。千钧将一羽，轻重在平衡。

卷 681_23 【腾腾】

韩偓

八年流落醉腾腾，点检行藏喜不胜。
乌帽素餐兼施药，前生多恐是医僧。

卷 681_24 【寄隐者】

韩偓

烟郭云扃路不遥，怀贤犹恨太迢迢。长松夜落钗千股，
小港春添水半腰。已约病身抛印绶，不嫌门巷似渔樵。
渭滨晦迹南阳卧，若比吾徒更寂寥。

卷 681_25 【闲居】

韩偓

厌闻趋竞喜闲居，自种芜菁亦自锄。麋鹿跳梁忧触拨，
鹰鹯搏击恐粗疏。拙谋却为多循理，所短深惭尽信书。
刀尺不亏绳墨在，莫疑张翰恋鲈鱼。

卷 681_26 【僧影】

韩偓

山色依然僧已亡，竹间疏磬隔残阳。
智灯已灭余空烬，犹自光明照十方。

卷 681_27 【洞庭玩月】

韩偓

洞庭湖上清秋月，月皎湖宽万顷霜。玉碗深沈潭底白，
金杯细碎浪头光。寒惊乌鹊离巢噪，冷射蛟螭换窟藏。
更忆瑶台逢此夜，水晶宫殿挹琼浆。

卷 681_28 【赠隐逸】

韩偓

静景须教静者寻，清狂何必在山阴。蜂穿窗纸尘侵砚，
鸟斗庭花露滴琴。莫笑乱离方解印，犹胜颠蹶未抽簪。
筑金总得非名士，况是无人解筑金。

卷 681_29 【南浦】

韩偓

月若半环云若吐，高楼帘卷当南浦。应是石城艇子来，
两桨咿哑过花坞。正值连宵酒未醒，不宜此际兼微雨。
直教笔底有文星，亦应难状分明苦。

卷 681_30 【桃林场客舍之前有池半亩木槿栉比阨水遮山…五言八韵（一本题以下有记之三字）】

韩偓

插槿作藩篱，丛生覆小池。为能妨远目，因遣去闲枝。
邻叟偷来赏，栖禽欲下疑。虚空无障处，蒙闭有开时。
苇鹭怜潇洒，泥鳅畏日曦。稍宽春水面，尽见晚山眉。
岸稳人偷钓，阶明日上基。世间多弊事，事事要良医。

卷 681_31 【中秋寄杨学士（一作中秋永夕奉寄杨学士兄弟）】

韩偓

鳞差甲子渐衰迟，依旧年年困乱离。
八月夜长乡思切，鬓边添得几茎丝。

卷 681_32 【寄禅师】

韩偓

他心明与此心同，妙用忘言理暗通。气运阴阳成世界，
水浮天地寄虚空。劫灰聚散铢锱黑，日御奔驰茧栗红。
万物尽遭风鼓动，唯应禅室静无风。

卷 681_33 【清兴】

韩偓

阴沈天气连翩醉，摘索花枝料峭寒。
拥鼻绕廊吟看雨，不知遗却竹皮冠。

卷 681_34 【深院】

韩偓

鹅儿唼喋栀黄嘴，凤子轻盈腻粉腰。
深院下帘人昼寝，红蔷薇架碧芭蕉。

卷 681_35 【凄凄】

韩偓

深将宠辱齐，往往亦凄凄。白日知丹抱，青云有旧蹊。
嗜咸凌鲁济，恶洁助泾泥。风雨今如晦，堪怜报晓鸡。

卷 681_36 【火蛾】

韩偓

阳光不照临，积阴生此类。非无惜死心，奈有灭明意。
妆穿粉焰焦，翅扑兰膏沸。为尔一伤嗟，自弃非天弃。

卷 681_37 【信笔】

韩偓

春风狂似虎，春浪白于鹅。柳密藏烟易，松长见日多。
石崖采芝叟，乡俗摘茶歌。道在无伊郁，天将奈尔何。

卷 681_38 【雷公】

韩偓

闲人倚柱笑雷公，又向深山霹怪松。
必若有苏天下意，何如惊起武侯龙。

卷 681_39 【船头】

韩偓

两岸绿芜齐似翦，掩映云山相向晚。
船头独立望长空，日艳波光逼人眼。

卷 681_40 【喜凉】

韩偓

炉炭烧人百疾生，凤狂龙躁减心情。四山毒瘴乾坤浊，
一簟凉风世界清。楚调忽惊凄玉柱，汉宫应已湿金茎。
豪强顿息蛙唇吻，爽利重新鹖眼睛。稳想海槎朝犯斗，
健思胡马夜翻营。东南亦是中华分，蒸郁相凌太不平。

卷 681_41 【天鉴】

韩偓

何劳谄笑学趋时，务实清修胜用机。猛虎十年摇尾立，
苍鹰一旦醒心飞。神依正道终潜卫，天鉴衷肠竟不违。
事历艰难人始重，九层成后喜从微。

卷 681_42 【江岸闲步（此后壬申年作，在南安县）】

韩偓

一手携书一杖筇，出门何处觅情通。立谈禅客传心印，
坐睡渔师著背蓬。青布旗夸千日酒，白头浪吼半江风。
淮阴市里人相见，尽道途穷未必穷。

卷 681_43 【野塘】

韩偓

侵晓乘凉偶独来，不因鱼跃见萍开。
卷荷忽被微风触，泻下清香露一杯。

卷 681_44 【余卧疾深村闻一二郎官今称继使闽越笑余迂古…
因成此篇】

韩偓

枕流方采北山薇，驿骑交迎市道儿。雾豹只忧无石室，
泥鳅唯要有洿池。不羞莽卓黄金印，却笑羲皇白接^脚离。
莫负美名书信史，清风扫地更无遗。

卷 681_45 【安贫】

韩偓

手风慵展一行书，眼暗休寻九局图。窗里日光飞野马，
案头筠管长蒲卢。谋身拙为安蛇足，报国危曾捋虎须。
举世可能无默识，未知谁拟试齐竽。

卷 681_46 【残春旅舍】

韩偓

旅舍残春宿雨晴，恍然心地忆咸京。树头蜂抱花须落，
池面鱼吹柳絮行。禅伏诗魔归净域，酒冲愁阵出奇兵。
两梁免被尘埃污，拂拭朝簪待眼明。

卷 681_47 【鹄】

韩偓

偏承雨露润毛衣，黑白分明众所知。高处营巢亲凤阙，
静时闲语上龙墀。化为金印新祥瑞，飞向银河旧路岐。
莫怪天涯栖不稳，托身须是万年枝。

卷 681_48 【露】

韩偓

鹤非千岁饮犹难，莺舌偷含岂自安。光湿最宜丛菊亚，
荡摇无奈绿荷干。名因霈泽随天眷，分与浓霜保岁寒。
五色呈祥须得处，戛云仙掌有金盘。

卷 681_49 【赠僧】

韩偓

尽说归山避战尘，几人终肯别嚣氛。瓶添涧水盛将月，
衲挂松枝惹得云。三接旧承前席遇，一灵今用戒香熏。
相逢莫话金銮事，触拨伤心不愿闻。

卷 681_50 【感旧】

韩偓

省趋弘阁侍貂珰，指座深恩刻寸肠。秦苑已荒空逝水，
楚天无限更斜阳。时昏却笑朱弦直，事过方闻锁骨香。
入室故寮流落尽，路人惆怅见灵光。

卷 681_51 【八月六日作四首】

韩偓

日离黄道十年昏，敏手重开造化门。火帝动炉销剑戟，
风师吹雨洗乾坤。左牵犬马诚难测，右袒簪缨最负恩。
丹笔不知谁定罪，莫留遗迹怨神孙。

金虎挺灾不复论，构成狂獠犯车尘。御衣空惜侍中血，
国玺几危皇后身。图霸未能知盗道，饰非唯欲害仁人。
黄旗紫气今仍旧，免使老臣攀画轮。

簪裾皆是汉公卿，尽作锋铓剑血醒。显负旧恩归乱主，
难教新国用轻刑。穴中狡兔终须尽，井上婴儿岂自宁。
底事亦疑惩未了，更应书罪在泉扃。

坐看包藏负国恩，无才不得预经纶。袁安坠睫寻忧汉，

贾谊濡毫但过秦。威凤鬼应遮矢射，灵犀天与隔埃尘。
堤防瓜李能终始，免愧于心负此身。

卷 681_52 【驿步（癸酉年在南安县）】

韩偓

暂息征车病眼开，况穿松竹入楼台。江流灯影向东去，
树递雨声从北来。物近刘舆招垢腻，风经庾亮污尘埃。
高情自古多惆怅，赖有南华养不材。

卷 681_53 【访隐者遇沈醉书其门而归】

韩偓

晓入江村觅钓翁，钓翁沈醉酒缸空。
夜来风起闲花落，狼藉柴门鸟径中。

卷 681_54 【疏雨】

韩偓

疏雨从东送疾雷，小庭凉气净莓苔。卷帘燕子穿人去，
洗砚鱼儿触手来。但欲进贤求上赏，唯将拯溺作良媒。

戎衣一挂清天下，傳野非无济世才。

卷 681_55 【南安寓止】

韩偓

此地三年偶寄家，枳篱茅厂共桑麻。蝶矜翅暖徐窥草，
蜂倚身轻凝看花。天近函关屯瑞气，水侵吴甸浸晴霞。
岂知卜肆严夫子，潜指星机认海槎。

卷 681_56 【十月七日早起作时气疾初愈】

韩偓

疾愈身轻觉数通，山无岚瘴海无风。
阳精欲出阴精落，天地包含紫气中。

卷 681_57 【有感】

韩偓

坚辞羽葆与吹铙，翻向天涯困系匏。故老未曾忘炙背，
何人终拟问苞茅？融风渐暖将回雁，滹水犹腥近斩蛟。
万里关山如咫尺，女床唯待凤归巢。

卷 681_58 【观斗鸡（一作鸡斗）偶作】

韩偓

何曾解报稻粱恩，金距花冠气遏云。
白日枭鸣无意问，唯将芥羽害同群。

卷 681_59 【蜻蜓】

韩偓

碧玉眼睛云母翅，轻于粉蝶瘦于蜂。
坐来迎拂波光久，岂是殷勤为蓼丛。

卷 681_60 【即目】

韩偓

书墙暗记移花日，洗瓮先知酝酒期。
须信闲人有忙事，早来冲雨觅渔师。

卷 681_61 【寄邻庄道侣】

韩偓

闻说经旬不启关，药窗谁伴醉开颜。
夜来雪压村前竹，賸见溪南几尺山。

卷 681_62 【初赴期集】

韩偓

轻寒著背雨凄凄，九陌无尘未有泥。
还是平时旧滋味，慢垂鞭袖过街西。

卷 681_63 【惜花】

韩偓

皱白离情高处切，腻香愁态静中深。眼随片片沿流去，
恨满枝枝被雨淋。总得苔遮犹慰意，若教泥污更伤心。
临轩一醺悲春酒，明日池塘是绿阴。

卷 681_64 【半醉】

韩偓

水向东流竟不回，红颜白发递相催。壮心暗逐高歌尽，
往事空因半醉来。云护雁霜笼澹月，雨连莺晓落残梅。
西楼怅望芳菲节，处处斜阳草似苔。

卷 681_65 【春尽】

韩偓

惜春连日醉昏昏，醒后衣裳见酒痕。细水浮花归别涧，
断云含雨入孤村。入闲易有芳时恨，地胜难招自古魂。
惭愧流莺相厚意，清晨犹为到西园。

卷 681_66 【睡起】

韩偓

睡起墙阴下药阑，瓦松花白闭柴关。断年不出僧嫌癖，
逐日无机鹤伴闲。尘土莫寻行止处，烟波长在梦魂间。
终撑舴艋称渔叟，賸买湖心一崦山。

卷 681_67 【寄友人】

韩偓

伤时惜别心交加，支颐一向千咨嗟。旷野风吹寒食月，
广庭烟著黄昏花。长拟醺酣遗世事，若为局促问生涯。
夫君亦是多情者，几处将愁殢酒家。

卷 681_68 【见别离者因赠之】

韩偓

征人草草尽戎装，征马萧萧立路傍。尊酒阑珊将远别，
秋山迢迢更斜阳。白髭兄弟中年后，瘴海程途万里长。
曾向天涯怀此恨，见君呜咽更凄凉。

卷 681_69 【伤乱】

韩偓

岸上花根总倒垂，水中花影几千枝。一枝一影寒山里，
野水野花清露时。故国几年犹战斗，异乡终日见旌旗。
交亲流落身羸病，谁在谁亡两不知。

卷 681_70 【南亭】

韩偓

每日在南亭，南亭似僧院。人语静先闻，鸟啼深不见。
松瘦石棱棱，山光溪淀淀。堑蔓坠长茸，岛花垂小蒨。
行簪隐士冠，卧读先贤传。更有兴来时，取琴弹一遍。

卷 681_71 【太平谷中玩水上花】

韩偓

山头水从云外落，水面花自山中来。一溪红点我独惜，
几树蜜房谁见开？应有妖魂随暮雨，岂无香迹在苍苔。
凝眸不觉斜阳尽，忘逐樵人蹑石回。

卷 681_72 【雨】

韩偓

坐来簌簌山风急，山雨随风暗原隰。树带繁声出竹闻，
溪将大点穿篱入。饷妇寥翘布领寒，牧童拥肿蓑衣湿。
此时高味共谁论，拥鼻吟诗空伫立。

卷 681_73 【幽独】

韩偓

幽独起侵晨，山莺啼更早。门巷掩萧条，落花满芳草。
烟和魂共远，春与人同老。默默又依依，凄然此怀抱。

卷 681_74 【江行】

韩偓

浪蹙青山江北岸，云含黑雨日西边。舟人偶语忧风色，
行客无聊罢昼眠。争似槐花九衢里，马蹄安稳慢垂鞭。

卷 681_75 【汉江行次】

韩偓

村寺虽深已暗知，幡竿残日迥依依。沙头有庙青林合，
驿步无人白鸟飞。牧笛自由随草远，渔歌得意扣舷归。
竹园相接春波暖，痛忆家乡旧钓矶。

卷 681_76 【偶题】

韩偓

俟时轻进固相妨，实行丹心仗彼苍。
萧艾转肥兰蕙瘦，可能天亦妒馨香。

卷 681_77 【湖南绝少含桃偶有人以新摘者见惠感事伤怀因成四韵】

韩偓

时节虽同气候殊，不积堪荐寝园无。合充凤食留三岛，
谁许莺偷过五湖。苦笋恐难同象匕，酪浆无复莹玼珠。
金銮岁岁长宣赐，忍泪看天忆帝都。

卷 681_78 【隰州新驿】

韩偓

盛德已图形，胡为忽构兵。燎原虽自及，诛乱不无名。
掷鼠须防误，连鸡莫惮惊。本期将系虏，末策但婴城。
肘腋人情变，朝廷物论生。果闻荒谷缢，旋睹藁街烹。
帝怒今方息，时危喜暂清。始终俱以此，天意甚分明。

卷 681_79 【乱后春日途经野塘】

韩偓

世乱他乡见落梅，野塘晴暖独裴回。船冲水鸟飞还住，
袖拂杨花去却来。季重旧游多丧逝，子山新赋极悲哀。
眼看朝市成陵谷，始信昆明是劫灰。

卷 681_80 【赠易卜崔江处士（袁州）】

韩偓

白首穷经通秘义，青山养老度危时。门传组绶身能退，
家学渔樵迹更奇。四海尽闻龟策妙，九霄堪叹鹤书迟。
壶中日月将何用，借与闲人试一窥。

卷 681_81 【过临淮故里】

韩偓

交游昔岁已凋零，第宅今来亦变更。旧庙荒凉时飨绝，
诸孙饥冻一官成。五湖竟负他年志，百战空垂异代名。
荣盛几何流落久，遣人襟抱薄浮生。

卷 681_82 【赠湖南李思齐处士】

韩偓

两板船头浊酒壶，七丝琴畔白髭须。三春日日黄梅雨，
孤客年年青草湖。燕侠冰霜难狎近，楚狂锋刃触凡愚。
知余绝粒窥仙事，许到名山看药炉。

第六百八十二卷

卷 682_1 【乱后却至近甸有感（乙卯年作）】

韩偓

狂童容易犯金门，比屋齐人作旅魂。夜户不扃生茂草，
春渠自溢浸荒园。关中忽见屯边卒，塞外翻闻有汉村。
堪恨无情清渭水，渺茫依旧绕秦原。

卷 682_2 【同年前虞部李郎中自长沙赴行在余以紫石砚赠之 赋诗代书】

韩偓

斧柯新样胜珠玕，堪赞星郎染翰时。不向东垣修直疏，
即须西掖草妍词。紫光称近丹青笔，声韵宜裁锦绣诗。
蓬岛侍臣今放逐，羡君回去逼龙墀。

卷 682_3 【甲子岁夏五月自长沙抵醴陵贵就深僻以便疏慵…
聊寄知心】

韩偓

职在内庭宫阙下，厅前皆种紫薇花。眼明忽傍渔家见，
魂断方惊魏阙赊。浅色晕成宫里锦，浓香染著洞中霞。
此行若遇支机石，又被君平验海槎。

卷 682_4 【和王舍人抚州饮席赠韦司空】

韩偓

楼台掩映入春寒，丝竹铮鏦向夜阑。席上弟兄皆杞梓，
花前宾客尽鸳鸾。孙弘莫惜频开阁，韩信终期别筑坛。
削玉风姿官水土，黑头公自古来难。

卷 682_5 【避地寒食】

韩偓

避地淹留已自悲，况逢寒食欲沾衣。浓春孤馆人愁坐，
斜日空园花乱飞。路远渐忧知己少，时危又与赏心违。
一名所系无穷事，争敢当年便息机。

卷 682_6 【山驿】

韩偓

参差西北数行雁，寥落东方几片云。叠石小松张水部，
暗山寒雨李将军。秋花粉黛宜无味，独鸟笙簧称静闻。
潇洒襟怀遗世虑，驿楼红叶自纷纷。

卷 682_7 【早发蓝关】

韩偓

关门愁立候鸡鸣，搜景驰魂入杳冥。云外日随千里雁。
山根霜共一潭星。路盘暂见樵人火，栈转时闻驿使铃。
自问辛勤缘底事，半年驱马傍长亭。

卷 682_8 【深村】

韩偓

甘向深村固不材，犹胜摧折傍尘埃。清宵玩月唯红叶，
永日关门但绿苔。幽院菊荒同寂寞，野桥僧去独裴回。
隔篱农叟遥相贺，□□□□膏雨来。

卷 682_9 【重游（一作过）曲江】

韩偓

追寻前事立江汀，渔者应闻太息声。避客野鸥如有感，
损花微雪似无情。疏林自觉长堤在，春水空连古岸平。
惆怅引人还到夜，鞭鞘风冷柳烟轻。

卷 682_10 【三月】

韩偓

辛夷才谢小桃发，蹋青过后寒食前。四时最好是三月，
一去不回唯少年。吴国地遥江接海，汉陵魂断草连天。
新愁旧恨真无奈，须就邻家瓮底眠。

卷 682_11 【秋村】

韩偓

稻垄蓼红沟水清，荻园叶白秋日明。空坡路细见骑过，
远田人静闻水行。柴门狼藉牛羊气，竹坞幽深鸡犬声。
绝粒看经香一炷，心知无事即长生。

卷 682_12 【残花】

韩偓

余霞残雪几多在，蔫香冶态犹无穷。黄昏月下惆怅白，
清明雨后寥梢红。树底草齐千片净，墙头风急数枝空。
西园此日伤心处，一曲高歌水向东。

卷 682_13 【夜船】

韩偓

野云低迷烟苍苍，平波挥目如凝霜。月明船上帘幕卷，
露重岸头花木香。村远夜深无火烛，江寒坐久换衣裳。
诚知不觉天将曙，几簇青山雁一行。

卷 682_14 【伤春】

韩偓

三月光景不忍看，五陵春色何摧残。穷途得志反惆怅，
饮席话旧多阑珊。中酒向阳成美睡，惜花冲雨觉伤寒。
野棠飞尽蒲根暖，寂寞南溪倚钓竿。

卷 682_15 【归紫阁下】

韩偓

一笈携归紫阁峰，马蹄闲慢水溶溶。黄昏后见山田火，
胧朧时闻县郭钟，瘦竹迸生僧坐石，野藤缠杀鹤翘松。
钓矶自别经秋雨，长得莓苔更几重。

卷 682_16 【夜坐】

韩偓

天似空江星似波，时时珠露滴圆荷。平生踪迹慕真隐，
此夕襟怀深自多。格是厌厌饶酒病，终须的的学渔歌。
无名无位堪休去，犹拟朝衣换钓蓑。

卷 682_17 【午寝梦江外兄弟（一作午梦曲江兄弟）】

韩偓

长夏居闲门不开，绕门青草绝尘埃。空庭日午独眠觉，
旅梦天涯相见回。鬓向此时应有雪，心从别处即成灰。
如何水陆三千里，几月书邮始一来。

卷 682_18 【曲江夜思】

韩偓

鼓声将绝月斜痕，园外闲坊半掩门。池里红莲凝白露，
苑中青草伴黄昏。林塘阒寂偏宜夜，烟火稀疏便似村。
大抵世间幽独景，最关诗思与离魂。

卷 682_19 【过汉口】

韩偓

浊世清名一概休，古今翻覆賸堪愁。年年春浪来巫峡，
日日残阳过沔州。居杂商徒偏富庶，地多词客自风流。
联翩半世腾腾过，不在渔船即酒楼。

卷 682_20 【惜春】

韩偓

愿言未偶非高卧，多病无憀选胜游。一夜雨声三月尽，
万般人事五更头。年逾弱冠即为老，节过清明却似秋。
应是西园花已落，满溪红片向东流。

卷 682_21 【及第过堂日作】

韩偓

早随真侣集蓬瀛，阊阖门开尚见星。龙尾楼台迎晓日，
鳌头宫殿入青冥。暗惊凡骨升仙籍，忽讶麻衣谒相庭。
百辟敛容开路看，片时辉赫胜图形。

卷 682_22 【夏课成感怀】

韩偓

别离终日心忉忉，五湖烟波归梦劳。凄凉身事夏课毕，
淩落生涯秋风高。居世无媒多困蹶，昔贤因此亦号咷。
谁怜愁苦多衰改，未到潘年有二毛。

卷 682_23 【离家第二日却寄诸兄弟】

韩偓

睡起褰帘日出时，今辰初恨间容辉。千行泪激傍人感，
一点心随健步归。却望山川空黯黯，回看僮仆亦依依。
定知兄弟高楼上，遥指征途羡鸟飞。

卷 682_24 【游江南水陆院】

韩偓

早于喧杂是深雠，犹恐行藏坠俗流。高寺懒为携酒去，
名山长恨送人游。关河见月空垂泪，风雨看花欲白头。
除却祖师心法外，浮生何处不堪愁。

卷 682_25 【江南送别】

韩偓

江南行止忽相逢，江馆棠梨叶正红。一笑共嗟成往事，
半酣相顾似衰翁。关山月皎清风起，送别人归野渡空。
大抵多情应易老，不堪岐路数西东。

卷 682_26 【格卑】

韩偓

格卑尝恨足牵仍，欲学忘情似不能。入意云山输画匠，
动人风月羡琴僧。南朝峻洁推弘景，东晋清狂数季鹰。
惆怅后尘流落尽，自抛怀抱醉懵腾。

卷 682_27 【冬日】

韩偓

萧条古木衔斜日，戚沥晴寒滞早梅。愁处雪烟连野起，
静时风竹过墙来。故人每忆心先见，新酒偷尝手自开。
景状入诗兼入画，言情不尽恨无才。

卷 682_28 【再止庙居】

韩偓

去值秋风来值春，前时今日共销魂。颓垣古柏疑山观，
高柳鸣鸦似水村。菜甲未齐初出叶，树阴方合掩重门。
幽深冻馁皆推分，静者还应为讨论。

卷 682_29 【老将】

韩偓

折枪黄马倦尘埃，掩耳凶徒怕疾雷。雪密酒酣偷号去，
月明衣冷斫营回。行驱貔虎披金甲，立听笙歌掷玉杯。
坐久不须轻矍铄，至今双擘硬弓开。

卷 682_30 【边上看猎赠元戎】

韩偓

绣帘临晓觉新霜，便遣移厨较猎场。燕卒铁衣围汉相，
鲁儒戎服从梁王。搜山闪闪旗头远，出树斑斑豹尾长。
赞获一声连朔漠，贺杯环骑舞优倡。军回野静秋天白，
角怨城遥晚照黄。红袖拥门持烛炬，解劳今夜宴华堂。

卷 682_31 【余自刑部员外郎为时权所挤值盘石出镇藩屏…长句寄所知】

韩偓

正叨清级忽从戎，况与燕台事不同。开口谩劳矜道在，
抚膺唯合哭途穷。操心未省趋浮俗，点额尤惭自至公。
他日陶甄寻坠履，沧洲何处觅渔翁。

卷 682_32 【北齐二首】

韩偓

任道骄奢必败亡，且将繁盛悦嫔嫱。几千奩镜成楼柱，
六十间云号殿廊。后主猎回初按乐，胡姬酒醒更新妆。

绮罗堆里春风畔，年少多情一帝王。

神器传时异至公，败亡安可怨匆匆。犯寒猎士朝频戮，
告急军书夜不通。并部义旗遮日暗，邺城飞焰照天红。
周朝将相还无体，宁死何须入铁笼。

卷 682_33 【寄京城亲友二首】

韩偓

苦吟看坠叶，寥落共天涯。壮岁空为客，初寒更忆家。
雨墙经月藓，山菊向阳花。因味碧云句，伤哉后会赊。

相思凡几日，日欲咏离衿。直得吟成病，终难状此心。
解衣悲缓带，搔首闷遗簪。西岭斜阳外，潜疑是故林。

卷 682_34 【野寺】

韩偓

野寺看红叶，县城闻捣衣。自怜痴病苦，犹共赏心违。
高阁正临夜，前山应落晖。离情在烟鸟，遥入故关飞。

卷 682_35 【吴郡怀古】

韩偓

主暗臣忠枉就刑，遂教强国醉中倾。人亡建业空城在，
花落西江春水平。万古壮夫犹抱恨，至今词客尽伤情。
徒劳铁锁长千尺，不觉楼船下晋兵。

卷 682_36 【守愚】

韩偓

深院寥寥竹荫廊，披衣欹枕过年芳。守愚不觉世途险，
无事始知春日长。一亩落花围隙地，半竿浓日界空墙。
今来自责趋时懒，翻恨松轩书满床。

卷 682_37 【村居】

韩偓

二月三月雨晴初，舍南舍北唯平芜。前欢入望盈千恨，
胜景牵心非一途。日照神堂闻啄木，风含社树叫提壶。
行看旦夕梨霜发，犹有山寒伤酒垆。

卷 682_38 【离家】

韩偓

八月初长夜，千山第一程。款颜唯有梦，怨泣却无声。
祖席诸宾散，空郊匹马行。自怜非达识，局促为浮名。

卷 682_39 【秋雨内宴（乙卯年作）】

韩偓

一带清风入画堂，撼真珠箔碎玎珰。
更看槛外霏霏雨，似劝须教醉玉觞。

卷 682_40 【寒食日沙县雨中看蔷薇（己巳）】

韩偓

何处遇蔷薇，殊乡冷节时。雨声笼锦帐，风势偃罗帏。
通体全无力，酡颜不自持。绿疏微露刺，红密欲藏枝。
惬意凭阑久，贪吟放盏迟。旁人应见讶，自醉自题诗。

卷 682_41 【地炉】

韩偓

两星残火地炉畔，梦断背灯重拥衾。侧听空堂闻静响，
似敲疏磬裹清音。风灯有影随笼转，腊雪无声逐夜深。
禅客钓翁徒自好，那知此际湛然心。

卷 682_42 【隰州新驿赠刺史】

韩偓

贤侯新换古长亭，先定心机指顾成。高义尽招秦逐客，
旷怀偏接鲁诸生。萍蓬到此销离恨，燕雀飞来带喜声。
却笑昔贤交易极，一开东閤便垂名。

卷 682_43 【草书屏风】

韩偓

何处一屏风，分明怀素踪。虽多尘色染，犹见墨痕浓。
怪石奔秋涧，寒藤挂古松。若教临水畔，字字恐成龙。

卷 682_44 【永明禅师房】

韩偓

景色方妍媚，寻真出近郊。宝香炉上爇，金磬佛前敲。
蔓草棱山径，晴云拂树梢。支公禅寂处，时有鹤来巢。

卷 682_45 【登楼有题】

韩偓

暑气檐前过，蝉声树杪交。待潮生浦口，看雨过山坳。
才见兰舟动，仍闻桂楫敲。宰云朱槛好，终睹凤来巢。

卷 682_46 【朝退书怀】

韩偓

鹤帔星冠羽客装，寝楼西畔坐书堂。山禽养久知人唤，
窗竹茱萸多漏月光。粉壁不题新拙恶，小屏唯录古篇章。
孜孜莫患劳心力，富国安民理道长。

卷 682_47 【元夜即席】

韩偓

元宵清景亚元正，丝雨霏霏向晚倾。桂兔韬光云叶重，
烛龙衔耀月轮明。烟空但仰如膏润，绮席都忘滴砌声。
更待今宵开霁后，九衢车马未妨行。

卷 682_48 【大庆堂赐宴元珣而有诗呈吴越王】

韩偓

非为亲贤展绮筵，恒常宁敢恣游盘。绿搓杨柳绵初软，
红晕樱桃粉未干。谷鸟乍啼声似涩，甘霖方霁景犹寒。
笙歌风紧人酣醉，却绕珍丛烂熳看。

卷 682_49 【又和】

韩偓

樱桃花下会亲贤，风远铜乌转露盘。蝶下粉墙梅乍坼，
蚁浮金斝酒难干。云和缓奏泉声咽，珠箔低垂水影寒。
狂简斐然吟咏足，却邀群彦重吟看。

卷 682_50 【再和】

韩偓

我有嘉宾宴乍欢，画帘纹细凤双盘。影笼沼沚修篁密，
声透笙歌羯鼓干。散后便依书篋寐，渴来潜想玉壶寒。
樱桃零落红桃媚，更俟旬余共醉看。

卷 682_51 【重和】

韩偓

冷宴殷勤展小园，舞鞞柔软彩虬盘。簪花尽日疑头重，
病酒经宵觉口干。嘉树倚楼青琐暗，晚云藏雨碧山寒。
文章天子文章别，八米卢郎未可看。

卷 682_52 【余作探使以繚绫手帛子寄贺因而有诗】

韩偓

解寄繚绫小字封，探花筵上映春丛。黛眉印在微微绿，
檀口消来薄薄红。绶处直应心共紧，研时兼恐汗先融。
帝台春尽还东去，却系裙腰伴雪胸。

卷 682_53 【别锦儿（及第后出京，别锦儿与蜀妓）】

韩偓

一尺红绡一首诗，赠君相别两相思。画眉今日空留语，
解佩他年更可期。临去莫论交颈意，清歌休著断肠词。
出门何事休惆怅，曾梦良人折桂枝。

卷 682_54 【闲步】

韩偓

庄南纵步游荒野，独鸟寒烟轻惹惹。傍山疏雨湿秋花，
僻路浅泉浮败果。樵人相见指惊麕，牧童四散收嘶马。
一壶倾尽未能归，黄昏更望诸峰火。

卷 682_55 【乾宁三年丙辰在奉天重围作】

韩偓

仗剑夜巡城，衣襟满霜霰。贼火遍郊垠，飞焰侵星汉。
积雪似空江，长林如断岸。独凭女墙头，思家起长叹。

卷 682_56 【雨中】

韩偓

青桐承雨声，声声何重叠。疏滴下高枝，次打欹低叶。
鸟湿更梳翎，人愁方拄颊。独自上西楼，风襟寒帖帖。

卷 682_57 【与僧】

韩偓

江海扁舟客，云山一衲僧。相逢两无语，若个是南能。

卷 682_58 【晚岸】

韩偓

揭起青篷上岸头，野花和雨冷修修。
春江一夜无波浪，校得行人分外愁。

卷 682_59 【仙山】

韩偓

一炷心香洞府开，偃松皱涩半莓苔。

水清无底山如削，始有仙人骑鹤来。

卷 682_60 【过茂陵】

韩偓

不悲霜露但伤春，孝理何因感兆民。
景帝龙髯消息断，异香空见李夫人。

卷 682_61 【曲江秋日】

韩偓

斜烟缕缕鹭鸶栖，藕叶枯香折野泥。
有个高僧入图画，把经吟立水塘西。

卷 682_62 【流年】

韩偓

三月伤心仍晦日，一春多病更阴天。
雄豪亦有流年恨，况是离魂易黯然。

卷 682_63 【商山道中】

韩偓

云横峭壁水平铺，渡口人家日欲晡。
却忆往年看粉本，始知名画有工夫。

卷 682_64 【招隐】

韩偓

立意忘机机已生，可能朝市污高情。
时人未会严陵志，不钓鲈鱼只钓名。

卷 682_65 【雨村】

韩偓

雁行斜拂雨村楼，帘下三重幕一钩。
倚柱不知身半湿，黄昏独自未回头。

卷 682_66 【使风】

韩偓

茶烟睡觉心无事，一卷黄庭在手中。
欹枕卷帘江万里，舟人不语满帆风。

卷 682_67 【阻风】

韩偓

平生情趣羡渔师，此日烟江愜所思。
肥鰕香粳小舫牒，断肠滋味阻风时。

卷 682_68 【并州】

韩偓

戍旗青草接榆关，雨里并州四月寒。
谁会凭阑潜忍泪，不胜天际似江干。

卷 682_69 【夏夜】

韩偓

猛风飘电黑云生，霎霎高林簇雨声。
夜久雨休风又定，断云流月却斜明。

卷 682_70 【阑干】

韩偓

扫花虽恨夜来雨，把酒却怜晴后寒。
吴质谩言愁得病，当时犹不凭阑干。

卷 682_71 【以庭前海棠梨花一枝寄李十九员外】

韩偓

二月春风澹荡时，旅人虚对海棠梨。
不如寄与星郎去，想得朝回正画眉。

卷 682_72 【驿楼】

韩偓

流云溶溶水悠悠，故乡千里空回头。
三更犹凭阑干月，泪满关山孤驿楼。

卷 682_73 【频访卢秀才（卢时在选末）】

韩偓

药诀棋经思致论，柳腰莲脸本忘情。
频频强入风流坐，酒肆应疑阮步兵。

卷 682_74 【答友人见寄酒】

韩偓

虽可忘忧矣，其如作病何。淋漓满襟袖，更发楚狂歌。

卷 682_75 【野钓】

韩偓

细雨桃花水，轻鸥逆浪飞。风头阻归棹，坐睡倚蓑衣。

卷 682_76 【曲江晚思】

韩偓

云物阴寂历，竹木寒青苍。水冷鹭鸶立，烟月愁昏黄。

卷 682_77 【赠友人】

韩偓

莫嫌谈笑与经过，却恐闲多病亦多。
若遣心中无一事，不知争奈日长何。

卷 682_78 【半睡】

韩偓

眉山暗澹向残灯，一半云鬟坠枕棱。
四体著人娇欲泣，自家揉损砑缭绫。

卷 682_79 【已凉】

韩偓

愁多却讶天凉早，思倦翻嫌夜漏迟。

何处山川孤馆里，向灯弯尽一双眉。

卷 682_80 【寄禅师】

韩偓

从无入有云峰聚，已有还无电火销。
销聚本来皆是幻，世间闲口漫嚣嚣。

卷 682_81 【访明公大德】

韩偓

寸发如霜袒右肩，倚肩筇竹貌怡然。悬灯深屋夜分坐，
移榻向阳斋后眠。刮膜且扬三毒论，摄心徐指二宗禅。
清凉药分能知味，各自胸中有醴泉。

卷 682_82 【大酺乐】

韩偓

晚日催弦管，春风入绮罗。杏花如有意，偏落舞衫多。

卷 682_83 【思归乐】

韩偓

泪滴珠难尽，容殊玉易销。恍随明月去，莫道梦魂遥。

卷 682_84 【御制春游长句】

韩偓

天意分明道已光，春游嘉景胜仙乡。玉炉烟直风初静，
银汉云消日正长。柳带似眉全展绿，杏苞如脸半开香。
黄莺历历啼红树，紫燕关关语画梁。低槛晚晴笼翡翠，
小池波暖浴鸳鸯。马嘶广陌贪新草，人醉花堤怕夕阳。
比屋管弦呈妙曲，连营罗绮斗时妆。全吴霸越千年后，
独此升平显万方。

第六百八十三卷

卷 683_1 【幽窗（以下《香奁集》）】

韩偓

刺绣非无暇，幽窗自鲜欢。手香江橘嫩，齿软越梅酸。
密约临行怯，私书欲报难。无凭谗鹊语，犹得暂心宽。

卷 683_2 【江楼二首】

韩偓

梦啼呜咽觉无语，杳杳微微望烟浦。
楼空客散燕交飞，江静帆飞日亭午。

鲙鱼苦笋香味新，杨柳酒旗三月春。
风光百计牵人老，争奈多情是病身。

卷 683_3 【春尽日】

韩偓

树头初日照西檐，树底蔫花夜雨沾。外院池亭闻动锁，
后堂阑槛见垂帘。柳腰入户风斜倚，榆荚堆墙水半淹。
把酒送春惆怅在，年年三月病厌厌。

卷 683_4 【咏灯】

韩偓

高在酒楼明锦幕，远随渔艇泊烟江。
古来幽怨皆销骨，休向长门背雨窗。

卷 683_5 【别绪】

韩偓

别绪静悄悄，牵愁暗入心。已回花渚棹，悔听酒垆琴。
菊露凄罗幕，梨霜恻锦衾。此生终独宿，到死誓相寻。
月好知何计，歌阑叹不禁。山巅更高处，忆上上头吟。

卷 683_6 【见花】

韩偓

褰裳拥鼻正吟诗，日午墙头独见时。血染蜀罗山踯躅，
肉红宫锦海棠梨。因狂得病真闲事，欲咏无才是所悲。
看却东风归去也，争教判得最繁枝。

卷 683_7 【马上见】

韩偓

骄马锦连钱，乘骑是谪仙。和裙穿玉镫，隔袖把金鞭。
去带懵腾醉，归成困顿眠。自怜输廐吏，余暖在香鞯。

卷 683_8 【绕廊】

韩偓

浓烟隔帘香漏泄，斜灯映竹光参差。
绕廊倚柱堪惆怅，细雨轻寒花落时。

卷 683_9 【屐子】

韩偓

方寸肤圆光致致，白罗绣屐红托里。
南朝天子欠风流，却重金莲轻绿齿。

卷 683_10 【青春】

韩偓

眼意心期卒未休，暗中终拟约秦楼。光阴负我难相遇，
情绪牵人不自由。遥夜定嫌香蔽膝，闷时应弄玉搔头。
樱桃花谢梨花发，肠断青春两处愁。

卷 683_11 【闻雨】

韩偓

香侵蔽膝夜寒轻，闻雨伤春梦不成。
罗帐四垂红烛背，玉钗敲著枕函声。

卷 683_12 【懒起（一作闺意）】

韩偓

百舌唤朝眠，春心动几般。枕痕霞黯澹，泪粉玉阑珊。
笼绣香烟歇，屏山烛焰残。暖嫌罗袜窄，瘦觉锦衣宽。
昨夜三更雨，今朝一阵寒。海棠花在否，侧卧卷帘看。

卷 683_13 【已凉】

韩偓

碧阑干外绣帘垂，猩血屏风画折枝。
八尺龙须方锦褥，已凉天气未寒时。

卷 683_14 【欲去】

韩偓

粉纭隔窗语，重约蹋青期。总得相逢处，无非欲去时。
恨深书不尽，宠极意多疑。惆怅桃源路，惟教梦寐知。

卷 683_15 【横塘】

韩偓

秋寒洒背入帘霜，凤胫灯清照洞房。蜀纸麝煤沾笔兴，
越瓯犀液发茶香。风飘乱点更筹转，拍送繁弦曲破长。
散客出门斜月在，两眉愁思问横塘。

卷 683_16 【五更】

韩偓

往年曾约郁金床，半夜潜身入洞房。怀里不知金钿落，
暗中唯觉绣鞋香。此时欲别魂俱断，自后相逢眼更狂。
光景旋消惆怅在，一生赢得是凄凉。

卷 683_17 【联缀体】

韩偓

院宇秋明日日长，社前一雁到辽阳。
陇头针线年年事，不喜寒砧捣断肠。

卷 683_18 【半睡】

韩偓

抬镜仍嫌重，更衣又怕寒。宵分未归帐，半睡待郎看。

卷 683_19 【寒食夜（一作深夜，一作夜深）】

韩偓

清江碧草两悠悠，各自风流一种愁。
正是落花寒食夜，夜深无伴倚南楼。

卷 683_20 【哭花】

韩偓

曾愁香结破颜迟，今见妖红委地时。
若是有情争不哭，夜来风雨葬西施。

卷 683_21 【重游曲江】

韩偓

鞭梢乱拂暗伤情，踪迹难寻露草青。

犹是玉轮曾辗处，一泓秋水涨浮萍。

卷 683_22 【遥见】

韩偓

悲歌泪湿澹胭脂，闲立风吹金缕衣。
白玉堂东遥见后，令人斗薄画杨妃。

卷 683_23 【新秋】

韩偓

一夜清风动扇愁，背时容色入新秋。
桃花脸里汪汪泪，忍到更深枕上流。

卷 683_24 【宫词】

韩偓

绣裙斜立正销魂，侍女移灯掩殿门。
燕子不来花著雨，春风应自怨黄昏。

卷 683_25 【蹋青（一本有词字）】

韩偓

蹋青会散欲归时，金车久立频催上。
收裙整髻故迟迟，两点深心各惆怅。

卷 683_26 【夜深（一作寒食夜）】

韩偓

恻恻轻寒翦翦风，小梅飘雪杏花红。
夜深斜搭秋千索，楼阁朦胧烟雨中。

卷 683_27 【夏日】

韩偓

庭树新阴叶未成，玉阶人静一蝉声。
相风不动乌龙睡，时有娇莺自唤名。

卷 683_28 【新上头】

韩偓

学梳松鬓试新裙，消息佳期在此春。
为要好多心转惑，遍将宜称问傍人。

卷 683_29 【中庭】

韩偓

夜短睡迟慵早起，日高方始出纱窗。
中庭自摘青梅子，先向钗头戴一双。

卷 683_30 【咏浴】

韩偓

再整鱼犀拢翠簪，解衣先觉冷森森。教移兰烛频羞影，
自试香汤更怕深。初似洗花难抑按，终忧沃雪不胜任。
岂知侍女帘帷外，剩取君王几饼金。

卷 683_31 【席上有赠】

韩偓

矜严标格绝嫌猜，嗔怒虽逢笑靥开。小雁斜侵眉柳去，
媚霞横接眼波来。鬓垂香颈云遮藕，粉著兰胸雪压梅。
莫道风流无宋玉，好将心力事妆台。

卷 683_32 【早归】

韩偓

去是黄昏后，归当胧朧时。杈衣吟宿醉，风露动相思。

卷 683_33 【玉合（杂言）】

韩偓

罗囊绣两凤凰，玉合雕双鸂鶒。中有兰膏渍红豆，
每回拈著长相忆。长相忆，经几春？人怅望，香氤氲。
开缄不见新书迹，带粉犹残旧泪痕。

卷 683_34 【金陵（杂言）】

韩偓

风雨萧萧，石头城下木兰桡。烟月迢迢，金陵渡口去来潮。
自古风流皆暗销，才魂妖魂谁与招？彩笺丽句今已矣，
罗袜金莲何寂寥。

卷 683_35 【懒卸头（一作生查子）】

韩偓

侍女动妆奁，故故惊人睡。那知本未眠，背面偷垂泪。
懒卸凤凰钗，羞入鸳鸯被。时复见残灯，和烟坠金穗。

卷 683_36 【倚醉】

韩偓

倚醉无端寻旧约，却怜惆怅转难胜。静中楼阁深春雨。
远处帘栊半夜灯。抱柱立时风细细，绕廊行处思腾腾。
分明窗下闻裁剪，敲遍阑干唤不应。

卷 683_37 【咏手】

韩偓

腕白肤红玉笋芽，调琴抽线露尖斜。背人细捻垂胭鬓。
向镜轻匀衬脸霞。怅望昔逢褰绣幔，依稀曾见托金车。
后园笑向同行道，摘得茱萸又折花。

卷 683_38 【荷花】

韩偓

纨扇相欹绿，香囊独立红。浸淫因重露，狂暴是秋风。
逸调无人唱，秋塘每夜空。何繇见周昉，移入画屏中。

卷 683_39 【松髻】

韩偓

髻根松慢玉钗垂，指点花枝又过时。
坐久暗生惆怅事，背人匀却泪胭脂。

卷 683_40 【寄远（在岐日作）】

韩偓

眉如半月云如鬓，梧桐叶落敲井阑。孤灯亭亭公署寒，
微霜凄凄客衣单。想美人兮云一端，梦魂悠悠关山难。
空房展转怀悲酸，铜壶漏尽闻金鸾。

卷 683_41 【踪迹】

韩偓

东乌西兔似车轮，劫火桑田不复论。
唯有风光与踪迹，思量长是暗销魂。

卷 683_42 【病（一作痛）忆】

韩偓

信知尤物必牵情，一顾难酬觉命轻。
曾把禅机销此病，破除才尽又重生。

卷 683_43 【妒媒】

韩偓

洞房深闭不曾开，横卧乌龙作妒媒。好鸟岂劳兼比翼，
异华何必更重台。难留旋逐惊飙去，暂见如随急电来。
多为过防成后悔，偶因翻语得深猜。已嫌刻蜡春宵短，
最恨鸣珂晓鼓催。应笑楚襄仙分薄，日中长是独裴回。

卷 683_44 【不见】

韩偓

动静防闲又怕疑，佯佯脉脉是深机。
此身愿作君家燕，秋社归时也不归。

卷 683_45 【昼寝】

韩偓

碧桐阴尽隔帘栊，扇拂金鹅玉簟烘。扑粉更添香体滑，
解衣唯见下裳红。烦襟乍触冰壶冷，倦枕徐欹宝髻松。
何必苦劳魂与梦，王昌只在此墙东。

卷 683_46 【意绪】

韩偓

绝代佳人何寂寞，梨花未发梅花落。东风吹雨入西园，
银线千条度虚阁。脸粉难匀蜀酒浓，口脂易印吴绡薄。
娇饶意态不胜羞，愿倚郎肩永相著。

卷 683_47 【惆怅】

韩偓

身情长在暗相随，生魄随君君岂知。被头不暖空沾泪，
钗股欲分犹半疑。朗月清风难惬意，词人绝色多伤离。
何如饮酒连千醉，席地幕天无所知。

卷 683_48 【忍笑】

韩偓

宫样衣裳浅画眉，晚来梳洗更相宜。
水精鹦鹉钗头颤，举袂佯羞忍笑时。

卷 683_49 【咏柳】

韩偓

裹雨拖风不自持，全身无力向人垂。
玉纤折得遥相赠，便似观音手里时。

卷 683_50 【密意】

韩偓

呵花贴鬓黏寒发，凝酥光透猩猩血。
经过洛水几多人，唯有陈王见罗袜。

卷 683_51 【偶见（一作秋千）】

韩偓

秋千打困解罗裙，指点醍醐索一尊。
见客入来和笑走，手搓梅子映中门。

卷 683_52 【寒食夜有寄】

韩偓

风流大抵是恹恹，此际相思必断肠。
云薄月昏寒食夜，隔帘微雨杏花香。

卷 683_53 【效崔国辅（一作辅国）体四首】

韩偓

澹月照中庭，海棠花自落。独立俯闲阶，风动秋千索。
雨后碧苔院，霜来红叶楼。闲阶上斜日，鹦鹉伴人愁。
酒力滋睡眸，鹵莽闻街鼓。欲明天更寒，东风打窗雨。
罗幕生春寒，绣窗愁未眠。南湖一夜雨，应湿采莲船。

卷 683_54 【后魏时相州人作李波小妹（一作少妹）歌疑其未
备因补之】

韩偓

李波小妹字雍容，窄衣短袖蛮锦红。未解有情梦梁殿，

何曾自媚妒吴宫。难教牵引知酒味，因令怅望成春慵。
海棠花下秋千畔，背人撩鬓道匆匆。

卷 683_55 【春昼（一作尽）】

韩偓

春融艳艳，大醉陶陶。漏添迟日，箭减良宵。
藤垂戟户，柳拂河桥。帘幕燕子，池塘伯劳。
肤清臂瘦，衫薄香销。楚殿衣窄，南朝髻高。
河阳县远，清波地遥。丝缠露泣，各自无憀。

卷 683_56 【三忆】

韩偓

忆眠时，春梦困腾腾。展转不能起，玉钗垂枕棱。
忆行时，背手揜金雀。敛笑慢回头，步转阑干角。
忆去时，向月迟迟行。强语戏同伴，图郎闻笑声。

卷 683_57 【六言三首】

韩偓

春楼处子倾城，金陵狎客多情。朝云暮雨会合，
罗袜绣被逢迎。华山梧桐相覆，蛮江豆蔻连生。
幽欢不尽告别，秋河怅望平明。

一灯前雨落夜，三月尽草青时。半寒半暖正好，
花开花谢相思。惆怅空教梦见，懊恼多成酒悲。
红袖不干谁会，揉损联娟澹眉。

此间青草更远，不唯空绕汀洲。那里朝日才出，
还应先照西楼。忆泪因成恨泪，梦游常续心游。
桃源洞口来否，绛节霓旌久留。

卷 683_58 【寒食日重游李氏园（一作林）亭有怀】

韩偓

往年同在鸾桥上，见倚朱阑咏柳绵。今日独来香径里，
更无人迹有苔钱。伤心阔别三千里，屈指思量四五年。
料得他乡遇佳节，亦应怀抱暗凄然。

卷 683_59 【思录旧诗于卷上，凄然有感，因成一章】

韩偓

缉缀小诗钞卷里，寻思闲事到心头。
自吟自泣无人会，肠断蓬山第一流。

卷 683_60 【春闺二首】

韩偓

愿结交加梦，因倾潋滟尊。醒来情绪恶，帘外正黄昏。
氤氲帐里香，薄薄睡时妆。长吁解罗带，怯见上空床。

卷 683_61 【代小玉家为蕃骑所虏后寄故集贤裴公相国】

韩偓

动天金鼓逼神州，惜别无心学坠楼。不得回眸辞傅粉，
便须含泪对残秋。折钗伴妾埋青冢，半镜随郎葬杜邮。
唯有此宵魂梦里，殷勤见觅凤池头。

卷 683_62 【荐福寺讲筵偶见又别（一作别后）】

韩偓

见时浓日午，别处暮钟残。景色疑春尽，襟怀似酒阑。
两情含眷恋，一饷致辛酸。夜静长廊下，难寻屐齿看。

卷 683_63 【复偶见三绝】

韩偓

雾为襟袖玉为冠，半似羞人半忍寒。
别易会难长自叹，转身应把泪珠弹。

桃花脸薄难藏泪，柳叶眉长易觉愁。
密迹未成当面笑，几回抬眼又低头。

半身映竹轻闻语，一手揭帘微转头。
此意别人应未觉，不胜情绪两风流。

卷 683_64 【厌花落】

韩偓

厌花落，人寂寞，果树阴成燕翅齐，西园永日闲高阁。

后堂夹帘愁不卷，低头闷把衣襟捻。忽然事到心中来，
四肢娇入茸茸眼。也曾同在华堂宴，佯佯拢鬓偷回面。
半醉狂心忍不禁，分明一任傍人见。书中说却平生事，
犹疑未满情郎意。锦囊封了又重开，夜深窗下烧红纸。
红纸千张言不尽，至诚无语传心印。但得鸳鸯枕臂眠，
也任时光都一瞬。

卷 683_65 【春闷（一作闺）偶成十二韵】

韩偓

阡陌悬云壤，阑畦隔艾芝。路遥行雨懒，河阔过桥迟。
雁足应难达，狐踪浪得疑。谢鲲吟未废，张硕梦堪思。
有意通情处，无言拢鬓时。格高归敛笑，歌怨在颦眉。
醉后金蝉重，欢余玉燕欹。素姿凌白柰，圆颊诮红梨。
粉字题花笔，香笺咏柳诗。绣窗携手约，芳草蹋青期。
别泪开泉脉，春愁罥藕丝。相思不相信，幽恨更谁知。

卷 683_66 【想得（一作再青春）】

韩偓

两重门里玉堂前，寒食花枝月午天。
想得那人垂手立，娇羞不肯上秋千。

卷 683_67 【偶见背面是夕兼梦】

韩偓

酥凝背胛玉搓肩，轻薄红绡覆白莲。此夜分明来入梦，
当时惆怅不成眠。眼波向我无端艳，心火因君特地然。
莫道人生难际会，秦楼鸾凤有神仙。

卷 683_68 【五更】

韩偓

秋雨五更头，桐竹鸣骚屑。却似残春间，断送花时节。
空楼雁一声，远屏灯半灭。绣被拥娇寒，眉山正愁绝。

卷 683_69 【有忆】

韩偓

昼漏迢迢夜漏迟，倾城消息杳无期。愁肠泥酒人千里，
泪眼倚楼天四垂。自笑计狂多独语，谁怜梦好转相思。
何时斗帐浓香里，分付东风与玉儿。

卷 683_70 【半夜】

韩偓

板閤数尊后，至今犹酒悲。一宵相见事，半夜独眠时。
明朝窗下照，应有鬓如丝。

卷 683_71 【信笔】

韩偓

睡髻休频拢，春眉忍更长。整钗梳子重，泛酒菊花香。
绣叠昏金色，罗揉损砑光。有时闲弄笔，亦画两鸳鸯。

卷 683_72 【寄恨】

韩偓

秦钗枉断长条玉，蜀纸虚留小字红。
死恨物情难会处，莲花不肯嫁春风。

卷 683_73 【两处】

韩偓

楼上澹山横，楼前沟水清。怜山又怜水，两处总牵情。

卷 683_74 【拥鼻】

韩偓

拥鼻悲吟一向愁，寒更转尽未回头。绿屏无睡秋分簟，
红叶伤心月午楼。却要因循添逸兴，若为趋竞怗离忧。
殷勤凭仗官渠水，为到西溪动钓舟。

卷 683_75 【闺怨（一作恨）】

韩偓

时光潜去暗凄凉，懒对菱花晕晓妆。
初坼秋千人寂寞，后园青草任他长。

卷 683_76 【褒姒（丁卯年作）】

韩偓

褒姒腰肢淡薄妆，六朝宫样窄衣裳。著词暂见樱桃破，
飞盏遥闻豆蔻香。春恼情怀身觉瘦，酒添颜色粉生光。
此时不敢分明道，风月应知暗断肠。

卷 683_77 【多情（庚午年在桃林场作）】

韩偓

天遣多情不自持，多情兼与病相宜。蜂偷野蜜初尝处，
莺啄含桃欲咽时。酒荡襟怀微駸駸，春牵情绪更融融。
水香剩置金盆里，琼树长须浸一枝。

卷 683_78 【偶见】

韩偓

千金莫惜早莲生，一笑从教下蔡倾。仙树有花难问种，
御香闻气不知名。愁来自觉歌喉咽，瘦去谁怜舞掌轻？
小叠红笺书恨字，与奴方便寄卿卿。

卷 683_79 【个依】

韩偓

甚感殷勤意，其如阻碍何？隔帘窥绿齿，映柱送横波。
老大逢知少，襟怀暗喜多。因倾一尊酒，聊以慰蹉跎。

卷 683_80 【无题】

韩偓

小槛移灯炮，空房锁隙尘。额波风尽日，帘影月侵晨。
香辣更衣后，钗梁拢鬓新。吉音闻诡计，醉语近天真。
妆好方长叹，欢余却浅颦。绣屏金作屋，丝幰玉为轮。
致意通绵竹，精诚托锦鳞。歌凝眉际恨，酒发脸边春。
溪纆殊倾越，楼箫岂美秦！柳虚禳沴气，梅实引芳津。
乐府降清唱，宫厨减食珍。防闲襟并敛，忍妒泪休匀。
宿饮愁萦梦，春寒瘦著人。手持双豆蔻，的的为东邻。

碧瓦偏光日，红帘不受尘。柳昏连绿野，花烂烁清晨。
书密偷看数，情通破体新。明言终未实，暗祝始应真。
枉道嫌偷药，推诚鄙效颦。合成云五色，宜作日中轮。
照兽金涂爪，钗鱼玉镂鳞。渺瀰三岛浪，平远一楼春。
堕髻还名寿，修蛾本姓秦。棹寻闻犬洞，槎入饮牛津。
麟脯随重酿，霜华间八珍。锦囊霞彩烂，罗袜砑光匀。

羞涩佯牵伴，娇饶欲泥人。偷儿难捉搦，慎莫共比邻。

紫蜡融花蒂，红绵拭镜尘。梦狂翻惜夜，妆懒厌凌晨。
茜袖啼痕数，香笺墨色新。

卷 683_81 【倒押前韵】

韩偓

白下同归路，乌衣枉作邻。珮声犹隔箔，香气已迎人。
酒劝杯须满，书羞字不匀。歌怜黄竹怨，味实碧桃珍。
翦烛非良策，当关是要津。东阿初度洛，杨恽旧家秦。
粉化横波溢，衫轻晓雾春。鸦黄双凤翅，麝月半鱼鳞。
别袂翻如浪，回肠转似轮。后期才注脚，前事又含颦。
纵有才难咏，宁无画逼真。天香闻更有，琼树见长新。
斗草常更仆，迷阄误达晨。嗅花判不得，檀注惹风尘。

卷 683_82 【闺情（一作夜闺）】

韩偓

轻风滴砾动帘钩，宿酒犹酣懒卸头。但觉夜深花有露，
不知人静月当楼。何郎烛暗谁能咏，韩寿香焦亦任偷。
敲折玉钗歌转咽，一声声作两眉愁。

卷 683_83 【自负】

韩偓

人许风流自负才，偷桃三度到瑶台。
至今衣领胭脂在，曾被谪仙痛咬来。

卷 683_84 【天凉】

韩偓

愁来却讶天凉早，思倦翻嫌夜漏迟。
何处山川孤馆里，向灯弯尽一双眉。

卷 683_85 【日高】

韩偓

朦胧犹记管弦声，噤瘥余寒酒半醒。
春暮日高帘半卷，落花和雨满中庭。

卷 683_86 【夕阳】

韩偓

花前洒泪临寒食，醉里回头问夕阳。
不管相思人老尽，朝朝容易下西墙。

卷 683_87 【旧馆】

韩偓

前欢往恨分明在，酒兴诗情大半亡。
还似墙西紫荆树，残花摘索映高塘。

卷 683_88 【中春忆赠】

韩偓

年年长是阻佳期，万种恩情只自知。
春色转添惆怅事，似君花发两三枝。

卷 683_89 【春恨】

韩偓

残梦依依酒力余，城头画角伴啼乌。
平明未卷西楼幕，院静时闻响辘轳。

卷 683_90 【秋千（以下三首，本集不载）】

韩偓

池塘夜歇清明雨，绕院无尘近花坞。五丝绳系出墙迟，
力尽才瞋见邻圃。下来娇喘未能调，斜倚朱阑久无语。
无语兼动所思愁，转眼看天一长吐。

卷 683_91 【长信宫二首】

韩偓

天上梦魂何杳杳，宫中消息太沈沈。
君恩不似黄金井，一处团圆万丈深。

天上凤凰休寄梦，人间鹦鹉旧堪悲。
平生心绪无人识，一只金梭万丈丝。

卷 683_92 【句】

韩偓

岂独鸱夷解归去，五湖渔艇且𩇾糟。

第六百八十四卷

卷 684_1 【奉和御制（一本有幸岳寺三字）】

吴融

岳寺清秋霁，宸游永日闲。霓旌森物外，凤吹落人间。
玉漱穿城水，屏开对阙山。皆知圣情悦，丽藻洒芳兰。

卷 684_2 【和集贤相公西溪侍宴观竞渡】

吴融

片水耸层桥，祥烟霭庆霄。昼花铺广宴，晴电闪飞桡。
浪叠摇仙仗，风微定彩标。都人同盛观，不觉在行朝。

卷 684_3 【山居即事四首】

吴融

桂树秋来风满枝，碧岩归日免乖期。

故人尽向蟾宫折，独我攀条欲寄谁。

不傲南窗且采樵，干松每带湿云烧。
庖厨却得长兼味，三秀芝根五朮苗。

万事翛然只有棋，小轩高净簟凉时。
阑珊半局和微醉，花落中庭树影移。

无邻无里不成村，水曲云重掩石门。
何用深求避秦客，吾家便是武陵源。

卷 684_4 【红白牡丹】

吴融

不必繁弦不必歌，静中相对更情多。殷鲜一半霞分绮，
洁澈旁边月飏波。看久愿成庄叟梦，惜留须倩鲁阳戈。
重来应共今来别，风堕香残衬绿莎。

卷 684_5 【中秋（此下一本有十五夜三字）陪熙用学士（此下一本有侍郎二字）禁中玩月（此下一本有因书五言六韵六字）】

吴融

月圆年十二，秋半每多阴。此夕无纤霭，同君宿禁林。

未高知海阔，当午见宫深。衣似繁霜透，身疑积水沈。
遭逢陪侍辇，归去忆抽簪。太液池南岸，相期到晓吟。

卷 684_6 【题豪家故池】

吴融

岁久无泉引，春来仰雨流。萍枯黏朽槛，沙浅露沉舟。
照影人何在，持竿客寄游。翛然兴废外，回首谢眠鸥。

卷 684_7 【偶题】

吴融

贱子曾尘国士知，登门倒屣忆当时。西州酌尽看花酒，
东阁编成咏雪诗。莫道精灵无伯有，寻闻任侠报爰丝。
乌衣旧宅犹能认，粉竹金松一两枝。

卷 684_8 【渚宫立春书怀】

吴融

春候侵残腊，江芜绿已齐。风高莺啭涩，雨密雁飞低。
向日心须在，归朝路欲迷。近闻惊御火，犹及灞陵西。

卷 684_9 【闻李翰林游池上有寄】

吴融

花飞絮落水和流，玉署词臣奉诏游。四面看人随画鹢，
中流合乐起眠鸥。皇恩自抱丹心报，清颂谁将白雪酬。
不为禁钟催入宿，前峰月上未回舟。

卷 684_10 【谷口寓居偶题】

吴融

泔泔病骨怯朝天，谷口归来取性眠。峭壁削成开画障，
急溪飞下咽繁弦。不能尘土争闲事，且放形神学散仙。
已熟前峰采芝径，更于何处养残年。

卷 684_11 【无题】

吴融

万态千端一瞬中，沁园芜没伫秋风。鹄鹳夜警池塘冷，
蝙蝠昼飞楼阁空。粉貌早闻残洛市，箫声犹自傍秦宫。
今朝陌上相非者，曾此歌钟几醉同。

卷 684_12 【赋雪】

吴融

一夜阴风度，平明颢气交。未知融结判，唯见混茫包。
路莫藏行迹，林难出树梢。气应封兽穴，险必堕禽巢。
影密灯回照，声繁竹送敲。玩宜苏让点，餐称蜜匀抄。
结冻防鱼跃，黏沙费马跑。炉寒资爇荻，屋暖赖编茅。
远不分山叠，低宜失地坳。阑干高百尺，新霁若为抛。

卷 684_13 【寄僧】

吴融

柳拂池光一点清，紫方袍袖杖藜行。偶传新句来中禁，
谁把闲书寄上卿？锡倚山根重藓破，棋敲石面碎云生。
应怜正视淮王诏，不识东林物外情。

卷 684_14 【酬僧】

吴融

吾师既续惠休才，况值高秋万象开。吟处远峰横落照，
定中黄叶下青苔。双林不见金兰久，丹楚空翻组绣来。

闻说近郊寒尚绿，登临应待一追陪。

卷 684_15 【题延寿坊东南角古池】

吴融

蔓草萧森曲岸摧，水笼沙浅露莓苔。更无簇簇红妆点，
犹有双双翠羽来。雨细几逢耕犊去，日斜时见钓人回。
繁华自古皆相似，金谷荒园土一堆。

卷 684_16 【登鹳雀楼】

吴融

鸟在林梢脚底看，夕阳无际戍烟残。冻开河水奔浑急，
雪洗条山错落寒。始为一名抛故国，近因多难怕长安。
祖鞭掉折徒为尔，赢得云溪负钓竿。

卷 684_17 【和峡州冯使君题所居】

吴融

三年拔薤成仁政，一日诛茅葺所居。晓岫近排吟阁冷，
夜江遥响寝堂虚。唯怀避地逃多难，不羨朝天卧直庐。

记得街西邻舍否，投荒南去五千余。

卷 684_18 【秋日感事】

吴融

一叶飘然夕照沈，世间何事不经心？
几人欲话云台峻，独我方探禹穴深。
鸡檄固应无下策，鹤书还要问中林。
自怜情为多忧动，不为西风白露吟。

卷 684_19 【莺】

吴融

日落林西鸟未知，自先飞上最高枝。
千啼万语不离恨，已去又来如有期。
惯识江南春早处，长惊蓟北梦回时。
谢家园里成吟久，只欠池塘一句诗。

卷 684_20 【次韵（一本无韵字）和王员外杂游四韵】

吴融

一分难减亦难加，得似溪头浣越纱。
两桨惯邀催去艇，七香曾占取来车。
黄昏忽堕当楼月，清晓休开满镜花。

谁见玉郎肠断处，露床风簟半欹斜。

卷 684_21 【秋事】

吴融

江天暑气自凉清，物候须知一雨成。松竹健来唯欠语，
蕙兰衰去始多情。他年拟献书空在，此日知机意尽平。
更欲轻桡放烟浪，苇花深处睡秋声。

卷 684_22 【和陆拾遗题谏院松】

吴融

落落孤松何处寻，月华西畔结根深。晓含仙掌三清露，
晚上宫墙百雉阴。野鹤不归应有怨，白云高去太无心。
碧岩秋涧休相望，捧日元须在禁林。

卷 684_23 【题扬子津亭】

吴融

扬子江津十四经，纪行文字遍长亭。惊人旅鬓斩新白，
无事海门依旧青。前路莫知霜凛凛，故乡何处雁冥冥。

可怜不识生离者，数点渔帆落暮汀。

卷 684_24 【闲望】

吴融

三点五点映山雨，一枝两枝临水花。蛱蝶狂飞掠芳草，
鸳鸯稳睡翘暖沙。阙下新居成别业，江南旧隐是谁家。
东迁西去俱无计，却羡暝归林上鸦。

卷 684_25 【雪后过昭应】

吴融

路过章台气象宽，九重城阙在云端。烟含上苑沈沈紫，
雪露南山惺惺寒。绮陌已堪骑宝马，绿芜行即弹金丸。
灞川南北真图画，更待残阳一望看。

卷 684_26 【商人】

吴融

百尺竿头五两斜，此生何处不为家？北抛衡岳南过雁，
朝发襄阳暮看花。蹭蹬也应无陆地，团圆应觉有天涯。

随风逐浪年年别，却笑如期八月槎。

卷 684_27 【岐下闻杜鹃】

吴融

化去蛮乡北，飞来渭水西。为多亡国恨，不忍故山啼。
怨已惊秦凤，灵应识汉鸡。数声烟漠漠，余思草萋萋。
楼迥波无际，林昏日又低。如何不肠断，家近五云溪。

卷 684_28 【雨后闻思归乐二首】

吴融

山禽连夜叫，兼雨未尝休。尽道思归乐，应多离别愁。
我家方旅食，故国在沧洲。闻此不能寐，青灯茆屋幽。

一夜鸟飞鸣，关关彻五更。似因归路隔，长使别魂惊。
未省愁雨暗，就中伤月明。须知越吟客，欹枕不胜情。

卷 684_29 【中夜闻啼禽】

吴融

漠漠苍苍未五更，宿禽何处两三声。若非西涧回波触，

即是南塘急雨惊。金屋独眠堪寄恨，商陵永诀更牵情。
此时归梦随肠断，半壁残灯闪闪明。

卷 684_30 【灵池县见早梅（时太尉中书令京兆公奉诏讨蜀，
余在幕中）】

吴融

小园晴日见寒梅，一寸乡心万里回。春日暖时抛笠泽，
战尘飞处上琴台。栖身未识登龙地，落笔元非倚马才。
待勒燕然归未得，雪枝南畔少徘徊。

卷 684_31 【野庙】

吴融

古原荒庙掩莓苔，何处喧喧鼓笛来。
日暮鸟归人散尽，野风吹起纸钱灰。

卷 684_32 【闲书】

吴融

接鹭陪鸾漫得群，未如高卧紫溪云。晋阳起义寻常见，

湖口屯营取次闻。大底鹪鹏须自适，何尝玉石不同焚。
回看带砺山河者，济得危时没旧勋。

卷 684_33 【寄贯休上人】

吴融

别来如梦亦如云，八字微言不复闻。世上浮沈应念我，
笔端飞动只降君。几同江步吟秋霁，更忆山房语夜分。
见拟沃州寻旧约，且教丹顶许为邻。

卷 684_34 【书怀】

吴融

傍岩依树结檐楹，夏物萧疏景更清。滩响忽高何处雨，
松阴自转远山晴。见多邻犬遥相认，来惯幽禽近不惊。
争得便夸饶胜事，九衢尘里免劳生。

卷 684_35 【重阳日荆州作】

吴融

万里投荒已自哀，高秋寓目更徘徊。浊醪任冷难辞醉，

黄菊因暄却未开。上国莫归戎马乱，故人何在塞鸿来。
惊时感事俱无奈，不待残阳下楚台。

卷 684_36 【寄贯休】

吴融

休公何处去，知我宦情无。已似冯唐老，方知武子愚。
一身仍更病，双鬓又须趋。若得重相见，冥心学半铢。

卷 684_37 【秋日渚宫即事】

吴融

漠漠澹云烟，秋归泽国天。风高还促燕，雨细未妨蝉。
静引荒城望，凉惊旅枕眠。更堪憔悴里，欲泛洞庭船。

卷 684_38 【荆州寓居书怀】

吴融

一室四无邻，荒郊接古津。幽闲消俗态，摇落露家贫。
绝迹思浮海，修书懒寄秦。东西不复问，翻笑泣岐人。

卷 684_39 【和严谏议萧山庙十韵（旧说常闻萧管之声，因而得名，次韵）】

吴融

泽国瞻遗庙，云韶仰旧名。一隅连障影，千仞落泉声。
老狖寻危栋，秋蛇束画楹。路长资税驾，岁俭绝丰盛。
默默虽难测，昭昭本至平。岂知迁去客，自有复来兵。
美舜歌徒作，欺尧犬正狞。近兼闻顺动，敢复怨徂征。
日出天须霁，风休海自清。肺肠无处说，一为后聪明。

卷 684_40 【松江晚泊】

吴融

树远天疑尽，江奔地欲随。孤帆落何处，残日更新离。
客是凄凉本，情为系滞枝。寸肠无计免，应只楚猿知。

卷 684_41 【湖州溪楼书献郑员外】

吴融

危槛等飞檐，闲追晚际凉。青林上雨色，白鸟破溪光。
目以高须极，心因静更伤。唯公旧相许，早晚侍长杨。

卷 684_42 【秋兴】

吴融

微雨过菰苇，野居生早凉。襟期渐萧洒，精爽欲飞扬。
鱼买罾头活，酒沽船上香。不缘人不用，始道静胜忙。

卷 684_43 【端居】

吴融

片雨过前汀，端居枕簟清。病魔随暑退，诗思傍凉生。
别燕殷勤语，残蝉仿佛鸣。古来悲不尽，况我本多情。

卷 684_44 【途中】

吴融

一棹归何处，苍茫落照昏。无人应失路，有树始知春。
湖岸春耕废，江城战鼓喧。儒冠解相误，学剑尽乘轩。

卷 684_45 【西陵夜居】

吴融

寒潮落远汀，暝色入柴扃。漏永沈沈静，灯孤的的清。
林风移宿鸟，池雨定流萤。尽夜成愁绝，啼蛩莫近庭。

卷 684_46 【燕雏】

吴融

掠水身犹重，偎风力尚微。瓦苔难定立，檐雨忽喧归。
未识重溟远，先愁一叶飞。衔泥在他日，两两占春晖。

卷 684_47 【新秋】

吴融

白发又经秋，端居海上洲。无机因事发，有涕为时流。
新酒乘凉压，残棋隔夜收。公车无路入，同拜老闲侯。

卷 684_48 【题越州法华寺】

吴融

寺在五峰阴，穿缘一径寻。云藏古殿暗，石护小房深。
宿鸟连僧定，寒猿应客吟。上方应见海，月出试登临。

卷 684_49 【寒食洛阳道】

吴融

路岐无乐处，时节倍思家。彩索飏轻吹，黄鹂啼落花。
连乾驰宝马，历禄斗香车。行客胜回首，看看春日斜。

卷 684_50 【忆事】

吴融

去年花下把金卮，曾赋杨花数句诗。
回首朱门闭荒草，如今愁到牡丹时。

卷 684_51 【金陵遇悟空上人（上人与故相国杨公有旧）】

吴融

东阁无人事渺茫，老僧持钵过丹阳。
十年栖止如何报，好与南谿剩炷香。

卷 684_52 【途中】

吴融

柳弱风长在，云轻雨易休。不劳芳草色，更惹夕阳愁。
万里独归去，五陵无与游。春心渐伤尽，何处有高楼。

卷 684_53 【秋园】

吴融

始怜春草细霏霏，不觉秋来绿渐稀。
惆怅撷芳人散尽，满园烟露蝶高飞。

卷 684_54 【富春】

吴融

天下有水亦有山，富春山水非人寰。
长川不是春来绿，千峰倒影落其间。

卷 684_55 【山居即事】

吴融

小亭前面接青崖，白石交加衬绿苔。
日暮松声满阶砌，不关风雨鹤归来。

卷 684_56 【寓言】

吴融

非明非暗朦朦月，不暖不寒慢慢风。
独卧空床好天气，平生闲事到心中。

卷 684_57 【华清宫二首】

吴融

四郊飞雪暗云端，唯此宫中落旋干。
绿树碧檐相掩映，无人知道外边寒。

长生秘殿倚青苍，拟敌金庭不死乡。
无奈逝川东去急，秦陵松柏满残阳。

卷 684_58 【过九成宫】

吴融

凤辇东归二百年，九成宫殿半荒阡。魏公碑字封苍藓，
文帝泉声落野田。碧草断沾仙掌露，绿杨犹忆御炉烟。
升平旧事无人说，万叠青山但一川。

卷 684_59 【出潼关】

吴融

重门随地险，一径入天开。华岳眼前尽，黄河脚底来。
飞轩何满路，丹陛正求才。独我疏慵质，飘然又此回。

卷 684_60 【过丹阳】

吴融

云阳县郭半郊垞，风雨萧条万古情。山带梁朝陵路断，
水连刘尹宅基平。桂枝自折思前代，藻鉴难逢耻后生。
遗事满怀兼满目，不堪孤棹舫荒城。

卷 684_61 【和人题武城寺】

吴融

神清已觉三清近，目断仍劳万象牵。渭水远含秋草渡，
汉陵高枕夕阳天。半岩云粉千竿竹，满寺风雷百尺泉。
别有阑干压行路，看人尘土竟流年。

卷 684_62 【长安里中间猿】

吴融

夹巷重门似海深，楚猿争得此中吟。一声紫陌才回首，
万里青山已到心。惯倚客船和雨听，可堪侯第见尘侵。
无因永夜闻清啸，禁路人归月自沈。

卷 684_63 【岐下闻子规】

吴融

剑阁西南远凤台，蜀魂何事此飞来。偶因陇树相迷至，
唯恐边风却送回。只有花知啼血处，更无猿替断肠哀。
谁怜越客曾闻处，月落江平晓雾开。

卷 684_64 【敷水有丐者云是马侍中诸孙，悯而有赠】

吴融

天地尘昏九鼎危，大貂曾出武侯师。一心忠赤山河见，
百战功名日月知。旧宅已闻栽禁树，诸孙仍见丐征岐。
而今不要教人识，正藉将军死斗时。

卷 684_65 【还俗尼（本是歌妓）】

吴融

柳眉梅额倩妆新，笑脱袈裟得旧身。三峡却为行雨客，
九天曾是散花人。空门付与悠悠梦，宝帐迎回暗暗春。
寄语江南徐孝克，一生长短托清尘。

卷 684_66 【彭门用兵后经汴路三首】

吴融

长亭一望一徘徊，千里关河百战来。细柳旧营犹锁月，
祁连新冢已封苔。霜凋绿野愁无际，烧接黄云惨不开。
若比江南更牢落，子山词赋莫兴衰。

隋堤风物已凄凉，堤下仍多旧战场。金镞有苔人拾得，
芦花无主鸟衔将。秋声暗促河声急，野色遥连日色黄。
独上寒城正愁绝，戍鼙惊起雁行行。

铁马云旗梦渺茫，东来无处不堪伤。风吹白草人行少，
月落空城鬼啸长。一自纷争惊宇宙，可怜萧索绝烟光。
曾为塞北闲游客，辽水天山未断肠。

卷 684_67 【寄殿院高侍御】

吴融

黄梅雨细暮长洲，柳密花疏水慢流。钓艇正寻逋客去，
绣衣方结少年游。风前不肯看垂手，灯下还应惜裹头。
一夜自怜无羽翼，独当何逊滴阶愁。

卷 684_68 【新安道中玩流水】

吴融

一渠春碧弄潺潺，密竹繁花掩映间。看处便须终日住，
算来争得此身闲。萦纤似接迷春洞，清冷应连有雪山。
上却征车再回首，了然尘土不相关。

卷 684_69 【忆钓舟】

吴融

青山小隐枕潺湲，一叶垂纶几溯沿。后浦春风随兴去，
南塘秋雨有时眠。惯冲晓雾惊群雁，爱飏残阳入乱烟。
回首无人寄惆怅，九衢尘土困扬鞭。

卷 684_70 【灵宝县西侧津（一本无侧津二字，一本注侧律二字）】

吴融

碧溪潋潋流残阳，晴沙两两眠鸳鸯。柳花无赖苦多暇，
蛱蝶有情长自忙。千里宦游成底事，每年风景是他乡。
高歌一曲垂鞭去，尽日无人识楚狂。

卷 684_71 【即席】

吴融

家住丛台旧，名参绛圃新。醉波疑夺烛，娇态欲沈春。
伴雨聊过楚，归云定占秦。桃花正浓暖，争不浪迷人。

卷 684_72 【出迟】

吴融

园密花藏易，楼深月到难。酒虚留客尽，灯暗远更残。
麝想眉间印，鸦知顶上盘。文王之囿小，莫惜借人看。

卷 684_73 【送僧归日本国】

吴融

沧溟分故国，渺渺泛杯归。天尽终期到，人生此别稀。
无风亦骇浪，未午已斜晖。系帛何须雁，金乌日日飞。

卷 684_74 【送僧归破山寺】

吴融

万里指吴山，高秋杖锡还。别来双阙老，归去片云闲。
师在有无外，我婴尘土间。居然本相别，不要惨离颜。

卷 684_75 【夏夜有寄】

吴融

月上簟如水，轩高帘在钩。竹声寒不夏，蛩思静先秋。
偶得清宵兴，方知白日愁。所思何处远，斜汉欲低流。

卷 684_76 【春词】

吴融

鸾镜长侵夜，鸳衾不识寒。羞多转面语，妒极定睛看。
金市旧居近，钿车新造宽。春期莫相误，一日百花残。

卷 684_77 【汴上晚泊】

吴融

亭上风犹急，桥边月已斜。柳寒难吐絮，浪浊不成花。
岐路春三月，园林海一涯。萧然正无寐，夜橹莫咿哑。

卷 684_78 【送僧南游】

吴融

战輦鸣未已，瓶屨抵何乡？偶别尘中易，贪归物外忙。
后蝉抛鄢杜，先雁下潇湘。不得从师去，殷勤谢草堂。

卷 684_79 【戏（一本有作字）】

吴融

恨极同填海，情长抵导江。丁香从小结，莲子彻枝双。
整髻花当槛，吹灯月在窗。秦台非久计，早晚降霓幢。

卷 684_80 【雪中寄卢延让秀才】

吴融

苦贫皆共雪，吾子岂同悲。永日应无食，经宵必有诗。
渚宫寒过节，华省试临期。努力图西去，休将冻馁辞。

第六百八十五卷

卷 685_1 【花村六韵】

吴融

地胜非离郭，花深故号村。已怜梁雪重，仍愧楚云繁。
山近当吟冷，泉高入梦喧。依稀小有洞，邂逅武陵源。
月好频移座，风轻莫闭门。流莺更多思，百啭待黄昏。

卷 685_2 【赋雪十韵】

吴融

雨冻轻轻下，风干渐渐吹。喜胜花发处，惊似客来时。
河静胶行棹，岩空响折枝。终无鹧鸪识，先有鹧鸪知。
马势晨争急，雕声晚更饥。替霜严柏署，藏月上龙墀。
百尺楼堪倚，千钱酒要追。朝归紫阁早，漏出建章迟。
腊候何曾爽，春工是所资。遥知故溪柳，排比万条丝。

卷 685_3 【溪边】

吴融

溪边花满枝，百鸟带香飞。下有一白鹭，日斜翘石矶。

卷 685_4 【长安逢故人】

吴融

岁暮长安客，相逢酒一杯。眼前闲事静，心里故山来。
池影含新草，林芳动早梅。如何不归去，霜鬓共风埃。

卷 685_5 【雨夜】

吴融

旅夕那禁雨，梅天已思秋。未明孤枕倦，相吊一灯愁。
有恋惭沧海，无机奈白头。何人得浓睡，溪上钓鱼舟。

卷 685_6 【旅中送迁客】

吴融

天南不可去，君去吊灵均。落日青山路，秋风白发人。

言危无继者，道在有明神。满目尽胡越，平生何处陈。

卷 685_7 【寄尚颜师】

吴融

僧中难得静，静得是吾师。到阙不求紫，归山只爱诗。
临风翘雪足，向日剃霜髭。自叹眠漳久，双林动所思。

卷 685_8 【微雨】

吴融

天青织未遍，风急舞难成。粉重低飞蝶，黄沈不语莺。
自随春霭乱，还放夕阳明。惆怅池塘上，荷珠点点倾。

卷 685_9 【送广利大师东归】

吴融

紫殿久沾恩，东归过海门。浮荣知是梦，轻别肯销魂。
明发先晨鸟，寒栖入暝猿。戢山如重到，应老旧云根。

卷 685_10 【关东献兵部刘员外】

吴融

昨夜星辰动，仙郎近汉关。玳筵吟雪罢，锦帐押春还。
已到青云上，应栖绛圃间。临邛有词赋，一为奏天颜。

卷 685_11 【途次淮口】

吴融

寒流万派碧，南渡见烟光。人向隋宫近，山盘楚塞长。
有村皆绿暗，无径不红芳。已带伤春病，如何更异乡。

卷 685_12 【咏柳】

吴融

自与莺为地，不教花作媒。细应和雨断，轻只爱风裁。
好拂锦步障，莫遮铜雀台。灞陵千万树，日暮别离回。

卷 685_13 【武牢关遇雨】

吴融

泽春关路迥，暮雨细霏霏。带雾昏河浪，和尘重客衣。
望中迷去骑，愁里乱斜晖。惆怅家山远，溟蒙湿翠微。

卷 685_14 【春寒】

吴融

固教梅忍落，体与杏藏娇。已过冬疑剩，将来暖未饶。
玉阶残雪在，罗荐暗魂销。莫问王孙事，烟芜正寂寥。

卷 685_15 【早发（一作登）潼关】

吴融

天边月初落，马上梦犹残。关树苍苍晓，玉阶澹澹寒。
宦游终自苦，身世静堪观。争似山中隐，和云枕碧湍。

卷 685_16 【送策上人】

吴融

昨来非有意，今去亦无心。阙下抛新院，江南指旧林。
瓶添新涧绿，笠卸晚峰阴。八字如相许，终辞尺组寻。

卷 685_17 【和诸学士秋夕禁直偶（一作遇）雪】

吴融

大华积秋雪，禁闱生夜寒。砚冰忧诏急，灯烬惜更残。
正遂攀稽愿，翻追访戴欢。更为三日约，高兴未将阑。

卷 685_18 【御沟十六韵】

吴融

一水终南下，何年派作沟。穿城初北注，过苑却东流。
绕岸清波溢，连宫瑞气浮。去应涵凤沼，来必渗龙湫。
激石珠争碎，萦堤练不收。照花长乐曙，泛叶建章秋。
影炫金茎表，光摇绮陌头。旁沾画眉府，斜入教箫楼。
有雨难澄镜，无萍易掷钩。鼓宜尧女瑟，荡必蔡姬舟。
皋著通鸣鹤，津应接斗牛。回风还潋潋，和月更悠悠。

浅忆觴堪泛，深思杖可投。只怀泾合虑，不带陇分愁。
自有朝宗乐，曾无溃穴忧。不劳夸大汉，清渭贯神州。

卷 685_19 【赴阙次留献荆南成相公三十韵】

吴融

分阃兼文德，持衡有武功。荆南知独去，海内更谁同。
拔地孤峰秀，当天一鹗雄。云生五色笔，月吐六钧弓。
骨格凌秋耸，心源见底空。神清餐沆瀣，气逸饮洪濛。
临事成奇策，全身仗至忠。解鞍欺李广，煮弩笑臧洪。
往昔逢多难，来兹故统戎。卓旗云梦泽，扑火细腰宫。
铲土楼台构，连江雉堞笼。似平铺掌上，疑涌出壶中。
岂是劳人力，宁因役鬼工。本遗三户在，今匝万家通。
画舸横青雀，危樯列彩虹。席飞巫峡雨，袖拂宋亭风。
场广盘球子，池闲引钓筒。礼贤金璧贱，煦物雪霜融。
酒满梁尘动，棋残漏滴终。俭常资澹静，贵绝恃穹崇。
唯要臣诚显，那求帝渥隆。甘棠名异爽，大树姓非冯。
自念为迁客，方谐谒上公。痛知遭止棘，频叹委飘蓬。
借宅诛茅绿，分囷指粟红。只惭燕馆盛，宁觉阮途穷。
涣汗沾明主，沧浪别钓翁。去曾忧塞马，归欲逐边鸿。
积感深于海，衔恩重极嵩。行行柳门路，回首下离东。

卷 685_20 【三峰府内矮柏（一作桧）十韵】

吴融

擢秀依黄阁，移根自碧岑。周围虽合抱，直上岂盈寻。
远砌行窥顶，当庭坐庇阴。短堪惊众木，高已让他林。
日转无长影，风回有细音。不容萝茑附，只耐雪霜侵。
玉帐笼应匝，牙旗倚更禁。叶低宜拂席，枝褭易抽簪。
绿涧支离久，朱门掩映深。何须一千丈，方有岁寒心。

卷 685_21 【雪十韵】

吴融

洒密蔽璇穹，霏霏杳莫穷。迟于雨到地，疾甚絮随风。
四野苍茫际，千家晃朗中。夜迷三绕鹊，昼断一行鸿。
结片飞琼树，栽花点蕊宫。壅应边尽北，填合海无东。
高爱危峰积，低愁暖气融。月交都浩渺，日射更玲珑。
送腊辞寒律，迎春入旧丛。自怜曾未至，聊复赋玄功。

卷 685_22 【和睦州卢中丞题茅堂十韵】

吴融

有士当今重，忘情自古稀。独开青嶂路，闲掩白云扉。

石累千层险，泉分一带微。栋危猿竞下，檐回鸟争归。
烟冷茶铛静，波香兰舸飞。好移钟阜蓼，莫种首阳薇。
树密含轻雾，川空漾薄晖。芝泥看只捧，蕙带且休围。
东郭邻穿履，西林近衲衣。琼瑶一百字，千古见清机。

卷 685_23 【奉和御制六韵】

吴融

天晓密云开，亭亭翠葆来。芰荷笼水殿，杨柳蔽风台。
恩洽三时雨，欢腾万岁雷。日华偏照御，星彩迥分台。
苇岸萦仙棹，莲峰倒玉杯。独惭歌圣德，不是侍臣才。

卷 685_24 【败帘六韵】

吴融

有客编来久，弥年断不收。不堪风作候，岂复燕为雠？
尽见三重阁，难迷百尺楼。伴灯微掩梦，兼扇劣遮羞。
零落亡珠缀，殷勤谢玉钩。凉宵何必卷，月自入轩流。

卷 685_25 【玉堂种竹六韵】

吴融

当砌植檀栾，浓阴五月寒。引风穿玉牖，摇露滴金盘。

有韵和宫漏，无香杂畹兰。地疑云锁易，日近雪封难。
静称围棋会，闲宜阁笔看。他年终结实，不羨树栖鸾。

卷 685_26 【和韩致光侍郎无题三首十四韵】

吴融

珠佩元消暑，犀簪自辟尘。掩灯容燕宿，开镜待鸡晨。
去懒都忘旧，来多未厌新。每逢忧是梦，长忆故延真。
杏小双圆压，山浓两点嚬。瘦难胜宝带，轻欲驭飙轮。
篋凤金雕翼，钗鱼玉镂鳞。月明无睡夜，花落断肠春。
解舞何须楚，能筝可在秦？怯探同海底，稀遇极天津。
绿柰攀宫艳，青梅弄岭珍。管纤银字咽，梭密锦书匀。
厌胜还随俗，无疑不避人。可怜三五夕，妩媚善为邻。

舞转轻轻雪，歌霏漠漠尘。漫游多卜夜，慵起不知晨。
玉箸和妆裹，金莲逐步新。凤笙追北里，鹤驭访南真。
有恨都无语，非愁亦有嚬。戏应过蚌浦，飞合入蟾轮。
杯样成言鸟，梳文解卧鳞。逢迎大堤晚，离别洞庭春。
似玉曾夸赵，如云不让秦。锦收花上露，珠引月中津。
木为连枝贵，禽因比翼珍。万峰酥点薄，五色绣妆匀。
獭髓求鱼客，鲛绡托海人。寸肠谁与达，洞府四无邻。

绮阁临初日，铜台拂暗尘。鸂鶒偏报晓，乌鵂惯惊晨。
鱼网裁书数，鸂弦上曲新。病多疑厄重，语切见心真。
子母钱征笑，西南月借嚬。捣衣嫌独杵，分袂怨双轮。

贝叶教丹觜，金刀寄赤鳞。卷帘吟塞雪，飞楫渡江春。
解织宜名蕙，能歌合姓秦。眼穿回雁岭，魂断饮牛津。
药自偷来绝，香从窃去珍。茗煎云沫聚，药种玉苗匀。
草密应迷客，花繁好避人。长干足风雨，遥夜与谁邻。

卷 685_27 【倒次元韵】

吴融

南陌来寻伴，东城去卜邻。生憎无赖客，死忆有情人。
似束腰支细，如描发彩匀。黄鹂裁帽贵，紫燕刻钗珍。
身近从淄右，家元接观津。雨台谁属楚，花洞不知秦。
泪滴空床冷，妆浓满镜春。枕凉欹琥珀，簟洁展麒麟。
茂苑廊千步，昭阳扇九轮。阳城迷处笑，京兆画时颦。
鱼子封笺短，蝇头学字真。易判期已远，难讳事还新。
艇子愁冲夜，骊驹怕拂晨。如何断岐路，免得见行尘。

卷 685_28 【个人三十韵】

吴融

袅袅复盈盈，何年坠玉京。见人还道姓，羞客不称名。
故事谙金谷，新居近石城。脸横秋水溢，眉拂远山晴。
粉薄涂云母，簪寒簪水晶。催来两桨送，怕起五丝萦。
髻学盘桓结，床依宛转成。博山凝雾重，油壁隐车轻。

额点梅花样，心通棘刺情。搔头邀顾遇，约指到平生。
鱼网徐徐褫，螺卮浅浅倾。芙蓉褥已展，豆蔻水休更。
赵女怜胶膩，丁娘爱烛明。炷香龙荐脑，辟魔虎输精。
管咽参差韵，弦嘈倭僮声。花残春寂寂，月落漏丁丁。
柳絮联章敏，椒花属思清。剪罗成彩字，销蜡脱珠缨。
邂逅当投珮，艰难莫拊楹。熨来身热定，舐得面痕平。
匣镜金螭怒，帘旌绣兽狞。颈长堪鹤并，腰细任蜂争。
滴泪泉饶竭，论心石未贞。必双成凤去，岂独化蝉鸣。
书远肠空断，楼高胆易惊。数钱红带结，斗草萋裙盛。
袂柳阑干小，侵波略彳横。夜愁遥寄雁，晓梦半和莺。
翼只思鹣比，根长羨藕并。可怜衣带缓，休赋重行行。

卷 685_29 【即席十韵】

吴融

住处方窥宋，平生未嫁卢。暖金轻铸骨，寒玉细凝肤。
妒蝶长成伴，伤鸾耐得孤。城堪迷下蔡，台合上姑苏。
弄眼难降柳，含茸欲斗蒲。生凉云母扇，直夜博山炉。
翡翠交妆镜，鸳鸯入画图。无心同石转，有泪约泉枯。
猿渴应须见，鹰饥只待呼。银河正清浅，霓节过来无。

卷 685_30 【追咏棠梨花十韵】

吴融

蜀地从来胜，棠梨第一花。更应无软弱，别自有妍华。

不贵绡为雾，难降绮作霞。移须归紫府，驻合饵丹砂。
密映弹琴宅，深藏卖酒家。夜宜红蜡照，春称锦筵遮。
连庙魂栖望，飘江字绕巴。未饶酥点薄，兼妒雪飞斜。
旧赏三年断，新期万里赊。长安如种得，谁定牡丹夸。

卷 685_31 【绵竹山四十韵】

吴融

绵竹东西隅，千峰势相属。峻嶒压东巴，连延罗古蜀。
方者露圭角，尖者钻箭簇。引者蛾眉弯，敛者鸢肩缩。
尾蟠青蛇盘，颈低玄兔伏。横来突若奔，直上森如束。
岁在作噩年，铜梁摇蜃毒。相国京兆公，九命来作牧。
戎提虎仆毛，专奉狼头纛。行府寄精庐，开窗对林麓。
是时重阳后，天气旷清肃。兹山昏晓开，一一在人目。
霜空正沆寥，浓翠霏扑扑。披海出珊瑚，贴天堆碧玉。
俄然阴霾作，城郭才霏霭。绝顶已凝雪，晃朗开红旭。
初疑昆仑下，夭矫龙衔烛。亦似蓬莱巅，金银台叠蹙。
紫霞或旁映，绮段铺繁褥。晚照忽斜笼，赤城差断续。
又如煮吴盐，万万盆初熟。又如濯楚练，千千匹未轴。
又如水晶宫，蛟螭结川渎。又如钟乳洞，电雷开岩谷。
丹青画不成，造化供难足。合有羽衣人，飘飘曳烟躅。
合有五色禽，叫啸含仙曲。根虽限剑门，穴必通林屋。
方诸沧海隔，欲去忧沦覆。群玉缥缈间，未可量往复。
何如当此境，终朝旷遐瞩。往往草檄余，吟哦思幽独。
早晚扫欃枪，笳鼓迎畅毂。休飞霹雳车，罢系虾蟆木。

勒铭燕然山，万代垂芬郁。然后恣逍遥，独往群麋鹿。
不管安与危，不问荣与辱。但乐濠梁鱼，岂怨钟山鹄。
纫兰以围腰，采芝将实腹。石床须卧平，一任闲云触。

卷 685_32 【祝风三十二韵】

吴融

我有二顷田，长洲东百里。环涂为之区，积葑相连纚。
松江流其旁，春夏多苦水。堤防苟不时，泛滥即无已。
粤余病眠久，而复家无峙。田峻不胜荒，农功皆废弛。
他稼已如云，我田方欲蒔。四际上通波，兼之葭与苇。
是时立秋后，烟露浩凄矣。虽然遣毕功，萎约都无几。
如何海上风，连日从空起。似欲驱沧溟，来沃具区里。
噫嘻尔风师，吴中多豪士。困仓过九年，一粒惜如死。
余贱兼茆贵，凶年翻大喜。只是疲羸苦，才饥须易子。
余仍轹轳者，进趋年二纪。秋不安一食，春不闲一晷。
肠回为多别，骨瘦因积毁。咳唾莫逢人，挪揄空睹鬼。
中又值干戈，遑遑常转徙。故隐茅山西，今来笠泽涘。
荒者不复寻，葺者还有以。将正陶令巾，又盖姜肱被。
不敢务有余，有余必骄鄙。所期免假匄，假匄多惭耻。
骄鄙既不生，惭耻更能弭。自可致逍遥，无妨阅经史。
吁余将四十，满望只如此。干泽尚多难，学稼兹复尔。
穷达虽系命，祸福生所履。天不饥死余，飘风当自止。

卷 685_33 【金陵怀古】

吴融

玉树声沉战舰收，万家冠盖入中州。
只应江令偏惆怅，头白归来是客游。

卷 685_34 【凉思】

吴融

松间小槛接波平，月淡烟沉暑气清。
半夜水禽栖不定，绿荷风动露珠倾。

卷 685_35 【蛟绡】

吴融

云供片段月供光，贫女寒机枉自忙。
莫道不蚕能致此，海边何事有扶桑。

卷 685_36 【潮】

吴融

暮去朝来无定期，桑田长被此声移。
蓬莱若探人间事，一日还应两度知。

卷 685_37 【忘忧花】

吴融

繁红落尽始凄凉，直道忘忧也未忘。
数朵殷红似春在，春愁特此系人肠。

卷 685_38 【忆街西所居】

吴融

衡门一别梦难稀，人欲归时不得归。
长忆去年寒食夜，杏花零落雨霏霏。

卷 685_39 【云】

吴融

南北东西似客身，远峰高鸟自为邻。
清歌一曲犹能住，莫道无心胜得人。

卷 685_40 【华清宫四首】

吴融

中原无鹿海无波，凤辇鸾旗出幸多。
今日故宫归寂寞，太平功业在山河。

渔阳烽火照函关，玉辇匆匆下此山。
一曲羽衣听不尽，至今遗恨水潺潺。

上皇銮辂重巡游，雨泪无言独倚楼。
惆怅眼前多少事，落花明月满宫秋。

别殿和云锁翠微，太真遗像梦依依。
玉皇掩泪频惆怅，应叹僧繇彩笔飞。

卷 685_41 【陈琳墓】

吴融

冀州飞檄傲英雄，却把文辞事邺宫。
纵道笔端由我得，九泉何面见袁公。

卷 685_42 【湖州朝阳楼】

吴融

十二亭亭占晓光，隋家浪说有迷藏。
仲宣题尽平生恨，别处应难看屋梁。

卷 685_43 【卖花翁】

吴融

和烟和露一丛花，担入宫城许史家。
惆怅东风无处说，不教闲地著春华。

卷 685_44 【自讽】

吴融

世路升沉合自安，故人何必苦相干。
涂穷始解东归去，莫过严光七里滩。

卷 685_45 【送杜鹃花】

吴融

春红始谢又秋红，息国亡来入楚宫。
应是蜀冤啼不尽，更凭颜色诉西风。

卷 685_46 【西京道中闻蛙】

吴融

雨余林外夕烟沉，忽有蛙声伴客吟。
莫怪闻时倍惆怅，稚圭蓬荜在山阴。

卷 685_47 【情】

吴融

依依脉脉两如何，细似轻丝渺似波。
月不长圆花易落，一生惆怅为伊多。

卷 685_48 【送荆南从事之岳州】

吴融

秋拂湖光一镜开，庾郎兰棹好徘徊。
遥知月落酒醒处，五十弦从波上来。

卷 685_49 【渡淮作】

吴融

红杏花时辞汉苑，黄梅雨里上淮船。
雨迎花送长如此，辜负东风十四年。

卷 685_50 【薛舍人见征恩赐香并二十八字同寄】

吴融

往岁知君侍武皇，今来何用紫罗囊。
都缘有意重熏裊，更洒江毫上玉堂。

卷 685_51 【王母庙】

吴融

鸾龙一夜降昆丘，遗庙千年枕碧流。
赚得武皇心力尽，忍看烟草茂陵秋。

卷 685_52 【途中阻风】

吴融

洛阳寒食苦多风，扫荡春华一半空。
莫道芳蹊尽成实，野花犹有未开丛。

卷 685_53 【楚事（屈原云：目极千里伤春心。宋玉云：悲哉秋之为气。）】

吴融

悲秋应亦抵伤春，屈宋当年并楚臣。
何事从来好时节，只将惆怅付词人。

卷 685_54 【和僧咏牡丹】

吴融

万缘销尽本无心，何事看花恨却深。
都是支郎足情调，坠香残蕊亦成吟。

卷 685_55 【豫让】

吴融

韩魏同谋反覆深，晋阳三板免成沉。
赵衰当面何须恨，不把干将访负心。

卷 685_56 【和寄座主尚书】

吴融

偶逢戎旅战争日，岂是明时放逐臣。
不用裁诗苦惆怅，风雷看起卧龙身。

卷 685_57 【江行】

吴融

霞低水远碧翻红，一棹无边落照中。
说示北人应不爱，锦遮泥健马追风。

卷 685_58 【旅馆梅花】

吴融

清香无以敌寒梅，可爱他乡独看来。
为忆故溪千万树，几年辜负雪中开。

卷 685_59 【水鸟】

吴融

烟为行止水为家，两两三三睡暖沙。
为谢离鸾兼别鹄，如何禁得向天涯。

卷 685_60 【杨花】

吴融

不斗秾华不占红，自飞晴野雪濛濛。
百花长恨风吹落，唯有杨花独爱风。

卷 685_61 【水调】

吴融

凿河千里走黄沙，沙殿西来动日华。
可道新声是亡国，且贪惆怅后庭花。

卷 685_62 【秋夕楼居】

吴融

月里青山淡如画，露中黄叶飒然秋。
危栏倚遍都无寐，只恐星河堕入楼。

卷 685_63 【经蔡坚墓】

吴融

百里烟尘散杳冥，新平一隰草青青。
八公山石君知否，休更中原作彗星。

卷 685_64 【松江晚泊】

吴融

吴台越峤两分津，万万樯乌簇夜云。
吟尽长江一江月，更无人似谢将军。

卷 685_65 【送薛学士赴任峡州二首】

吴融

负谴虽安不敢安，叠猿声里独之官。
莫将彩笔闲抛掷，更待淮王诏草看。

片帆飞入峡云深，带雨兼风动楚吟。
何似玉堂裁诏罢，月斜鵙鹊漏沈沈。

卷 685_66 【送许校书】

吴融

故人言别倍依依，病里班荆苦忆违。
明日柳亭门外路，不知谁赋送将归？

卷 685_67 【蛺蝶】

吴融

两两自依依，南园烟露微。住时须并住，飞处要交飞。
草浅忧惊吹，花残惜晚晖。长交擷芳女，夜梦远人归。

第六百八十六卷

卷 686_1 【阆乡寓居十首（一作卜居，一本阆乡上有壬戌岁三字）·阿对泉】

吴融

六载抽毫侍禁闱，不堪多病决然归。
五陵年少如相问，阿对泉头一布衣。

卷 686_2 【阆乡寓居十首·蛙声】

吴融

稚圭伦鉴未精通，只把蛙声鼓吹同。
君听月明人静夜，肯饶天籁与松风。

卷 686_3 【阆乡寓居十首·茆堂】

吴融

结得茆檐瞰碧溪，闲云之外不同栖。

犹嫌未远函关道，正睡刚闻报晓鸡。

卷 686_4 【闽乡寓居十首·清溪】

吴融

清溪见底露苍苔，密竹垂藤锁不开。
应是仙家在深处，爱流花片引人来。

卷 686_5 【闽乡寓居十首·钓竿】

吴融

曾抛钓渚入秦关，今却持竿傍碧滩。
认得旧溪兼旧意，恰如羊祜识金环。

卷 686_6 【闽乡寓居十首·山僧】

吴融

石臼山头有一僧，朝无香积夜无灯。
近嫌俗客知踪迹，拟向中方断石层。

卷 686_7 【阆乡寓居十首·小径】

吴融

碍竹妨花一径幽，攀援可到玉峰头。
若教须作康庄好，更有高车驷马忧。

卷 686_8 【阆乡寓居十首·闻提壶鸟】

吴融

早于批鵝巧于莺，故国春林足此声。
今在天涯别馆里，为君沽酒复何情？

卷 686_9 【阆乡寓居十首·木塔偶题】

吴融

西南古刹近芳林，偶得高秋试一吟。
无限黄花衬黄叶，可须春月始伤心。

卷 686_10 【阆乡寓居十首·山禽】

吴融

碧嶂为家烟外栖，衔红啄翠入芳蹊。
可能知我心无定，频袅花枝拂面啼。

卷 686_11 【闻歌】

吴融

贯珠一夜奏累累，尽是荀家旧教词。
落尽梁尘肠不断，九原谁报小怜知。

卷 686_12 【即席】

吴融

竹引丝随袅翠楼，满筵惊动玉关秋。
何人借与丹青笔，画取当时八字愁。

卷 686_13 【便殿候对】

吴融

宣呼昼入蕊珠宫，玉女窗扉薄雾笼。
待得华胥春梦觉，半竿斜日下厢风。

卷 686_14 【南迁途中作七首·登七盘岭二首】

吴融

才非贾傅亦迁官，五月驱羸上七盘。
从此自知身计定，不能回首望长安。

七盘岭上一长号，将谓青天鉴郁陶。
近日青天都不鉴，七盘应是未高高。

卷 686_15 【南迁途中作七首·渡汉江初尝鳊鱼有作】

吴融

啸父知机先忆鱼，季鹰无事已思鲈。
自惭初识查头味，正是栖栖哭阮涂。

卷 686_16 【南迁途中作七首·溪翁】

吴融

饭稻羹菰晓复昏，碧滩声里长诸孙。
应嗟独上沔阳客，排比椒浆奠楚魂。

卷 686_17 【南迁途中作七首·寄友人】

吴融

惊魂往往坐疑飘，便好为文慰寂寥。
若待清湘葬鱼了，纵然招得不堪招。

卷 686_18 【南迁途中作七首·途中偶怀】

吴融

无路能酬国士恩，短亭寂寂到黄昏。
回肠一寸危如线，赖得商山未有猿。

卷 686_19 【南迁途中作七首·访贯休上人】

吴融

休公为我设兰汤，方便教人学洗肠。
自觉尘缨顿潇洒，南行不复问沧浪。

卷 686_20 【鸳鸯】

吴融

翠翘红颈覆金衣，滩上双双去又归。
长短死生无两处，可怜黄鹄爱分飞。

卷 686_21 【野步】

吴融

一曲两曲涧边草，千枝万枝村落花。
携筇深去不知处，几叹山阿隔酒家。

卷 686_22 【酬僧】

吴融

玉堂全不限常朝，卧待重城宿雾销。
翻忆故山深雪里，满炉枯柏带烟烧。

卷 686_23 【买带花樱桃】

吴融

粉红轻浅靓妆新，和露和烟别近邻。
万一有情应有恨，一年荣落两家春。

卷 686_24 【海棠二首】

吴融

太尉园林两树春，年年奔走探花人。
今来独倚荆山看，回首长安落战尘。

云绽霞铺锦水头，占春颜色最风流。
若教更近天街种，马上多逢醉五侯。

卷 686_25 【送僧上峡归东蜀】

吴融

巴字江流一棹回，紫袈裟是禁中裁。
如从十二峰前过，莫赋佳人殊未来。

卷 686_26 【杏花（五言三韵）】

吴融

春物竞相妒，杏花应最娇。红轻欲愁杀，粉薄似啼销。
愿作南华蝶，翩翩绕此条。

卷 686_27 【草】

吴融

染亦不可成，画亦不可得。苌弘未死时，应无此颜色。

卷 686_28 【和杨侍郎】

吴融

目极家山远，身拘禁苑深。烟霄惭暮齿，麋鹿愧初心。

卷 686_29 【山居喜友人相访】

吴融

秋雨空山夜，非君不此来。高于剡溪雪，一棹到门回。

卷 686_30 【远山】

吴融

隐隐隔千里，巍巍知几重。平时未能去，梦断一声钟。

卷 686_31 【江树】

吴融

终日冲奔浪，何年坠乱风？谢公堪入咏，目极在云中。

卷 686_32 【蔷薇】

吴融

万卉春风度，繁花夏景长。馆娃人尽醉，西子始新妆。

卷 686_33 【梅雨】

吴融

浑开又密望中迷，乳燕归迟粉竹低。扑地暗来飞野马，
舞风斜去散醯鸡。初从滴沥妨琴榭，渐到潺湲绕药畦。
少傍海边飘泊处，中庭自有两犁泥。

卷 686_34 【登途怀友人】

吴融

日落野原秀，雨余云物闲。清时正愁绝，高处正跻攀。
京洛遥天外，江河战鼓间。孤怀欲谁寄，应望塞鸿还。

卷 686_35 【闻蝉】

吴融

夏在先催过，秋赊已被迎。自应人不会，莫道物无情。
木叶纵未落，鬓丝还易生。西风正相乱，休上夕阳城。

卷 686_36 【秋色】

吴融

染不成乾画未销，霏霏拂拂又迢迢。
曾从建业城边路，蔓草寒烟锁六朝。

卷 686_37 【自讽】

吴融

本是沧洲把钓人，无端三署接清尘。
从来不解长流涕，也渡湘漓作逐臣。

卷 686_38 【宿青云驿】

吴融

苍黄负谴走商颜，保得微躬出武关。
今夜青云驿前月，伴吟应到落西山。

卷 686_39 【秋闻子规】

吴融

年年春恨化冤魂，血染枝红压叠繁。
正是西风花落尽，不知何处认啼痕。

卷 686_40 【荆南席上闻歌】

吴融

迎愁敛黛一声分，吊屈江边日暮闻。
何事遏云翻不定，自缘踪迹爱行云。

卷 686_41 【武关】

吴融

时来时去若循环，双阖平云谩锁山。只道地教秦设险，
不知天与汉为关。贪生莫作千年计，到了都成一梦闲。
争得便如岩下水，从他兴废自潺潺。

卷 686_42 【月夕追事】

吴融

曾听豪家碧玉歌，云床冰簟落秋河。月临高阁帘无影，
风过回廊幕有波。屈指尽随云雨散，满头赢得雪霜多。
此时空见清凉影，来伴蛩声咽砌莎。

卷 686_43 【上阳宫辞】

吴融

苑路青青半是苔，翠华西去未知回。景阳春漏无人报，
太液秋波有雁来。单影可堪明月照，红颜无奈落花催。
谁能赋得长门事，不惜千金奉酒杯。

卷 686_44 【送于员外归隐蓝田】

吴融

曾吟工部两峰寒，今日星郎得挂冠。吾道不行归始是，
世情如此住应难。围棋已访生云石，把钓先寻急雨滩。
若遇秦时雪髯客，紫芝兼可备朝餐。

卷 686_45 【废宅】

吴融

风飘碧瓦雨摧垣，却有邻人与锁门。
几树好花闲白昼，满庭荒草易黄昏。
放鱼池涸蛙争聚，栖燕梁空雀自喧。
不独凄凉眼前事，咸阳一火便成原。

卷 686_46 【湖州晚望】

吴融

鼓角迎秋晚韵长，断虹疏雨间微阳。
两条溪水分头碧，四面人家入骨凉。
独鸟归时云斗迥，残蝉急处日争忙。
他年若得壶中术，一簇汀洲尽贮将。

卷 686_47 【宋玉宅】

吴融

草白烟寒半野陂，临江旧宅指遗基。
已怀湘浦招魂事，更忆高唐说梦时。
穿径早曾闻客住，登墙岂复见人窥。
今朝送别还经此，吟断当年几许悲。

卷 686_48 【春晚书怀】

吴融

落尽红芳春意阑，绿芜空锁辟疆园。嫦娥断影霜轮冷，
帝子无踪泪竹繁。未达东邻还绝想，不劳南浦更销魂。
晚来虽共残莺约，争奈风凄又雨昏。

卷 686_49 【寄杨侍郎】

吴融

云情鹤态莫夸慵，正上仙楼十二重。吟逸易沈鸂鶒月，
梦长先断景阳钟。奇文已刻金书券，秘语看镌玉检封。
何事春来待归隐，探知溪畔有风松。

卷 686_50 【杏花】

吴融

粉薄红轻掩敛羞，花中占断得风流。软非因醉都无力，
凝不成歌亦自愁。独照影时临水畔，最含情处出墙头。
裴回尽日难成别，更待黄昏对酒楼。

卷 686_51 【宪丞裴公上洛退居有寄二首】

吴融

鸿在冥冥已自由，紫芝峰下更高秋。抛来簪绂都如梦，
泥著杯香不为愁。晚树拂檐风脱翠，夜滩当户月和流。
自嗟不得从公去，共上仙家十二楼。

瘦如仙鹤爽风篁，外却尘嚣兴绪长。偶坐几回沈皓月，
闲吟是处到残阳。门前立使修书懒，花下留宾压酒忙。
目断琼林攀不得，一重丹水抵三湘。

卷 686_52 【丛祠】

吴融

丛祠一炬照秦川，雨散云飞二十年。长路未归萍逐水，
旧居难问草平烟。金鞍正伴桐乡客，粉壁犹怀桂苑仙。
何必向来曾识面，拂尘看字也凄然。

卷 686_53 【分水岭】

吴融

两派潺湲不暂停，岭头长泻别离情。南随去马通巴栈，

北逐归人达渭城。澄处好窥双黛影，咽时堪寄断肠声。
紫溪旧隐还如此，清夜梁山月更明。

卷 686_54 【赴职西川过便桥书怀寄同年】

吴融

平门桥下水东驰，万里从军一望时。乡思旋生芳草见，
客愁何限夕阳知。秦陵无树烟犹锁，汉苑空墙浪欲吹。
不是伤春爱回首，杏坛恩重马迟迟。

卷 686_55 【太保中书令军前新楼】

吴融

十二阑干压锦城，半空人语落滩声。风流近接平津阁，
气色高含细柳营。尽日卷帘江草绿，有时欹枕雪峰晴。
不知捧诏朝天后，谁此登临看月明。

卷 686_56 【玉女庙】

吴融

九清何日降仙霓，掩映荒祠路欲迷。愁黛不开山浅浅，

离心长在草萋萋。檐横渌派王余掷，窗袅红枝杜宇啼。
若得洗头盆置此，靓妆无复碧莲西。

卷 686_57 【坤维军前寄江南弟兄】

吴融

二年征战剑山秋，家在松江白浪头。关月几时干客泪，
戍烟终日起乡愁。未知辽堞何当下，转觉燕台不易酬。
独羨一声南去雁，满天风雨到汀州。

卷 686_58 【浣水席上献座主侍郎】

吴融

暖泉宫里告虔回，略避红尘小宴开。落絮已随流水去，
啼莺还傍夕阳来。草能缘岸侵罗荐，花不容枝蘸玉杯。
莫讶诸生中独醉，感恩伤别正难裁。

卷 686_59 【送知古上人】

吴融

昔年离别浙河东，多难相逢旧楚宫。振锡才寻三径草，

登船忽挂一帆风。几程村饭添盂白，何处山花照衲红。
不似投荒憔悴客，沧浪无际问渔翁。

卷 686_60 【和座主尚书登布善寺楼】

吴融

往事何时不系肠，更堪凝睇白云乡。楚王城垒空秋色，
羊祜江山只暝光。林下远分南去马，渡头偏认北归航。
谁知此日凭轩处，一笔工夫胜七襄。

卷 686_61 【金桥感事】

吴融

太行和雪叠晴空，二月春郊尚朔风。饮马早闻临渭北，
射雕今欲过山东。百年徒有伊川叹，五利宁无魏绛功。
日暮长亭正愁绝，哀笳一曲戍烟中。

卷 686_62 【萧县道中】

吴融

戍火三笼滞晚程，枯桑系马上寒城。满川落照无人过，

卷地飞蓬有烧明。楚客早闻歌凤德，刘琨休更舞鸡声。
草堂旧隐终归去，寄语岩猿莫晓惊。

卷 686_63 【题袁州泗河中石床（李白、杜甫皆此饮咏）】

吴融

一片苔床水漱痕，何人清赏动乾坤。谪仙醉后云为态，
野客吟时月作魂。光景不回波自远，风流难问石无言。
迩来多少登临客，千载谁将胜事论。

卷 686_64 【禁直偶书】

吴融

玉皇新复五城居，仙馆词臣在碧虚。锦砌渐看翻芍药，
锁窗还咏隔蟾蜍。敢期林上灵鸟语，贪草云间彩凤书。
争奈沧洲频入梦，白波无际落红蕖。

卷 686_65 【送弟东归】

吴融

偶持麟笔侍金闺，梦想三年在故溪。祖竹定欺檐雪折，

稚杉应拂栋云齐。谩劳筋力趋丹凤，可有文词咏碧鸡。
此别更无闲事嘱，北山高处谢猿啼。

卷 686_66 【和座主尚书春日郊居】

吴融

海燕初归朔雁回，静眠深掩百花台。春蔬已为高僧掇，
腊酝还因熟客开。檐外暖丝兼絮堕，槛前轻浪带鸥来。
谢公难避苍生意，自古风流必上台。

卷 686_67 【僧舍白牡丹二首】

吴融

腻若裁云薄缀霜，春残独自殿群芳。梅妆向日霏霏暖，
纨扇摇风闪闪光。月魄照来空见影，露华凝后更多香。
天生洁白宜清净，何必殷红映洞房。

侯家万朵簇霞丹，若并霜林素艳难。合影只应天际月，
分香多是畹中兰。虽饶百卉争先发，还在三春向后残。
想得惠林凭此槛，肯将荣落意来看。

卷 686_68 【八月十五夜禁直寄同僚】

吴融

中秋月满尽相寻，独入非烟宿禁林。曾恨人间千里隔，
更堪天上九门深。明涵太液鱼龙定，静锁圆灵象纬沈。
目断枚皋何处在，阑干十二忆登临。

卷 686_69 【上巳日花下闲看（一作步）】

吴融

十里香尘扑马飞，碧莲峰下踏青时。云鬟照水和花重，
罗袖抬风惹絮迟。可使无心邀妩媚，还应有泪忆袁熙。
如烟如梦争寻得，溪柳回头万万丝。

卷 686_70 【禅院弈棋偶题】

吴融

裊尘丝雨送微凉，偶出樊笼入道场。半偈已能消万事，
一枰兼得了残阳。寻知世界都如梦，自喜身心甚不忙。
更约西风摇落后，醉来终日卧禅房。

卷 686_71 【和张舍人】

吴融

玉女盆边雪未销，正多春事莫无憀。杏花向日红匀脸，
云带环山白系腰。莺转树头欹枕听，冻开泉眼杖藜挑。
陵迁谷变如须问，控鹤山人字子乔。

卷 686_72 【送友赴阙】

吴融

故人归去指翔鸾，乐带离声可有欢。驿路两行秋吹急，
渭波千叠夕阳寒。空郊已叹周禾熟，旧苑应寻汉火残。
遥羨从公无一事，探花先醉曲江干。

卷 686_73 【过邓城县作】

吴融

不用登临足感伤，古来今往尽茫茫。未知尧桀谁臧否，
可便彭殇有短长。楚垒万重多故事，汉波千叠更残阳。
到头一切皆身外，只觉关身是醉乡。

卷 686_74 【文德初闻车驾东游】

吴融

龙旆丛丛下剑门，还将瑞气入中原。鳌头一荡山虽没，
乌足重安日不昏。晋客已知周礼在，秦人仍喜汉官存。
自怜闲坐渔矶石，万级云台落梦魂。

卷 686_75 【子规】

吴融

举国繁华委逝川，羽毛飘荡一年年。他山叫处花成血，
旧苑春来草似烟。雨暗不离浓绿树，月斜长吊欲明天。
湘江日暮声凄切，愁杀行人归去船。

卷 686_76 【简州归降贺京兆公】

吴融

分栋山前曙色开，三千铁骑简州回。云间堕箭飞书去，
风里擎竿露布来。古谓伐谋为上策，今看静胜自中台。
功名一似淮西事，只是元臣不姓裴。

卷 686_77 【登汉州城楼】

吴融

雨余秋色拂孤城，远目凝时万象清。叠翠北来千嶂尽，
漫流东去一江平。从军固有荆州乐，怀古能无岷首情。
欲下阑干一回首，乌归帆没戍烟明。

卷 686_78 【岐下寓居见槐花落因寄从事】

吴融

才开便落不胜黄，覆著庭莎衬夕阳。只共蝉催双鬓老，
可知人已十年忙。晓窗须为吟秋兴，夜枕应教梦帝乡。
蜀国马卿看从猎，肯将闲事入凄凉。

卷 686_79 【和人有感】

吴融

莫愁家住石城西，月坠星沈客到迷。一院无人春寂寂，
九原何处草萋萋。香魂未散烟笼水，舞袖休翻柳拂堤。
兰棹一移风雨急，流莺千万莫长啼。

第六百八十七卷

卷 687_1 【春归次金陵】

吴融

春阴漠漠覆江城，南国归桡趁晚程。水上驿流初过雨，
树笼堤处不离莺。迹疏冠盖兼无梦，地近乡园自有情。
便被东风动离思，杨花千里雪中行。

卷 687_2 【途中见杏花】

吴融

一枝红艳出墙头，墙外行人正独愁。长得看来犹有恨，
可堪逢处更难留。林空色暝莺先到，春浅香寒蝶未游。
更忆帝乡千万树，澹烟笼日暗神州。

卷 687_3 【秋经别墅】

吴融

别墅萧条海上村，偶期兰菊与琴尊。檐横碧嶂秋光近，

树带闲潮晚色昏。幸有白云眠楚客，不劳芳草思王孙。
北山移去前文在，无复教人叹晓猿。

卷 687_4 【红叶】

吴融

露染霜干片片轻，斜阳照处转烘明。和烟飘落九秋色，
随浪泛将千里情。几夜月中藏鸟影，谁家庭际伴蛩声。
一时衰飒无多恨，看着清风彩剪成。

卷 687_5 【离雪溪感事献郑员外】

吴融

足恨饶悲不自由，萍无根蒂水长流。庾公明月吟连曙，
谢守青山看入秋。一饭意专堪便死，千金诺在转难酬。
云沈鸟去回头否，平子才多好赋愁。

卷 687_6 【岐州安西门】

吴融

安西门外彻安西，一百年前断鼓鼙。犬解人歌曾入唱，

马称龙子几来嘶。自从辽水烟尘起，更到涂山道路迷。
今日登临须下泪，行人无个草萋萋。

卷 687_7 【关西驿亭即事】

吴融

晚霞零落雨初收，关上危阑独怅留。千里好春聊极目，
五陵无事莫回头。山犹带雪霏霏恨，柳未禁寒冉冉愁。
直是无情也肠断，鸟归帆没水空流。

卷 687_8 【望嵩山】

吴融

三十六峰危似冠，晴楼百尺独登看。高凌鸟外青冥窄，
翠落人间白昼寒。不觉衡阳遮雁过，如何钟阜斗龙盘。
始知万岁声长在，只待东巡动玉鸾。

卷 687_9 【题湖城县西道中槐树】

吴融

零落欹斜此路中，盛时会识太平风。晓迷天仗归春苑，

暮送鸾旗指洛宫。一自烟尘生蓟北，更无消息幸关东。
而今只有孤根在，鸟啄虫穿没乱蓬。

卷 687_10 【东归次瀛上】

吴融

暖烟轻淡草萋萋，一片晴山衬夕晖。水露浅沙无客泛，
树连疏苑有莺飞。自从身与沧浪别，长被春教寂寞归。
回首青门不知处，向人杨柳莫依依。

卷 687_11 【偶书】

吴融

青牛关畔寄孤村，山当屏风石当门。芳树绿阴连蔽芾，
长河飞浪接昆仑。苔田绿后蛙争聚，麦垄黄时雀更喧。
只此无心便无事，避人何必武陵源？

卷 687_12 【得京中亲友书，讶久无音耗，以诗代谢】

吴融

退闲何事不忘机，况限溪云静掩扉。马颊浪高鱼去少，

鸡鸣关险雁来稀。无才敢更期连茹，有意兼思学采薇。
珍重故人知我者，九霄休复寄音徽。

卷 687_13 【即事】

吴融

抵鹄山前云掩扉，更甘终老脱朝衣。晓窥青镜千峰入，
暮倚长松独鹤归。云里引来泉脉细，雨中移得药苗肥。
何须一箸鲈鱼脍，始挂孤帆问钓矶。

卷 687_14 【病中宜茯苓寄李谏议】

吴融

千年茯菟带龙鳞，太华峰头得最珍。金鼎晓煎云漾粉，
玉瓯寒贮露含津。南宫已借征诗客，内署今还托谏臣。
飞檄愈风知妙手，也须分药救漳滨。

卷 687_15 【槎】

吴融

浪痕龙迹老欹危，流落何时别故枝。岁月空教苔藓积，

芳菲长倩薜萝知。有文在朽人难识，无蠹藏心鸟莫窥。
家近沧浪从泛去，碧天消息不参差。

卷 687_16 【汴上观（一本有河冰二字）】

吴融

九曲河冰半段来，严霜结出劲风裁。非时已认蝉飘翼，
到海须忧蚌失胎。千里风清闻戛玉，几人东下忆奔雷。
殷勤莫碍星槎路，从看天津弄杼回。

卷 687_17 【闲居有作】

吴融

依依芳树拂檐平，绕竹清流浸骨清。爱弄绿苔鱼自跃，
惯偷红果鸟无声。踏青堤上烟多绿，拾翠江边月更明。
只此超然长往是，几人能遂铸金成。

卷 687_18 【离岐下题西湖】

吴融

送夏迎秋几醉来，不堪行色被蝉催。身随渭水看归远，

梦挂秦云约自回。雨细若为抛钓艇，月明谁复上歌台。
千波万浪西风急，更为红蕖把一杯。

卷 687_19 【岐阳蒙相国对（一作借）宅因抒怀投献】

吴融

风有危亭月有台，平津阁畔好裴回。虽非宋玉诛茅至，
且学王家种竹来。已得静居从马歇，不堪行色被蝉催。
故园兰菊三千里，旅梦方应校懒回。

卷 687_20 【晚泊松江】

吴融

落日停桡古渡边，古今踪迹一苍然。平沙尽处云藏树，
远吹收来水定天。正困东西千里路，可怜潇洒五湖船。
如何不及前贤事，却谢鲈鱼在洛川。

卷 687_21 【过浣池书事】

吴融

浣池城郭半遗基，无限春愁挂落晖。柳渡风轻花浪绿，

麦田烟暖锦鸡飞。相如忠烈千秋断，二主英雄一梦归。
莫道新亭人对泣，异乡殊代也沾衣。

卷 687_22 【富春】

吴融

水送山迎入富春，一川如画晚晴新。云低远渡帆来重，
潮落寒沙鸟下频。未必柳间无谢客，也应花里有秦人。
严光万古清风在，不敢停桡更问津。

卷 687_23 【高侍御话及（一本无及字）皮博士池中白莲因成一章寄博士兼（一作无上六字）奉呈】

吴融

白玉花开绿锦池，风流御史报人知。看来应是云中堕，
偷去须从月下移。已被乱蝉催晚晚，更禁凉雨动褰褰。
习家秋色堪图画，只欠山公倒接^离罍。

卷 687_29 【忆猿】

吴融

翠微云敛日沈空，叫彻青冥怨不穷。连臂影垂溪色里，

断肠声尽月明中。静含烟峡凄凄雨，高弄霜天袅袅风。
犹有北山归意在，少惊佳树近房栊。

卷 687_30 【红树】

吴融

一声南雁已先红，神女霜飞叶叶同。自是孤根非暖地，
莫惊他木耐秋风。暖烟散去阴全薄，明月临来影半空。
长忆洞庭千万树，照山横浦夕阳中。

卷 687_31 【新雁】

吴融

湘浦波春始北归，玉关摇落又南飞。数声飘去和秋色，
一字横来背晚晖。紫阁高翻云幂幂，灞川低渡雨微微。
莫从思妇台边过，未得征人万里衣。

卷 687_32 【海上秋怀】

吴融

辞无珪组隐无才，门向潮头过处开。几度黄昏逢罔象，

有时红旭见蓬莱。磧连荒戍频频火，天绝纤云往往雷。
昨夜秋风已摇落，那堪更上望乡台。

卷 687_33 【忆山泉】

吴融

穿云落石细湔湔，尽日疑闻弄管弦。千仞洒来寒碎玉，
一泓深去碧涵天。烟迷叶乱寻难见，月好风清听不眠。
春雨正多归未得，只应流恨更潺湲。

卷 687_34 【东归望华山】

吴融

碧莲重叠在青冥，落日垂鞭缓客程。不奈春烟笼暗淡，
可堪秋雨洗分明。南边已放三千马，北面犹标百二城。
只怕仙人抚高掌，年年相见是空行。

卷 687_35 【游华州飞泉亭】

吴融

走马街南百亩池，碧莲花影倒参差。偶同人去红尘外，

正值僧归落照时。万事已为春弃置，百忧须赖酒医治。
殷勤待取前峰月，更倚阑干弄钓丝。

卷 687_36 【池上双凫二首】

吴融

碧池悠漾小凫雏，两两依依只自娱。钓艇忽移还散去，
寒鸱有意即相呼。可怜翡翠归云髻，莫羨鸳鸯入画图。
幸是羽毛无取处，一生安稳老菰蒲。

双凫狎得傍池台，戏藻衔蒲远又回。敢为稻粱凌险去，
幸无鹰隼触波来。万丝春雨眠时乱，一片浓萍浴处开。
不在笼栏夜仍好，月汀星沼剩裴回。

卷 687_37 【叶落】

吴融

红影飘来翠影微，一辞林表不知归。伴愁无色烟犹在，
替恨成啼露未晞。若逐水流应万里，莫因风起便孤飞。
楚郊千树秋声急，日暮纷纷惹客衣。

卷 687_38 【和皮博士赴上京观中修灵（此下一本有宝字）斋
赠威仪尊师兼见寄】

吴融

霓结双旌羽缀裙，七星坛上拜元君。精诚有为天应感，
章奏无私鬼怕闻。鹤驭已从烟际下，凤膏还向月中焚。
白云乡路看看到，好驻流年翊圣文。

卷 687_39 【春雨】

吴融

霏霏漠漠暗和春，幂翠凝红色更新。寒入膩裘浓晓睡，
细随油壁静香尘。连云似织休迷雁，带柳如啼好赠人。
别有空阶寂寥事，绿苔狼藉落花频。

卷 687_40 【秋池】

吴融

冷涵秋水碧溶溶，一片澄明见底空。有日晴来云衬白，
几时吹落叶浮红。香啼蓼穗娟娟露，乾动莲茎淅淅风。
凌晓无端照衰发，便悲霜雪镜光中。

卷 687_41 【首阳山】

吴融

首阳山枕黄河水，上有两人曾饿死。不同天下人为非，
兄弟相看自为是。遂令万古识君心，为臣贵义不贵身。
精灵长在白云里，应笑随时饱死人。

卷 687_42 【太湖石歌】

吴融

洞庭山下湖波碧，波中万古生幽石。铁索千寻取得来，
奇形怪状谁能识。初疑朝家正人立，又如战士方狙击。
又如防风死后骨，又如於菟活时额。又如成人枫，
又如害瘿柏。雨过上停泓，风来中有隙。想得沈潜水府时，
兴云出雨蟠蛟螭。今来磈砢林庭上，长恐忽然生白浪。
用时应不称蜗皇，将去也堪随博望。噫嘻尔石好凭依，
幸有方池并钓矶。小山丛桂且为伴，钟阜白云长自归。
何必豪家甲第里，玉阑干畔争光辉。一朝荆棘忽流落，
何异绮罗云雨飞。

卷 687_43 【赠方干处士歌】

吴融

把笔尽为诗，何人敌夫子？句满天下口，名聒天下耳。
不识朝，不识市，旷逍遥，闲徙倚。一杯酒，无万事；
一叶舟，无千里。衣裳白云，坐卧流水。霜落风高忽相忆，
惠然见过留一夕。一夕听吟十数篇，水榭林萝为岑寂。
拂旦舍我亦不辞，携筇径去随所适。随所适，无处觅。
云半片，鹤一只。

卷 687_44 【李周弹箏歌（淮南韦太尉席上赠）】

吴融

古人云，丝不如竹，竹不如肉。乃知此语未必然，
李周弹箏听不足。闻君七岁八岁时，五音六律皆生知。
就中十三弦最妙，应宫出入年方少。青骢惯走长楸日，
几度承恩蒙急召。一字雁行斜御筵，锵金戛羽凌非烟。
始似五更残月里，凄凄切切清露蝉。又如石罅堆叶下，
泠泠沥沥苍崖泉。鸿门玉斗初向地，织女金梭飞上天。
有时上苑繁花发，有时太液秋波阔。当头独坐攄一声，
满座好风生拂拂。天颜开，圣心悦，紫金白珠沾赐物。
出来无暇更还家，且上青楼醉明月。年将六十艺转精，
自写梨园新曲声。近来一事还惆怅，故里春荒烟草平。

供奉供奉且听语，自昔兴衰看乐府。只如伊州与梁州，
尽是太平时歌舞。旦夕君王继此声，不要停弦泪如雨。

卷 687_45 【赠蛩光上人草书歌】

吴融

篆书朴，隶书俗，草圣贵在无羁束。江南有僧名蛩光，
紫毫一管能颠狂。人家好壁试挥拂，瞬目已流三五行。
摘如钩，挑如拨，斜如掌，回如斡。又如夏禹锁淮神，
波底出来手正拔。又如朱亥锤晋鄙，袖中抬起腕欲脱。
有时软萦盈，一穗秋云曳空阔。有时瘦嶮岩，
百尺枯松露槎枿。忽然飞动更惊人，一声霹雳龙蛇活。
稽山贺老昔所传，又闻能者惟张颠。上人致功应不下，
其奈飘飘沧海边。可中一入天子国，络素裁缣洒毫墨。
不系知之与不知，须言一字千金值。

卷 687_46 【赠李长史歌】

吴融

危栏压溪溪澹碧，翠裊红飘莺寂寂。此日长亭怆别离，
座中忽遇吹芦客。双攘轻袖当高轩，含商吐羽凌非烟。
初疑一百尺瀑布，八九月落香炉巅。又似鲛人为客罢，
迸泪成珠玉盘泻。碧珊瑚碎震泽中，金银铛撼龟山下。

铿匏揭调初惊人，幽咽细声还感神。紫凤将雏叫山月，
玄兔丧子啼江春。咨嗟长史出人艺，如何值此艰难际。
可中长似承平基，肯将此为闲人吹？不是东城射雉处，
即应南苑斗鸡时。白樱桃熟每先赏，红芍药开长有诗。
卖珠曾被武皇问，薰香不怕贾公知。今来流落一何苦，
江南江北九寒暑。翠华犹在橐泉中，一曲梁州泪如雨。
长史长史听我语，从来艺绝多失所。罗君赠君两首诗，
半是悲君半自悲。

卷 687_47 【赠广利大师歌】

吴融

化人之心固甚难，自化之心更不易。化人可以程限之，
自化元须有其志。在心为志者何人，今日得之于广利。
三十年前识师初，正见把笔学草书。崩云落日千万状，
随手变化生空虚。海北天南几回别，每见书踪转奇绝。
近来兼解作歌诗，言语明快有气骨。坚如百炼钢，
挺特不可屈。又如千里马，脱缰飞灭没。好是不雕刻，
纵横冲口发。昨来示我十余篇，咏杀江南风与月。
乃知性是天，习是人。莫轻河边羖羊羝，飞作天上麒麟。
但日新，又日新，李太白，非通神。

卷 687_48 【古离别（杂言）】

吴融

紫鸾黄鹄虽别离，一举千里何难追。犹闻啼风与叫月，
流连断续令人悲。赋情更有深缱绻，碧甃千寻尚为浅。
蟾蜍正向清夜流，蛱蝶须教堕丝罥。莫道断丝不可续，
丹穴凤凰胶不远。莫道流水不回波，海上两潮长自返。

卷 687_49 【风雨吟】

吴融

风骚骚，雨涔涔，长洲苑外荒居深。门外流水流澶漫，
河边古木鸣萧森。夔无禽影，寂无人音。端然拖愁坐，
万感丛于心。姑苏碧瓦十万户，中有楼台与歌舞。
寻常倚月复眠花，莫说斜风兼细雨。
应不知天地造化是何物，亦不知荣辱是何主。
吾困长满是太平，吾乐不极是天生。岂忧天下有大憝，
四郊刁斗常铮铮。官军扰人甚于贼，将臣怕死唯守城。
又岂复忧朝廷苦弛慢，中官转纵横。李膺勾党即罹患，
窦武忠谋又未行。又岂忧文臣尽遭束高阁，
文教从今日萧索。若更无人稍近前，把笔到头同一恶。
可叹吴城城中人，无人与我交一言。蓬蒿满径尘一榻，
独此闷闷何其烦。虽然小或可谋大，嫠妇之忧史尚存。

况我长怀丈夫志，今来流落沧溟涘。有时惊事再咨嗟，
因风因雨更憔悴。只有闲横膝上琴，怨伤怨恨聊相寄。
伯牙海上感沧溟，何似今朝风雨思。

卷 687_50 【江行】

吴融

来时风，去时雨，萧萧飒飒春江浦。欹欹侧侧海门帆，
轧轧哑哑洞庭橹。

卷 687_51 【壁画折竹杂言】

吴融

枯缠藤，重欹雪。渭曲逢，湘江别。不是从来无本根，
画工取势教摧折。

卷 687_52 【古锦裾六韵（锦上有鹦鹉、鹤、陆处士有序）】

吴融

濯水经何日，随风故有人。绿衣犹偃画，丹顶尚迷真。
暗淡云沈古，青苍藓剥新。映襟知惹泪，侵鞞想萦尘。

掣曳无由睹，流传久自珍。武威应认得，牵挽几当春。

卷 687_53 【赋得欲晓看妆面】

吴融

胧胧欲曙色，隐隐辨残妆。月始云中出，花犹雾里藏。
眉边全失翠，额畔半留黄。转入金屏影，隈侵角枕光。
有蝉隳鬓样，无燕著钗行。十二峰前梦，如何不断肠。

卷 687_54 【府试雨夜帝里闻猿声】

吴融

雨滴秦中夜，猿闻峡外声。已吟何逊恨，还赋屈平情。
暗逐哀鸿泪，遥含禁漏清。直疑游万里，不觉在重城。
霏霏侵灯乱，啾啾入梦惊。明朝临晓镜，别有鬓丝生。

卷 687_55 【题画柏】

吴融

不得月中桂，转思陵上柏。闲取画图看，烦纡果冰释。
桂生在青冥，万古烟雾隔。下荫玄兔窟，上映嫦娥魄。

圆缺且不常，高低图难测。若非假羽翰，折攀何由得。
天远眼虚穿，夜阑头自白。未知陵上柏，一定不移易。
有意兼松茂，无情从麝食。不在是非间，与人为愤激。
他年上缣素，今日悬屋壁。灵怪不可知，风雨疑来逼。
明朝归故园，唯此同所适。回首寄团枝，无劳惠消息。

卷 687_56 【平望蚊子二十六韵】

吴融

天下有蚊子，候夜瞋人肤。平望有蚊子，白昼来相屠。
不避风与雨，群飞出菰蒲。扰扰蔽天黑，雷然随舳舻。
利嘴入人肉，微形红且濡。振蓬亦不惧，至死贪膏腴。
舟人敢停棹，陆者亦疾趋。南北百余里，畏之如虎驱。
噫嘻天地间，万物各有殊。阳者阳为伍，阴者阴为徒。
蚊蚋是阴物，夜从喧墙隅。如何正曦赫，吞噬当通衢。
人筋为尔断，人力为尔枯。衣巾秽且甚，盘馔腥有余。
岂是阳德衰，不能使消除。岂是有主者，此乡宜毒荼。
吾闻蛇能螫，避之则无虞。吾闻蛰有毒，见之可疾驱。
唯是此蚊子，逢人皆病诸。江南夏景好，水木多萧疏。
此中震泽路，风月弥清虚。前后几来往，襟怀曾未舒。
朝既蒙褫积，夜仍跼遽蔕。虽然好吟啸，其奈难踟蹰。
人生有不便，天意当何如。谁能假羽翼，直上言红炉？

卷 687_57 【桃花】

吴融

满树和娇烂漫红，万枝丹彩灼春融。
何当结作千年实，将示人间造化工。

卷 687_58 【木笔花】

吴融

嫩如新竹管初齐，粉腻红轻样可携。
谁与诗人偎槛看，好于笺墨并分题。

卷 687_59 【浙东筵上有寄】

吴融

襄王席上一神仙，眼色相当语不传。见了又休真似梦，
坐来虽近远于天。陇禽有意犹能说，江月无心也解圆。
更被东风劝惆怅，落花时节定翩翩。

卷 687_60 【富水驿东楹有人题诗（笔迹柔媚，出自纤指）】

吴融

绣纓霞翼两鸳鸯，金岛银川是故乡。只合双飞便双死，
岂悲相失与相忘。烟花夜泊红蕖膩，兰渚春游碧草芳。
何事遽惊云雨别，秦山楚水两乖张。

卷 687_61 【上巳日】

吴融

本学多情刘武威，寻花傍水看春晖。
无端遇著伤心事，赢得凄凉索漠归。

卷 687_62 【隋堤】

吴融

搔首隋堤落日斜，已无余柳可藏鸦。岩傍昔道牵龙舰，
河底今来走犊车。曾笑陈家歌玉树，却随后主看琼花。
四方正是无虞日，谁信黎阳有古家？

第六百八十八卷

卷 688_1 【寄杜先生诗】

孙偓

蜀国信难遇，楚乡心更愁。我行同范蠡，师举效浮丘。
他日相逢处，多应在十洲。

卷 688_2 【赠南岳僧全毗】

孙偓

窠居过后更何人，传得如来法印真。
昨日祝融峰下见，草衣便是雪山□。

卷 688_3 【答门生王涣李德邻赵光胤王拯长句（一作裴贻诗）】

孙偓

谬持文柄得时贤，粉署清华次第迁。昔岁策名皆健笔，

今朝称职并同年。各怀器业宁推让，俱上青霄肯后先。
何事老夫犹赋咏，欲将酬和永留传。

卷 688_4 【句】

孙偓

好是步虚明月夜，瑞炉蜚下醺坛前。

卷 688_5 【禁林闻晓莺】

陆扈

曙色分层汉，莺声绕上林。报花开瑞锦，催柳绽黄金。
断续随风远，间关送月沈。语当温树近，飞觉禁园深。
绣户惊残梦，瑶池听好音。愿将栖息意，从此沃天心。

卷 688_6 【句】

陆扈

今秋已约天台月。

卷 688_7 【华州榜寄诸门生】

薛昭纬

时君过听委平衡，粉署华灯到晓明。开卷固难窥浩汗，
执衡空欲慕公平。机云笔舌临文健，沈宋章篇发咏清。
自笑观光辉下阙。

卷 688_8 【谢银工】

薛昭纬

一碟毡根数十皴，盘中犹更有红鳞。
早知文字多辛苦，悔不当初学冶银。

卷 688_9 【闲居即事】

陆翱

衰柳迷隋苑，衡门啼暮鸦。茅厨烟不动，书牖日空斜。
悔下东山石，贫于南阮家。沈忧损神虑，萱草自开花。

卷 688_10 【赵氏北楼】

陆翱

殷勤赵公子，良夜竟相留。朗月生东海，仙娥在北楼。
酒阑珠露滴，歌迴石城秋。本为愁人设，愁人到晓愁。

卷 688_11 【题马嵬驿（一作罗隐诗）】

狄归昌

马嵬烟柳正依依，重见銮舆幸蜀归。
泉下阿蛮应有语，这回休更怨杨妃。

卷 688_12 【蜀中登第答李搏六韵】

裴廷裕

何劳问我成都事，亦报君知便纳降。蜀柳笼堤烟矗矗，
海棠当户燕双双。富春不并穷师子，濯锦全胜旱曲江。
高卷绛纱扬氏宅，半垂红袖薛涛窗。浣花泛鹢诗千首，
静众寻梅酒百缸。若说弦歌与风景，主人兼是碧油幢。

卷 688_13 【偶题】

裴廷裕

微雨微风寒食节，半开半合木兰花。
看花倚柱终朝立，却似凄凄不在家。

卷 688_14 【闲宵望月】

李沆

卷箔舒红茵，当轩玩明月。懿哉深夜中，静听歌初发。
苔含殿华湿，竹影蟾光洁。转扇来清风，援琴飞白雪。
行愁景候变，坐恐流芳歇。桂影有余光，兰灯任将灭。

卷 688_15 【醮词】

李沆

犬咬天关闭，彩童呼仙吏。一封红篆书，为奏尘寰事。
八极鳌柱倾，四溟龙鬣沸。长庚冷有芒，文曲淡无气。
乌轮不再中，黄沙瘞腥鬼。请帝命真官，临云启金匮。
方与清华宫，重正紫极位。旷古雨露恩，安得惜沾施。
生人血欲尽，搀抢无饱意。

卷 688_16 【巫山高】

李沆

扶天心，开地脉，浮动凌霄拂蓝碧。襄王端眸望不极，
似睹瑶姬长叹息。巫妆不治独西望，暗泣红蕉抱云帐。
君王妒妾梦荆宫，虚把金泥印仙掌。江涛迅激如相助，
十二狞龙怒行雨。昆仑谩有通天路，九峰正在天低处。

卷 688_17 【梦仙谣】

李沆

海宫蹙浪收残月，挈壶掌事传更歇。银蟾半坠恨流咽，
六鳌披月撼蓬阙。九炁真翁骑白犀，临池静听雌蛟啼。
桂花裊露曙香冷，八窗玉朗惊晨鸡。裁纱剪罗贴丹凤，
腻霞远闭瑶山梦。露干欲醉芙蓉塘，回首驱云朝正阳。

卷 688_18 【秋霖歌】

李沆

西方龙儿口犹乳，初解驱云学行雨。纵恣群阴驾老虬，
勺水蹄涔尽奔注。叶破苔黄未休滴，腻光透长狂莎色。

恨无长剑一千仞，划断顽云看晴碧。

卷 688_19 【方响歌】

李沆

敲金扣石声相凌，遥空冷静天正澄。宝瓶下井辘轳急，
小娃弄索伤清冰。穿丝透管音未歇，回风绕指惊泉咽。
季伦怒击珊瑚摧，灵芸整鬓步摇折。十六叶中侵素光，
寒玲震月杂珮珰。云和不觉罢余怨，莲峰一夜啼琴姜。
急节写商商恨促，秦愁越调逡巡足。梦入仙楼戛残曲，
飞霜棱棱上秋玉。

卷 688_20 【答王涣（一作孙偓诗）】

裴贽

谬持文柄得时贤，粉署清华次第迁。昔岁策名皆健笔，
今朝称职并同年。各怀器业宁推让，俱上青霄肯后先。
何事老夫犹赋咏，欲将酬和永留传。

卷 688_21 【薄命妾】

卢汝弼

君恩已断尽成空，追想娇欢恨莫穷。长为薜花光晓日，

谁知团扇送秋风。黄金买赋心徒切，清路飞尘信莫通。
闲凭玉栏思旧事，几回春暮泣残红。

卷 688_22 【秋夕寓居精舍书事】

卢汝弼

叶满苔阶杵满城，此中多恨恨难平。疏檐看织蠨蛸网，
暗隙愁听蟋蟀声。醉卧欲抛羁客思，梦归偏动故乡情。
觉来独步长廊下，半夜西风吹月明。

卷 688_23 【闻雁】

卢汝弼

秋风萧瑟静埃氛，边雁迎风响咽群。瀚海应嫌霜下早，
湘川偏爱草初薰。芦洲宿处依沙岸，榆塞飞时度晚云。
何处最添羁客恨，竹窗残月酒醒闻。

卷 688_24 【鸳鸯】

卢汝弼

双浮双浴傍苔矶，蓼浦兰皋绣帐帏。长羡鹭鸶能洁白，

不随鸂鶒斗毛衣。霞侵绿渚香衾暖，楼倚青云殿瓦飞。
应笑随阳沙漠雁，洞庭烟暖又思归。

卷 688_25 【和李秀才边庭四时怨】

卢汝弼

春风昨夜到榆关，故国烟花想已残。
少妇不知归不得，朝朝应上望夫山。

卢龙塞外草初肥，雁乳平芜晓不飞。
乡国近来音信断，至今犹自著寒衣。

八月霜飞柳半黄，蓬根吹断雁南翔。
陇头流水关山月，泣上龙堆望故乡。

朔风吹雪透刀瘢，饮马长城窟更寒。
半夜火来知有敌，一时齐保贺兰山。

第六百八十九卷

卷 689_1 【山居（一作房）即事二首】

陆希声

君山苍翠接青冥，东走洮湖上洞庭。茅屋向阳梳白发，
竹窗深夜诵丹经。涌泉回沆鱼龙气，怪石惊腾鸟兽形。
为问前时金马客，此焉还作少微星。

不是幽栖矫性灵，从来无意在膻腥。满川风物供高枕，
四合云山借画屏。五鹿归来惊岳岳，孤鸿飞去入冥冥。
君阳遁叟何为乐，一炷清香两卷经。

卷 689_2 【阳羨杂咏十九首·苦行径】

陆希声

山前无数碧琅玕，一径清森五月寒。
世上何人怜苦节，应须细问子猷看。

卷 689_3 【阳羨杂咏十九首·梅花坞】

陆希声

冻蕊凝香色艳新，小山深坞伴幽人。
知君有意凌寒色，羞共千花一样春。

卷 689_4 【阳羨杂咏十九首·石兕台】

陆希声

大河波浪激潼关，青兕胡为伏此山。
遥想楚王云梦泽，蜺旌羽盖定空还。

卷 689_5 【阳羨杂咏十九首·讲易台】

陆希声

年逾知命志尤坚，独向青山更绝编。
天下有山山有水，养蒙肥遁正翛然。

卷 689_6 【阳羨杂咏十九首·观鱼亭】

陆希声

惠施徒自学多方，谩说观鱼理未长。
不得庄生濠上旨，江湖何以见相忘。

卷 689_7 【阳羨杂咏十九首·绿云亭】

陆希声

六月清凉绿树阴，小亭高卧涤烦襟。
羲皇向上何人到，永日时时弄素琴。

卷 689_8 【阳羨杂咏十九首·清辉堂】

陆希声

野人心地本无机，为爱茅檐倚翠微。
尽日尊前谁是客，秋山含水有清辉。

卷 689_9 【阳羨杂咏十九首·观妙庵】

陆希声

妙理难观旨甚深，欲知无欲是无心。
茅庵不异人间世，河上真人自可寻。

卷 689_10 【阳羨杂咏十九首·西阳亭】

陆希声

隔林残日照孤亭，玄晏先生酒未醒。
入夜莫愁迷下路，昔人犹在逐流萤。

卷 689_11 【阳羨杂咏十九首·弄云亭】

陆希声

自知无业致吾君，只向春山弄白云。
已共此山私断当，不须转辙重移文。

卷 689_12 【阳羨杂咏十九首·伏龟堂】

陆希声

盘崖蹙缩似灵龟，鬼谷先生隐遁时。
不独卷怀经世志，白云流水是心期。

卷 689_13 【阳羨杂咏十九首·桃花谷】

陆希声

君阳山下足春风，满谷仙桃照水红。
何必武陵源上去，涧边好过落花中。

卷 689_14 【阳羨杂咏十九首·含桃圃】

陆希声

小圃初晴风露光，含桃花发满山香。
香花对酒心无事，倍觉春来白日长。

卷 689_15 【阳羨杂咏十九首·茗坡】

陆希声

二月山家谷雨天，半坡芳茗露华鲜。
春醒酒病兼消渴，惜取新芽旋摘煎。

卷 689_16 【阳羨杂咏十九首·松岭】

陆希声

岭上青松手自栽，已能苍翠映莓苔。
岁寒本是君家事，好送清风月下来。

卷 689_17 【阳羨杂咏十九首·桃溪】

陆希声

芳草萋萋遍地齐，桃花脉脉自成溪。
也知百舌多言语，任向春风尽意啼。

卷 689_18 【阳羨杂咏十九首·李径】

陆希声

一径秾芳万蕊攒，风吹雨打未摧残。
怜君尽向高枝发，应为行人要整冠。

卷 689_19 【阳羨杂咏十九首·鸿盘】

陆希声

落落飞鸿渐始盘，青云起处剩须看。
如今天路多矰缴，纵使衔芦去也难。

卷 689_20 【阳羨杂咏十九首·偃月岭】

陆希声

山岭依稀偃月形，数层倚石叠空青。
几回雪夜寒光积，直似金光照户庭。

卷 689_21 【寄蛰光上人】

陆希声

笔下龙蛇似有神，天池雷雨变逡巡。
寄言昔日不龟手，应念江头洴澼人。

卷 689_22 【喜杜荀鹤及第】

李昭象

深岩贫复病，榜到见君名。贫病浑如失，山川顿觉清。
一春新酒兴，四海旧诗声。日使能吟者，西来步步轻。

卷 689_23 【赴举出山留寄山居郑参军】

李昭象

还如费冠卿，向此振高名。肯羡鱼须美，长夸鹤氅轻。
理琴寒指倦，试药黑髭生。时泰难云卧，随看急诏行。

卷 689_24 【题顾正字谿居】

李昭象

高敞吟轩近钓湾，尘中来似出人间。若教明月休生桂，
应得危时共掩关。春酒夜棋难放客，短篱疏竹不遮山。
莫夸恬淡胜荣禄，雁引行高未许闲。

卷 689_25 【寄献山中顾公员外】

李昭象

抽却朝簪著钓蓑，近来声迹转巍峨。祥麟避网虽山野，
丹凤衔书即薜萝。乍隐文章情更逸，久闲经济术翻多。
深惭未副吹嘘力，竟困风埃争奈何。

卷 689_26 【山中寄崔谏议】

李昭象

半生猿鸟共山居，吟月吟风两鬓疏。新句未尝忘教化，
上才争忍不吹嘘。全家欲去干戈后，大国中兴礼乐初。
从此升腾休说命，只希公道数封书。

卷 689_27 【学仙词寄顾云】

李昭象

记得初传九转方，碧云峰下祝虚皇。丹砂未熟心徒切，
白日难留鬓欲苍。无路洞天寻穆满，有时人世美刘郎。
仙人恩重何由报，焚尽星坛午夜香。

卷 689_28 【寄尉迟侍御（一作郎）】

李昭象

我眠青嶂弄澄潭，君戴貂蝉白玉簪。
应向谢公楼上望，九华山色在西南。

卷 689_29 【招西洞道者】

李昭象

危峰抹黛夹晴川，树簇红英草碧烟。
樵客云僧两无事，此中堪去觅灵仙。

· 全唐诗 ·

卷 689_30 【句】

李昭象

投文得仕而今少，佩印还家古所荣。

第六百九十卷

卷 690_1 【夏雨】

王驾

非惟消旱暑，且喜救生民。天地如蒸湿，园林似却春。
洗风清枕簟，换夜失埃尘。又作丰年望，田夫笑向人。

卷 690_2 【古意】

王驾

夫戍萧关妾在吴，西风吹妾妾忧夫。
一行书信千行泪，寒到君边衣到无。

卷 690_3 【社日（一作张演诗）】

王驾

鹅湖山下稻梁肥，豚栅鸡栖半掩扉。

桑柘影斜春社散，家家扶得醉人归。

卷 690_4 【雨晴（一作晴景）】

王驾

雨前初见花间蕊，雨后兼无叶里花。
蛱蝶飞来过墙去，却疑春色在邻家。

卷 690_5 【乱后曲江（一作羊士谔诗）】

王驾

忆昔争游曲水滨，未春长有探春人。
游春人尽空池在，直至春深不似春。

卷 690_6 【过故友居】

王驾

邻笛寒吹日落初，旧居今已别人居。
乱来儿侄皆分散，惆怅僧房认得书。

卷 690_7 【上裴侍郎】

王涣

青衿七十榜三年，建礼含香次第迁。珠彩下连星错落，
桂花曾对月婵娟。玉经磨琢多成器，剑拔沈埋更倚天。
应念衔恩最深者，春来为寿拜尊前。

卷 690_8 【悼亡】

王涣

春来得病夏来加，深掩妆窗卧碧纱。为怯暗藏秦女扇，
怕惊愁度阿香车。腰肢暗想风欺柳，粉态难忘露洗花。
今日青门葬君处，乱蝉衰草夕阳斜。

卷 690_9 【惆怅诗十二首】

王涣

八蚕薄絮鸳鸯绮，半夜佳期并枕眠。
钟动红娘唤归去，对人匀泪拾金钿。

李夫人病已经秋，汉武看来不举头。

得所浓华销歇尽，楚魂湘血一生休。

谢家池馆花笼月，萧寺房廊竹飏风。
夜半酒醒凭槛立，所思多在别离中。

隋师战舰欲亡陈，国破应难保此身。
诀别徐郎泪如雨，镜鸾分后属何人。

七夕琼筵随事陈，兼花连蒂共伤神。
蜀王殿里三更月，不见骊山私语人。

夜寒春病不胜怀，玉瘦花啼万事乖。
薄幸檀郎断芳信，惊嗟犹梦合欢鞋。

呜咽离声管吹秋，妾身今日为君休。
齐奴不说平生事，忍看花枝谢玉楼。

青丝一络堕云鬟，金剪刀鸣不忍看。
持谢君王寄幽怨，可能从此住人间。

陈宫兴废事难期，三阁空余绿草基。
狎客沦亡丽华死，他年江令独来时。

晨肇重来路已迷，碧桃花谢武陵溪。
仙山目断无寻处，流水潺湲日渐西。

少卿降北子卿还，朔野离觞惨别颜。

却到茂陵唯一恸，节毛零落鬓毛斑。

梦里分明入汉宫，觉来灯背锦屏空。
紫台月落关山晓，肠断君恩信画工。

卷 690_10 【江上雨】

戴司颜

非不欲前去，此情非自由。星辰照何处，风雨送凉秋。
寒锁空江梦，声随黄叶愁。萧萧犹未已，早晚去蘋洲。

卷 690_11 【塞上】

戴司颜

空迹昼苍茫，沙腥古战场。逢春多霰雪，生计在牛羊。
冷角吹乡泪，干榆落梦床。从来山水客，谁谓到渔阳。

卷 690_12 【句】

戴司颜

远来朝凤阙，归去恋元侯。

卷 690_13 【投谢钱武肃】

吴仁璧

东门上相好知音，数尽台前郭隗金。累重虽然容食椹，
力微无计报焚林。弊貂不称芙蓉幕，衰朽仍惭玳瑁簪。
十里溪光一山月，可堪从此负归心。

卷 690_14 【客路】

吴仁璧

人寰急景如波委，客路浮云似盖轻。
回首故山天外碧，十年无计却归耕。

卷 690_15 【南徐题友人郊居】

吴仁璧

门前樵径连江寺，岸下渔矶系海槎。
待到秋深好时节，与君长醉隐侯家。

卷 690_16 【读度人经寄郑仁表】

吴仁璧

身虽一旦尘中老，名拟三清会里题。
二午九斋余日在，请君相伴醉如泥。

卷 690_17 【秋日听僧弹琴】

吴仁璧

金徽玉轸韵泠然，言下浮生指下泉。
恰称秋风西北起，一时吹入碧湘烟。

卷 690_18 【贾谊】

吴仁璧

扶持一疏满遗编，汉陛前头正少年。
谁道恃才轻绶灌，却将惆怅吊湘川。

卷 690_19 【春雪】

吴仁璧

雪霁凝光入坐寒，天明犹自卧袁安。
貂裘穿后鹤氅敝，自此风流不足看。

卷 690_20 【衰柳】

吴仁璧

金风渐利露珠团，广陌长堤黛色残。
水殿狂游隋炀帝，一千余里可堪看。

卷 690_21 【凤仙花】

吴仁璧

香红嫩绿正开时，冷蝶饥蜂两不知。
此际最宜何处看，朝阳初上碧梧枝。

卷 690_22 【金钱花】

吴仁璧

浅绛浓香几朵匀，日熔金铸万家新。
堪疑刘宠遗芳在，不许山阴父老贫。

卷 690_23 【钱塘鹤】

吴仁璧

人间路靄青天半，鰲岫云生碧海涯。
虽抱雕笼密扃钥，可能长在叔伦家。

卷 690_24 【句】

吴仁璧

为惜苔钱妨换砌，因怜山色旋开尊。
高阁烟霞禅客睡，满城尘土世人忙。
五龙金角向星斗，三洞玉音愁鬼神。

蒲草薄裁连蒂白，胭脂浓染半葩红。

卷 690_25 【奉试麦垄多秀色】

汪极

南陌生岐穗，农家乐事多。塍畦交茂绿，苗实际清和。
日布玲珑影，风翻浩荡波。来牟知帝力，含哺有衢歌。

卷 690_26 【下第戏状元崔昭纬】

张曙

千里江山陪骥尾，五更风水失龙鳞。
昨夜浣花溪上雨，绿杨芳草为何人？

卷 690_27 【赠天台王处士】

林嵩

深隐天台不记秋，琴台长别一何愁。茶烟岩外云初起，
新月潭心钓未收。映宇异花丛发好，穿松孤鹤一声幽。
赤城不掩高宗梦，宁久悬冠枕瀑流。

第六百九十一卷

卷 691_1 【春宫怨（一作周朴诗）】

杜荀鹤

早被婵娟误，欲妆临镜慵。承恩不在貌，教妾若为容。
风暖鸟声碎，日高花影重。年年越溪女，相忆采芙蓉。

卷 691_2 【访道者不遇】

杜荀鹤

寂寂白云门，寻真不遇真。只应松上鹤，便是洞中人。
药圃花香异，沙泉鹿迹新。题诗留姓字，他日此相亲。

卷 691_3 【送人游吴】

杜荀鹤

君到姑苏见，人家尽枕河。古宫闲地少，水港小桥多。

夜市卖菱藕，春船载绮罗。遥知未眠月，乡思在渔歌。

卷 691_4 【送陈晁归麻川】

杜荀鹤

麻川清见底，似入武陵溪。两岸山相向，三春鸟乱啼。
酒旗和柳动，僧屋与云齐。即此吾乡路，怀君梦不迷。

卷 691_5 【出山】

杜荀鹤

病眼看春榜，文场公道开。朋人登第尽，白发出山来。
处世曾无过，惟天合是媒。长安不觉远，期遂一名回。

卷 691_6 【浙中逢诗友】

杜荀鹤

到处有同人，多为赋与文。诗中难得友，湖畔喜逢君。
冻把城根雪，风开岳面云。苦吟吟不足，争忍话离群。

卷 691_7 【送友游吴越】

杜荀鹤

去越从吴过，吴疆与越连。有园多种橘，无水不生莲。
夜市桥边火，春风寺外船。此中偏重客，君去必经年。

卷 691_8 【出常山界使回有寄】

杜荀鹤

自小即南北，未如今日离。封疆初尽处，人使却回时。
开口有所忌，此心无以为。行行复垂泪，不称是男儿。

卷 691_9 【经废宅】

杜荀鹤

人生当贵盛，修德可延之。不虑有今日，争教无破时。
藓斑题字壁，花发带巢枝。何况蒿原上，荒坟与折碑。

卷 691_10 【登天台寺】

杜荀鹤

一到天台寺，高低景旋生。共僧岩上坐，见客海边行。
野色人耕破，山根浪打鸣。忙时向闲处，不觉有闲情。

卷 691_11 【途中春】

杜荀鹤

马上览春色，丈夫惭泪垂。一生看却老，五字未逢知。
酒力不能久，愁根无可医。明年到今日，公道与谁期。

卷 691_12 【入关历阳道中却寄舍弟】

杜荀鹤

求名日苦辛，日望日荣亲。落叶山中路，秋霖马上人。
晨昏知汝道，诗酒卫吾身。自笑抛麋鹿，长安拟醉春。

卷 691_13 【赠欧阳明府】

杜荀鹤

贤宰宰斯邑，政闻闾里间。都缘民讼少，长觉吏徒闲。
帆落樽前浦，钟鸣枕上山。回舟却惆怅，数宿钓鱼湾。

卷 691_14 【赠临上人】

杜荀鹤

不计禅兼律，终须入悟门。解空非有自，所得是无言。
眼豁浮生梦，心澄大道源。今来习师者，多锁教中猿。

卷 691_15 【题战岛僧居（在江之心）】

杜荀鹤

师爱无尘地，江心岛上居。接船求化惯，登陆赴斋疏。
载土春栽树，抛生日餽鱼。入云萧帝寺，毕竟欲何如？

卷 691_16 【别衡州牧】

杜荀鹤

朝别使君门，暮投江上村。从来无旧分，临去望何恩。
行计自不定，此心谁与论。秋猿叫寒月，只欲断人魂。

卷 691_17 【送人游江南】

杜荀鹤

满酌劝君酒，劝君君莫辞。能禁几度别，即到白头时。
晚岫无云蔽，春帆有燕随。男儿两行泪，不欲等闲垂。

卷 691_18 【游茅山】

杜荀鹤

步步入山门，仙家鸟径分。渔樵不到处，麋鹿自成群。
石面迸出水，松头穿破云。道人星月下，相次礼茅君。

卷 691_19 【读友人诗卷】

杜荀鹤

冰齿味瑶轴，只应神鬼知。坐当群静后，吟到月沈时。
雪峡猿声健，风柅鹤立危。篇篇一字字，谁复更言诗。

卷 691_20 【寄从叔】

杜荀鹤

三族不当路，长年犹布衣。苦吟天与性，直道世将非。
雁夜愁痴坐，渔乡老忆归。为儒皆可立，自是拙时机。

卷 691_21 【寄李溥】

杜荀鹤

如我如君者，不妨身晚成。但从时辈笑，自得古人情。
共莫更初志，俱期立后名。男儿且如此，何用叹平生。

卷 691_22 【郊居即事投李给事】

杜荀鹤

无禄奉晨昏，闲居几度春。江湖苦吟士，天地最穷人。
书剑同三友，蓬蒿外四邻。相知不相荐，何以自谋身。

卷 691_23 【寄诗友】

杜荀鹤

别来春又春，相忆喜相亲。与我为同志，如君能几人。
何时吟得力，渐老事关身。惟有前溪水，年年濯客尘。

卷 691_24 【题田翁家（一作家翁）】

杜荀鹤

田翁真快活，婚嫁不离村。州县供输罢，追随鼓笛喧。
盘飧同老少，家计共田园。自说身无事，应官有子孙。

卷 691_25 【长安冬日】

杜荀鹤

近腊饶风雪，闲房冻坐时。书生教到此，天意转难知。
吟苦猿三叫，形枯柏一枝。还应公道在，未忍与山期。

卷 691_26 【霁后登唐兴寺水阁】

杜荀鹤

一雨三秋色，萧条古寺间。无端登水阁，有处似家山。
白日生新事，何时得暂闲。将知老僧意，未必恋松关。

卷 691_27 【山中寄友人】

杜荀鹤

深山多隙地，无力及耕桑。不是营生拙，都缘觅句忙。
破窗风翳烛，穿屋月侵床。吾友应相笑，辛勤道未光。

卷 691_28 【自述】

杜荀鹤

四海欲行遍，不知终遇谁。用心常合道，出语或伤时。
拟作闲人老，惭无识者嗤。如今已无计，只得苦于诗。

卷 691_29 【题江山寺】

杜荀鹤

江上山头寺，景留吟客船。遍游销一日，重到是何年？
沙鸟多翘足，岩僧半露肩。为诗我语涩，喜此得终篇。

卷 691_30 【秋日旅舍卧病呈所知】

杜荀鹤

秋色上庭枝，愁怀切向谁？青云无势日，华发有狂时。
枕上闻风雨，江南系别离。如何吟到此，此道不闻知。

卷 691_31 【秋宿山馆】

杜荀鹤

山馆坐待晓，夜长吟役神。斜风吹败叶，寒烛照愁人。
蕴蓄天然性，浇讹世恶真。男儿出门志，不独为谋身。

卷 691_32 【赠老僧】

杜荀鹤

众僧尊夏腊，灵岳遍曾登。度水手中杖，行山溪畔藤。
心空默是印，眉白雪为棱。自得巡方道，栖禅老未能。

卷 691_33 【别舍弟】

杜荀鹤

欲往往不得，出门天气秋。惟知偷拭泪，不忍更回头。
此日只愁老，况身方远游。孤寒将五字，何以动诸侯？

卷 691_34 【雪中别诗友】

杜荀鹤

酒寒无小户，请满酌行杯。若待雪消去，自然春到来。
出城人迹少，向暮鸟声哀。未遇应关命，侯门处处开。

卷 691_35 【题岳麓寺】

杜荀鹤

一簇楚江山，江山胜此难。觅人来画取，到处得吟看。
鹤隐松声尽，鱼沈槛影寒。自知心未了，闲话亦多端。

卷 691_36 【怀庐岳书斋】

杜荀鹤

长忆在庐岳，免低尘土颜。煮茶窗底水，采药屋头山。
是境皆游遍，谁人不羡闲？无何一名系，引出白云间。

卷 691_37 【题唐兴寺小松】

杜荀鹤

虽小天然别，难将众木同。侵僧半窗月，向客满襟风。
枝拂行苔鹤，声分叫砌虫。如今未堪看，须是雪霜中。

卷 691_38 【与友人话别】

杜荀鹤

客路行多少，干人无易颜。未成终老计，难致此身闲。
月兔走入海，日乌飞出山。流年留不得，半在别离间。

卷 691_39 【赠庐岳隐者】

杜荀鹤

自见来如此，未尝离洞门。结茅遮雨雪，采药给晨昏。
古树藤缠杀，春泉鹿过浑。悠悠无一事，不似属乾坤。

卷 691_40 【怀紫阁隐者】

杜荀鹤

紫阁白云端，云中有地仙。未归蓬岛上，犹隐国门前。
洞口人无迹，花阴鹿自眠。焚香赋诗罢，星月冷遥天。

卷 691_41 【题会上人院】

杜荀鹤

鼓角城中寺，师居日得闲。必能行大道，何用在深山。
破衲新添线，空门夜不关。心知与眼见，终取到无间。

卷 691_42 【送黄补阙南迁】

杜荀鹤

得罪非天意，分明谪去身。一心贪谏主，开口不防人。
自古有迁客，何朝无直臣？喧然公论在，难滞楚南春。

卷 691_43 【送宾贡登第后归海东】

杜荀鹤

归捷中华第，登船鬓未丝。直应天上桂，别有海东枝。
国界波穷处，乡心日出时。西风送君去，莫虑到家迟。

卷 691_44 【近试投所知】

杜荀鹤

白发随梳落，吟怀说向谁。敢辞成事晚，自是出山迟。
拟动如浮海，凡言似课诗。终身事知己，此外复何为？

卷 691_45 【送友人牧江州】

杜荀鹤

本国兵戈后，难官在此时。远分天子命，深要使君知。
但遂生灵愿，当应雨露随。江山胜他郡，闲赋庾楼诗。

卷 691_46 【辞座主侍郎】

杜荀鹤

一饭尚怀感，况攀高桂枝。此恩无报处，故国远归时。
只恐兵戈隔，再趋门馆迟。茅堂拜亲后，特地泪双垂。

卷 691_47 【别从叔】

杜荀鹤

立马不忍上，醉醒天气寒。都缘在门易，直似别家难。
世路既如此，客心须自宽。江村亦饥冻，争及问长安。

卷 691_48 【送人南游】

杜荀鹤

凡游南国者，未有不蹉跎。到海路难尽，挂帆人更多。
潮沙分象迹，花洞响蛮歌。纵有投文处，于君能几何？

卷 691_49 【经贾岛墓】

杜荀鹤

谪宦自麻衣，衔冤至死时。山根三尺墓，人口数联诗。
仙桂终无分，皇天似有私。暗松风雨夜，空使老猿悲。

卷 691_50 【秋夜（一作江）晚泊】

杜荀鹤

一望一苍然，萧骚起暮天。远山横落日，归鸟度平川。
家是去秋别，月当今夕圆。渔翁似相伴，彻晓苇丛边。

卷 691_51 【送舍弟】

杜荀鹤

我受羁栖惯，客情方细知。好看前路事，不比在家时。
勉汝言须记，闻人善即师。旅中无废业，时作一篇诗。

卷 691_52 【将归山逢友人】

杜荀鹤

儒为君子儒，儒道不妨孤。白发多生矣，青山可住乎？
徉狂宁是事，巧达又非夫。只此平生愿，他人肯信无？

卷 691_53 【经九华费征君墓】

杜荀鹤

凡吊先生者，多伤荆棘间。不知三尺墓，高却九华山。
天地有何外，子孙无亦闲。当时若征起，未必得身还。

卷 691_54 【溪居叟】

杜荀鹤

溪翁居静处，溪鸟入门飞。早起钓鱼去，夜深乘月归。
见君无事老，觉我有求非。不说风霜苦，三冬一草衣。

卷 691_55 【与友人对酒吟】

杜荀鹤

凭君满酌酒，听我醉中吟。客路如天远，侯门似海深。
新坟侵古道，白发恋黄金。共有人间事，须怀济物心。

卷 691_56 【送僧】

杜荀鹤

道了亦未了，言闲今且闲。从来无住处，此去向何山。
片石树阴下，斜阳潭影间。请师留偈别，恐不到人寰。

卷 691_57 【送九华道士游茅山】

杜荀鹤

忽起地仙兴，飘然出旧山。于身无切事，在世有余闲。
日月浮生外，乾坤大醉间。故园华表上，谁得见君还。

卷 691_58 【寄舍弟】

杜荀鹤

世乱信难通，乡心日万重。弟兄皆向善，天地合相容。
大野阴云重，连城杀气浓。家山白云里，卧得最高峰。

卷 691_59 【下第投所知】

杜荀鹤

若以名场内，谁无一轴诗？纵饶生白发，岂敢怨明时。
知己虽然切，春官未必私。宁教读书眼，不有看花期。

卷 691_60 【寄顾云】

杜荀鹤

省得前年别，蘋洲旅馆中。乱离身不定，彼此信难通。
侯国兵虽敛，吾乡业已空。秋来忆君梦，夜夜逐征鸿。

卷 691_61 【赠宣城麋明府】

杜荀鹤

天下为官者，无君一轴诗。数联同我得，当代遇谁知？
年齿吟将老，生涯说可悲。何当抛手板，邻隐过危时。

卷 691_62 【望远】

杜荀鹤

门前通大道，望远上高台。落日人行尽，穷边信不来。
还闻战得胜，未见敕招回。却入机中坐，新愁织不开。

卷 691_63 【冬末投长沙裴侍郎】

杜荀鹤

欲露尘中事，其如不易言。家山一离别，草树匝春暄。
吹梦风天角，啼愁雪岳猿。伫思心觉满，何以远门轩？

卷 691_64 【赠秋浦金明府长】

杜荀鹤

倚郭难为宰，非君即有私。惟凭野老口，不立政声碑。
苦甚求名日，贫于未选时。溪山竟如此，利得且吟诗。

卷 691_65 【和高秘书早春对雪登楼见寄之什】

杜荀鹤

天有惜花意，恐花开染尘。先教微雪下，始放满城春。
且醉登楼客，重期出郭人。因酬郢中律，霜鬓数茎新。

卷 691_66 【乱后山中作】

杜荀鹤

自从天下乱，日晚别庭闱。兄弟团圞乐，羁孤远近归。
文章甘世薄，耕种喜山肥。直待中兴后，方应出隐扉。

卷 691_67 【旅寓书事】

杜荀鹤

日日惊身事，凄凄欲断魂。时清不自立，发白傍谁门。
中路残秋雨，空山一夜猿。公卿得见面，怀抱细难言。

卷 691_68 【舟行晚泊江上寺】

杜荀鹤

久劳风水上，禅客喜相依。挂衲虽无分，修心未觉非。
日沈山虎出，钟动寺禽归。月上潮平后，谈空渐入微。

卷 691_69 【长林山中间贼退寄孟明府】

杜荀鹤

一县今如此，残民数不多。也知贤宰切，争奈乱兵何。
皆自干戈达，咸思雨露和。应怜住山者，头白未登科。

卷 691_70 【泗上客思】

杜荀鹤

痛饮复高歌，愁终不奈何。家山随日远，身事逐年多。
没雁云横楚，兼蝉柳夹河。此心闲未得，到处被诗磨。

卷 691_71 【寄同人】

杜荀鹤

尽与贫为患，唯余即不然。四方无静处，百口度荒年。
白发生闲事，新诗出数联。时情竟如此，不免却归田。

卷 691_72 【下第出关投郑拾遗】

杜荀鹤

丹青桂有枝，未折未为迟。况是孤寒士，兼行苦涩诗。
杏园人醉日，关路独归时。更卜深知意，将来拟荐谁？

卷 691_73 【塞上】

杜荀鹤

草白河冰合，蕃戎出掠频。戍楼三号火，探马一条尘。
战士风霜老，将军雨露新。封侯不由此，何以慰征人？

卷 691_74 【别敬侍郎】

杜荀鹤

交道有寒暑，在人无古今。与君中夜话，尽我一生心。
所向未得志，岂惟空解吟？何当重相见，旧隐白云深。

卷 691_75 【送青阳李明府】

杜荀鹤

善政无惭色，吟归似等闲。惟将六幅绢，写得九华山。
求理头空白，离京债未还。仍闻猿与鹤，都在一船间。

卷 691_76 【将游湘湖有作】

杜荀鹤

一家相别意，不得不潸然。远作南方客，初登上水船。
岳钟思冷梦，湘月少残篇。便有归来计，风波亦隔年。

卷 691_77 【送姚庭珪】

杜荀鹤

脱衣将换酒，对酌话何之。雨后秋萧索，天涯晚别离。
人生无此恨，鬓色不成丝。未得重相见，看君马上诗。

卷 691_78 【投李大夫】

杜荀鹤

自小僻于诗，篇篇恨不奇。苦吟无暇日，华发有多时。
进取门难见，升沈命未知。秋风夜来急，还恐到京迟。

卷 691_79 【贻里中同志】

杜荀鹤

乡里为儒者，唯君见我心。诗书常共读，雨雪亦相寻。
贫贱志气在，子孙交契深。古人犹晚达，况未鬓霜侵。

卷 691_80 【江上送韦象先辈】

杜荀鹤

不易为离抱，江天即见鸿。暮帆何处落，凉月与谁同？
木叶新霜后，渔灯夜浪中。时难慎行止，吾道利于穷。

卷 691_81 【维扬逢诗友张乔】

杜荀鹤

天下方多事，逢君得话诗。直应吾道在，未觉国风衰。
生计吟消日，人情醉过时。雅篇三百首，留作后来师。

卷 691_82 【秋晨有感】

杜荀鹤

木叶落时节，旅人初梦惊。钟才枕上尽，事已眼前生。
吟发不长黑，世交无久情。且将公道约，未忍便归耕。

卷 691_83 【秋日山中寄李处士】

杜荀鹤

吾辈道何穷，寒山细雨中。儿童书懒读，果栗树将空。
言论关时务，篇章见国风。升平犹可用，应不废为公。

卷 691_84 【晚泊金陵水亭】

杜荀鹤

江亭当废国，秋景倍萧骚。夕照残荒垒，寒潮涨古濠。
就田看鹤劣，隔水见僧高。无限前朝事，醒吟易觉劳。

卷 691_85 【钱塘别罗隐】

杜荀鹤

故国看看远，前程计在谁？五更听角后，一叶渡江时。
吾道天宁丧，人情日可疑。西陵向西望，双泪为君垂。

卷 691_86 【山中贻同志】

杜荀鹤

君贫我亦贫，为善喜为邻。到老如今日，无心愧古人。
闭门非傲世，守道是谋身。别有同山者，其如未可亲。

卷 691_87 【秋日怀九华旧居】

杜荀鹤

吾道在五字，吾身宁陆沈。凉生中夜雨，病起故山心。
烛共寒酸影，蛩添苦楚吟。何当遂归去，一径入松林。

卷 691_88 【江岸秋思】

杜荀鹤

驱马傍江行，乡愁步步生。举鞭挥柳色，随手失蝉声。
秋稼缘长道，寒云约古城。家贫遇丰岁，无地可归耕。

卷 691_89 【哭刘德仁】

杜荀鹤

贾岛还如此，生前不见春。岂能诗苦者，便是命羈人。
家事因吟失，时情碍国亲。多应衔恨骨，千古不为尘。

卷 691_90 【经青山吊李翰林】

杜荀鹤

何为先生死，先生道日新。青山明月夜，千古一诗人。
天地空销骨，声名不傍身。谁移耒阳冢，来此作吟邻？

卷 691_91 【下第东归别友人】

杜荀鹤

不得同君住，当春别帝乡。年华落第老，岐路出关长。
芳草缘流水，残花向夕阳。怀亲暂归去，非是钓沧浪。

卷 691_92 【秋宿诗僧云英房（一作院）因赠】

杜荀鹤

贾岛怜无可，都缘数句诗。君虽是后辈，我谓过当时。
溪浪和星动，松阴带鹤移。同吟到明坐，此道淡谁知？

卷 691_93 【送人宰吴县】

杜荀鹤

海涨兵荒后，为官合动情。字人无异术，至论不如清。
草履随船卖，菱梭隔水鸣。唯持古人意，千里赠君行。

卷 691_94 【读友人诗】

杜荀鹤

君诗通大雅，吟觉古风生。外却浮华景，中含教化情。
名应高日月，道可润公卿。莫以孤寒耻，孤寒达更荣。

卷 691_95 【登山寺】

杜荀鹤

山半一山寺，野人秋日登。就中偏爱石，独上最高层。
有果猿攀树，无斋鸽看僧。儒门自多事，来此复何能。

卷 691_96 【辞九江李郎中入关】

杜荀鹤

帝里无相识，何门迹可亲。愿开言重口，荐与分深人。
卷许新诗出，家怜旧业贫。今从九江去，应免更迷津。

卷 691_97 【江南逢李先辈】

杜荀鹤

李杜复李杜，彼时逢此时。干戈侵帝里，流落向天涯。
岁月消于酒，平生断在诗。怀才不得志，只恐满头丝。

卷 691_98 【秋日寄吟友】

杜荀鹤

闲坐细思量，唯吟不可忘。食无三亩地，衣绝一株桑。
蝉树生寒色，渔潭落晓光。青云旧知己，未许钓沧浪。

卷 691_99 【江上与从弟话别】

杜荀鹤

相逢尽说归，早晚遂归期。流水多通处，孤舟少住时。
干人不得已，非我欲为之。及此终无愧，其如道在兹。

卷 691_100 【送友人游南海】

杜荀鹤

南海南边路，君游只为贫。山川多少地，郡邑几何人？
花鸟名皆别，寒暄气不均。相期早晚见，莫待瘴侵身。

卷 691_101 【赠聂尊师】

杜荀鹤

诗道将仙分，求之不可求。非关从小学，应是数生修。
蟾桂云梯折，鳌山鹤驾游。他年两成事，堪喜是邻州。

卷 691_102 【旅感】

杜荀鹤

白发根丛出，镊频愁不开。自怜空老去，谁信苦吟来？
客路东西阔，家山早晚回。翻思钓鱼处，一雨一层苔。

卷 691_103 【寄益阳武灌明府】

杜荀鹤

县称诗人理，无嫌日寂寥。溪山入城郭，户口半渔樵。
月满弹琴夜，花香漉酒朝。相思不相见，烟水路迢迢。

卷 691_104 【湘中秋日呈所知】

杜荀鹤

四海无寸土，一生惟苦吟。虚垂异乡泪，不滴别人心。
雨色凋湘树，滩声下塞禽。求归归未得，不是掷光阴。

卷 691_105 【苦吟】

杜荀鹤

世间何事好，最好莫过诗。一句我自得，四方人已知。
生应无辍日，死是不吟时。始拟归山去，林泉道在兹。

卷 691_106 【闽中别所知】

杜荀鹤

触目生归思，那堪路七千。腊中离此地，马上见明年。
郡邑溪山巧，寒暄日月偏。自疑双鬓雪，不似到南天。

卷 691_107 【塞上伤战士】

杜荀鹤

战士说辛勤，书生不忍闻。三边远天子，一命信将军。
野火烧人骨，阴风卷阵云。其如禁城里，何以重要勋。

卷 691_108 【春日访独孤处士】

杜荀鹤

地僻春来静，深宜长者居。好花都待晚，修竹不妨疏。
雁入湘江食，人侵晓色锄。似君无学处，头白道如初。

卷 691_109 【哭友人】

杜荀鹤

病向名场得，终为善误身。无儿承后嗣，有女托何人。
葬礼难求备，交情好者贫。惟余旧文集，一览一沾巾。

卷 691_110 【新栽竹】

杜荀鹤

剺破苍苔色，因栽十数茎。窗风从此冷，诗思当时清。
酒入杯中影，棋添局上声。不同桃与李，潇洒伴书生。

卷 691_111 【送吴蜕下第入蜀】

杜荀鹤

下第言之蜀，那愁举别杯。难兄方在幕，上相复怜才。
鸟径盘春霭，龙湫发夜雷。临邛无久恋，高桂待君回。

卷 691_112 【乱后归山（一作山居）】

杜荀鹤

乱世归山谷，征辇喜不闻。诗书犹满架，弟侄未为军。
山犬眠红叶，樵童唱白云。此心非此志，终拟致明君。

卷 691_113 【题著禅师】

杜荀鹤

大道本无幻，常情自有魔。人皆迷著此，师独悟如何？
为岳开窗阔，因虫长草多。说空空说得，空得到维摩。

卷 691_114 【春日闲居即事】

杜荀鹤

未得青云志，春同秋日情。花开如叶落，莺语似蝉鸣。
道合和贫守，诗堪与命争。饥寒是吾事，断定不归耕。

卷 691_115 【秋宿栖贤寺怀友人】

杜荀鹤

一宿三秋寺，闲忙与晓分。细泉山半落，孤客夜深闻。
鹤去巢盛月，龙潜穴拥云。苦吟方见景，多恨不同君。

卷 691_116 【乱后再逢汪处士】

杜荀鹤

如君真道者，乱世有闲情。每别不知处，见来长后生。
药非因病服，酒不为愁倾。笑我于身苦，吟髭白数茎。

卷 691_117 【山中喜与故交宿话】

杜荀鹤

远地能相访，何惭事力微。山中深夜坐，海内故交稀。
村酒沽来浊，溪鱼钓得肥。贫家只如此，未可便言归。

卷 691_118 【观棋】

杜荀鹤

对面不相见，用心同用兵。算人常欲杀，顾己自贪生。
得势侵吞远，乘危打劫赢。有时逢敌手，当局到深更。

卷 691_119 【送人宰德清】

杜荀鹤

乱世人多事，耕桑或失时。不闻宽赋敛，因此转流离。
天意未如是，君心无自欺。能依四十字，可立德清碑。

卷 691_120 【寄窦处士】

杜荀鹤

漳水醉中别，今来犹未醒。半生因酒废，大国几时宁。
海畔将军柳，天边处士星。游人不可见，春入乱山青。

卷 691_121 【题历山舜祠（山有庙，呼为帝二子多变妖异，为时所敬）】

杜荀鹤

昔舜曾耕地，遗风日寂寥。世人那肯祭，大圣不兴妖。
殿宇秋霖坏，杉松野火烧。时讹竞淫祀，丝竹醉山魈。

卷 691_122 【赠李蒙叟】

杜荀鹤

在我成何事，逢君更劝吟。纵饶不得力，犹胜别劳心。
凡事有兴废，诗名无古今。百年能几日，忍不惜光阴。

卷 691_123 【维扬冬末寄幕中二从事】

杜荀鹤

闻道长溪尉，相留一馆闲。□□□□□，尚隔几重山。
为旅春风外，怀人夜雨间。年来疏览镜，怕见减朱颜。

卷 691_124 【和吴太守罢郡山村偶题二首】

杜荀鹤

罢郡饶山兴，村家不惜过。官情随日薄，诗思入秋多。
野兽眠低草，池禽浴动荷。眼前余政在，不似有干戈。

快活田翁辈，常言化育时。纵饶稽岁月，犹说向孙儿。
茅屋梁和节，茶盘果带枝。相传终不忘，何必立生祠。

卷 691_125 【乱后送友人（一作送人遇乱）归湘中】

杜荀鹤

家枕三湘岸，门前即钓矶。渔竿壮岁别，鹤发乱时归。
岳暖无猿叫，江春有燕飞。平生书剑在，莫便学忘机。

卷 691_126 【送紫阳僧归庐岳旧寺】

杜荀鹤

紫衣明主赠，归寺感先师。受业恩难报，开堂影不知。
松风欹枕夜，山雪下楼时。此际无人会，微吟复敛眉。

卷 691_127 【和刘评事送海禅和归山】

杜荀鹤

衲外元无象，言寻那路寻。问禅将底说，传印得何心。
未了群山浅，难休一室深。伏魔宁是兽，巢顶亦非禽。
观色风驱雾，听声雪洒林。凡归是归处，不必指高岑。

卷 691_128 【御沟柳】

杜荀鹤

律到御沟春，沟边柳色新。细笼穿禁水，轻拂入朝人。
日近韶光早，天低圣泽匀。谷莺栖未稳，宫女画难真。
楚国空摇浪，隋堤暗惹尘。如何帝城里，先得覆龙津。

第六百九十二卷

卷 692_1 【冬末同友人泛潇湘】

杜荀鹤

残腊泛舟何处好，最多吟兴是潇湘。就船买得鱼偏美，
踏雪沽来酒倍香。猿到夜深啼岳麓，雁知春近别衡阳。
与君剩采江山景，裁取新诗入帝乡。

卷 692_2 【赠李鐔（鐔自维扬遇乱，东入山中）】

杜荀鹤

君行君文天合知，见君如此我兴悲。只残三口兵戈后，
才到孤村雨雪时。著卧衣裳难办洗，旋求粮食莫供炊。
地炉不暖柴枝湿，犹把蒙求授小儿。

卷 692_3 【旅中卧病】

杜荀鹤

秋来谁料病相萦，枕上心犹算去程。风射破窗灯易灭，

月穿疏屋梦难成。故园何啻三千里，新雁才闻一两声。
我自与人无旧分，非干人与我无情。

卷 692_4 【旅泊遇郡中叛乱示同志】

杜荀鹤

握手相看谁敢言，军家刀剑在腰边。遍搜宝货无藏处，
乱杀平人不怕天。古寺拆为修寨木，荒坟开作甃城砖。
郡侯逐出浑闲事，正是銮舆幸蜀年。

卷 692_5 【赠秋浦张明府】

杜荀鹤

君为秋浦三年宰，万虑关心两鬓知。人事旋生当路县，
吏才难展用兵时。农夫背上题军号，贾客船头插战旗。
他日亲知问官况，但教吟取杜家诗。

卷 692_6 【雪】

杜荀鹤

风搅长空寒骨生，光于晓色报窗明。江湖不见飞禽影，

岩谷时闻折竹声。巢穴几多相似处，路岐兼得一般平。
拥袍公子休言冷，中有樵夫跣足行。

卷 692_7 【题庐岳刘处士草堂】

杜荀鹤

仙境闲寻采药翁，草堂留话一宵同。若看山下云深处，
直是人间路不通。泉领藕花来洞口，月将松影过溪东。
求名心在闲难遂，明日马蹄尘土中。

卷 692_8 【山中寄诗友】

杜荀鹤

山深长恨少同人，览景无时不忆君。庭果自从霜后熟，
野猿频向屋边闻。琴临秋水弹明月，酒就东山酌白云。
仙桂算攀攀合得，平生心力尽于文。

卷 692_9 【秋宿临江驿】

杜荀鹤

南来北去二三年，年去年来两鬓斑。举世尽从愁里老，

谁人肯向死前闲。渔舟火影寒归浦，驿路铃声夜过山。
身事未成归未得，听猿鞭马入长关。

卷 692_10 【题瓦棺寺真上人院矮桧】

杜荀鹤

天生仙桧是长材，栽桧希逢此最低。一自旧山来砌畔，
几番凡木与云齐。迴无斜影教僧踏，免有闲枝引鹤栖。
今日偶题题似着，不知题后更谁题？

卷 692_11 【江下（一作上）初秋寓泊】

杜荀鹤

蒙蒙烟雨蔽江村，江馆愁人好断魂。自别家来生白发，
为侵星起谒朱门。也知柳欲开春眼，争奈萍无入土根。
兄弟无书雁归北，一声声觉苦于猿。

卷 692_12 【投从叔补阙】

杜荀鹤

吾宗不谒谒诗宗，常仰门风继国风。空有篇章传海内，

更无亲族在朝中。其来虽愧源流浅，所得须怜雅颂同。
三十年吟到今日，不妨私荐亦成公。

卷 692_13 【赠张员外儿】

杜荀鹤

张公一子才三岁，闻客吟声便出来。唤物舌头犹未稳，
诵诗心孔迥然开。天生便是成家庆，年长终为间世才。
月里桂枝知有分，不劳诸丈作梯媒。

卷 692_14 【重阳日有作】

杜荀鹤

一为重阳上古台，乱时谁见菊花开。偷搴白发真堪笑，
牢锁黄金实可哀。是个少年皆老去，争知荒冢不荣来。
大家拍手高声唱，日未沈山且莫回。

卷 692_15 【入关寄九华友人】

杜荀鹤

坐床难稳露蝉新，便作东西马上身。醺酒却输耽睡客，

好山翻对不吟人。无多志气禁离别，强半年光属苦辛。
篋里篇章头上雪，未知谁恋杏园春。

卷 692_16 【送李贠游新安】

杜荀鹤

邯郸李贠才峥嵘，酒狂诗逸难干名。气直不与儿辈洽，
醉来拟共天公争。孤店夜烧枯叶坐，乱时秋踏早霜行。
一间茅屋住不稳，刚出为人平不平。

卷 692_17 【冬末自长沙游桂岭留献所知】

杜荀鹤

家隔重湖归未期，更堪南去别深知。前程笑到山多处，
上马愁逢岁尽时。四海内无容足地，一生中有苦心诗。
朱门只见朱门事，独把孤寒问阿谁。

卷 692_18 【送福昌周繇少府归宁兼谋隐】

杜荀鹤

少见古人无远虑，如君真得古人情。登科作尉官虽小，

避世安亲禄已荣。一路水云生隐思，几山猿鸟认吟声。
知君未作终焉计，要著文章待太平。

卷 692_19 【贺顾云侍御府主与子弟奏官（敕下时，年七岁）】

杜荀鹤

青桂朱袍不贺兄，贺兄荣是见儿荣。孝经始向堂前彻，
官诰当从幕下迎。戏把蓝袍包果子，娇将竹笏恼先生。
自惭乱世无知己，弟侄鞭牛傍陇耕。

卷 692_20 【舟行即事】

杜荀鹤

年少髭须雪欲侵，别家三日几般心。朝随贾客忧风色，
夜逐渔翁宿苇林。秋水鹭飞红蓼晚，暮山猿叫白云深。
重阳酒熟茱萸紫，却向江头倚棹吟。

卷 692_21 【乱后山居】

杜荀鹤

从乱移家拟傍山，今来方办买山钱。九州有路休为客，

百岁无愁即是仙。野叟并田锄暮雨，溪禽同石立寒烟。
他人似我还应少，如此安贫亦荷天。

卷 692_22 【山居寄同志】

杜荀鹤

茅斋深僻绝轮蹄，门径缘莎细接溪。垂钓石台依竹垒，
待宾茶灶就岩泥。风生谷口猿相叫，月照松头鹤并栖。
不是无端过时日，拟从窗下蹑云梯。

卷 692_23 【将入关安陆遇兵寇】

杜荀鹤

家贫无计早离家，离得家来蹇滞多。已是数程行雨雪，
更堪中路阻兵戈。几州户口看成血，一旦天心却许和。
四面烟尘少无处，不知吾土自如何。

卷 692_24 【夏日登友人书斋林亭】

杜荀鹤

暑天长似秋天冷，带郭林亭画不如。蝉噪槛前遮日竹，

鹭窥池面弄萍鱼。抛山野客横琴醉，种药家僮踏雪锄。
众惜君才堪上第，莫因居此与名疏。

卷 692_25 【寄临海姚中丞】

杜荀鹤

夏辞旌旆已秋深，永夕思量泪满襟。风月易斑搜句鬓，
星霜难改感恩心。寻花洞里连春醉，望海楼中彻晓吟。
虽有梦魂知处所，去来多被角声侵。

卷 692_26 【秋日闲居寄先达】

杜荀鹤

到头身事欲何为，窗下工夫鬓上知。乍可百年无称意，
难教一日不吟诗。风驱早雁冲湖色，雨挫残蝉点柳枝。
自古书生也如此，独堪惆怅是明时。

卷 692_27 【题觉禅和】

杜荀鹤

少见修行得似师，茅堂佛像亦随时。禅衣衲后云藏线，

夏腊高来雪印眉。耕地诚侵连冢土。伐薪教护带巢枝。
有时问着经中事，却道山僧总不知。

卷 692_28 【感秋（一作秋感）】

杜荀鹤

年年名路漫辛勤，襟袖空多马上尘。画戟门前难作客，
钓鱼船上易安身。冷烟粘柳蝉声老，寒渚澄星雁叫新。
自是依家无住处，不关天地窄于人。

卷 692_29 【题德玄上人院】

杜荀鹤

割得心来忙处闲，闲中方寸阔于天。浮生自是无空性，
长寿何曾有百年。罢定磬敲松罅月，解眠茶煮石根泉。
我虽未似师披衲，此理同师悟了然。

卷 692_30 【春日山居寄友人】

杜荀鹤

野吟何处最相宜，春景暄和好入诗。高下麦苗新雨后，

浅深山色晚晴时。半岩云脚风牵断，平野花枝鸟踏垂。
倒载干戈是何日，近来麋鹿欲相随。

卷 692_31 【怀庐岳旧隐】

杜荀鹤

一别三年长在梦，梦中时蹑石棱层。泉声入夜方堪听，
山色逢秋始好登。岩鹿惯随锄药叟，溪鸥不怕洗苔僧。
人间有许多般事，求要身闲直未能。

卷 692_32 【投长沙裴侍郎】

杜荀鹤

此身虽贱道长存，非谒朱门谒孔门。只望至公将卷读，
不求朝士致书论。垂纶雨结渔乡思，吹木风传雁夜魂。
男子受恩须有地，平生不受等闲恩。

卷 692_33 【和友人见题山居】

杜荀鹤

避时多喜葺居成，七字君题万象清。开户晓云连地白，

访人秋月满山明。庭前树瘦霜来影，洞口泉喷雨后声。
有景供吟且如此，算来何必躁于名。

卷 692_34 【献长沙王侍郎】

杜荀鹤

文星渐见射台星，皆仰为霖沃众情。天泽逼来逢圣主，
辞林盛去得书生。云妆岳色供吟景，月浩湘流递政声。
美化事多难讽诵，未如耕钓口分明。

卷 692_35 【春日登楼遇雨】

杜荀鹤

忽地晴天作雨天，全无暑气似秋间。看看水没来时路，
渐渐云藏望处山。风趁鹭鸶双出苇，浪催渔父尽归湾。
一心准拟闲登眺，却被诗情使不闲。

卷 692_36 【春日行次钱塘却寄台州姚中丞】

杜荀鹤

岂为无心求上第，难安帝里为家贫。江南江北闲为客，

潮去潮来老却人。两岸雨收莺语柳，一楼风满角吹春。
花前不独垂乡泪，曾是朱门寄食身。

卷 692_37 【投江上崔尚书】

杜荀鹤

此生何路出尘埃，犹把中才谒上才。闭户十年专笔砚，
仰天无处认梯媒。马前霜叶催归去，枕上边鸿唤觉来。
若许登门换髻鬟，必应辛苦事风雷。

卷 692_38 【书事投所知】

杜荀鹤

古陌寒风来去吹，马蹄尘旋上麻衣。虽然干禄无休意，
争奈趋时不见机。诗思趁云从岳涌，乡心随雁绕湖飞。
肯将骨肉轻离别，未遇人知未得归。

卷 692_39 【秋日湖外书事】

杜荀鹤

十五年来笔砚功，只今犹在苦贫中。三秋客路湖光外，

万里乡关楚邑东。鸟径杖藜山翳雨，猿林欹枕树摇风。
朱门处处若相似，此命到头通不通。

卷 692_40 【题宗上人旧院】

杜荀鹤

此院重来事事乖，半欹茅屋草侵阶。啄生鸦忆啼松枿。
接果猿思啸石崖。壁上尘粘蒲叶扇，床前苔烂笋皮鞋。
分明记得谈空日，不向秋风更怆怀。

卷 692_41 【乱后出山逢高员外】

杜荀鹤

自从乱后别京关，一入烟萝十五年。重出故山生白发，
却装新卷谒清贤。窗回旅梦城头角，柳结乡愁雨后蝉。
名姓暗投心暗祝，永期收拾向门前。

卷 692_42 【赠友人罢举赴交趾辟命】

杜荀鹤

罢却名场拟入秦，南行无罪似流人。纵经商岭非驰驿，

须过长沙吊逐臣。舶载海奴镮碓耳，象驼蛮女彩缠身。
如何待取丹青桂，别赴嘉招作上宾。

卷 692_43 【山中寡妇（一作时世行）】

杜荀鹤

夫因兵死守蓬茅，麻甯衣衫鬓发焦。桑柘废来犹纳税，
田园荒后尚征苗。时挑野菜和根煮，旋斫生柴带叶烧。
任是深山更深处，也应无计避征徭。

卷 692_44 【访蔡融因题】

杜荀鹤

杖藜时复过荒郊，来到君家不忍抛。每见苦心修好事，
未尝开口怨平交。一溪寒色渔收网，半树斜阳鸟傍巢。
必若天工主人事，肯交吾子委衡茅。

卷 692_45 【闲居书事】

杜荀鹤

竹门茅屋带村居，数亩生涯自有余。鬓白只应秋炼句，

眼昏多为夜抄书。雁惊风浦渔灯动，猿叫霜林橡实疏。
待得功成即西去，时清不问命何如。

卷 692_46 【友人赠舍弟依韵戏和】

杜荀鹤

吾家此弟有何知，多愧君开道业基。不觉裹头成大汉，
昨来竹马作童儿。还缘世遇兵戈闹，只恐身修礼乐迟。
及见和诗诗自好，石公不到更何时。

卷 692_47 【乱后逢村叟（一作时世行）】

杜荀鹤

经乱衰翁居破村，村中何事不伤魂。因供寨木无桑柘，
为著乡兵绝子孙。还似平宁征赋税，未尝州县略安存。
至于鸡犬皆星散，日落前山独倚门。

卷 692_48 【赠元上人】

杜荀鹤

多少僧中僧行高，偈成流落遍僧抄。经窗月静滩声到，

石径人稀藓色交。垂露竹粘蝉落壳，宰云松载鹤栖巢。
煮茶童子闲胜我，犹得依时把磬敲。

卷 692_49 【下第东归道中作】

杜荀鹤

一回落第一宁亲，多是途中过却春。心火不销双鬓雪，
眼泉难濯满衣尘。苦吟风月唯添病，遍识公卿未免贫。
马壮金多有官者，荣归却笑读书人。

卷 692_50 【夏日留题张山人林亭】

杜荀鹤

此中偏称夏中游，时有风来暑气收。涧底松摇千尺雨，
庭中竹撼一窗秋。求猿句寄山深寺，乞鹤书传海畔洲。
闲与先生话身事，浮名薄宦总悠悠。

卷 692_51 【伤病马】

杜荀鹤

此马堪怜力壮时，细匀行步恐尘知。骑来未省将鞭触，

病后长教觅药医。顾主强抬和泪眼，就人轻刷带疮皮。
只今筋骨浑全在，春暖莎青放未迟。

卷 692_52 【馆舍秋夕】

杜荀鹤

寒雨萧萧灯焰青，灯前孤客难为情。兵戈闹日别乡国，
鸿雁过时思弟兄。冷极睡无离枕梦，苦多吟有彻云声。
出门便作还家计，直至如今计未成。

卷 692_53 【送僧赴黄山沐汤泉兼参禅宗长老】

杜荀鹤

闻有汤泉独去寻，一瓶一钵一无金。不愁乱世兵相害，
却喜寒山路入深。野老禱神鸦噪庙，猎人冲雪鹿惊林。
患身是幻逢禅主，水洗皮肤语洗心。

卷 692_54 【哭山友】

杜荀鹤

十载同栖庐岳云，寒烧枯叶夜论文。在生未识公卿面，

至死不离麋鹿群。从见蓬蒿丛坏屋，长忧雨雪透荒坟。
把君诗句高声读，想得天高也合闻。

卷 692_55 【献池州牧】

杜荀鹤

池阳今日似渔阳，大变凶年作小康。江路静来通客货，
郡城安后绝戎装。分开野色收新麦，惊断莺声摘嫩桑。
纵有逋民归未得，远闻仁政旋还乡。

卷 692_56 【送韦书记归京（座主侍郎同举）】

杜荀鹤

韦杜相逢眼自明，事连恩地倍牵情。闻归帝里愁攀送，
知到师门话姓名。朝客半修前辈礼，古人多重晚年荣。
从来有泪非无泪，未似今朝泪满缨。

卷 692_57 【献郑给事】

杜荀鹤

化行邦域二年春，樵唱渔歌日日新。未降诏书酬善政，

不知天泽答何人。秋登岳寺云随步，夜宴江楼月满身。
他日朱门恐难扫，沙堤新筑必无尘。

卷 692_58 【赠休禅和】

杜荀鹤

为僧难得不为僧，僧戒僧仪未是能。弟子自知心了了，
吾师应为醉腾腾。多生觉悟非关衲，一点分明不在灯。
只道诗人无佛性，长将二雅入三乘。

卷 692_59 【送李先辈从知（一作军）塞上】

杜荀鹤

去草军书出帝乡，便从城外学戎装。好随汉将收胡土，
莫遣胡兵近汉疆。洒碛雪粘旗力重，冻河风揭角声长。
此行也是男儿事，莫向征人恃桂香。

卷 692_60 【和友人送弟】

杜荀鹤

君说无家只弟兄，此中言别若为情。干戈闹日分头去，

山水寒时信路行。月下断猿空有影，雪中孤雁却无声。
我今骨肉虽饥冻，幸喜团圆过乱兵。

卷 692_61 【酬张员外见寄】

杜荀鹤

分应天与吟诗老，如此兵戈不废诗。生在世间人不识，
死于泉下鬼应知。啼花蜀鸟春同苦，叫雪巴猿昼共饥。
今日逢君惜分手，一枝何校一年迟。

卷 692_62 【献新安于尚书】

杜荀鹤

九土雄师竟若何，未如良牧与天和。月留清俸资家少，
岁计阴功及物多。四野绿云笼稼穡，千山明月静干戈。
行人耳满新安事，尽是无愁父老歌。

卷 692_63 【乱后书事寄（一作呈）同志】

杜荀鹤

九土如今尽用兵，短戈长戟困书生。思量在世头堪白，

画度归山计未成。皇泽正沾新将士，侯门不是旧公卿。
到头诗卷须藏却，各向渔樵混姓名。

卷 692_64 【中山临上人院观牡丹寄诸从事（一作弟）】

杜荀鹤

闲来吟绕牡丹丛，花艳人生事略同。半雨半风三月内，
多愁多病百年中。开当韶景何妨好，落向僧家即是空。
一境别无唯此有，忍教醒坐对支公。

卷 692_65 【投宣谕张侍郎乱后遇毗陵】

杜荀鹤

此生今日似前生，重著麻衣特地行。经乱后囊新卷轴，
出山来见旧公卿。雨笼蛩壁吟灯影，风触蝉枝噪浪声。
闻道中兴重人物，不妨西去马蹄轻。

卷 692_66 【下第投所知】

杜荀鹤

落第愁生晓鼓初，地寒才薄欲何如。不辞更写公卿卷，

却是难修骨肉书。御苑早莺啼暖树，钓乡春水浸贫居。
拟离门馆东归去，又恐重来事转疏。

卷 692_67 【哭方干】

杜荀鹤

何言寸禄不沾身，身没诗名万古存。况有数篇关教化，
得无余庆及儿孙。渔樵共垒坟三尺，猿鹤同栖月一村。
天下未宁吾道丧，更谁将酒酹吟魂。

卷 692_68 【秋日泊浦江】

杜荀鹤

一帆程歇九秋时，漠漠芦花拂浪飞。寒浦更无船并宿，
暮山时见鸟双归。照云烽火惊离抱，剪叶风霜逼暑衣。
江月渐明汀露湿，静驱吟魄入玄微。

卷 692_69 【白发吟】

杜荀鹤

一茎两茎初似丝，不妨惊度少年时。几人乱世得及此，

今我满头何足悲。九转灵丹那胜酒，五音清乐未如诗。
家山苍翠万余尺，藜杖楮冠输老儿。

卷 692_70 【下第寄池州郑员外】

杜荀鹤

省出蓬蒿修谒初，蒙知曾不见生疏。侯门数处将书荐，
帝里经年借宅居。未必有诗堪讽诵，只怜无援过吹嘘。
如今足得成持取，莫使江湖却钓鱼。

卷 692_71 【塞上】

杜荀鹤

旌旗鬣鬣汉将军，闲出巡边帝命新。沙塞旋收饶帐幕，
犬戎时杀少烟尘。冰河夜渡偷来马，雪岭朝飞猎去人。
独作书生疑不稳，软弓轻剑也随身。

卷 692_72 【赠题兜率寺闲上人院】

杜荀鹤

人间寺应诸天号，真行僧禅此寺中。百岁有涯头上雪，

万般不染耳边风。挂帆波浪惊心白，上马尘埃翳眼红。
毕竟浮生漫劳役，算来何事不成空。

卷 692_73 【别四明钟尚书】

杜荀鹤

九华天际碧嵯峨，无奈春来入梦何。难与英雄论教化，
却思猿鸟共烟萝。风前柳态闲时少，雨后花容淡处多。
都大人生有离别，且将诗句代离歌。

卷 692_74 【题护国大师塔】

杜荀鹤

莫认双林是佛林，禅栖无地亦无金。塔前尽礼灰来相，
衲下谁宗印了心。笠象胤明双不见，线源分派寸难寻。
吾师觉路余知处，大藏经门一夜吟。

卷 692_75 【春日山中对雪有作】

杜荀鹤

竹树无声或有声，霏霏漠漠散还凝。岭梅谢后重妆蕊，

岩水铺来却结冰。牢系鹿儿防猎客，满添茶鼎候吟僧。
好将膏雨同功力，松径莓苔又一层。

卷 692_76 【山中对雪有作】

杜荀鹤

一浑乾坤万象收，唯应不壅大江流。虎狼遇猎难藏迹，
松柏因风易举头。玉帐英雄携妓赏，山村鸟雀共民愁。
岂堪久蔽苍苍色，须放三光照九州。

卷 692_77 【戏题王处士书斋】

杜荀鹤

先生高兴似樵渔，水鸟山猿一处居。石径可行苔色厚，
钓竿时斫竹丛疏。欺春只爱和酩酒，讳老犹看夹注书。
莫道无金空有寿，有金无寿欲何如？

卷 692_78 【早发】

杜荀鹤

东窗未明尘梦苏，呼童结束登征途。落叶铺霜马蹄滑，

寒猿啸月人心孤。时逆帽檐风刮顶，旋呵鞭手冻粘须。
青云快活一未见，争得安闲钓五湖。

卷 692_79 【题仇处士郊居（处士弃官卜居）】

杜荀鹤

江南景簇此林亭，手板蓝裾自可轻。洞里客来无俗话，
郭中人到有公情。闲敲岩果呼猿接，时钓溪鱼引鹤争。
笑我有诗三百首，马蹄红日急于名。

卷 692_80 【依韵次（一作酬）同年张曙先辈见寄之什】

杜荀鹤

天上诗名天下传，引来齐列玉皇前。大仙录后头无雪，
至药成来灶绝烟。笑蹑紫云金作阙，梦抛尘世铁为船。
九华山叟惊凡骨，同到蓬莱岂偶然。

卷 692_81 【乱后逢李昭象叙别】

杜荀鹤

李生李生何所之，家山翠云胡不归。兵戈到处弄性命，

礼乐向人生是非。却与野猿同橡坞，还将溪鸟共渔矶。
也知不是男儿事，争奈时情贱布衣。

卷 692_82 【晚春寄同年张曙先辈】

杜荀鹤

莫将时态破天真，只合高歌醉过春。易落好花三个月，
难留浮世百年身。无金润屋浑闲事，有酒扶头是了人。
恩地未酬闲未得，一回醒话一沾巾。

卷 692_83 【长安春感】

杜荀鹤

出京无计住京难，深入东风转索然。满眼有花寒食下，
一家无信楚江边。此时晴景愁于雨，是处莺声苦却蝉。
公道算来终达去，更从今日望明年。

卷 692_84 【登灵山水阁贻钓者】

杜荀鹤

江上见僧谁是了，修斋补衲日劳身。未胜渔父闲垂钓，

独背斜阳不采人。纵有风波犹得睡，总无蓑笠始为贫。
瓦瓶盛酒瓷瓯酌，荻浦芦湾是要津。

卷 692_85 【赠溧水（一作涟水）崔少府】

杜荀鹤

庭户萧条燕雀喧，日高窗下枕书眠。只闻留客教沽酒，
未省逢人说料钱。洞口礼星披鹤氅，溪头吟月上渔船。
九华山叟心相许，不计官卑赠一篇。

卷 692_86 【读张仆射诗（曹应举，不及第，投笔领郡）】

杜荀鹤

秋吟一轴见心胸，万象搜罗咏欲空。才大却嫌天上桂，
世危翻立阵前功。廉颇解武文无说，谢朓能文武不通。
双美总输张太守，二南章句六钧弓。

卷 692_87 【题所居村舍】

杜荀鹤

家随兵尽屋空存，税额宁容减一分。衣食旋营犹可过，

赋输长急不堪闻。蚕无夏织桑充寨，田废春耕犊劳军。
如此数州谁会得，杀民将尽更邀勋。

卷 692_88 【献钱塘县罗著作判官】

杜荀鹤

还乡夫子遇贤侯，抚字情知不自由。莫把一名专懊恼，
放教双眼绝冤仇。猩袍懒著辞公宴，鹤氅闲披访道流。
犹有九华知己在，羡君高卧早回头。

卷 692_89 【遣怀】

杜荀鹤

驱驰岐路共营营，只为人间利与名。红杏园中终拟醉，
白云山下懒归耕。题桥每念相如志，佩印当期季子荣。
谩道强亲堪倚赖，到头须是有前程。

卷 692_90 【长安道中有作】

杜荀鹤

回头不忍看羸僮，一路行人我最穷。马迹蹇于槐影里，

钓船抛在月明中。帽檐晓滴淋蝉露，衫袖时飘卷雁风。
子细寻思底模样，腾腾又过玉关东。

卷 692_91 【题开元寺门阁】

杜荀鹤

一登高阁眺清秋，满目风光尽胜游。何处画桡寻绿水，
几家鸣笛咽红楼。云山已老应长在，岁月如波只暗流。
唯有禅居离尘俗，了无荣辱挂心头。

卷 692_92 【出关投孙侍御】

杜荀鹤

东归还著旧麻衣，争免花前有泪垂。每岁春光九十日，
一生年少几多时。青云寸禄心耕早，明月仙枝分种迟。
不为感恩酬未得，五湖闲作钓鱼师。

卷 692_93 【送项山人归天台】

杜荀鹤

因话天台归思生，布囊藤杖笑离城。不教日月拘身事，

自与烟萝结野情。龙镇古潭云色黑，露淋秋桧鹤声清。
此中是处堪终隐，何要世人知姓名？

卷 692_94 【题衡阳隐士山居】

杜荀鹤

闲居不问世如何，云起山门日已斜。放鹤去寻三岛客，
任人来看四时花。松醪腊酝安神酒，布水宵煎觅句茶。
毕竟金多也头白，算来争得似君家。

卷 692_95 【题江寺禅和】

杜荀鹤

江寺禅僧似悟禅，坏衣芒履住茅轩。懒求施主修真像，
翻说经文是妄言。出浦钓船惊宿雁，伐岩樵斧迸寒猿。
行人莫问师宗旨，眼不浮华耳不喧。

卷 692_96 【题弟侄书堂】

杜荀鹤

何事居穷道不穷，乱时还与静时同。家山虽在干戈地，

弟侄常修礼乐风。窗竹影摇书案上，野泉声入砚池中。
少年辛苦终身事，莫向光阴惰寸功。

卷 692_97 【和友人寄长林孟明府】

杜荀鹤

为政为人渐见心，长才聊屈宰长林。莫嫌月入无多俸，
须喜秋来不废吟。寒雨旋疏丛菊艳，晚风时动小松阴。
讼庭闲寂公书少，留客看山索酒斟。

卷 692_98 【戏赠渔家】

杜荀鹤

见君生计羨君闲，求食求衣有底难。养一箔蚕供钓线，
种千茎竹作渔竿。葫芦杓酌春浓酒，舴艋舟流夜涨滩。
却笑依家最辛苦，听蝉鞭马入长安。

卷 692_99 【登城有作】

杜荀鹤

上得孤城向晚春，眼前何事不伤神。遍看原上累累冢，

曾是城中汲汲人。尽谓黄金堪润屋，谁思荒骨旋成尘？
一名一宦平生事，不放愁侵易过身。

卷 692_100 【秋日山中寄池州李常侍】

杜荀鹤

近来参谒陡生疏，因向云山僻处居。出为羈孤营粝食，
归同弟侄读生书。风凋古木秋阴薄，月满寒山夜景虚。
但得中兴知己在，算应身未老樵渔。

卷 692_101 【辞杨侍郎】

杜荀鹤

春在门阑秋未离，不因人荐只因诗。半年宾馆成前事，
一日侯门失旧知。霜岛树凋猿叫夜，湖田谷熟雁来时。
西风万里东归去，更把愁心说向谁。

卷 692_102 【题汪氏茅亭】

杜荀鹤

茅亭客到多称奇，茅亭之上难题诗。出尘景物不可状，

小手篇章徒尔为。牛畔稻苗新雨后，鹤边松韵晚风时。
君今酷爱人间事，争得安闲老在兹。

卷 692_103 【喜从弟雪中远至有作】

杜荀鹤

深山大雪懒开门，门径行踪自尔新。无酒御寒虽寡况，
有书供读且资身。便均情爱同诸弟，莫更生疏似外人。
昼短夜长须强学，学成贫亦胜他贫。

卷 692_104 【送僧归国清寺】

杜荀鹤

吟送越僧归海涯，僧行浑不觉程赊。路沿山脚潮痕出，
睡倚松根日色斜。撼锡度冈猿抱树，挈瓶盛浪鹭翘沙。
到参禅后知无事，看引秋泉灌藕花。

卷 692_105 【题汪明府山居】

杜荀鹤

不似当官只似闲，野情终日不离山。方知薄宦难拘束，

多与高人作往还。牛笛漫吹烟雨里，稻苗平入水云间。
羨君公退归欹枕，免向他门厚客颜。

卷 692_106 【下第东归将及故园有作】

杜荀鹤

平生操立有天知，何事谋身与志违。上国献诗还不遇，
故园经乱又空归。山城欲暮人烟敛，江月初寒钓艇归。
且把风寒作闲事，懒能和泪拜庭闱。

卷 692_107 【宿东林寺题愿公院】

杜荀鹤

古寺沈沈僧未眠，支颐将客说闲缘。一溪月色非尘世，
满洞松声似雨天。檐底水涵抄律烛，窗间风引煮茶烟。
无由住得吟相伴，心系青云十五年。

卷 692_108 【山居自遣】

杜荀鹤

茅屋周回松竹阴，山翁时挈酒相寻。无人开口不言利，

只我白头空爱吟。月在钓潭秋睡重，云横樵径野情深。
此中一日过一日，有底闲愁得到心。

卷 692_109 【赠友人罢举赴辟命】

杜荀鹤

连天一水浸吴东，十幅帆飞二月风。好景采抛诗句里，
别愁驱入酒杯中。渔依岸柳眠圆影，鸟傍岩花戏暖红。
不是桂枝终不得，自缘年少好从戎。

卷 692_110 【乱后旅中遇友人】

杜荀鹤

念子为儒道未亨，依依心向十年兄。莫依乱世轻依托，
须学前贤隐姓名。大国未知何日静，旧山犹可入云耕。
不如自此同归去，帆挂秋风一信程。

卷 692_111 【赠休粮僧】

杜荀鹤

自言因病学休粮，本意非求不死方。徒有至人传道术，

更无斋客到禅房。雨中林鸟归巢晚，霜后岩猿拾橡忙。
争似吾师无一事，稳披云衲坐藤床。

卷 692_112 【维扬春日再遇孙侍御】

杜荀鹤

本为荣家不为身，读书谁料转家贫。三年行却千山路，
两地思归一主人。络岸柳丝悬细雨，绣田花朵弄残春。
多情御史应嗟见，未上青云白发新。

卷 692_113 【乱后宿南陵废寺寄沈明府】

杜荀鹤

只共寒灯坐到明，塞鸿冲雪一声声。乱时为客无人识，
废寺吟诗有鬼惊。且把酒杯添志气，已将身事托公卿。
男儿仗剑酬恩在，未肯徒然过一生。

卷 692_114 【投郑先辈】

杜荀鹤

匣中长剑未酬恩，不遇男儿不合论。闷向酒杯吞日月，

闲将诗句问乾坤。宁辞马足劳关路，肯为渔竿忆水村。
两鬓欲斑三百首，更教装写傍谁门。

卷 692_115 【途中有作】

杜荀鹤

无论南北与西东，名利牵人处处同。枕上事仍多马上，
山中心更甚关中。川原晚结阴沈气，草树秋生索漠风。
百岁此身如且健，大家闲作卧云翁。

卷 692_116 【和舍弟题书堂】

杜荀鹤

兄弟将知大自强，乱时同葺读书堂。岩泉遇雨多还闹，
溪竹唯风少即凉。藉草醉吟花片落，傍山闲步药苗香。
团圆便是家肥事，何必盈仓与满箱？

卷 692_117 【送蜀客游维扬】

杜荀鹤

见说西川景物繁，维扬景物胜西川。青春花柳树临水，

白日绮罗人上船。夹岸画楼难惜醉，数桥明月不教眠。
送君懒问君回日，才子风流正少年。

卷 692_118 【旅寓】

杜荀鹤

暗算乡程隔数州，欲归无计泪空流。已违骨肉来时约，
更束琴书何处游？画角引风吹断梦，垂杨和雨结成愁。
去年今日还如此，似与青春有旧仇。

卷 692_119 【途中春】

杜荀鹤

年光身事旋成空，毕竟何门遇至公。人世鹤归双鬓上，
客程蛇绕乱山中。牧童向日眠春草，渔父隈岩避晚风。
一醉未醒花又落，故乡回首楚关东。

卷 692_120 【维扬冬末寄幕中二从事】

杜荀鹤

江上数株桑枣树，自从离乱更荒凉。那堪旅馆经残腊，

只把空书寄故乡。典尽客衣三尺雪，炼精诗句一头霜。
故人多在芙蓉幕，应笑孜孜道未光。

卷 692_121 【辞郑员外入关】

杜荀鹤

男儿三十尚蹉跎，未遂青云一桂科。在客易为销岁月，
到家难住似经过。帆飞楚国风涛润，马度蓝关雨雪多。
长把行藏信天道，不知天道竟如何。

卷 692_122 【书斋即事】

杜荀鹤

时清只合力为儒，不可家贫与善疏。卖却屋边三亩地，
添成窗下一床书。沿溪摘果霜晴后，出竹吟诗月上初。
乡里老农多见笑，不知稽古胜耕锄。

卷 692_123 【雋阳道中】

杜荀鹤

客路客路何悠悠，蝉声向背槐花愁。争知百岁不百岁，

未合白头今白头。四五朵山妆雨色，两三行雁帖云秋。
输他江上垂纶者，只在船中老便休。

卷 692_124 【入关因别舍弟】

杜荀鹤

吾今别汝汝听言，去住人情足可安。百口度荒均食易，
数年经乱保家难。莫愁寒族无人荐，但愿春官把卷看。
天道不欺心意是，帝乡吾土一般般。

卷 692_125 【赠彭蠡钓者】

杜荀鹤

偏坐渔舟出苇林，苇花零落向秋深。只将波上鸥为侣，
不把人间事系心。傍岸歌来风欲起，卷丝眠去月初沈。
若教我似君闲放，赢得湖山到老吟。

卷 692_126 【送友人入关】

杜荀鹤

此去青云莫更疑，出人才行足人知。况当朝野搜贤日，

正是孤寒取士时。仙岛烟霞通鹤信，早春雷雨与龙期。
我今不得同君去，两鬓霜欺桂一枝。

卷 692_127 【送友人宰浔阳】

杜荀鹤

高兴那言去路长，非君不解爱浔阳。有时猿鸟来公署，
到处烟霞是道乡。钓艇满江鱼贱菜，纸窑连岳楮多桑。
陶潜旧隐依稀在，好继高踪结草堂。

卷 692_128 【秋日卧病（一作秋日旅中）】

杜荀鹤

浮世浮名能几何，致身流落向天涯。少年心壮轻为客，
一日病来思在家。山顶老猿啼古木，渡头新雁下平沙。
不堪吟罢西风起，黄叶满庭寒日斜。

卷 692_129 【叙吟】

杜荀鹤

多惭到处有诗名，转觉吟诗僻性成。度水却嫌船著岸，

过山翻恨马贪程。如仇雪月年年景，似梦笙歌处处声。
未合白头今已白，自知非为别愁生。

卷 692_130 【行次荥阳却寄诸弟】

杜荀鹤

难把归书说远情，奉亲多阙拙为兄。早知寸禄荣家晚，
悔不深山共汝耕。枕上算程关月落，帽前搜景岳云生。
如今已作长安计，只得辛勤取一名。

卷 692_131 【登石壁禅师水阁有作】

杜荀鹤

石壁早闻僧说好，今来偏与我相宜。有山有水堪吟处，
无雨无风见景时。渔父晚船分浦钓，牧童寒笛倚牛吹。
画人画得从他画，六幅应输八句诗。

卷 692_132 【赠袒肩和尚】

杜荀鹤

山衣草屐染莓苔，双眼犹慵向俗开。若比吾师居世上，

何如野客卧岩隈？才闻锡杖离三楚，又说随缘向五台。
乘醉吟诗问禅理，为谁须去为谁来？

卷 692_133 【闲居即事】

杜荀鹤

形觉清羸道觉肥，竹门前径静相宜。一壶村酒无求处，
数朵庭花见落时。章句偶为前辈许，话言多被俗人疑。
一枝仙桂如攀得，只此山前是老期。

卷 692_134 【自叙】

杜荀鹤

酒瓮琴书伴病身，熟谙时事乐于贫。宁为宇宙闲吟客，
怕作乾坤窃禄人。诗旨未能忘救物，世情奈值不容真。
平生肺腑无言处，白发吾唐一逸人。

卷 692_135 【空闲二公递以禅律相鄙因而解之】

杜荀鹤

一教谁云辟二途，律禅禅律智归愚。念珠在手隳禅衲，

禅衲披肩坏念珠。象外空分空外象，无中有作有中无。
有无无有师穷取，山到平来海亦枯。

卷 692_136 【寄温州朱尚书并呈军倅崔太博（朱名褒）】

杜荀鹤

永嘉名郡昔推名，连属荀家弟与兄。教化静师龚渤海，
篇章高体谢宣城。山从海岸妆吟景，水自城根演政声。
今日老输崔博士，不妨疏逸伴双旌。

卷 692_137 【恩门致书远及山居因献之】

杜荀鹤

时难转觉保身难，难向师门欲继颜。若把白衣轻易脱，
却成青桂偶然攀。身居剑戟争雄地，道在乾坤未丧间。
必许酬恩酬未晚，且须容到九华山。

卷 692_138 【寄温州崔博士】

杜荀鹤

怀君劳我写诗情，宰宰阴风有鬼听。县宰不仁工部饿，

酒家无识翰林醒。眼昏经史天何在，心尽英雄国未宁。
好向贤侯话吟侣，莫教辜负少微星。

卷 692_139 【李昭象云与二三同人见访有寄】

杜荀鹤

得君书后病颜开，云拉同人访我来。在路不妨冲雨雪，
到山还免踏尘埃。吟沈水阁何宵月，坐破松岩几处苔。
贫舍款宾无别物，止于空战大尊罍。

卷 692_140 【自江西归九华】

杜荀鹤

他乡终日忆吾乡，及到吾乡值乱荒。云外好山看不见，
马头歧路去何忙。无衣织女桑犹小，阙食农夫麦未黄。
许大乾坤吟未了，挥鞭回首出陵阳。

卷 692_141 【和友人见题山居水阁八韵】

杜荀鹤

池阁初成眼豁开，眼前霁景属微才。试攀檐果猿先见，

才把渔竿鹤即来。修竹已多犹可种，艳花虽少不劳栽。
南昌一榻延徐孺，楚国千钟逼老莱。未称执鞭奔紫陌，
惟宜策杖步苍苔。笼禽岂是摩霄翼，润木元非涧下材。
鉴已每将天作镜，陶情常以海为杯。和君诗句吟声大，
虫豸闻之谓蛰雷。

第六百九十三卷

卷 693_1 【感寓】

杜荀鹤

大海波涛浅，小人方寸深。海枯终见底，人死不知心。

卷 693_2 【春闺怨】

杜荀鹤

朝喜花艳春，暮悲花委尘。不悲花落早，悲妾似花身。

卷 693_3 【马上行】

杜荀鹤

五里复五里，去时无住时。日将家渐远，犹恨马行迟。

卷 693_4 【钓叟】

杜荀鹤

茅屋深湾里，钓船横竹门。经营衣食外，犹得弄儿孙。

卷 693_5 【再经胡城县】

杜荀鹤

去岁曾经此县城，县民无口不冤声。
今来县宰加朱绂，便是生灵血染成。

卷 693_6 【读诸家诗】

杜荀鹤

辞赋文章能者稀，难中难者莫过诗。
直应吟骨无生死，只我前身是阿谁。

卷 693_7 【春来燕】

杜荀鹤

我屋汝嫌低不住，雕梁画阁也知宽。

大须稳择安巢处，莫道巢成却不安。

卷 693_8 【清溪来明府出二子请诗因遗一绝】

杜荀鹤

珠明玉润尽惊人，不称寒门不称贫。
若向吾唐作双瑞，便同祥凤与祥麟。

卷 693_9 【哭陈陶】

杜荀鹤

耒阳山下伤工部，采石江边吊翰林。
两地荒坟各三尺，却成开解哭君心。

卷 693_10 【哭贝韬】

杜荀鹤

交朋来哭我来歌，喜傍山家葬荔萝。
四海十年人杀尽，似君埋少不埋多。

卷 693_11 【蚕妇】

杜荀鹤

粉色全无饥色加，岂知人世有荣华。
年年道我蚕辛苦，底事浑身着苧麻。

卷 693_12 【山寺（一作中）老僧】

杜荀鹤

草屨无尘心地闲，静随猿鸟过寒暄。
眼昏齿落看经遍，却向僧中总不言。

卷 693_13 【闽中秋思】

杜荀鹤

雨匀紫菊丛丛色，风弄红蕉叶叶声。
北畔是山南畔海，只堪图画不堪行。

卷 693_14 【八骏图】

杜荀鹤

丹雘传真未得真，那知筋骨与精神。
只今恃骏凭毛色，绿耳骅骝赚杀人。

卷 693_15 【赠僧】

杜荀鹤

利门名路两何凭，百岁风前短焰灯。
只恐为僧僧不了，为僧得了总输僧。

卷 693_16 【秋夕】

杜荀鹤

世间多少能诗客，谁是无愁得睡人？
自我夜来霜月下，到头吟魄始终身。

卷 693_17 【溪兴】

杜荀鹤

山雨溪风卷钓丝，瓦瓯篷底独斟时。
醉来睡着无人唤，流下前溪也不知。

卷 693_18 【过巢湖】

杜荀鹤

世人贪利复贪荣，来向湖边始至诚。
男子登舟与登陆，把心何不一般行。

卷 693_19 【伤硖石县病叟】

杜荀鹤

无子无孙一病翁，将何筋力事耕农。
官家不管蓬蒿地，须勒王租出此中。

卷 693_20 【赠老僧】

杜荀鹤

童子为僧今白首，暗锄心地种闲情。
时将旧衲添新线，披坐披行过一生。

卷 693_21 【钓叟】

杜荀鹤

田不曾耕地不锄，谁人闲散得如渠。
渠将底物为香饵，一度抬竿一个鱼。

卷 693_22 【溪岸秋思】

杜荀鹤

桑柘穷头三四家，挂罾垂钓是生涯。
秋风忽起溪滩白，零落岸边芦荻花。

卷 693_23 【春日旅寓】

杜荀鹤

满城罗绮拖春色，几处笙歌揭画楼。
江上有家归未得，眼前花是眼前愁。

卷 693_24 【田翁】

杜荀鹤

白发星星筋力衰，种田犹自伴孙儿。
官苗若不平平纳，任是丰年也受饥。

卷 693_25 【秋江雨夜逢诗友】

杜荀鹤

故友别来三四载，新诗吟得百余篇。
夜来江上秋无月，恨不相逢在雪天。

卷 693_26 【感春】

杜荀鹤

无况青云有恨身，眼前花似梦中春。
浮生七十今三十，已是人间半世人。

卷 693_27 【题花木障】

杜荀鹤

不假东风次第吹，笔匀春色一枝枝。
由来画看胜栽看，免见朝开暮落时。

卷 693_28 【顾云侍御出二子请诗因遗一绝】

杜荀鹤

二雏毛骨秀仍奇，小小能吟大大诗。
想得月中仙桂树，各从生日长新枝。

卷 693_29 【秋夕病中】

杜荀鹤

坏屋不眠风雨夜，故园无信水云秋。
病中枕上谁相问，一一蝉声槐树头。

卷 693_30 【宿栳城驿却寄常山张书记】

杜荀鹤

一更更尽到三更，吟破离心句不成。
数树秋风满庭月，忆君时复下阶行。

卷 693_31 【湘江秋夕】

杜荀鹤

三湘月色三湘水，浸骨寒光似练铺。
一夜塞鸿来不住，故乡书信半年无。

卷 693_32 【旅怀】

杜荀鹤

蒹葭月冷时闻雁，杨柳风和日听莺。
水涉山行二年客，就中偏怕雨船声。

卷 693_33 【赠崔道士】

杜荀鹤

四海兵戈无静处，人家废业望烽烟。
九华道士浑如梦，犹向尊前笑揭天。

卷 693_34 【题道林寺】

杜荀鹤

身未立间终日苦，身当立后几年荣。
万般不及僧无事，共水将山过一生。

卷 693_35 【赠质上人】

杜荀鹤

棂坐云游出世尘，兼无瓶钵可随身。
逢人不说人间事，便是人间无事人。

卷 693_36 【泾溪】

杜荀鹤

泾溪石险人兢慎，终岁不闻倾覆人。
却是平流无石处，时时闻说有沈沦。

卷 693_37 【夏日题悟空上人院】

杜荀鹤

三伏闭门披一衲，兼无松竹荫房廊。
安禅不必须山水，灭得心中火自凉。

卷 693_38 【经严陵钓台】

杜荀鹤

苍翠云峰开俗眼，泓澄烟水浸尘心。
唯将道业为芳饵，钓得高名直至今。

卷 693_39 【关试后筵上别同人】

杜荀鹤

日午离筵到夕阳，明朝秦地与吴乡。
同年多是长安客，不信行人欲断肠。

卷 693_40 【鸬鹚】

杜荀鹤

一般毛羽结群飞，雨岸烟汀好景时。
深水有鱼衔得出，看来却是鹭鸶饥。

卷 693_41 【宿村舍】

杜荀鹤

野人于我有何情，半掩柴门向月明。
深夜欲眠眠未著，一丛寒木一猿声。

卷 693_42 【题新雁（一作罗邺诗）】

杜荀鹤

暮天新雁起汀洲，红蓼花疏水国秋。
想得故园今夜月，几人相忆在江楼。

卷 693_43 【离家】

杜荀鹤

丈夫三十身如此，疲马离乡懒著鞭。
槐柳路长愁杀我，一枝蝉到一枝蝉。

卷 693_44 【旅舍（一作馆）遇雨】

杜荀鹤

月华星彩坐来收，岳色江声暗结愁。
半夜灯前十年事，一时和雨到心头。

卷 693_45 【送人归淝上】

杜荀鹤

巢湖春涨喻溪深，才过东关见故林。
莫道南来总无利，水亭山寺二年吟。

卷 693_46 【自遣】

杜荀鹤

粝食粗衣随分过，堆金积帛欲如何？
百年身后一丘土，贫富高低争几多。

卷 693_47 【闻子规】

杜荀鹤

楚天空阔月成轮，蜀魄声声似告人。
啼得血流无用处，不如缄口过残春。

卷 693_48 【秋夜苦吟】

杜荀鹤

吟尽三更未著题，竹风松雨花凄凄。
此时若有人来听，始觉巴猿不解啼。

卷 693_49 【秋夜闻砧】

杜荀鹤

荒凉客舍眠秋色，砧杵家家弄月明。
不及巴山听猿夜，三声中有不愁声。

卷 693_50 【将过湖南经马当山庙因书三绝】

杜荀鹤

人说马当波浪险，我经波浪似通衢。
大凡君子行藏是，自有龙神卫过湖。

贪残官吏虔诚谒，毒害商人沥胆过。
只怕马当山下水，不知平地有风波。

九江连海一般深，未必船经庙下沈。
头上苍苍没瞒处，不如平取一生心。

卷 693_51 【梁王坐上赋无云雨（荀鹤初谒朱全忠，雨作而天无行云，全忠曰：“此谓天泣，知何祥？请作无云雨诗。”荀鹤乃赋云云，全忠悦。）】

杜荀鹤

同是乾坤事不同，雨丝飞洒日轮中。
若教阴朗长相似，争表梁王造化功。

卷 693_52 【小松】

杜荀鹤

自小刺头深草里，而今渐觉出蓬蒿。
时人不识凌云木，直待凌云始道高。

卷 693_53 【醉书僧壁】

杜荀鹤

九华山色真堪爱，留得高僧尔许年。
听我吟诗供我酒，不曾穿得判斋钱。

卷 693_54 【寄李隐居】

杜荀鹤

自小栖玄到老闲，如云如鹤住应难。
溪山不必将钱买，赢得来来去去看。

卷 693_55 【句】

杜荀鹤

旧衣灰絮絮，新酒竹箊箊。

只知断送豪家酒，不解安排旅客情。

第六百九十四卷

卷 694_1 【上蜀王】

张道古

封章才达冕旒前，黜诏俄离玉座端。二乱岂由明主用，
五危终被佞臣弹。西巡凤府非为固，东播銮輿卒未安。
谏疏至今如可在，谁能更与读来看？

卷 694_2 【咏雨】

张道古

亢阳今已久，嘉雨自云倾。一点不斜去，极多时下成。

卷 694_3 【杨岐山】

唐廌

逗竹穿花越几村，还从旧路入云门。翠微不闭楼台出，

清吹频回水石喧。天外鹤归松自老，岩间僧逝塔空存。
重来白首良堪喜，朝露浮生不足言。

卷 694_4 【吹笙引】

王穀

娲皇遗音寄玉笙，双成传得何凄清。丹穴娇雏七十只，
一时飞上秋天鸣。水泉迸泻急相续，一束宫商裂寒玉。
旖旎香风绕指生，千声妙尽神仙曲。曲终满席悄无语，
巫山冷碧愁云雨。

卷 694_5 【鸿门宴】

王穀

寰海沸兮争战苦，风云愁兮会龙虎。四百年汉欲开基，
项庄一剑何虚舞。殊不知人心去暴秦，天意归明主。
项王足底踏汉土，席上相看浑未悟。

卷 694_6 【玉树曲】

王穀

陈宫内宴明朝日，玉树新妆逞娇逸。三阁霞明天上开，

灵鼉振播神仙出。天花数朵风吹绽，对舞轻盈瑞香散。
金管红弦旖旎随，霓旌玉佩参差转。璧月夜满楼风轻，
莲舌泠泠词调新。当行狎客尽持禄，直谏犯颜无一人。
歌舞未终乐未阕，晋王剑上粘腥血。君臣犹在醉乡中，
一面已无陈日月。圣唐御宇三百祀，濮上桑间宜禁止。
请停此曲归正声，愿将雅乐调元气。

卷 694_7 【苦热行】

王毂

祝融南来鞭火龙，火旗焰焰烧天红。日轮当午凝不去，
万国如在洪炉中。五岳翠乾云彩灭，阳侯海底愁波竭。
何当一夕金风发，为我扫却天下热。

卷 694_8 【暑日题道边树】

王毂

火轮迸焰烧长空，浮埃扑面愁朦朦。羸童走马喘不进，
忽逢碧树含清风。清风留我移时住，满地浓阴懒前去。
却叹人无及物功，不似团团道边树。

卷 694_9 【红蔷薇歌】

王穀

红霞烂泼猩猩血，阿母瑶池晒仙纈。晚日春风夺眼明，
蜀机锦彩浑疑黦。公子亭台香触人，百花懔懔无精神。
苙罗西子见应妒，风光占断年年新。

卷 694_10 【刺桐花】

王穀

南国清和烟雨辰，刺桐夹道花开新。林梢簇簇红霞烂，
暑天别觉生精神。秾英斗火欺朱槿，栖鹤惊飞翅忧烬。
直疑青帝去匆匆，收拾春风浑不尽。

卷 694_11 【赠苍溪王明府有文在手曰长生】

王穀

执手长生在，人皆号地仙。水云真遂性，龟鹤足齐年。
但以酒养气，何言命在天。况无婚嫁累，应拍尚平肩。

卷 694_12 【逢道者神和子】

王穀

珍重神和子，闻名五十年。童颜终不改，绿发尚依然。
酒里消闲日，人间作散仙。长生如可慕，相逐隐林泉。

卷 694_13 【送友人归闽】

王穀

东南归思切，把酒且留连。再会知何处，相看共黯然。
猿啼梨岭路，月白建溪船。莫恋家乡住，酬身在少年。

卷 694_14 【春草碧色】

王穀

习习东风扇，萋萋草色新。浅深千里碧，高下一时春。
嫩叶舒烟际，微香动水滨。金塘明夕照，辇路惹芳尘。
造化功何广，阳和力自均。今当发生日，沥恳祝良辰。

卷 694_15 【梦仙谣三首】

王毂

前程渐觉风光好，琪花片片粘瑶草。
有人遗我五色丹，一粒吞之后天老。

青童递酒金觞疾，列坐红霞神气逸。
笑说留连数日间，已是人间一千日。

瑶台绛节游皆遍，异果奇花香扑面。
松窗梦觉却神清，残月林前三两片。

卷 694_16 【后魏行】

王毂

力微皇帝谤天嗣，太武凶残人所畏。
一朝羖羊历飞上天，子孙尽作河鱼饵。

卷 694_17 【秋（以下三首一作王睿诗）】

王毂

蝉噪古槐疏叶下，树衔斜日映孤城。

欲知潘鬓愁多少，一夜新添白数茎。

卷 694_18 【燕】

王穀

海燕双飞意若何，曲梁呕嘎语声多。
茅檐不必嫌卑陋，犹胜吴宫燕尔窠。

卷 694_19 【牡丹】

王穀

牡丹妖艳乱人心，一国如狂不惜金。
曷若东园桃与李，果成无语自垂阴。

卷 694_20 【古意二首（拟陈拾遗）】

孙郃

屈子生楚国，七雄知其材。介洁世不容，迹合藏蒿莱。
道废固命也，瓢饮亦贤哉！何事葬江水，空使后人哀。

魏礼段干木，秦王乃止戈。小国有其人，大国奈之何。

贤哲信为美，兵甲岂云多！君子战必胜，斯言闻孟轲。

卷 694_21 【哭方玄英先生】

孙郂

牛斗文星落，知是先生死。湖上闻哭声，门前见弹指。
官无一寸禄，名传千万里。死著弊衣裳，生谁顾朱紫？
我心痛其语，泪落不能已。犹喜韦补阙，扬名荐天子。

卷 694_22 【句】

孙郂

仕宦类商贾，终日常东西。

卷 694_23 【投节度邢公】

褚载

西风昨夜坠红兰，一宿邮亭事万般。无地可耕归不得，
有恩堪报死何难。流年怕老看将老，百计求安未得安。
一卷新书满怀泪，频来门馆诉饥寒。

卷 694_24 【贺赵观文重试及第】

褚载

一枝仙桂两回春。始觉文章可致身。已把色丝要上第，
又将彩笔冠群伦。龙泉再淬方知利，火浣重烧转更新。
今日街头看御榜，大能荣耀苦心人。

卷 694_25 【赠道士】

褚载

簪星曳月下蓬壶。曾见东皋种白榆。六甲威灵藏瑞检，
五龙雷电绕霜都。惟教鹤探丹丘信，不使人窥太乙炉。
闻说葛陂风浪恶，许骑青鹿从行无。

卷 694_26 【晓发】

褚载

贪路贪名须早发，枕前无计暂裴回。才闻鸡唱呼童起，
已有铃声过驿来。衣湿乍惊沾雾露，马行仍未见尘埃。
朝朝陌上侵星去，待得酬身了便回。

卷 694_27 【晓感】

褚载

晓鼓冬冬星汉微，佩金鸣玉斗光辉。出门各自争岐路，
至老何人免是非。大道不应由曲取，浮生还要略知机。
故园华表高高在，可得不如丁令威。

卷 694_28 【南徐晚望】

褚载

芳草铺香晚岸晴，岸头含醉去来行。僧归岳外残钟寺，
日下江边调角城。入浙孤帆知楚信，过淮疏雨带潮声。
如今未免风尘役，宁敢匆匆便濯缨。

卷 694_29 【移石】

褚载

嶙峋一片溪中石，恰称幽人弹素琴。浪漫多年苔色在，
洗来今日磬痕深。磨看粹色何殊玉，敲有奇声直异金。
不是不堪为器用，都缘良匠未留心。

卷 694_30 【瀑布】

褚载

泻雾倾烟撼撼雷，满山风雨助喧豨。
争知不是青天阙，扑下银河一半来。

卷 694_31 【定鼎门】

褚载

邶鄘城高门倚天，九重踪迹尚依然。
须知道德无关锁，一闭乾坤一万年。

卷 694_32 【陈仓驿】

褚载

锦翼花冠安在哉，雄飞雌伏尽尘埃。
一双童子应惆怅，不见真人更猎来。

卷 694_33 【长城】

褚载

秦筑长城比铁牢，蕃戎不敢过临洮。
焉知万里连云色，不及尧阶三尺高。

卷 694_34 【吊秦叟】

褚载

市西楼店金千秤，渭北田园粟万钟。
儿被杀伤妻被虏，一身随驾到三峰。

卷 694_35 【云（一作杜牧诗）】

褚载

尽日看云首不回，无心都大似无才。
可怜光采一片玉，万里晴天何处来。

卷 694_36 【鹤】

褚载

欲洗霜翎下涧边，却嫌菱刺污香泉。
沙鸥浦雁应惊讶，一举扶摇直上天。

卷 694_37 【句】

褚载

相逢多是醉醺然，应有囊中子母钱。
有兴欲沽红曲酒，无人同上翠旌楼。
星斗离披烟霭收，玉蟾蜍耀海东头。
鹿胎冠子水晶簪，长啸欹眠紫桂阴。
蹀躞马摇金络脑，婵娟人坠玉搔头。
狂歌放饮浑成性，知道逍遥出俗笼。
除却洛阳才子后，更谁封恨吊怀沙。

莲浦浪澄堪倚钓，柳堤风暖好垂鞭。

上马等闲销白日，出门轻薄倚黄金。

净名方丈虽然病，曼倩年涯未有多。

卷 694_38 【代寄边人】

郑准

君去不来久，悠悠昏又明。片心因卜解，残梦过桥惊。
圣泽如垂饵，沙场会息兵。凉风当为我，一一送砧声。

卷 694_39 【江南清明】

郑准

吴山楚驿四年中，一见清明一改容。旅恨共风连夜起，
韶光随酒著人浓。延兴门外攀花别，采石江头带雨逢。
无限归心何计是，路边戈甲正重重。

卷 694_40 【题宛陵北楼】

郑准

雨来风静绿芜藓，凭著朱阑思浩然。人语独耕烧后岭，

鸟飞斜没望中烟。松梢半露藏云寺，滩势横流出浦船。
若遣谢宣城不死，必应吟尽夕阳川。

卷 694_41 【寄进士崔鲁范】

郑准

洛阳才子旧交知，别后干戈积咏思。百战市朝千里梦，
三年风月几篇诗。山高雁断音书绝，谷背莺寒变化迟。
会待路宁归得去，酒楼渔浦重相期。

卷 694_42 【云】

郑准

片片飞来静又闲，楼头江上复山前。
飘零尽日不归去，点破清光万里天。

卷 694_43 【句】

郑准

护犊横身立，逢人揭尾跳。

卷 694_44 【游九鲤湖】

陈乘

汗漫乘春至，林峦雾雨生。洞莓黏屐重，岩雪溅衣轻。
窟宅分三岛，烟霞接五城。却怜饶药物，欲辨不知名。

第六百九十五卷

卷 695_1 【章台夜思】

韦庄

清瑟怨遥夜，绕弦风雨哀。孤灯闻楚角，残月下章台。
芳草已云暮，故人殊未来。乡书不可寄，秋雁又南回。

卷 695_2 【延兴门外作】

韦庄

芳草五陵道，美人金犊车。绿奔穿内水，红落过墙花。
马足倦游客，鸟声欢酒家。王孙归去晚，宫树欲栖鸦。

卷 695_3 【刘得仁墓】

韦庄

至公遗至艺，终抱至冤沈。名有诗家业，身无戚里心。

桂和秋露滴，松带夜风吟。冥冥知春否，坟蒿日已深。

卷 695_4 【下第题青龙寺僧房】

韦庄

千蹄万毂一枝芳，要路无媒果自伤。题柱末期归蜀国，
曳裾何处谒吴王？马嘶春陌金羁闹，鸟睡花林绣羽香。
酒薄恨浓消不得，却将惆怅问支郎。

卷 695_5 【虢州涧东村居作】

韦庄

东南骑马出郊垞，回首寒烟隔郡城。清涧涨时翘鹭喜，
绿桑疏处哺牛鸣。儿童见少生于客，奴仆骄多倨似兄。
试望家田还自适，满畦秋水稻苗平。

卷 695_6 【送日本国僧敬龙归】

韦庄

扶桑已在渺茫中，家在扶桑东更东。
此去与师谁共到，一船明月一帆风。

卷 695_7 【对酒】

韦庄

何用岩栖隐姓名，一壶春酎可忘形。
伯伦若有长生术，直到如今醉未醒。

卷 695_8 【尹喜宅】

韦庄

荒原秋殿柏萧萧，何代风烟占寂寥。紫气已随仙仗去，
白云空向帝乡消。蒙蒙暮雨春鸡唱，漠漠寒芜雪兔跳。
欲问灵踪无处所，十洲空阔阆山遥。

卷 695_9 【途中望雨怀归】

韦庄

满空寒雨漫霏霏，去路云深锁翠微。牧竖远当烟草立，
饥禽闲傍渚田飞。谁家树压红榴折，几处篱悬白菌肥。
对此不堪乡外思，荷蓑遥羨钓人归。

卷 695_10 【古离别（一作多情）】

韦庄

晴烟漠漠柳毵毵，不那离情酒半酣。
更把玉鞭云外指，断肠春色在江南。

卷 695_11 【柳谷道中作却寄】

韦庄

马前红叶正纷纷，马上离情断杀魂。晓发独辞残月店，
暮程遥宿隔云村。心如岳色留秦地，梦逐河声出禹门。
莫怪苦吟鞭拂地，有谁倾盖待王孙。

卷 695_12 【灞陵道中作】

韦庄

春桥南望水溶溶，一桁晴山倒碧峰。秦苑落花零露湿，
灞陵新酒拨醅浓。青龙夭矫盘双阙，丹凤褰褰隔九重。
万古行人离别地，不堪吟罢夕阳钟。

卷 695_13 【秋日早行】

韦庄

上马萧萧襟袖凉，路穿禾黍绕宫墙。半山残月露华冷，
一岸野风莲萼香。烟外驿楼红隐隐，渚边云树暗苍苍。
行人自是心如火，兔走乌飞不觉长。

卷 695_14 【叹落花】

韦庄

一夜霏微露湿烟，晓来和泪丧婵娟。不随残雪埋芳草，
尽逐香风上舞筵。西子去时遗笑靥，谢娥行处落金钿。
飘红堕白堪惆怅，少别秣华又隔年。

卷 695_15 【宫怨】

韦庄

一辞同辇闭昭阳，耿耿寒宵禁漏长。钗上翠禽应不返，
镜中红艳岂重芳！萤低夜色栖瑶草，水咽秋声傍粉墙。
展转令人思蜀赋，解将惆怅感君王。

卷 695_16 【关河道中】

韦庄

槐陌蝉声柳市风，驿楼高倚夕阳东。往来千里路长在，
聚散十年人不同。但见时光流似箭，岂知天道曲如弓。
平生志业匡尧舜，又拟沧浪学钓翁。

卷 695_17 【题盘豆驿水馆后轩】

韦庄

极目晴川展画屏，地从桃塞接蒲城。滩头鹭占清波立，
原上人侵落照耕。去雁数行天际没，孤云一点净中生。
冯轩尽日不回首，楚水吴山无限情。

卷 695_18 【梁氏水斋】

韦庄

独醉任腾腾，琴棋亦自能。卷帘山对客，开户犬迎僧。
看蚁移苔穴，闻蛙落石层。夜窗风雨急，松外一庵灯。

卷 695_19 【曲池（一作江）作】

韦庄

细雨曲池滨，青袍草色新。咏诗行信马，载酒喜逢人。
性为无机率，家因守道贫。若无诗自遣，谁奈寂寥春。

卷 695_20 【嘉会里闲居】

韦庄

岂知城阙内，有地出红尘。草占一方绿，树藏千古春。
马嘶游寺客，犬吠探花人。寂寂无钟鼓，槐行接紫宸。

卷 695_21 【夏夜】

韦庄

傍水迁书榻，开襟纳夜凉。星繁愁昼热，露重觉荷香。
蛙吹鸣还息，蛛罗灭又光。正吟秋兴赋，桐景下西墙。

卷 695_22 【早发】

韦庄

早雾浓于雨，田深黍稻低。出门鸡未唱，过客马频嘶。
树色遥藏店，泉声暗傍畦。独吟三十里，城月尚如珪。

卷 695_23 【寓言】

韦庄

黄金日日销还铸，仙桂年年折又生。
兔走乌飞如未息，路尘终见泰山平。

卷 695_24 【对雪献薛常侍】

韦庄

琼林瑶树忽珊珊，急带西风下晚天。皓鹤褰褰飞不辨，
玉山重叠冻相连。松装粉穗临窗亚，水结冰锥簇溜悬。
门外寒光利如剑，莫推红袖诉金船。

卷 695_25 【题裴端公郊居】

韦庄

暂随红旆佐藩方，高迹终期卧故乡。已近水声开涧户，
更侵山色架书堂。蒲生岸脚青刀利，柳拂波心绿带长。
莫夺野人樵牧兴，白云不识绣衣郎。

卷 695_26 【登咸阳县楼望雨】

韦庄

乱云如兽出山前，细雨和风满渭川。
尽日空濛无所见，雁行斜去字联联。

卷 695_27 【贵公子】

韦庄

大道青楼御苑东，玉栏仙杏压枝红。金铃犬吠梧桐月，
朱鬣马嘶杨柳风。流水带花穿巷陌，夕阳和树入帘栊。
瑶池宴罢归来醉，笑说君王在月宫。

卷 695_28 【听赵秀才弹琴】

韦庄

满匣冰泉咽又鸣，玉音闲淡入神清。巫山夜雨弦中起，
湘水清波指下生。蜂簇野花吟细韵，蝉移高柳迸残声。
不须更奏幽兰曲，卓氏门前月正明。

卷 695_29 【观猎】

韦庄

苑墙东畔欲斜晖，傍苑穿花兔正肥。公子喜逢朝罢日，
将军夸换战时衣。鹞翻锦翅云中落，犬带金铃草上飞。
直待四郊高鸟尽，掉鞍齐向国门归。

卷 695_30 【三堂东湖作】

韦庄

满塘秋水碧泓澄，十亩菱花晚镜清。景动新桥横螮蜺，
岸铺芳草睡鸂鶒。蟾投夜魄当湖落，岳倒秋莲入浪生。
何处最添诗客兴，黄昏烟雨乱蛙声。

卷 695_31 【放榜日作】

韦庄

一声开鼓辟金扉，三十仙材上翠微。葛水雾中龙乍变，
缙山烟外鹤初飞。邹阳暖艳催花发，太皞春光簇马归。
回首便辞尘土世，彩云新换六铢衣。

卷 695_32 【寄薛先辈】

韦庄

悬知回日彩衣荣，仙籍高标第一名。瑶树带风侵物冷，
玉山和雨射人清。龙翻瀚海波涛壮，鹤出金笼燕雀惊。
不说文章与门地，自然毛骨是公卿。

卷 695_33 【访含弘山僧不遇留题精舍】

韦庄

满院桐花鸟雀喧，寂寥芳草茂芊芊。吾师正遇归山日，
闲客空题到寺年。池竹闭门教鹤守，琴书开篋任僧传。
人间不自寻行迹，一片孤云在碧天。

卷 695_34 【寄从兄遵】

韦庄

江上秋风正钓鲈，九重天子梦翘车。不将高卧邀刘主，
自吐清谈护汉储。沧海十年龙景断，碧云千里雁行疏。
相逢莫话归山计，明日东封待直庐。

卷 695_35 【渔塘十六韵（在朱阳县石岩下，古老云：洛水一派，流出此山）】

韦庄

洛水分余脉，穿岩出石棱。碧经岚气重，清带露华澄。
莹澈通三岛，岩梧积万层。巢由应共到，刘阮想同登。
壁峻苔如画，山昏雾似蒸。撼松衣有雪，题石砚生冰。
路熟云中客，名留域外僧。饥猿寻落橡，斗鼠堕高藤。
嶮树临溪亚，残莎带岸崩。持竿聊藉草，待月好垂罾。
对景思任父，开图想不兴。晚风轻浪叠，暮雨湿烟凝。
似泛灵槎出，如迎羽客升。仙源终不测，胜概自相仍。
欲别诚堪恋，长归又未能。他时操史笔，为尔著良称。

卷 695_36 【冬日长安感志寄献虢州崔郎中二十韵】

韦庄

帝里无成久滞淹，别家三度见新蟾。郄诜丹桂无人指，
阮籍青襟有泪沾。溪上却思云满屋，镜中惟怕雪生髯。
病如原宪谁能疗，蹇似刘桢岂用占。雾雨十年同隐遁，
风雷何日振沈潜？吁嗟每被更声引，歌咏还因酒思添。
客舍正甘愁寂寂，郡楼遥想醉恹恹。已闻铃阁悬新诏，
即向纶闱副具瞻。济物便同川上楫，慰心还似邑中黔。
观星始觉中郎贵，问俗方知太守廉。宅后绿波栖画鹢，
马前红袖簇丹檐。闲招好客斟香蚁，闷对琼花咏散盐。
积冻慢封寒溜细，暮云高拔远峰尖。讼堂无事冰生印，
水榭高吟月透帘。松下围棋期褚胤，笔头飞箭荐陶谦。
未知匣剑何时跃，但恐铅刀不再铦。虽有远心长拥篲，
耻将新剑学编苫。才惊素节移铜律，又见玄冥变玉签。
百口似萍依广岸，一身如燕恋高檐。如今正困风波力，
更向人中间宋纤。

卷 695_37 【和薛先辈见寄初秋寓怀即事之作二十韵】

韦庄

玉律初移候，清风乍远襟。一声蝉到耳，千炬火然心。
岳静云堆翠，楼高日半沉。引愁憎暮角，惊梦怯残砧。

露白凝湘簟，风篁韵蜀琴。鸟喧从果烂，阶净任苔侵。
柿叶添红景，槐柯减绿阴。采珠逢宝窟，阅石见瑶林。
鲁殿铿寒玉，苔山激碎金。郾堂流桂景，陈巷集车音。
名自张华显，词因葛亮吟。水深龙易失，天远鹤难寻。
鉴貌宁惭乐，论才岂谢任。义心孤剑直，学海怒涛深。
既睹文兼质，翻疑古在今。惭闻纡绿绶，即候挂朝簪。
晚树连秋坞，斜阳映暮岑。夜虫方唧唧，疲马正駸駸。
托迹同吴燕，依仁似越禽。会随仙羽化，香蚁且同斟。

卷 695_38 【同旧韵】

韦庄

大火收残暑，清光渐惹襟。谢庄千里思，张翰五湖心。
暮角迎风急，孤钟向暝沈。露滋三径草，日动四邻砧。
簟委班姬扇，蝉悲蔡琰琴。方愁丹桂远，已怯二毛侵。
螯石回泉脉，移棋就竹阴。触丝蛛堕网，避隼鸟投林。
貌愧潘郎璧，文惭吕相金。但埋酆狱气，未发爨桐音。
静笑刘琨舞，闲思阮籍吟。野花和雨飏，怪石入云寻。
迹竟终非切，幽闲且自任。趋时惭艺薄，托质仰恩深。
美价方稀古，清名已绝今。既闻留缟带，讵肯掷蓍簪。
迟客虚高阁，迎僧出乱岑。壮心徒戚戚，逸足自駸駸。
安羡仓中鼠，危同幕上禽。期君调鼎鼐，他日俟羊斟。

卷 695_39 【三用韵】

韦庄

素律初回驭，商飙暗触襟。乍伤诗客思，还动旅人心。
蝉噪因风断，鳞游见鹭沈。笛声随晚吹，松韵激遥砧。
地覆青袍草，窗横绿绮琴。烟霄难自致，岁月易相侵。
涧柳横孤彀，岩藤架密阴。潇湘期钓侣，鄠杜别家林。
遗愧虞卿璧，言依季布金。铮鏦闻郢唱，次第发巴音。
萤影冲帘落，虫声拥砌吟。楼高思共钓，寺远想同寻。
入夜愁难遣，逢秋恨莫任。蜗游苔径滑，鹤步翠塘深。
莫问荣兼辱，宁论古与今。固穷怜瓮牖，感旧惜蒿簪。
晚日舒霞绮，遥天倚黛岑。鸳鸯方翊翊，骅骝整駸駸。
未化投陂竹，空思出谷禽。感多聊自遣，桑落且闲斟。

卷 695_40 【惊秋】

韦庄

不向烟波狎钓舟，强亲文墨事儒丘。
长安十二槐花陌，曾负秋风多少秋。

卷 695_41 【登汉高庙闲眺】

韦庄

独寻仙境上高原，云雨深藏古帝坛。天畔晚峰青簇簇，
槛前春树碧团团。参差郭外楼台小，断续风中鼓角残。
一带远光何处水，钓舟闲系夕阳滩。

卷 695_42 【耒阳县浮山神庙】

韦庄

一郡皆传此庙灵，庙前松桂古今青。山曾尧代浮洪水，
地有唐臣奠绿醑。绕坐香风吹宝盖，傍檐烟雨湿岩扃。
为霖自可成农岁，何用兴师远伐邢。

卷 695_43 【愁】

韦庄

避愁愁又至，愁至事难忘。夜坐心中火，朝为鬓上霜。
不经公子梦，偏入旅人肠。借问高轩客，何乡是醉乡？

卷 695_44 【村居书事】

韦庄

年年耕与钓，鸥鸟已相依。砌长苍苔厚，藤抽紫蔓肥。
风莺移树啭，雨燕入楼飞。不觉春光暮，绕篱红杏稀。

卷 695_45 【三堂早春】

韦庄

独倚危楼四望遥，杏花春陌马声骄。池边冰刃暖初落，
山上雪棱寒未销。溪送绿波穿郡宅，日移红影度村桥。
主人年少多情味，笑换金龟解珥貂。

第六百九十六卷

卷 696_1 【雨霁晚眺（庚子年冬大驾幸蜀后作）】

韦庄

入谷路萦纡，岩巔日欲晡。岭云寒扫盖，溪雪冻黏须。
卧草跼如兔，听冰怯似狐。仍闻关外火，昨夜彻皇都。

卷 696_2 【立春日作】

韦庄

九重天子去蒙尘，御柳无情依旧春。
今日不关妃妾事，始知辜负马嵬人。

卷 696_3 【赠云阳裴明府】

韦庄

南北三年一解携，海为深谷岸为蹊。已闻陈胜心降汉，

谁为田横国号齐？暴客至今犹战鹤，故人何处尚驱鸡？
归来能作烟波伴，我有鱼舟在五溪。

卷 696_4 【贼中与萧韦二秀才同卧重疾二君寻愈…因有题】

韦庄

与君同卧疾，独我渐弥留。弟妹不知处，兵戈殊未休。
胸中疑晋竖，耳下斗殷牛。纵有秦医在，怀乡亦泪流。

卷 696_5 【重围中逢萧校书】

韦庄

相逢俱此地，此地是何乡？侧目不成语，抚心空自伤。
剑高无鸟度，树暗有兵藏。底事征西将，年年戍洛阳。

卷 696_6 【咸通】

韦庄

咸通时代物情奢，欢杀金张许史家。破产竞留天上乐，
铸山争买洞中花。诸郎宴罢银灯合，仙子游回璧月斜。
人意似知今日事，急催弦管送年华。

卷 696_7 【白樱桃（一作于邺诗）】

韦庄

王母阶前种几株，水精帘外看如无。
只应汉武金盘上，泻得珊珊白露珠。

卷 696_8 【夜景】

韦庄

满庭松桂雨余天，宋玉秋声韵蜀弦。乌兔不知多事世，
星辰长似太平年。谁家一笛吹残暑，何处双砧捣暮烟。
欲把伤心问明月，素娥无语泪娟娟。

卷 696_9 【宿山家】

韦庄

山行侵夜到，云窦一星灯。草动蛇寻穴，枝摇鼠上藤。
背风开药灶，向月展渔罾。明日前溪路，烟萝更几层。

卷 696_10 【长年（一作感怀）】

韦庄

长年方悟少年非，人道新诗胜旧诗。十亩野塘留客钓，
一轩春雨对僧棋。花间醉任黄莺语，亭上吟从白鹭窥。
大盗不将炉冶去，有心重筑太平基。

卷 696_11 【辛丑年】

韦庄

九衢漂杵已成川，塞上黄云战马闲。但有羸兵填渭水，
更无奇士出商山。田园已没红尘里，弟妹相逢白刃间。
西望翠华殊未返，泪痕空湿剑文斑。

卷 696_12 【思归】

韦庄

暖丝无力自悠扬，牵引东风断客肠。外地见花终寂寞，
异乡闻乐更凄凉。红垂野岸樱还熟，绿染回汀草又芳。
旧里若为归去好，子期凋谢吕安亡。

卷 696_13 【忆昔】

韦庄

昔年曾向五陵游，子夜歌清月满楼。银烛树前长似昼，
露桃花里不知秋。西园公子名无忌，南国佳人号莫愁。
今日乱离俱是梦，夕阳唯见水东流。

卷 696_14 【合欢莲花】

韦庄

虞舜南巡去不归，二妃相誓死江湄。
空留万古香魂在，结作双葩合一枝。

卷 696_15 【览萧必先卷】

韦庄

满轴编新句，翛然大雅风。名因五字得，命合一言通。
景尽才难尽，吟终意未终。似逢曹与谢，烟雨思何穷。

卷 696_16 【和人岁宴旅舍见寄】

韦庄

积雪满前除，寒光夜皎如。老忧新岁近，贫觉故交疏。
意合论文后，心降得句初。莫言常郁郁，天道有盈虚。

卷 696_17 【宿泊孟津寄三堂友人】

韦庄

解缆西征未有期，槐花又逼桂花时。鸿胪陌上归耕晚，
金马门前献赋迟。只恐愁苗生两鬓，不堪离恨入双眉。
分明昨夜南池梦，还把渔竿咏楚词。

卷 696_18 【对酒赋（一作赠）友人】

韦庄

多病仍多感，君心自我心。浮生都是梦，浩叹不如吟。
白雪篇篇丽，清酤盏盏深。乱离俱老大，强醉莫沾襟。

卷 696_19 【天井关】

韦庄

太行山上云深处，谁向云中筑女墙？短绠讵能垂玉瓮，
缭垣何用学金汤。劖开岚翠为高垒，截断云霞作巨防。
守吏不教飞鸟过，赤眉何路到吾乡。

卷 696_20 【赠边将】

韦庄

昔因征远向金微，马出榆关一鸟飞。万里只携孤剑去，
十年空逐塞鸿归。手招都护新降虏，身著文皇旧赐衣。
只待烟尘报天子，满头霜雪为兵机。

卷 696_21 【春日】

韦庄

忽觉东风景渐迟，野梅山杏暗芳菲。落星楼上吹残角，
偃月营中挂夕晖。旅梦乱随蝴蝶散，离魂渐逐杜鹃飞。
红尘遮断长安陌，芳草王孙暮不归。

卷 696_22 【早秋夜作】

韦庄

翠簟初清暑半销，撇帘松韵送轻飙。莎庭露永琴书润，
山郭月明砧杵遥。傍砌绿苔鸣蟋蟀，绕檐红树织蟪蛄。
不须更作悲秋赋，王粲辞家鬓已凋。

卷 696_23 【寄江南逐客】

韦庄

二年音信阻湘潭，花下相思酒半酣。
记得竹斋风雨夜，对床孤枕话江南。

卷 696_24 【冬夜】

韦庄

睡觉寒炉酒半消，客情乡梦两遥遥。
无人为我磨心剑，割断愁肠一寸苗。

卷 696_25 【又闻湖南荆渚相次陷没】

韦庄

几时闻唱凯旋歌，处处屯兵未倒戈。天子只凭红旆壮，
将军空恃紫髯多。尸填汉水连荆阜，血染湘云接楚波。
莫问流离南越事，战余空有旧山河。

卷 696_26 【家叔南游却归因献贺】

韦庄

缭绕江南一岁归，归来行色满戎衣。长闻凤诏征兵急，
何事龙韬献捷稀。旅梦远依湘水阔，离魂空伴越禽飞。
遥知倚棹思家处，泽国烟深暮雨微。

卷 696_27 【楚行吟】

韦庄

章华台下草如烟，故郢城头月似弦。
惆怅故宫云雨后，露啼花笑一年年。

卷 696_28 【洛阳吟（时大驾在蜀，巢寇未平，洛中寓居作七言）】

韦庄

万户千门夕照边，开元时节旧风烟。宫官试马游三市，
舞女乘舟上九天。胡骑北来空进主，汉皇西去竟升仙。
如今父老偏垂泪，不见承平四十年。

卷 696_29 【过旧宅】

韦庄

华轩不见马萧萧，廷尉门人久寂寥。朱槛翠楼为卜肆，
玉栏仙杏作春樵。阶前雨落鸳鸯瓦，竹里苔封螭螭桥。
莫问此中销歇寺，娟娟红泪滴芭蕉。

卷 696_30 【喻东军】

韦庄

四年龙驭守峨嵋，铁马西来步步迟。五运未教移汉鼎，
六韬何必待秦师。几时鸾凤归丹阙，到处乌鸢从白旗。
独把一樽和泪酒，隔云遥奠武侯祠。

卷 696_31 【清河县楼作】

韦庄

有客微吟独凭楼，碧云红树不胜愁。盘雕迴印天心没，
远水斜牵日脚流。千里战尘连上苑，九江归路隔东周。
故人此地扬帆去，何处相思雪满头。

卷 696_32 【北原闲眺】

韦庄

春城回首树重重，立马平原夕照中。五凤灰残金翠灭，
六龙游去市朝空。千年王气浮清洛，万古坤灵镇碧嵩。
欲问向来陵谷事，野桃无语泪花红。

卷 696_33 【赠戍兵】

韦庄

汉皇无事暂游汾，底事狐狸啸作群。夜指碧天占晋分，
晓磨孤剑望秦云。红旗不卷风长急，画角闲吹日又曛。
止竟有征须有战，洛阳何用久屯军？

卷 696_34 【睹军回戈】

韦庄

关中群盗已心离，关外犹闻羽檄飞。
御苑绿莎嘶战马，禁城寒月捣征衣。
漫教韩信兵涂地，不及刘琨啸解围。
昨日屯军还夜遁，满车空载洛神归。

卷 696_35 【中渡晚眺】

韦庄

魏王堤畔草如烟，有客伤时独扣舷。
妖气欲昏唐社稷，夕阳空照汉山川。
千重碧树笼春苑，万缕红霞衬碧天。
家寄杜陵归不得，一回回首一潸然。

卷 696_36 【河内别村业闲题】

韦庄

阮氏清风竹巷深，满溪松竹似山阴。
门当谷路多樵客，地带河声足水禽。
闲伴尔曹虽适意，静思吾道好沾襟。
邻翁莫问伤时事，一曲高歌夕照沈。

卷 696_37 【闻官军继至未睹凯旋】

韦庄

嫫姚何日破重围，秋草深来战马肥。已有孔明传将略，
更闻王导得神机。阵前鼙鼓晴应响，城上乌鸢饱不飞。
何事小臣偏注目，帝乡遥羡白云归。

卷 696_38 【和集贤侯学士分司丁侍御秋日雨霁之作】

韦庄

洛岸秋晴夕照长，凤楼龙阙倚清光。玉泉山净云初散，
金谷树多风正凉。席上客知蓬岛路，坐中寒有柏台霜。
多惭十载游梁士，却伴宾鸿入帝乡。

卷 696_39 【题安定张使君】

韦庄

器度风标合出尘，桂宫何负一枝新。成丹始见金无滓，
冲斗方知剑有神。愤气不销头上雪，政声空布海边春。
中兴若继开元事，堪向龙池作近臣。

卷 696_40 【颍阳县】

韦庄

琴堂连少室，故事即仙踪。树老风声壮，山高腊候浓。
雪多庭有鹿，县僻寺无钟。何处留诗客，茆檐倚后峰。

卷 696_41 【寄园林主人】

韦庄

主人常不在，春物为谁开？桃艳红将落，梨华雪又摧。
晓莺闲自啭，游客暮空回。尚有余芳在，犹堪载酒来。

卷 696_42 【洛北村居】

韦庄

十亩松篁百亩田，归来方属大兵年。岩边石室低临水，
云外岚峰半入天。鸟势去投金谷树，钟声遥出上阳烟。
无人说得中兴事，独倚斜晖忆仲宣。

卷 696_43 【对梨花赠皇甫秀才】

韦庄

林上梨花雪压枝，独攀琼艳不胜悲。依前此地逢君处，
还是去年今日时。且恋残阳留绮席，莫推红袖诉金卮。
腾腾战鼓正多事，须信明朝难重持。

卷 696_44 【立春】

韦庄

青帝东来日驭迟，暖烟轻逐晓风吹。罽袍公子樽前觉，
锦帐佳人梦里知。雪圃乍开红菜甲，彩幡新翦绿杨丝。
殷勤为作宜春曲，题向花笺帖绣楣。

卷 696_45 【村笛】

韦庄

箫韶九奏韵凄锵，曲度虽高调不伤。
却见孤村明月夜，一声牛笛断人肠。

卷 696_46 【题李斯传】

韦庄

蜀魄湘魂万古悲，未悲秦相死秦时。
临刑莫恨仓中鼠，上蔡东门去自迟。

卷 696_47 【赠薛秀才】

韦庄

相辞因避世，相见尚兵戈。乱后故人少，别来新话多。
但闻哀痛诏，未睹凯旋歌。欲结岩栖伴，何山好薜萝？

卷 696_48 【和元秀才别业书事】

韦庄

僻居春事好，水曲乱花阴。浪过河移岸，雏成鸟别林。
绿钱榆贯重，红障杏篱深。莫饮宜城酒，愁多醉易沈。

卷 696_49 【纪村事】

韦庄

绿蔓映双扉，循墙一径微。雨多庭果烂，稻熟渚禽肥。
酿酒迎新社，遥砧送暮晖。数声牛上笛，何处饷田归。

卷 696_50 【题许仙师院】

韦庄

地古多乔木，游人到且吟。院开金锁涩，门映绿篁深。
山色不离眼，鹤声长在琴。往来谁与熟，乳鹿住前林。

卷 696_51 【离筵诉酒】

韦庄

感君情重惜分离，送我殷勤酒满卮。
不是不能判酩酊，却忧前路酒醒时。

卷 696_52 【不寐】

韦庄

不寐天将晓，心劳转似灰。
蚊吟频到耳，鼠斗竞缘台。
户闇知蟾落，林喧觉雨来。
马嘶朝客过，知是禁门开。

卷 696_53 【赠武处士】

韦庄

一身唯一室，高静若僧家。
扫地留疏影，穿池浸落霞。
绿萝临水合，白道向村斜。
卖药归来醉，吟诗倚钓查。

卷 696_54 【题吉涧卢拾遗庄】

韦庄

主人西游去不归，满溪春雨长春薇。
怪来马上诗情好，印破青山白鹭飞。

卷 696_55 【题颖源庙】

韦庄

曾是巢由栖隐地，百川唯说颖源清。微波乍向云根吐，
去浪遥冲雪嶂横。万木倚檐疏干直，群峰当户晓岚晴。
临川试问尧年事，犹被封人劝濯缨。

卷 696_56 【东游远归】

韦庄

扣角干名计已疏，剑歌休恨食无鱼。辞家柳絮三春半，
临路桃花七月初。江上欲寻渔父醉，日边时得故人书。
青云不识杨生面，天子何由问子虚。

卷 696_57 【新正日商南道中作寄李明府】

韦庄

相看又见岁华新，依旧杨朱拭泪巾。踏雪偶因寻戴客，
论文还比聚星人。嵩山不改千年色，洛邑长生一路尘。
今日与君同避世，却怜无事是家贫。

卷 696_58 【春暮】

韦庄

一春春事好，病酒起常迟。流水绿萦砌，落花红堕枝。
楼高喧乳燕，树密斗雏鹂。不学山公醉，将何自解颐？

卷 696_59 【哭麻处士】

韦庄

却到歌吟地，闲门草色中。百年流水尽，万事落花空。
繡帐扃秋月，诗楼锁夜虫。少微何处堕，留恨白杨风。

卷 696_60 【春早】

韦庄

闻莺才觉晓，闭户已知晴。一带窗间月，斜穿枕上生。

卷 696_61 【和友人】

韦庄

闭门同隐士，不出动经时。静阅王维画，闲翻褚胤棋。

落泉当户急，残月下窗迟。却想从来意，谯周亦自嗤。

卷 696_62 【春愁】

韦庄

寓思本多伤，逢春恨更长。露沾湘竹泪，花堕越梅妆。
睡怯交加梦，闲倾潋滟觞。后庭人不到，斜月上松篁。

卷 696_63 【晚春】

韦庄

花开疑乍富，花落似初贫。万物不如酒，四时唯爱春。
峨峨秦氏髻，皎皎洛川神。风月应相笑，年年醉病身。

卷 696_64 【题许浑诗卷】

韦庄

江南才子许浑诗，字字清新句句奇。
十斛明珠量不尽，惠休虚作碧云词。

卷 696_65 【赠礼佛名者】

韦庄

何用辛勤礼佛名，我从未得到真庭。
寻思六祖传心印，可是从来读藏经。

卷 696_66 【残花（一作于邺诗）】

韦庄

和烟和露雪离披，金蕊红须尚满枝。

第六百九十七卷

卷 697_1 【上元县（浙西作）】

韦庄

南朝三十六英雄，角逐兴亡尽此中。有国有家皆是梦，
为龙为虎亦成空。残花旧宅悲江令，落日青山吊谢公。
止竟霸图何物在，石麟无主卧秋风。

卷 697_2 【江上逢史馆李学士】

韦庄

前年分袂陕城西，醉凭征轩日欲低。去浪指期鱼必变，
出门回首马空嘶。关河自此为征垒，城阙于今陷战鼙。
谁谓世途陵是谷，燕来还识旧巢泥。

卷 697_3 【金陵图】

韦庄

谁谓伤心画不成，画人心逐世人情。
君看六幅南朝事，老木寒云满故城。

卷 697_4 【谒蒋帝庙】

韦庄

建业城边蒋帝祠，素髯清骨旧风姿。江声似激秦军破，
山势如匡晋祚危。残雪岭头明组练，晚霞檐外簇旌旗。
金陵客路方流落，空祝回銮奠酒卮。

卷 697_5 【闻再幸梁洋】

韦庄

才喜中原息战鼙，又闻天子幸巴西。延烧魏阙非关燕，
大狩陈仓不为鸡。兴庆玉龙寒自跃，昭陵石马夜空嘶。
遥思万里行宫梦，太白山前月欲低。

卷 697_6 【王道者】

韦庄

五云遥指海中央，金鼎曾传肘后方。三岛路岐空有月，
十洲花木不知霜。因携竹杖闻龙气，为使仙童带橘香。
应笑我曹身是梦，白头犹自学诗狂。

卷 697_7 【陪金陵府相中堂夜宴】

韦庄

满耳笙歌满眼花，满楼珠翠胜吴娃。因知海上神仙窟，
只似人间富贵家。绣户夜攒红烛市，舞衣晴曳碧天霞。
却愁宴罢青蛾散，杨子江头月半斜。

卷 697_8 【和侯秀才同友生泛舟溪中相招之作】

韦庄

嵇阮相将棹酒船，晚风侵浪水侵舷。轻如控鲤初离岸，
远似乘槎欲上天。雨外鸟归吴苑树，镜中人入洞庭烟。
凭君不用回舟疾，今夜西江月正圆。

卷 697_9 【赠野童】

韦庄

羡尔无知野性真，乱搔蓬发笑看人。
闲冲暮雨骑牛去，肯问中兴社稷臣。

卷 697_10 【代书寄马】

韦庄

驱驰曾在五侯家，见说初生自渥洼。鬃白似披梁苑雪，
颈肥如扑杏园花。休嫌绿绶嘶贫舍，好著红缨入使衙。
稳上云衢千万里，年年长踏魏堤沙。

卷 697_11 【题淮阴侯庙】

韦庄

满把椒浆奠楚祠，碧幢黄钺旧英威。能扶汉代成王业，
忍见唐民陷战机。云梦去时高鸟尽，淮阴归日故人稀。
如何不借平齐策，空看长星落贼围。

卷 697_12 【送崔郎中往使西川行在】

韦庄

拜书辞玉帐，万里剑关长。新马杏花色，绿袍春草香。
一身朝玉陛，几日过铜梁。莫恋炉边醉，仙宫待侍郎。

卷 697_13 【润州显济阁晓望】

韦庄

清晓水如镜，隔江人似鸥。远烟藏海岛，初日照扬州。
地壮孙权气，云凝庾信愁。一篷何处客，吟凭钓鱼舟。

卷 697_14 【观浙西府相畋游】

韦庄

十里旌旗十万兵，等闲游猎出军城。紫袍日照金鹅斗，
红旆风吹画虎狞。带箭彩禽云外落，避雕寒兔月中惊。
归来一路笙歌满，更有仙娥载酒迎。

卷 697_15 【官庄（江南富民悉以犯酒没家产，因以此诗讽之，浙帅遂改酒法，不入财产）】

韦庄

谁氏园林一簇烟，路人遥指尽长叹。
桑田稻泽今无主，新犯香醪没入官。

卷 697_16 【解维】

韦庄

又解征帆落照中，暮程还过秣陵东。
二年辛苦烟波里，赢得风姿似钓翁。

卷 697_17 【雨霁池上作呈侯学士】

韦庄

鹿巾藜杖葛衣轻，雨歇池边晚吹清。
正是如今江上好，白鳞红稻紫莼羹。

卷 697_18 【寓言】

韦庄

为儒逢世乱，吾道欲何之。学剑已应晚，归山今又迟。
故人三载别，明月两乡悲。惆怅沧江上，星星鬓有丝。

卷 697_19 【哭同舍崔员外】

韦庄

却到同游地，三年一电光。池塘春草在，风烛故人亡。
祭罢泉声急，斋余磬韵长。碧天应有恨，斜日吊松篁。

卷 697_20 【题姑苏凌处士庄】

韦庄

一簇林亭返照间，门当官道不曾关。花深远岸黄莺闹，
雨急春塘白鹭闲。载酒客寻吴苑寺，倚楼僧看洞庭山。
怪来话得仙中事，新有人从物外还。

卷 697_21 【过当涂县】

韦庄

客过当涂县，停车访旧游。谢公山有墅，李白酒无楼。
采石花空发，乌江水自流。夕阳谁共感，寒鹭立汀洲。

卷 697_22 【江亭酒醒却寄维扬饯客】

韦庄

别筵人散酒初醒，江步黄昏雨雪零。
满坐绮罗皆不见，觉来红树背银屏。

卷 697_23 【台城】

韦庄

江雨霏霏江草齐，六朝如梦鸟空啼。
无情最是台城柳，依旧烟笼十里堤。

卷 697_24 【赠渔翁】

韦庄

草衣荷笠鬓如霜，自说家编楚水阳。满岸秋风吹枳橘，
绕陂烟雨种菰蒋。芦刀夜鲙红鳞膩，水甌朝蒸紫芋香。
曾向五湖期范蠡，尔来空阔久相忘。

卷 697_25 【过扬州】

韦庄

当年人未识兵戈，处处青楼夜夜歌。花发洞中春日永，
月明衣上好风多。淮王去后无鸡犬，炀帝归来葬绮罗。
二十四桥空寂寂，绿杨摧折旧官河。

卷 697_26 【寄右省李起居】

韦庄

已向鸳行接雁行，便应双拜紫薇郎。才闻阙下征书急，
已觉回朝草诏忙。白马似怜朱绂贵，彩衣遥惹御炉香。
多惭十载游梁客，未换青襟侍素王。

卷 697_27 【镊白】

韦庄

白发太无情，朝朝镊又生。始因丝一缕，渐至雪千茎。
不避佳人笑，唯惭稚子惊。新年过半百，犹叹未休兵。

卷 697_28 【漳亭驿小樱桃（一作桃花）】

韦庄

当年此树正花开，五马仙郎载酒来。
李白已亡工部死，何人堪伴玉山颓。

卷 697_29 【酬吴秀才雪川相送】

韦庄

一叶南浮去似飞，楚乡云水本无依。离心不忍闻春鸟，
病眼何堪送落晖。掺袂客从花下散，棹舟人向镜中归。
夫君别我应惆怅，十五年来识素衣。

卷 697_30 【对雨独酌】

韦庄

榴花新酿绿于苔，对雨闲倾满满杯。
荷锺醉翁真达者，卧云逋客竟悠哉。
能诗岂是经时策，爱酒原非命世才。
门外绿萝连洞口，马嘶应是步兵来。

卷 697_31 【夏初与侯补阙江南有约同泛淮汴西赴行朝庄…四韵吊之】

韦庄

本约同来谒帝阍，忽随川浪去东奔。
九重圣主方虚席，千里高堂尚倚门。
世德只应荣伯仲，诗名终自付儿孙。
遥怜月落清淮上，寂寞何人吊旅魂。

卷 697_32 【汴堤行】

韦庄

欲上隋堤举步迟，隔云烽燧叫非时。
才闻破虏将休马，又道征辽再出师。
朝见西来为过客，暮看东去作浮尸。
绿杨千里无飞鸟，日落空投旧店基。

卷 697_33 【旅次甬西见儿童以竹枪纸旗戏为阵列…余因感之】

韦庄

已闻三世没军营，又见儿孙学战争。
见尔此言堪恸哭，遣予何日望时平。

卷 697_34 【自孟津舟西上雨中作】

韦庄

秋烟漠漠雨濛濛，不卷征帆任晚风。百口寄安沧海上，
一身逃难绿林中。来时楚岸杨花白，去日隋堤蓼穗红。
却到故园翻似客，归心迢递秣陵东。

卷 697_35 【含山店梦觉作】

韦庄

曾为流离惯别家，等闲挥袂客天涯。
灯前一觉江南梦，惆怅起来山月斜。

卷 697_36 【题貂黄岭官军】

韦庄

散骑萧萧下太行，远从吴会去陈仓。
斜风细雨江亭上，尽日凭栏忆楚乡。

卷 697_37 【过内黄县】

韦庄

相州吹角欲斜阳，匹马摇鞭宿内黄。
僻县不容投刺客，野陂时遇射雕郎。
云中粉堞新城垒，店后荒郊旧战场。
犹指去程千万里，秣陵烟树在何乡。

卷 697_38 【杂感】

韦庄

莫悲建业荆榛满，昔日繁华是帝京。
莫爱广陵台榭好，也曾芜没作荒城。
鱼龙爵马皆如梦，风月烟花岂有情。
行客不劳频怅望，古来朝市叹衰荣。

卷 697_39 【垣县山中寻李书记山居不遇，留题河次店】

韦庄

白云红树绕琅东，名鸟群飞古画中。
仙吏不知何处隐，山南山北雨蒙蒙。

卷 697_40 【送人游并汾】

韦庄

风雨萧萧欲暮秋，独携孤剑塞垣游。
如今虏骑方南牧，莫过阴关第一州。

卷 697_41 【李氏小池亭十二韵】

韦庄

积石乱巉巉，庭莎绿不芟。小桥低跨水，危槛半依岩。
花落鱼争唼，樱红鸟竞鹺。引泉疏地脉，扫絮积山嵌。
古柳红绡织，新篁紫绮缄。养猿秋啸月，放鹤夜栖杉。
枕簟谿云腻，池塘海雨咸。语窗鸡逞辨，舐鼎犬偏馋。
踏藓青黏屐，攀萝绿映衫。访僧舟北渡，赏酒日西衔。
迟客登高阁，题诗绕翠岩。家藏何所宝，清韵满琅函。

卷 697_42 【遣兴】

韦庄

如幻如泡世，多愁多病身。乱来知酒圣，贫去觉钱神。
异国清明节，空江寂寞春。声声林上鸟，唤我北归秦。

卷 697_43 【婺州和陆谏议将赴阙怀阳羡山居】

韦庄

望阙路仍远，子牟魂欲飞。道开烧药鼎，僧寄卧云衣。
故国饶芳草，他山挂夕晖。东阳虽胜地，王粲奈思归。

卷 697_44 【江上题所居】

韦庄

故人相别尽朝天，苦竹江头独闭关。落日乱蝉萧帝寺，
碧云归鸟谢家山。青州从事来偏熟，泉布先生老渐慳。
不是对花长酩酊，永嘉时代不如闲。

卷 697_45 【婺州屏居蒙右省王拾遗车枉降访病中延候不得因成寄谢】

韦庄

三年流落卧漳滨，王粲思家拭泪频。画角莫吹残月夜，
病心方忆故园春。自为江上樵苏客，不识天边侍从臣。
怪得白鸥惊去尽，绿萝门外有朱轮。

卷 697_46 【将卜兰茔村居留别郡中在仕】

韦庄

兰茔江头寄断蓬，移家空载一帆风。伯伦嗜酒还因乱，
平子归田不为穷。避世漂零人境外，结茅依约画屏中。
从今隐去应难觅，深入芦花作钓翁。

卷 697_47 【和陆谏议避地寄东阳进退未决见寄】

韦庄

未归天路紫云深，暂驻东阳岁月侵。入洛声华当世重，
闭门章句满朝吟。开炉夜看黄芽鼎，卧瓮闲欹白玉簪。
读易草玄人不会，忧君心是致君心。

卷 697_48 【山墅闲题】

韦庄

迢迢前冈厌后冈，一川桑柘好残阳。主人馈饷炊红黍，
邻父携竿钓紫鲂。静极却嫌流水闹，闲多翻笑野云忙。
有名不那无名客，独闭衡门避建康。

卷 697_49 【江上逢故人】

韦庄

前年送我曲江西，红杏园中醉似泥。今日逢君越溪上，
杜鹃花发鹧鸪啼。来时旧里人谁在，别后沧波路几迷。
江畔玉楼多美酒，仲宣怀土莫凄凄。

卷 697_50 【旅中感遇寄呈李秘书昆仲】

韦庄

南望愁云锁翠微，谢家楼阁雨霏霏。刘桢病后新诗少，
阮籍贫来好客稀。犹喜故人天外至，许将孤剑日边归。
怀乡不怕严陵笑，只待秋风别钓矶。

卷 697_51 【送范评事入关】

韦庄

寂寥门户寡相亲，日日频来只有君。正喜琴尊长作伴，
忽携书剑远辞群。伤心柳色离亭见，聒耳蝉声故国闻。
为报明年杏园客，与留绝艳待终军。

卷 697_52 【东阳酒家赠别二绝句】

韦庄

送君同上酒家楼，酩酊翻成一笑休。
正是落花饶怅望，醉乡前路莫回头。

天涯方叹异乡身，又向天涯别故人。
明日五更孤店月，醉醒何处泪沾巾。

卷 697_53 【江上村居】

韦庄

本无踪迹恋柴扃，世乱须教识道情。颠倒梦魂愁里得，
撚奇诗句望中生。花缘艳绝栽难好，山为看多咏不成。

闻道汉军新破虏，使来仍说近离京。

卷 697_54 【江外思乡（一作归）】

韦庄

年年春日异乡悲，杜曲黄莺可得知。
更被夕阳江岸上，断肠烟柳一丝丝。

卷 697_55 【和郑拾遗秋日感事一百韵】

韦庄

祸乱天心厌，流离客思伤。有家抛上国，无罪谪遐方。
负笈将辞越，扬帆欲泛湘。避时难驻足，感事易回肠。
雅道何销德，妖星忽耀芒。中原初纵燎，下国竟探汤。
盗据三秦地，兵缠八水乡。战尘轻犯阙，羽旆远巡梁。
自此修文代，俄成讲武场。熊罴驱涿鹿，犀象走昆阳。
御马迷新栈，宫娥改旧妆。五丁功再睹，八难事难忘。
凤引金根疾，兵环玉弩强。建牙虽可恃，摩垒讵能防？
霍庙神遐远，圯桥路杳茫。出师威似虎，御敌狠如羊。
眉画犹思赤，巾裁未厌黄。晨趋鸣铁骑，夜舞挹琼觞。
僭侈彤檐乱，喧呼绣鬓攘。但闻争曳组，讵见学垂缰。
鹄印提新篆，龙泉夺晓霜。军威徒逗挠，我武自维扬。
负扆劳天眷，凝旒念国章。绣旗张画兽，宝马跃红鸯。

但欲除妖气，宁思蔽耿光。晓烟生帝里，夜火入春坊。
鸟怪巢宫树，狐骄上苑墙。设危终在德，视履岂无祥。
气激雷霆怒，神驱岳渎忙。功高分虎节，位下耻龙骧。
遍命登坛将，巡封异姓王。志求扶坠典，力未振颓纲。
汉路闲雕鹗，云衢驻骅骝。宝装军器丽，麝裊战袍香。
日睹兵书捷，时闻虏骑亡。人心惊獬豸，雀意伺螳螂。
上略咸推妙，前锋讵可当。纡金光照耀，执玉意藏昂。
覆餗非无谓，奢华事每详。四民皆组绶，九土堕耕桑。
飞骑黄金勒，香车翠钿装。八珍罗膳府，五采斗筐床。
宴集喧华第，歌钟簇画梁。永期传子姓，宁误犯天狼。
未睹君除侧，徒思玉在傍。窜身奚可保，易地喜相将。
国运方夷险，天心讵测量。九流虽暂蔽，三柄岂相妨。
小孽乖躔次，中兴系昊苍。法尧功已普，罪己德非凉。
帝念惟思理，臣心岂自遑。诏催青琐客，时待紫微郎。
定难输宸算，胜灾减御梁。皇恩思荡荡，睿泽转洋洋。
偃卧虽非晚，艰难亦备尝。舜庭招谏鼓，汉殿上书囊。
俭德遵三尺，清朝俟一匡。世随渔父醉，身效接舆狂。
窜逐同天宝，遭罹异建康。道孤悲海澨，家远隔天潢。
卒岁贫无褐，经秋病泛漳。似鱼甘去乙，比蟹未成筐。
守道惭无补，趋时愧不臧。殷牛常在耳，晋竖欲潜育。
忸恨山思板，怀归海欲航。角吹魂悄悄，笛引泪浪浪。
乱觉乾坤窄，贫知日月长。势将随鹤列，忽喜遇鸳行。
已报新回驾，仍闻近纳隍。文风销剑楯，礼物换旂裳。
紫闼重开序，青衿再设庠。黑头期命爵，赆尾尚忧魴。
吴坂嘶骐驎，岐山集凤凰。词源波浩浩，谏署玉锵锵。
饲雀曾传庆，烹蛇讵有殃。张弓挥劲鏃，匣剑淬神铓。
谔谔宁惭直，堂堂不谢张。晓风趋建礼，夜月直文昌。

去国时虽久，安邦志不常。良金炉自跃，美玉楮难藏。
北望心如旆，西归律变商。迹随江燕去，心逐塞鸿翔。
晚翠笼桑坞，斜晖挂竹堂。路愁千里月，田爱万斯箱。
伴钓歌前浦，随樵上远冈。鹭眠依晚屿，鸟浴上枯杨。
惊梦缘欹枕，多吟为倚廊。访僧红叶寺，题句白云房。
帆外青枫老，尊前紫菊芳。夜灯银耿耿，晓露玉泠泠。
异国惭倾盖，归涂俟并粮。身虽留震泽，心已过雷塘。
执友知谁在，家山各已荒。海边登桂楫，烟外泛云樯。
巢树禽思越，嘶风马恋羌。寒声愁听杵，空馆厌闻蛩。
望阙飞华盖，趋朝振玉珰。米惭无薏苡，面喜有忧榔。
话别心重结，伤时泪一滂。伫归蓬岛后，纶诏润青绡。

卷 697_56 【梦入关】

韦庄

梦中乘传过关亭，南望莲峰簇簇青。
马上正吟归去好，觉来江月满前庭。

卷 697_57 【送人归上国】

韦庄

送君江上日西斜，泣向江边满树花。
若见青云旧相识，为言流落在天涯。

卷 697_58 【闻春鸟】

韦庄

云晴春鸟满江村，还似长安旧日闻。
红杏花前应笑我，我今憔悴亦羞君。

卷 697_59 【樱桃树】

韦庄

记得初生雪满枝，和蜂和蝶带花移。
而今花落游蜂去，空作主人惆怅诗。

卷 697_60 【独鹤】

韦庄

夕阳滩上立裴回，红蓼风前雪翅开。
应为不知栖宿处，几回飞去又飞来。

卷 697_61 【新栽竹】

韦庄

寂寞阶前见此君，绕栏吟罢却沾巾。
异乡流落谁相识，唯有丛篁似主人。

卷 697_62 【稻田】

韦庄

绿波春浪满前陂，极目连云罢亚肥。
更被鹭鸶千点雪，破烟来入画屏飞。

卷 697_63 【庭前菊】

韦庄

为忆长安烂熳开，我今移尔满庭栽。
红兰莫笑青青色，曾向龙山泛酒来。

卷 697_64 【燕来】

韦庄

去岁辞巢别近邻，今来空讶草堂新。
花开对语应相问，不是村中旧主人。

卷 697_65 【倚柴关】

韦庄

杖策无言独倚关，如痴如醉又如闲。
孤吟尽日何人会，依约前山似故山。

卷 697_66 【题七步廊】

韦庄

席门无计那残阳，更接檐前七步廊。
不羨东都丞相宅，每行吟得好篇章。

卷 697_67 【语松竹】

韦庄

庭前芳草绿于袍，堂上诗人欲二毛。
多病不禁秋寂寞，雨松风竹莫骚骚。

第六百九十八卷

卷 698_1 【不出院楚公（自三衢至江西作）】

韦庄

一自禅关闭，心猿日渐驯。不知城郭路，稀识市朝人。
履带阶前雪，衣无寺外尘。却嫌山翠好，诗客往来频。

卷 698_2 【江边吟】

韦庄

江边烽燧几时休，江上行人雪满头。谁信乱离花不见，
只应惆怅水东流。陶潜政事千杯酒，张翰生涯一叶舟。
若有片帆归去好，可堪重倚仲宣楼。

卷 698_3 【江南送李明府入关】

韦庄

雨花烟柳傍江村，流落天涯酒一樽。分首不辞多下泪，

回头唯恐更消魂。我为孟馆三千客，君继宁王五代孙。
正是中兴磐石重，莫将憔悴入都门。

卷 698_4 【送福州王先辈南归】

韦庄

豫章城下偶相逢，自说今方遇至公。八韵赋吟梁苑雪，
六铢衣惹杏园风。名标玉籍仙坛上，家寄闽山画障中。
明日一杯何处别，绿杨烟岸雨蒙蒙。

卷 698_5 【夜雪泛舟游南溪】

韦庄

大江西面小溪斜，入竹穿松似若耶。两岸严风吹玉树，
一滩明月晒银砂。因寻野渡逢渔舍，更泊前湾上酒家。
去去不知归路远，棹声烟里独呕哑。

卷 698_6 【江行西望】

韦庄

西望长安白日遥，半年无事驻兰桡。

欲将张翰秋江雨，画作屏风寄鲍昭。

卷 698_7 【铜仪】

韦庄

铜仪一夜变葭灰，暖律还吹岭上梅。已喜汉官今再睹，
更惊尧历又重开。窗中远岫青如黛，门外长江绿似苔。
谁念闭关张仲蔚，满庭春雨长蒿莱。

卷 698_8 【含香】

韦庄

含香高步已难陪，鹤到清霄势未回。遇物旋添芳草句，
逢春宁滞碧云才。微红几处花心吐，嫩绿谁家柳眼开。
却去金銮为近侍，便辞鸥鸟不归来。

卷 698_9 【春云】

韦庄

春云春水两溶溶，倚郭楼台晚翠浓。山好只因人化石，
地灵曾有剑为龙。官辞凤阙频经岁，家住峨眉第几峰。

王粲不知多少恨，夕阳吟断一声钟。

卷 698_10 【云散】

韦庄

云散天边落照和，关关春树鸟声多。刘伶避世唯沈醉，
甯戚伤时亦浩歌。已恨岁华添皎镜，更悲人事逐颓波。
青云自有鸢鸿待，莫说他山好薜萝。

卷 698_11 【袁州作】

韦庄

家家生计只琴书，一郡清风似鲁儒。山色东南连紫府，
水声西北属洪都。烟霞尽入新诗卷，郭邑闲开古画图。
正是江村春酒熟，更闻春鸟劝提壶。

卷 698_12 【题袁州谢秀才所居】

韦庄

主人年少已能诗，更有松轩挂夕晖。芳草似袍连径合，
白云如鸟傍檐飞。但将竹叶消春恨，莫遣杨花上客衣。

若有前山好烟雨，与君吟到暝钟归。

卷 698_13 【谒巫山庙】

韦庄

乱猿啼处访高唐，路入烟霞草木香。山色未能忘宋玉，
水声犹似哭襄王。朝朝暮暮阳台下，为雨为云楚国亡。
惆怅庙前无限柳，春来空斗画眉长。

卷 698_14 【鹧鸪】

韦庄

南禽无侣似相依，锦翅双双傍马飞。孤竹庙前啼暮雨，
汨罗祠畔吊残晖。秦人只解歌为曲，越女空能画作衣。
懊恼泽家非有恨，年年长忆凤城归。

卷 698_15 【宿蓬船】

韦庄

夜来江雨宿蓬船，卧听淋铃不忍眠。
却忆紫微情调逸，阻风中酒过年年。

卷 698_16 【送李秀才归荆溪】

韦庄

八月中秋月正圆，送君吟上木兰船。人言格调胜玄度，
我爱篇章敌浪仙。晚渡去时冲细雨，夜滩何处宿寒烟。
楚王宫去阳台近，莫倚风流滞少年。

卷 698_17 【洪州送西明寺省上人游福建】

韦庄

记得初骑竹马年，送师来往御沟边。荆榛已失当时路，
槐柳全无旧日烟。远自嵇山游楚泽，又从庐岳去闽川。
新春阙下应相见，红杏花中觅酒仙。

卷 698_18 【建昌渡暝吟】

韦庄

月照临官渡，乡情独浩然。鸟栖彭蠡树，月上建昌船。
市散渔翁醉，楼深贾客眠。隔江何处笛，吹断绿杨烟。

卷 698_19 【岁除对王秀才作】

韦庄

我惜今宵促，君愁玉漏频。岂知新岁酒，犹作异乡身。
雪向寅前冻，花从子后春。到明追此会，俱是隔年人。

卷 698_20 【酒渴爱江清】

韦庄

酒渴何方疗，江波一掬清。泻瓯如练色，漱齿作泉声。
味带他山雪，光含白露精。只应千古后，长称伯伦情。

卷 698_21 【和李秀才郊墅早春吟兴十韵】

韦庄

暖律变寒光，东君景渐长。我悲游海峤，君说住柴桑。
雪色随高岳，冰声陷古塘。草根微吐翠，梅朵半含霜。
酒市多逋客，渔家足夜航。匡庐云傍屋，彭蠡浪冲床。
绿摆杨枝嫩，红挑菜甲香。凤凰城已尽，鹦鹉赋应狂。
伫见龙辞沼，宁忧雁失行。不应双剑气，长在斗牛傍。

卷 698_22 【泛鄱阳湖】

韦庄

四顾无边鸟不飞，大波惊隔楚山微。纷纷雨外灵均过，
瑟瑟云中帝子归。迸鲤似棱投远浪，小舟如叶傍斜晖。
鸱夷去后何人到，爱者虽多见者稀。

卷 698_23 【黄藤山下闻猿】

韦庄

黄藤山下驻归程，一夜号猿吊旅情。入耳便能生百恨，
断肠何必待三声。穿云宿处人难见，望月啼时兔正明。
好笑五陵年少客，壮心无事也沾缨。

卷 698_24 【章江作】

韦庄

杜陵归客正裴回，玉笛谁家叫落梅。之子棹从天外去，
故人书自日边来。杨花慢惹霏霏雨，竹叶闲倾满满杯。
欲问维扬旧风月，一江红树乱猿哀。

卷 698_25 【南游富阳江中作】

韦庄

南去又南去，此行非自期。一帆云作伴，千里月相随。
浪迹花应笑，衰容镜每知。乡园不可问，禾黍正离离。

卷 698_26 【饶州余干县琵琶洲有故韩宾客宣城裴尚书修行…
因以和吟】

韦庄

琵琶洲近斗牛星，鸾凤曾于此放情。已觉地灵因昴降，
更闻川媚有珠生。一滩红树留佳气，万古清弦续政声。
戟户尽移天上去，里人空说旧簪缨。

卷 698_27 【九江逢卢员外】

韦庄

前年风月宿琴堂，大媚仙山近帝乡。别后几沾新雨露，
乱来犹记旧篇章。陶潜岂是铜符吏，田凤终为锦帐郎。
莫怪相逢倍惆怅，九江烟月似潇湘。

卷 698_28 【南昌晚眺】

韦庄

南昌城郭枕江烟，章水悠悠浪拍天。芳草绿遮仙尉宅，
落霞红衬贾人船。霏霏阁上千山雨，嘒嘒云中万树蝉。
怪得地多章句客，庾家楼在斗牛边。

卷 698_29 【衢州江上别李秀才】

韦庄

千山红树万山云，把酒相看日又曛。
一曲离歌两行泪，更知何地再逢君。

卷 698_30 【湘中作】

韦庄

千重烟树万重波，因便何妨吊汨罗。楚地不知秦地乱，
南人空怪北人多。臣心未肯教迁鼎，天道还应欲止戈。
否去泰来终可待，夜寒休唱饭牛歌。

卷 698_31 【桐庐县作】

韦庄

钱塘江尽到桐庐，水碧山青画不如。白羽鸟飞严子濑，
绿蓑人钓季鹰鱼。潭心倒影时开合，谷口闲云自卷舒。
此境只应词客爱，投文空吊木玄虚。

卷 698_32 【东阳赠别】

韦庄

绣袍公子出旌旗，送我摇鞭入翠微。大抵行人难诉酒，
就中辞客易沾衣。去时此地题桥去，归日何年佩印归。
无限别情言不得，回看溪柳恨依依。

卷 698_33 【寄湖州舍弟】

韦庄

半年江上怆离襟，把得新诗喜又吟。多病似逢秦氏药，
久贫如得顾家金。云烟但有穿杨志，尘土多无作吏心。
何况别来词转丽，不愁明代少知音。

卷 698_34 【信州西三十里山名仙人城下有月岩山其状秀拔…
赋是诗】

韦庄

驱车过闽越，路出饶阳西。仙山翠如画，簇簇生虹蜺。
群峰若侍从，众阜如婴提。岩峦互吞吐，岭岫相追携。
中有月轮满，皎洁如圆珪。玉皇恣游览，到此神应迷。
常娥曳霞帔，引我同攀跻。腾腾上天半，玉镜悬飞梯。
瑶池何悄悄，鸾鹤烟中栖。回头望尘世，露下寒凄凄。

卷 698_35 【婺州水馆重阳日作】

韦庄

异国逢佳节，凭高独若吟。一杯今日醉，万里故园心。
水馆红兰合，山城紫菊深。白衣虽不至，鸥鸟自相寻。

卷 698_36 【避地越中作】

韦庄

避世移家远，天涯岁已周。岂知今夜月，还是去年愁。
露果珠沈水，风萤烛上楼。伤心潘骑省，华发不禁秋。

卷 698_37 【抚州江口雨中作】

韦庄

江上闲冲细雨行，满衣风洒绿荷声。
金骝掉尾横鞭望，犹指庐陵半日程。

卷 698_38 【信州溪岸夜吟作】

韦庄

夜倚临溪店，怀乡独苦吟。月当山顶出，星倚水湄沈。
雾气渔灯冷，钟声谷寺深。一城人悄悄，琪树宿仙禽。

卷 698_39 【访浔阳友人不遇】

韦庄

不见安期悔上楼，寂寥人对鹭鸶愁。
芦花雨急江烟暝，何处潺潺独棹舟？

卷 698_40 【东林寺再遇僧益大德】

韦庄

见师初事懿皇朝，三殿归来白马骄。上讲每教倾国听，
承恩偏得内官饶。当时可爱人如画，今日相逢鬓已凋。
若向君门逢旧友，为传音信到云霄。

卷 698_41 【西塞山下作】

韦庄

西塞山前水似蓝，乱云如絮满澄潭。孤峰渐映湓城北，
片月斜生梦泽南。爨动晓烟烹紫蕨，露和香蒂摘黄柑。
他年却棹扁舟去，终傍芦花结一庵。

卷 698_42 【齐安郡】

韦庄

弥棹齐安郡，孤城百战残。傍村林有虎，带郭县无官。
暮角梅花怨，清江桂影寒。黍离缘底事，撩我起长叹。

卷 698_43 【夏口行寄婺州诸弟】

韦庄

回头烟树各天涯，婺女星边远寄家。尽眼楚波连梦泽，
满衣春雪落江花。双双得伴争如雁，一一归巢却羨鸦。
谁道我随张博望，悠悠空外泛仙槎。

卷 698_44 【南省伴直（甲寅年自江南到京后作）】

韦庄

文昌二十四仙曹，尽倚红檐种露桃。一洞烟霞人迹少，
六行槐柳鸟声高。星分夜彩寒侵帐，兰惹春香绿映袍。
何事爱留诗客宿，满庭风雨竹萧骚。

卷 698_45 【鄂杜旧居二首】

韦庄

却到山阳事事非，谷云谿鸟尚相依。阮咸贫去田园尽，
向秀归来父老稀。秋雨几家红稻熟，野塘何处锦鳞肥。
年年为献东堂策，长是芦花别钓矶。

一径寻村渡碧溪，稻花香泽水千畦。云中寺远磬难识，
竹里巢深鸟易迷。紫菊乱开连井合，红榴初绽拂檐低。
归来满把如渑酒，何用伤时叹凤兮。

卷 698_46 【寄江南诸弟】

韦庄

万里逢归雁，乡书忍泪封。吾身不自保，尔道各何从。
性拙唯多蹇，家贫半为慵。只思溪影上，卧看玉华峰。

卷 698_47 【投寄旧知】

韦庄

却将憔悴入都门，自喜青霄足故人。万里有家留百越，
十年无路到三秦。摧残不是当时貌，流落空余旧日贫。
多谢青云好知己，莫教归去重沾巾。

卷 698_48 【癸丑年下第献新先辈】

韦庄

五更残月省墙边，绛旆蜺旌卓晓烟。千炬火中莺出谷，

一声钟后鹤冲天。皆乘骏马先归去，独被羸童笑晚眠。
对酒暂时情豁尔，见花依旧涕潸然。未酬阡泽佣书债，
犹欠君平卖卜钱。何事欲休休不得，来年公道似今年。

卷 698_49 【题汧阳县马跑泉李学士别业】

韦庄

水满寒塘菊满篱，篱边无限彩禽飞。西园夜雨红樱熟，
南亩清风白稻肥。草色自留闲客住，泉声如待主人归。
九霄岐路忙于火，肯恋斜阳守钓矶。

卷 698_50 【绛州过夏留献郑尚书】

韦庄

朝朝沈醉引金船，不觉西风满树蝉。光景暗消银烛下，
梦魂长寄玉轮边。因循每被时流诮，奋发须由国士怜。
明月客肠何处断，绿槐风里独扬鞭。

卷 698_51 【绶州作】

韦庄

雕阴无树水难流，雉堞连云古帝州。带雨晚驼鸣远戍，

· 全唐诗 ·

望乡孤客倚高楼。明妃去日花应笑，蔡琰归时鬓已秋。
一曲单于暮烽起，扶苏城上月如钩。

第六百九十九卷

卷 699_1 【与东吴生相遇（及第后出关作）】

韦庄

十年身事各如萍，白首相逢泪满缨。老去不知花有态，
乱来唯觉酒多情。贫疑陋巷春偏少，贵想豪家月最明。
且对一尊开口笑，未衰应见泰阶平。

卷 699_2 【庭前桃】

韦庄

曾向桃源烂漫游，也同渔父泛仙舟。皆言洞里千株好，
未胜庭前一树幽。带露似垂湘女泪，无言如伴息妫愁。
五陵公子饶春恨，莫引香风上酒楼。

卷 699_3 【丙辰年鄜州遇寒食城外醉吟五首】

韦庄

满街杨柳绿丝烟，画出清明二月天。

好是隔帘花树动，女郎撩乱送秋千。

雕阴寒食足游人，金凤罗衣湿麝薰。
肠断入城芳草路，淡红香白一群群。

开元坡下日初斜，拜扫归来走钿车。
可惜数株红艳好，不知今夜落谁家。

马骄风疾玉鞭长，过去唯留一阵香。
闲客不须烧破眼，好花皆属富家郎。

雨丝烟柳欲清明，金屋人闲暖凤笙。
永日迢迢无一事，隔街闻筑气球声。

卷 699_4 【宜君（一作春）县比卜居不遂，留题王秀才别墅
二首】

韦庄

本期同此卧林丘，榾柮炉前拥布裘。
何事却骑羸马去，白云红树不相留。

明月严霜扑皂貂，羡君高卧正逍遥。
门前积雪深三尺，火满红炉酒满瓢。

卷 699_5 【鄜州留别张员外】

韦庄

江南相送君山下，塞北相逢朔漠中。三楚故人皆是梦，
十年陈事只如风。莫言身世他时异，且喜琴尊数日同。
惆怅却愁明日别，马嘶山店雨蒙蒙。

卷 699_6 【病中闻相府夜宴戏赠集贤卢学士】

韦庄

满筵红蜡照香钿，一夜歌钟欲沸天。花里乱飞金错落，
月中争认绣连乾。尊前莫话诗三百，醉后宁辞酒十千。
无那两三新进士，风流长得饮徒怜。

卷 699_7 【出关】

韦庄

马嘶烟岸柳阴斜，东去关山路转赊。到处因循缘嗜酒，
一生惆怅为判花。危时只合身无著，白日那堪事有涯。
正是灞陵春酬绿，仲宣何事独辞家？

卷 699_8 【过樊川旧居（时在华州驾前奉使入蜀作）】

韦庄

却到樊川访旧游，夕阳衰草杜陵秋。应刘去后苔生阁，
稽阮归来雪满头。能说乱离惟有燕，解偷闲暇不如鸥。
千桑万海无人见，横笛一声空泪流。

卷 699_9 【长安旧里】

韦庄

满目墙匡春草深，伤时伤事更伤心。
车轮马迹今何在，十二玉楼无处寻。

卷 699_10 【过汉陂怀旧】

韦庄

辛勤曾寄玉峰前，一别云溪二十年。三径荒凉迷竹树，
四邻凋谢变桑田。汉陂可是当时事，紫阁空余旧日烟。
多少乱离无处问，夕阳吟罢涕潸然。

卷 699_11 【汧阳间（一作汧阳县阁）】

韦庄

汧水悠悠去似絃，远山如画翠眉横。僧寻野渡归吴岳，
雁带斜阳入渭城。边静不收蕃帐马，地贫惟卖陇山鹦。
牧童何处吹羌笛，一曲梅花出塞声。

卷 699_12 【焦崖阁】

韦庄

李白曾歌蜀道难，长闻白日上青天。
今朝夜过焦崖阁，始信星河在马前。

卷 699_13 【鸡公愤（去褒城县二十里）】

韦庄

石状虽如愤，山形可类鸡。向风疑欲斗，带雨似闻啼。
蔓织青笼合，松长翠羽低。不鸣非有意，为怕客奔齐。

第七百卷

卷 700_1 【平陵老将（此以下诗皆集外补遗）】

韦庄

白羽金仆姑，腰悬双辘轳。前年葱岭北，独战云中胡。
匹马塞垣老，一身如鸟孤。归来辞第宅，却占平陵居。

卷 700_2 【即事】

韦庄

乱世时偏促，阴天日易昏。无言搔白首，憔悴倚东门。

卷 700_3 【姬人养蚕】

韦庄

昔年爱笑蚕家妇，今日辛勤自养蚕。
仍道不愁罗与绮，女郎初解织桑篮。

卷 700_4 【长干塘别徐茂才】

韦庄

乱离时节别离轻，别酒应须满满倾。
才喜相逢又相送，有情争得似无情。

卷 700_5 【勉儿子】

韦庄

养尔逢多难，常忧学已迟。辟疆为上相，何必待从师。

卷 700_6 【乞彩笺歌】

韦庄

浣花溪上如花客，绿闇红藏人不识。留得溪头瑟瑟波，
泼成纸上猩猩色。手把金刀擘彩云，有时剪破秋天碧。
不使红霓段段飞，一时驱上丹霞壁。蜀客才多染不供，
卓文醉后开无力。孔雀衔来向日飞，翩翩压折黄金翼。
我有歌诗一千首，磨砢山岳罗星斗。开卷长疑雷电惊，
挥毫只怕龙蛇走。班班布在时人口，满袖松花都未有。
人间无处买烟霞，须知得自神仙手。也知价重连城璧，

一纸万金犹不惜。薛涛昨夜梦中来，殷勤劝向君边觅。

卷 700_7 【白牡丹】

韦庄

闺中莫妒新妆妇，陌上须惭傅粉郎。
昨夜月明浑似水，入门唯觉一庭香。

卷 700_8 【悯耕者】

韦庄

何代何王不战争，尽从离乱见清平。
如今暴骨多于土，犹点乡兵作戍兵。

卷 700_9 【壶关道中作】

韦庄

处处兵戈路不通，却从山北去江东。
黄昏欲到壶关寨，匹马寒嘶野草中。

卷 700_10 【题酒家】

韦庄

酒绿花红客爱诗，落花春岸酒家旗。
寻思避世为逋客，不醉长醒也是痴。

卷 700_11 【寄舍弟】

韦庄

每吟富贵他人合，不觉洿澜又湿衣。
万里日边乡树远，何年何路得同归？

卷 700_12 【仆者杨金】

韦庄

半年辛苦葺荒居，不独单寒腹亦虚。
努力且为田舍客，他年为尔觅金鱼。

卷 700_13 【春陌二首】

韦庄

满街芳草卓香车，仙子门前白日斜。
肠断东风各回首，一枝春雪冻梅花。

嫩烟轻染柳丝黄，勾引花枝笑凭墙。
马上王孙莫回首，好风偏逐羽林郎。

卷 700_14 【赠姬人】

韦庄

莫恨红裙破，休嫌白屋低。请看京与洛，谁在旧香闺？

卷 700_15 【中酒】

韦庄

南邻酒熟爱相招，蘸甲倾来绿满瓢。
一醉不知三日事，任他童稚作渔樵。

卷 700_16 【暴雨】

韦庄

江村入夏多雷雨，晓作狂霖晚又晴。
波浪不知深几许，南湖今与北湖平。

卷 700_17 【悼亡姬】

韦庄

凤去鸾归不可寻，十洲仙路彩云深。若无少女花应老，
为有姮娥月易沈。竹叶岂能消积恨，丁香空解结同心。
湘江水阔苍梧远，何处相思弄舜琴？

卷 700_18 【独吟（以下四首俱悼亡姬作）】

韦庄

默默无言恻恻悲，闲吟独傍菊花篱。只今已作经年别，
此后知为几岁期。开筐每寻遗念物，倚楼空缀悼亡诗。
夜来孤枕空肠断，窗月斜辉梦觉时。

卷 700_19 【悔恨】

韦庄

六七年来春又秋，也同欢笑也同愁。才闻及第心先喜，
试说求婚泪便流。几为妒来频敛黛，每思闲事不梳头。
如今悔恨将何益，肠断千休与万休。

卷 700_20 【虚席】

韦庄

一闭香闺后，罗衣尽施僧。鼠偷筵上果，蛾扑帐前灯。
土蚀钗无凤，尘生镜少菱。有时还影响，花叶曳香缯。

卷 700_21 【旧居】

韦庄

芳草又芳草，故人杨子家。青云容易散，白日等闲斜。
皓质留残雪，香魂逐断霞。不知何处笛，一夜叫梅花。

卷 700_22 【晏起】

韦庄

尔来中酒起常迟，卧看南山改旧诗。
开户日高春寂寂，数声啼鸟上花枝。

卷 700_23 【幽居春思】

韦庄

绿映红藏江上村，一声鸡犬似山源。
闭门尽日无人到，翠羽春禽满树喧。

卷 700_24 【思归引】

韦庄

越鸟南翔雁北飞，两乡云路各言归。
如何我是飘飘者，独向江头恋钓矶。

卷 700_25 【与小女】

韦庄

见人初解语呕哑，不肯归眠恋小车。
一夜娇啼缘底事，为嫌衣少缕金华。

卷 700_26 【虎迹】

韦庄

白额频频夜到门，水边踪迹渐成群。
我今避世栖岩穴，岩穴如何又见君。

卷 700_27 【买酒不得】

韦庄

停尊待尔怪来迟，手挈空瓶氍毹归。
满面春愁消不得，更看溪鹭寂寥飞。

卷 700_28 【得故人书】

韦庄

正向溪头自采苏，青云忽得故人书。
殷勤问我归来否，双阙而今画不如。

卷 700_29 【洪州送僧游福建】

韦庄

八月风波似鼓鼙，可堪波上各东西。
殷勤早作归来计，莫恋猿声住建溪。

卷 700_30 【闻回戈军】

韦庄

上将麈尾又欲旋，翠华巡幸已三年。
营中不用栽杨柳，愿戴儒冠为控弦。

卷 700_31 【南邻公子】

韦庄

南邻公子夜归声，数炬银灯隔竹明。
醉凭马鬣扶不起，更邀红袖出门迎。

卷 700_32 【忆小女银娘】

韦庄

睦州江上水门西，荡桨扬帆各解携。
今日天涯夜深坐，断肠偏忆阿银犁。

卷 700_33 【女仆阿汪】

韦庄

念尔辛勤岁已深，乱离相失又相寻。
他年待我门如市，报尔千金与万金。

卷 700_34 【河清县河亭】

韦庄

由来多感莫凭高，竟日衷肠似有刀。
人事任成陵与谷，大河东去自滔滔。

卷 700_35 【钟陵夜阑作】

韦庄

钟陵风雪夜将深，坐对寒江独苦吟。
流落天涯谁见问，少卿应识子卿心。

卷 700_36 【悼杨氏妓琴弦】

韦庄

魂归寥廓魄归烟，只住人间十八年。
昨日施僧裙带上，断肠犹系琵琶弦。

卷 700_37 【残花】

韦庄

江头沈醉泥斜晖，却向花前恸哭归。
惆怅一年春又去，碧云芳草两依依。

卷 700_38 【岁晏同左生作】

韦庄

岁暮乡关远，天涯手重携。雪埋江树短，云压夜城低。
宝瑟湘灵怨，清砧杜魄啼。不须临皎镜，年长易凄凄。

卷 700_39 【咸阳怀古】

韦庄

城边人倚夕阳楼，城上云凝万古愁。山色不知秦苑废，
水声空傍汉宫流。李斯不向仓中悟，徐福应无物外游。
莫怪楚吟偏断骨，野烟踪迹似东周。

卷 700_40 【和同年韦学士华下途中见寄】

韦庄

绿杨城郭雨凄凄，过尽千轮与万蹄。送我独游三蜀路，
羡君新上九霄梯。马惊门外山如活，花笑尊前客似泥。
正是清和好时节，不堪离恨剑门西。

卷 700_41 【春愁】

韦庄

自有春愁正断魂，不堪芳草思王孙。
落花寂寂黄昏雨，深院无人独倚门。

卷 700_42 【伤灼灼（灼灼，蜀之丽人也。近闻贫且老，殁落于成都酒市中，因以四韵吊之）】

韦庄

尝闻灼灼丽于花，云髻盘时未破瓜。桃脸曼长横绿水，
玉肌香腻透红纱。多情不住神仙界，薄命曾嫌富贵家。
流落锦江无处问，断魂飞作碧天霞。

卷 700_43 【汉州】

韦庄

比依初到汉州城，郭邑楼台触目惊。松桂影中旌旆色，
芰荷风里管弦声。人心不似经离乱，时运还应却太平。
十日醉眠金雁驿，临岐无恨脸波横。

卷 700_44 【长安清明】

韦庄

蚤是伤春梦雨天，可堪芳草更芊芊。内官初赐清明火，
上相闲分白打钱。紫陌乱嘶红叱拨，绿杨高映画秋千。
游人记得承平事，暗喜风光似昔年。

卷 700_45 【秋霁晚景】

韦庄

秋霁禁城晚，六街烟雨残。墙头山色健，林外鸟声欢。
翹日楼台丽，清风剑佩寒。玉人襟袖薄，斜凭翠阑干。

卷 700_46 【和人春暮书事寄崔秀才】

韦庄

半掩朱门白日长，晚风轻堕落梅妆。不知芳草情何限，
只怪游人思易伤。才见早春莺出谷，已惊新夏燕巢梁。
相逢只赖如渑酒，一曲狂歌入醉乡。

卷 700_47 【古离别（一作多情）】

韦庄

一生风月供惆怅，到处烟花恨别离。
止竟多情何处好，少年长抱少年悲。

卷 700_48 【边上逢薛秀才话旧】

韦庄

前年同醉武陵亭，绝倒闲谭坐到明。也有绛唇歌白雪，
更怜红袖夺金觥。秦云一散如春梦，楚市千烧作故城。
今日皤然对芳草，不胜东望涕交横。

卷 700_49 【饮散呈主人】

韦庄

梦觉笙歌散，空堂寂寞秋。更闻城角弄，烟雨不胜愁。

卷 700_50 【使院黄葵花】

韦庄

薄妆新著淡黄衣，对捧金炉侍醺迟。向月似矜倾国貌，
倚风如唱步虚词。乍开檀炷疑闻语，试与云和必解吹。
为报同人看来好，不禁秋露即离披。

卷 700_51 【摇落】

韦庄

摇落秋天酒易醒，凄凄长似别离情。
黄昏倚柱不归去，肠断绿荷风雨声。

卷 700_52 【奉和观察郎中春暮忆花言怀见寄四韵之什】

韦庄

天畔峨嵋簇簇青，楚云何处隔重扃？落花带雪埋芳草，
春雨和风湿画屏。对酒莫辞冲暮角，望乡谁解倚南亭？
惟君信我多惆怅，只愿陶陶不愿醒。

卷 700_53 【奉和左司郎中春物暗度感而成章】

韦庄

才喜新春已暮春，夕阳吟杀倚楼人。锦江风散霏霏雨，
花市香飘漠漠尘。今日尚追巫峡梦，少年应遇洛川神。
有时自患多情病，莫是生前宋玉身。

卷 700_54 【少年行】

韦庄

五陵豪客多，买酒黄金盞。醉下酒家楼，美人双翠幘。
挥剑邯郸市，走马梁王苑。乐事殊未央，年华已云晚。

卷 700_55 【令狐亭】

韦庄

若非天上神仙宅，须是人间将相家。
想得当时好烟月，管弦吹杀后庭花。

卷 700_56 【闺月】

韦庄

明月照前除，烟华蕙兰湿。清风行处来，白露寒蝉急。
美人情易伤，暗上红楼立。欲言无处言，但向姮娥泣。

卷 700_57 【闺怨】

韦庄

戚戚彼何人，明眸利于月。啼妆晓不干，素面凝香雪。
良人去淄右，镜破金簪折。空藏兰蕙心，不忍琴中说。

卷 700_58 【上春词】

韦庄

曈曈赫日东方来，禁城烟暖蒸青苔。金楼美人花屏开，
晨妆未罢车声催。幽兰报暖紫芽折，天花愁艳蝶飞回。
五陵年少惜花落，酒浓歌极翻如哀。四时轮环终又始，
百年不见南山摧。游人陌上骑生尘，颜子门前吹死灰。

卷 700_59 【捣练篇】

韦庄

月华吐艳明烛烛，青楼妇唱捣衣曲。白袷丝光织鱼目，
菱花绶带鸳鸯簇。临风缥缈叠秋雪，月下丁冬捣寒玉。
楼兰欲寄在何乡，凭人与系征鸿足。

卷 700_60 【杂体联锦】

韦庄

携手重携手，夹江金线柳。江上柳能长，行人恋尊酒。
尊酒意何深，为郎歌玉簪。玉簪声断续，钿轴鸣双轂。
双轂去何方，隔江春树绿。树绿酒旗高，泪痕沾绣袍。

袍缝紫鹅湿，重持金错刀。错刀何灿烂，使我肠千断。
肠断欲何言，帘动真珠繁。真珠缀秋露，秋露沾金盘。
金盘湛琼液，仙子无归迹。无迹又无言，海烟空寂寂。
寂寂古城道，马嘶芳岸草。岸草接长堤，长堤人解携。
解携忽已久，缅邈空回首。回首隔天河，恨唱莲塘歌。
莲塘在何许，日暮西山雨。

卷 700_61 【长安春】

韦庄

长安二月多香尘，六街车马声辘辘。家家楼上如花人，
千枝万枝红艳新。帘间笑语自相问，何人占得长安春？
长安春色本无主，古来尽属红楼女。如今无奈杏园人，
骏马轻车拥将去。

卷 700_62 【抚盈歌】

韦庄

凤穀兮鸳绡，霞疏兮绮寮。玉庭兮春昼，金屋兮秋宵。
愁瞳兮月皎，笑颊兮花娇。罗轻兮浓麝，室暖兮香椒。
銮輿去兮萧屑，七丝断兮沈寥，主父卧兮漳水，
君王幸兮云韶。铅华宵窕兮秾姿，棠公肸蚩兮靡依。
翠华长逝兮莫追，晏相望兮空悲。

卷 700_63 【赠峨嵋山弹琴李处士】

韦庄

峨嵋山下能琴客，似醉似狂人不测。何须见我眼偏青，
未见我身头已白。茫茫四海本无家，一片愁云飏秋碧。
壶中醉卧日月明，世上长游天地窄。晋朝叔夜旧相知，
蜀郡文君小来识。后生常建彼何人，赠我篇章苦雕刻。
名卿名相尽知音，遇酒遇琴无间隔。如今世乱独翛然，
天外鸿飞招不得。余今正泣杨朱泪，八月边城风刮地。
霓旌绛旆忽相寻，为我尊前横绿绮。一弹猛雨随手来，
再弹白雪连天起。凄凄清清松上风，咽咽幽幽陇头水。
吟蜂绕树去不来，别鹤引雏飞又止。锦麟不动惟侧头，
白马仰听空竖耳。广陵故事无人知，古人不说今人疑。
子期子野俱不见，乌啼鬼哭空伤悲。坐中词客悄无语，
帘外月华庭欲午。为君吟作听琴歌，为我留名系仙谱。

卷 700_64 【江皋赠别】

韦庄

金管多情恨解携，一声歌罢客如泥。江亭系马绿杨短，
野岸维舟春草齐。帝子梦魂烟水阔，谢公诗思碧云低，
风前不用频挥手，我家山白日西。

卷 700_65 【南阳小将张彦硖口镇税人场射虎歌（一作白居易诗）】

韦庄

海内昔年狎太平，横目穰穰何峥嵘。天生天杀岂天怒，
忍使朝朝喂猛虎。关东驿路多丘荒，行人最忌税人场。
张彦雄特制残暴，见之叱起如叱羊。鸣弦霹雳越幽阻，
往往依林犹抵拒。草际旋看委锦茵，腰间不更抽白羽。
老饕已毙众雏恐，童稚揶揄皆自勇。忠良效顺势亦然，
一剑猜狂敢轻动。有文有武方为国，不是英雄伏不得。
试征张彦作将军，几个将军愿策勋？

卷 700_66 【下邳感旧（《太平广记》云：庄幼时常在华州下邳县侨居，多与邻巷诸儿会戏。及广明乱后，再经旧里，追思往事，但在遣踪，因赋诗以记之）】

韦庄

昔为童稚不知愁，竹马闲乘绕县游。曾为看花偷出郭，
也因逃学暂登楼。招他邑客来还醉，僂得先生去始休。
今日故人何处问，夕阳衰草尽荒丘。

卷 700_67 【涂次逢李氏兄弟感旧】

韦庄

御沟西面朱门宅，记得当时好弟兄。晓傍柳阴骑竹马，
夜隈灯影弄先生。巡街趁蝶衣裳破，上屋探雏手脚轻。
今日相逢俱老大，忧家忧国尽公卿。

卷 700_68 【龙潭（一作僧应物诗）】

韦庄

激石悬流雪满湾，九龙潜处野云闲。欲行甘雨四天下，
且隐澄潭一顷间。浪引浮槎依北岸，波分晚日见东山。
垂髯傥遇穆王驾，阆苑周流应未还。

卷 700_69 【江上别李秀才】

韦庄

前年相送灞陵春，今日天涯各避秦。
莫向尊前惜沈醉，与君俱是异乡人。

卷 700_70 【句】

韦庄

印将金锁锁，帘用玉钩钩。

不随妖艳开，独媚玄冥节。

岂是为穷常见隔，只应嫌酒不相过。

第七百零一卷

卷 701_1 【拟塞外征行】

王贞白

寇骑满鸡田，都护欲临边。青泥方绝漠，怀剑始辞燕。
旌旗挂龙虎，壮士募鹰鹳。长城威十万，高岭奋三千。
行行向马邑，去去指祁连。鼓声遥赤塞，兵气远冲天。
对阵云初上，临城月始悬。风惊烽易灭，沙暗马难前。
恩重恒思报，劳心屡损年。微功一可立，身轻不自怜。

卷 701_2 【芦苇】

王贞白

高士想江湖，湖闲庭植芦。清风时有至，绿竹兴何殊。
嫩喜日光薄，疏忧雨点粗。惊蛙跳得过，斗雀袅如无。
未织巴篱护，几抬邛竹扶。惹烟轻薄柳，蘸水漱清蒲。
溉灌情偏重，琴樽赏不孤。穿花思钓叟，吹叶少羌雏。
寒色暮天映，秋声远籁俱。朗吟应有趣，潇洒十余株。

卷 701_3 【田舍曲】

王贞白

古今利名路，只在依门前。至老不离家，一生常晏眠。
牛羊晚自归，儿童戏野田。岂思封侯贵，唯只待丰年。
征赋岂辞苦，但愿时苟贤。时官苟贪浊，田舍生忧煎。

卷 701_4 【妾薄命】

王贞白

薄命头欲白，频年嫁不成。秦娥未十五，昨夜事公卿。
岂有机杼力，空传歌舞名。妾专修妇德，媒氏却相轻。

卷 701_5 【湘妃怨】

王贞白

舜欲省蛮貊，南巡非逸游。九江沉白日，二女泣沧洲。
目极楚天断，恨深湘水流。至今闻鼓瑟，咽绝不胜愁。

卷 701_6 【长门怨二首】

王贞白

寂寞故宫春，残灯晓尚存。从来非妾过，偶尔失君恩。
花落伤容鬓，莺啼惊梦魂。翠华如可待，应免老长门。

叶落长门静，苔生永巷幽。相思对明月，独坐向空楼。
銮驾迷终转，蛾眉老自愁。昭阳歌舞伴，此夕未知秋。

卷 701_7 【有所思（一作长相思）】

王贞白

芙蓉出水时，偶尔便分离。自此无因见，长教挂所思。
残春不入梦，芳信欲传谁。寂寞秋堂下，空吟小谢诗。

卷 701_8 【短歌】

王贞白

物候来相续，新蝉送晚莺。百年休倚赖，一梦甚分明。
金鼎神仙隐，铜壶昼夜倾。不如早立德，万古有其名。

卷 701_9 【御沟水】

王贞白

一带御沟水，绿槐相荫清。此中涵帝泽，无处濯尘缨。
鸟道来虽险，龙池到自平。朝宗本心切，愿向急流倾。

卷 701_10 【少年行二首】

王贞白

游宴不知厌，杜陵狂少年。花时轻暖酒，春服薄装绵。
戏马上林苑，斗鸡寒食天。鲁儒甘被笑，对策鬓皤然。
弱冠投边急，驱兵夜渡河。追奔铁马走，杀虏宝刀讹。
威静黑山路，气含清海波。常闻为突骑，天子赐长戈。

卷 701_11 【塞上曲】

王贞白

岁岁但防虏，西征早晚休。匈奴不系颈，汉将但封侯。
夕照低烽火，寒笳咽戍楼。燕然山上字，男子见须羞。

卷 701_12 【长安道】

王贞白

晓鼓人已行，暮鼓人未息。梯航万国来，争先贡金帛。
不问贤与愚，但论官与职。如何贫书生，只献安边策。

卷 701_13 【洛阳道】

王贞白

喧喧洛阳路，奔走争先步。唯恐著鞭迟，谁能更回顾？
覆车虽在前，润屋何曾惧？贤哉只二疏，东门挂冠去。

卷 701_14 【度关山】

王贞白

只领千余骑，长驱碛邑间。云州多警急，雪夜度关山。
石响铃声远，天寒弓力悭。秦楼休怅望，不日凯歌还。

卷 701_15 【出自蓟北门行】

王贞白

蓟北连极塞，塞色昼冥冥。战地骸骨满，长时风雨腥。
沙河留不定，春草冻难青。万户封侯者，何谋静虏庭。

卷 701_16 【从军行】

王贞白

从军朔方久，未省用干戈。只以恩信及，自然戎虏和。
边声动白草，烧色入枯河。每度因看猎，令人勇气多。

卷 701_17 【古悔从军行】

王贞白

忆昔仗孤剑，十年从武威。论兵亲玉帐，逐虏过金微。
陇水秋先冻，关云寒不飞。辛勤功业在，麟阁志犹违。

卷 701_18 【胡笳曲】

王贞白

陇底悲笳引，陇头鸣北风。一轮霜月落，万里塞天空。
戍卒泪应尽，胡儿哭未终。争教班定远，不念玉关中。

卷 701_19 【入（一作出）塞】

王贞白

玉殿论兵事，君王诏出征。新除羽林将，曾破月支兵。
惯历塞垣险，能分部落情。从今一战胜，不使虏尘生。

卷 701_20 【游仙】

王贞白

我家三岛上，洞户眺波涛。醉背云屏卧，谁知海日高？
露香红玉树，风绽碧蟠桃。悔与仙子别，思归梦钓鳌。

卷 701_21 【歌（一作凉州行）】

王贞白

谁唱关西曲，寂寞夜景深。一声长在耳，万恨重经心。
调古清风起，曲终凉月沉。却应筵上客，未必是知音。

卷 701_22 【经故洛城】

王贞白

卜世何久远，由来仰圣明。山河徒自壮，周召不长生。
几主任奸谄，诸侯各战争。但余崩垒在，今古共伤情。

卷 701_23 【金陵（一本同下题作二首）】

王贞白

六代江山在，繁华古帝都。乱来城不守，战后地多芜。
寒日随潮落，归帆与鸟孤。兴亡多少事，回首一长吁。

卷 701_24 【金陵怀古】

王贞白

恃险不种德，兴亡叹数穷。石城几换主，天堑谩连空。
御路叠民冢，台基聚牧童。折碑犹有字，多记晋英雄。

卷 701_25 【商山】

王贞白

商山名利路，夜亦有人行。四皓卧云处，千秋叠藓生。
昼烧笼涧黑，残雪隔林明。我待酬恩了，来听水石声。

卷 701_26 【庐山】

王贞白

岳立镇南楚，雄名天下闻。五峰高阁日，九叠翠连云。
夏谷雪犹在，阴岩昼不分。唯应嵩与华，清峻得为群。

卷 701_27 【终南山】

王贞白

终朝异五岳，列翠满长安。地去搜扬近，人谋隐遁难。
水穿诸苑过，雪照一城寒。为问红尘里，谁同驻马看？

卷 701_28 【寄郑谷】

王贞白

五百首新诗，缄封寄去时。只凭夫子鉴，不要俗人知。
火鼠重收布，冰蚕乍吐丝。直须天上手，裁作领巾披。

卷 701_29 【题严陵钓台】

王贞白

山色四时碧，溪声七里清。严陵爱此景，下视汉公卿。
垂钓月初上，放歌风正轻。应怜渭滨叟，匡国王论兵。

卷 701_30 【晓泊汉阳渡】

王贞白

落月临古渡，武昌城未开。残灯明市井，晓色辨楼台。
云自苍梧去，水从嶓冢来。芳洲号鹦鹉，用记祢生才。

卷 701_31 【随计】

王贞白

徒步随计吏，辛勤鬓易凋。归期无定日，乡思满回潮。
冒雨投前驿，侵星过断桥。何堪穆陵路，霜叶更潇潇。

卷 701_32 【白牡丹】

王贞白

谷雨洗纤素，裁为白牡丹。异香开玉合，轻粉泥银盘。
晓贮露华湿，宵倾月魄寒。家人淡妆罢，无语倚朱栏。

卷 701_33 【述松】

王贞白

远谷呈材干，何由入栋梁？岁寒虚胜竹，功绩不如桑。
秋露落松子，春深裊嫩黄。虽蒙匠者顾，樵采日难防。

卷 701_34 【宫池产瑞莲（帖经日试）】

王贞白

雨露及万物，嘉祥有瑞莲。香飘鸡树近，荣占凤池先。
驿日临双丽，恩波照并妍。愿同指佞草，生向帝尧前。

卷 701_35 【送友人南归】

王贞白

南国菖蒲老，知君忆钓船。离京近残暑，归路有新蝉。
岘首白云起，洞庭秋月悬。若教吟兴足，西笑是何年。

卷 701_36 【送马明府归山】

王贞白

辞秩入匡庐，重修靖节居。免遭黑绶束，不与白云疏。
送吏各献酒，群儿自担书。到时看瀑布，为我谢清虚。

卷 701_37 【送韩从事归本道】

王贞白

献捷灵州倅，归时宠拜新。论边多称旨，许国誓亡身。
马渴黄河冻，雁回青冢春。到蕃唯促战，应不肯和亲。

卷 701_38 【秋日旅怀寄右省郑拾遗】

王贞白

永夕愁不寐，草虫喧客庭。半窗分晓月，当枕落残星。
鬓发游梁白，家山近越青。知音在谏省，苦调有谁听？

卷 701_39 【赠刘凝评事】

王贞白

棘寺官初罢，梁园静掩扉。春深颜子巷，花映老莱衣。
谈史曾无滞，攻书已造微。即膺新宠命，称庆向庭闱。

卷 701_40 【忆张处士】

王贞白

天台张处士，诗句造玄微。古乐知音少，名言与俗违。
山风入松径，海月上岩扉。毕世唯高卧，无人说是非。

卷 701_41 【云居长老】

王贞白

巘路蹑云上，来参出世僧。松高半岩雪，竹覆一溪冰。
不说有为法，非传无尽灯。了然方寸内，应只见南能。

卷 701_42 【洗竹】

王贞白

道院竹繁教略洗，鸣琴酌酒看扶疏。不图结实来双凤，
且要长竿钓巨鱼。锦箨裁冠添散逸，玉芽修饌称清虚。
有时记得三天事，自向琅玕节下书。

卷 701_43 【庾楼晓望】

王贞白

独凭朱槛亦凌晨，山色初明水色新。竹雾晓笼衔岭月，
蘋风暖送过江春。子城阴处犹残雪，衙鼓声前未有尘。
三百年来庾楼上，曾经多少望乡人。

卷 701_44 【送芮尊师】

王贞白

石上菖蒲节节灵，先生服食得长生。早知避世忧身老，
近日登山觉步轻。黄鹤待传蓬岛信，丹书应换蕊宫名。
他年控鲤升天去，庐岳逋民愿从行。

卷 701_45 【折杨柳三首（一作段成式诗）】

王贞白

枝枝交影锁长门，嫩色曾沾雨露恩。
凤辇不来春欲尽，空留莺语到黄昏。

水殿年年占早芳，柔条风里御炉香。
如今万乘多巡狩，辇路无阴绿草长。

嫩叶初齐不耐寒，风和时拂玉栏干。
征人去日曾攀折，泣雨伤春翠黛残。

卷 701_46 【远闻本郡行春到旧山二首】

王贞白

一身从宦留京邑，五马遥闻到旧山。
已领烟霞光野径，深惭老幼候柴关。

清风借响松筠外，画隼停晖水石间。
定掩溪名在图传，共知轩盖此登攀。

卷 701_47 【宿新安村步】

王贞白

淅淅寒流涨浅沙，月明空渚遍芦花。
离人偶宿孤村下，永夜闻砧一两家。

卷 701_48 【仙岩二首】

王贞白

白烟昼起丹灶，红叶秋书篆文。
二十四岩天上，一鸡啼破晴云。

风呼山鬼服役，月照衡薇结花。
江暖客寻瑶草，洞深人咽丹霞。

卷 701_49 【雨后从陶郎中登庾楼】

王贞白

庾楼逢霁色，夏日欲西曛。虹截半江雨，风驱大泽云。
岛边渔艇聚，天畔鸟行分。此景堪谁画，文翁请缀文。

卷 701_50 【九日长安作】

王贞白

无酒泛金菊，登高但忆秋。归心随旅雁，万里在沧洲。
残照明天阙，孤砧隔御沟。谁能思落帽，两鬓已添愁。

卷 701_51 【晓发萧关】

王贞白

早发长风里，边城曙色间。数鸿寒背碛，片月落临关。
陇上明星没，沙中夜探还。归程不可问，几日到家山？

卷 701_52 【钓台】

王贞白

异代有巢许，方知严子情。旧交虽建国，高卧不求荣。
溪鸟寒来浴，汀兰暖重生。何颜吟过此，辛苦得浮名。

卷 701_53 【寄天台叶尊师】

王贞白

师住天台久，长闻过石桥。晴峰见沧海，深洞彻丹霄。
采药霞衣湿，煎芝古鼎焦。念予无俗骨，频与鹤书招。

卷 701_54 【御试后进诗】

王贞白

三时赐食天厨近，再宿偷吟禁漏清。
二十五家齐拔宅，人间已写上升名。

卷 701_55 【春日咏梅花（见绝句辩体）】

王贞白

靓妆才罢粉痕新，迨晓风回散玉尘。
若遣有情应怅望，已兼残雪又兼春。

卷 701_56 【句】

王贞白

太阳虽不照，梁栋每重阴。
白发未逢媒，对景且裴回。

别酒莫辞今夜醉，故人知我几时来。

改贯永留乡党额，减租重感郡侯恩。

卷七二零二

卷 702_1 【登单于台】

张蠡

边兵春尽回，独上单于台。白日地中出，黄河天外来。
沙翻痕似浪，风急响疑雷。欲向阴关度，阴关晓不开。

卷 702_2 【寄友人】

张蠡

恋道欲何如，东西远索居。长疑即见面，翻致久无书。
甸麦深藏雉，淮苔浅露鱼。相思不我会，明月几盈虚？

卷 702_3 【和崔监丞春游郑仆射东园】

张蠡

春兴随花尽，东园自养闲。不离三亩地，似入万重山。
白鸟穿萝去，清泉抵石还。岂同秦代客，无位隐商山。

卷 702_4 【过萧关】

张蠡

出得萧关北，儒衣不称身。陇狐来试客，沙鹞下欺人。
晓戍残烽火，晴原起猎尘。边戎莫相忌，非是霍家亲。

卷 702_5 【盆池】

张蠡

圆内陶化功，外绝众流通。选处离松影，穿时减药丛。
别疑天在地，长对月当空。每使登门客，烟波入梦中。

卷 702_6 【野泉】

张蠡

远出白云中，长年听不同。清声萦乱石，寒色入长空。
挂壁聊成雨，穿林别起风。温泉非尔数，源发在深空。

卷 702_7 【送成州牧】

张𬸚

清时为塞郡，自古有儒流。素望知难惬，新恩且用酬。
犬牙连蜀国，兵额贯秦州。只作三年别，谁能听邑留？

卷 702_8 【蓟北书事】

张𬸚

度碛如经海，茫然但见空。戍楼承落日，沙塞碍惊蓬。
暑过燕僧出，时平虏客通。逢人皆上将，谁有定边功？

卷 702_9 【送徐州薛尚书】

张𬸚

上将出儒中，论诗拟立功。州从禹后别，军自汉来雄。
远驿销寒日，严城肃暮空。龙颜有遗庙，犹得奠英风。

卷 702_10 【贻曹郎中】

张蠙

所作高前古，封章自曲台。细看明主意，终用出人才。
省印寻僧锁，书楼领鹤开。南山有旧友，时向白云来。

卷 702_11 【送缙云尉】

张蠙

释褐从仙尉，之官兴若何。去程唯水石，公署在云萝。
野饭楼中迥，晴峰案上多。三年罢趋府，应更战高科。

卷 702_12 【送董卿赴台州】

张蠙

九陌除书出，寻僧问海城。家从中路挈，吏隔数州迎。
夜蚌侵灯影，春禽杂橹声。开图见异迹，思上石桥行。

卷 702_13 【送友人赴泾州幕（一作送李中丞再赴虔州）】

张蠙

杏园沈饮散，荣别就佳招。日月相期尽，山川独去遥。

府楼明蜀雪，关碛转胡雕。纵有烟尘动，应随上策销。

卷 702_14 【逢漳州崔使君北归】

张蠡

在郡多殊称，无人不望回。离城携客去，度岭担猿来。
障写经冬蕊，瓶缄落暑梅。长安有归宅，归见锁青苔。

卷 702_15 【云朔逢山友】

张蠡

会面却生疑，居然似梦归。塞深行客少，家远识人稀。
战马分旗牧，惊禽曳箭飞。将军虽异礼，难便脱麻衣。

卷 702_16 【别后寄友生（一作崔鲁诗）】

张蠡

上马如飞鸟，飘然隔去尘。共看今夜月，独作异乡人。
就养江南熟，移居井赋新。襄阳曾卜隐，应与孟家邻。

卷 702_17 【边游别友人】

张蠡

欲别不止泪，当杯难强歌。家贫随日长，身病涉寒多。
雨雪迷燕路，田园隔楚波。良时未自致，归去欲如何。

卷 702_18 【边庭送别】

张蠡

一生虽达理，远别亦相悲。白发无修处，青松有老时。
暮烟传戍起，寒日隔沙垂。若是长安去，何难定后期？

卷 702_19 【将之京师留别亲友】

张蠡

达命何劳问，西游且自期。至公如有日，知我岂无时。
野迥蝉相答，堤长柳对垂。酣歌一举袂，明发不堪思。

卷 702_20 【赠别山友】

张蠙

从容无限意，不独为离群。年长惊黄叶，时清厌白云。
旧山回马见，寒瀑别家闻。相与存吾道，穷通各自分。

卷 702_21 【途次绩溪先寄陈明府】

张蠙

入境风烟好，幽人不易传。新居多是客，旧隐半成仙。
山断云冲骑，溪长柳拂船。何当许过县，闻有箧中篇。

卷 702_22 【送友人归武陵】

张蠙

闻近桃源住，无村不是花。戍旗招海客，庙鼓集江鸦。
别岛垂橙实，闲田长荻花。游秦未得意，看即更离家。

卷 702_23 【乱中寄友人】

张蠡

别来难觅信，何处避艰危？鬓黑无多日，尘清是几时。
人情将厌武，王泽即兴诗。若便怀深隐，还应圣主知。

卷 702_24 【哭建州李员外】

张蠡

诗名不易出，名出又何为。捷到重科早，官终一郡卑。
素风无后嗣，遗迹有生祠。自罢羊公市，溪猿哭旧时。

卷 702_25 【吊孟浩然】

张蠡

每每樵家说，孤坟亦夜吟。若重生此世，应更苦前心。
名与襄阳远，诗同汉水深。亲栽鹿门树，犹盖石床阴。

卷 702_26 【送友人及第归（一本题下有新罗二字）】

张蠙

家林沧海东，未晓日先红。作贡诸蕃别，登科几国同。
远声鱼呷浪，层气蜃迎风。乡俗稀攀桂，争来问月宫。

卷 702_27 【次韵和友人冬月书斋】

张蠙

四季多花木，穷冬亦不凋。薄冰行处断，残火睡来消。
象版签书帙，蛮藤络酒瓢。公卿有知己，时得一相招。

卷 702_28 【过山家】

张蠙

避暑得探幽，忘言遂久留。云深窗失曙，松合径先秋。
响谷传人语，鸣泉洗客愁。家山不在此，至此可归休。

卷 702_29 【宿山驿】

张蠡

驿在千峰里，寒宵独此身。古坟时见火，荒壁悄无邻。
月白翻惊鸟，云闲欲就人。只应明日鬓，更与老相亲。

卷 702_30 【宿开照寺光泽上人院】

张蠡

静室谭玄旨，清宵独细听。真身非有像，至理本无经。
钟定遥闻水，楼高别见星。不教人触秽，偏说此山灵。

卷 702_31 【宿山寺】

张蠡

中峰半夜起，忽觉有青冥。此界自生雨，上方犹有星。
楼高钟尚远，殿古像多灵。好是潺湲水，房房伴诵经。

卷 702_32 【题紫阁院】

张蠡

上方人海外，苔径上千层。洞壑有灵药，房廊无老僧。
古岩雕素像，乔木挂寒灯。每到思修隐，将回苦不能。

卷 702_33 【白菊】

张蠡

秋天木叶干，犹有白花残。举世稀栽得，豪家却画看。
片苔相应绿，诸卉独宜寒。几度携佳客，登高欲折难。

卷 702_34 【丛苇】

张蠡

丛丛寒水边，曾折打鱼船。忽与亭台近，翻嫌岛屿偏。
花明无月夜，声急正秋天。遥忆巴陵渡，残阳一望烟。

卷 702_35 【郑穀补阙山松】

张蠙

心将积雪欺，根与白云离。远寄僧犹忆，高看鹤未知。
影交新长叶，皴匝旧生枝。多少同时种，深山不得移。

卷 702_36 【新竹】

张蠙

新鞭暗入庭，初长两三茎。不是他山少，无如此地生。
垂梢丛上出，柔叶箨间成。何用高唐峡，风枝扫月明。

卷 702_37 【和友人送赵能卿东归】

张蠙

一第时难得，归期日已过。相看玄鬓少，共忆白云多。
楚阔天垂草，吴空月上波。无人不有遇，之子独狂歌。

卷 702_38 【送人归南中】

张蠡

有家谁不别，经乱独难寻。远路波涛恶，穷荒雨雾深。
烧惊山象出，雷触海鳌沉。为问南迁客，何人在瘴林？

卷 702_39 【塞下曲】

张蠡

边事多更变，天心亦为忧。胡兵来作寇，汉将也封侯。
夜烧冲星赤，寒尘翳日愁。无门展微略，空上望西楼。

卷 702_40 【边将二首】

张蠡

历战燕然北，功高剑有威。闻名外国惧，轻命故人稀。
角怨星芒动，尘愁日色微。从为汉都护，未得脱征衣。

按剑立城楼，西看极海头。承家为上将，开地得边州。
碛迴兵难伏，天寒马易收。胡风一度猎，吹裂锦貂裘。

卷 702_41 【朔方书事】

张蠡

秋尽角声苦，逢人唯荷戈。城池向陇少，岐路出关多。
雁远行垂地，烽高影入河。仍闻黑山寇，又觅汉家和。

卷 702_42 【经荒驿】

张蠡

古驿成幽境，云萝隔四邻。夜灯移宿鸟，秋雨禁行人。
废巷荆丛合，荒庭虎迹新。昔年经此地，终日是红尘。

卷 702_43 【赠栖白大师】

张蠡

剃发得时名，僧应别应星。偶题皆有诏，闲论便成经。
扫叶寒烧鼎，融冰晓注瓶。长因内斋出，多客叩禅扃。

卷 702_44 【赠闻一上人】

张蠙

见面虽年少，闻名似白头。玄谈穷释旨，清思掩诗流。
果落痕生砌，松高影上楼。坛场在三殿，应召入焚修。

卷 702_45 【赠可伦上人】

张蠙

师教本于空，流来不自东。修从多劫后，行出众人中。
衲冷湖山雨，幡轻海甸风。游吴累夏讲，还与虎溪同。

卷 702_46 【寄法乾寺令諲太师】

张蠙

师居中禁寺，外请已无缘。望幸唯修偈，承恩不乱禅。
院多喧种药，池有化生莲。何日龙宫里，相寻借法船？

卷 702_47 【寄太白禅师】

张蠙

何年万仞顶，独有坐禅僧。客上应无路，人传或见灯。
斋厨唯有橡，讲石任生藤。遥想东林社，如师谁复能？

卷 702_48 【遇道者】

张蠙

数里白云里，身轻无履踪。故寻多不见，偶到即相逢。
古井生云水，高坛出异松。聊看杏花酌，便似换颜容。

卷 702_49 【赠道者】

张蠙

得道疑人识，都城独闭关。头从白后黑，心向闹中闲。
饥渴唯调气，儿孙亦驻颜。始知仙者隐，殊不在深山。

卷 702_50 【雨】

张蠡

半夜西亭雨，离人独启关。桑麻荒旧国，雷电照前山。
细滴高槐底，繁声叠漏间。唯应孤镜里，明月长愁颜。

卷 702_51 【长安春望】

张蠡

明时不敢卧烟霞，又见秦城换物华。残雪未销双凤阙，
新春已发五侯家。甘贫只拟长缄酒，忍病犹期强采花。
故国别来桑柘尽，十年兵践海西槎。

卷 702_52 【过黄牛峡】

张蠡

黄牛来势泻巴川，叠日孤舟逐峡前。雷电夜惊猿落树，
波涛愁恐客离船。盘涡逆入嵌空地，断壁高分缭绕天。
多少人经过此去，一生魂梦怕潺湲。

卷 702_53 【逢道者】

张蠙

纵意出山无远近，还如孤鹤在空虚。昔年亲种树皆老，
此世相逢人自疏。野叶细苞深洞药，岩萝闲束古仙书。
只寻隐迹归何处，方说烟霞不定居。

卷 702_54 【边情】

张蠙

穷荒始得静天骄，又说天兵拟渡辽。圣主尚嫌蕃界近，
将军莫恨汉庭遥。草枯朔野春难发，冰结河源夏半销。
惆怅临戎皆效国，岂无人似霍嫫姚。

卷 702_55 【赠李司徒】

张蠙

承家拓定陇关西，勋贵名应上将齐。金库夜开龙甲冷，
玉堂秋闭凤笙低。欢筵每恕娇娥醉，闲枥犹惊战马嘶。
长怪鲁儒头枉白，不亲弓箭觅丹梯。

卷 702_56 【送卢尚书赴灵武】

张蠡

西北正传烽候急，灵州共喜信臣居。从军尽是清才去，
属郡无非大将除。新地进图移汉界，古城遗碣见蕃书。
山川不异江湖景，宾馆常闻食有鱼。

卷 702_57 【投翰林张侍郎】

张蠡

举家贫拾海边樵，来认仙宗在碧霄。丹穴虽无凡羽翼，
灵椿还向细枝条。九衢马识他门少，十载身辞故国遥。
愿与吾君作霖雨，且应平地活枯苗。

卷 702_58 【投翰林萧侍郎】

张蠡

九仞墙边绝路岐，野才非合自求知。灵湫岂要鱼栖浪，
仙桂那容鸟寄枝。纤草不销春气力，微尘还助岳形仪。
从来为学投文镜，文镜如今更有谁。

卷 702_59 【宴驸马宅】

张蠡

牙香禁乐镇相携，日日君恩降紫泥。红药院深人半醉，
绿杨门掩马频嘶。座中古物多仙意，壁上新诗有御题。
别向庭芜真吟石，不教宫妓踏成蹊。

卷 702_60 【边将】

张蠡

上马乘秋欲建勋，飞弧夜阙出师频。若无紫塞烟尘事，
谁识青楼歌舞人。战骨沙中金镞在，贺筵花畔玉蝉新。
由来边卒皆如此，只是君门合杀身。

卷 702_61 【赠水军都将】

张蠡

平生为有安邦术，便别秋曹最上阶。战舰却容儒客卧，
公厅唯伴野僧斋。裁书榭迥冰胶笔，养药堂深藓惹鞋。
直待门前见幢节，始应高惬圣君怀。

卷 702_62 【赠九江太守】

张蠡

江头暂驻木兰船，渔父来夸太守贤。二邑旋添新户口，
四营渐废旧戈鋌。笙歌不似经荒后，礼乐犹如未战前。
昨日西亭从游骑，信旗风里说诗篇。

卷 702_63 【赠信安太守】

张蠡

三衢正对福星时，喜得君侯妙抚绥。甲士散教耕垄亩，
书生闲许从旌旗。条章最是贫家喜，禾黍仍防别郡饥。
昨日中官说天意，即飞丹诏立新碑。

卷 702_64 【赠江都郑明府】

张蠡

他人岂是称才术，才术须观力有余。兵乱几年临剧邑，
公清终日似闲居。床头怪石神仙画，篋里华笺将相书。
更欲栖踪近彭泽，香炉峰下结茅庐。

卷 702_65 【赠南昌宰】

张蠙

假邑邀真邑命分，明庭元有至公存。每锄奸弊同荆棘，
唯抚孤惻似子孙。折狱不曾偏下笔，灵襟长是大开门。
新衔便合兼朱绂，应待苍生更举论。

卷 702_66 【赠丘衙推】

张蠙

仙都高处掩柴扉，人世闻名见者稀。诗逸不拘凡对属，
易穷皆达圣玄微。偶携童稚离青嶂，便被君侯换白衣。
任醉宾筵莫深隐，绮罗丝竹胜渔矶。

卷 702_67 【献所知】

张蠙

迹熟荀家见弟兄，九霄同与指前程。吹嘘渐觉馨香出，
梦寐长疑羽翼生。住僻骅骝皆识路，来频鹦鹉亦知名。
登龙不敢怀他愿，只望为霖致太平。

卷 702_68 【投所知】

张蠡

十五年看帝里春，一枝头白未酬身。自闻离乱开公道，
渐数孤平少屈人。劣马再寻商岭路，扁舟重寄越溪滨。
省郎门似龙门峻，应借风雷变涸鳞。

卷 702_69 【南康夜宴东溪留别郡守陆郎中】

张蠡

飘然野客才无取，多谢君侯独见知。竹叶樽前教驻乐，
桃花纸上待君诗。香迷蛱蝶投红烛，舞拂蒹葭倚翠帷。
明发别愁何处去，片帆天际酒醒时。

卷 702_70 【言怀】

张蠡

十载声沈觉自非，贱身元合衣荷衣。岂能得路陪先达，
却拟还家望少微。战马到秋长泪落，伤禽无夜不魂飞。
平生只学穿杨箭，更向何门是见机？

卷 702_71 【喜友人日南回】

张蠡

南游曾去海南涯，此去游人不易归。白日雾昏张夜烛，
穷冬气暖著春衣。溪荒毒鸟随船啖，洞黑冤蛇出树飞。
重入帝城何寂寞，共回迁客半轻肥。

卷 702_72 【下第述怀】

张蠡

十载长安迹未安，杏花还是看人看。名从近事方知险，
诗到穷玄更觉难。世薄不惭云路晚，家贫唯怯草堂寒。
如何直道为身累，坐月眠霜思枉干。

卷 702_73 【华阳道者】

张蠡

华阳洞里持真经，心嫌来客风尘腥。惟餐白石过白日，
拟骑青竹上青冥，翔螭岂作汉武驾，神娥徒降燕昭庭。
长生不必论贵贱，却是幽人骨主灵。

卷 702_74 【夏日题老将林亭】

张蠡

百战功成翻爱静，侯门渐欲似仙家。墙头雨细垂纤草，
水面风回聚落花。井放辘轳闲浸酒，笼开鹦鹉报煎茶。
几人图在凌烟阁，曾不交锋向塞沙。

卷 702_75 【观江南牡丹】

张蠡

北地花开南地风，寄根还与客心同。群芳尽怯千般态，
几醉能消一番红。举世只将华胜实，真禅元喻色为空。
近年明主思王道，不许新栽满六宫。

卷 702_76 【钱塘夜宴留别郡守】

张蠡

四方骚动一州安，夜列樽罍伴客欢。觥栗调高山阁迥，
虾蟆更促海声寒。屏间佩响藏歌妓，幕外刀光立从官。
沈醉不愁归棹远，晚风吹上子陵滩。

卷 702_77 【送薛郎中赴江州】

张蠡

几州闻出刺，谣美有江民。正面传天旨，悬心祷岳神。
尺书先假路，红旆旋烧尘。郡显山川别，衙开将吏新。
散招僧坐暑，闲载客行春。听事棋忘着，探题酒乱巡。
好编高隐传，多貌上升真。近日居清近，求人在此人。

卷 702_78 【送南海僧游蜀】

张蠡

真修绝故乡，一衲度暄凉。此世能先觉，他生岂再忘。
定中船过海，腊后路沿湘。野迴鸦随笠，山深虎背囊。
瀑流垂石室，萝蔓盖铜梁。却后何年会，西方有上房。

卷 702_79 【和友人许裳题宣平里古藤】

张蠡

欲结千年茂，生来便近松。迸根通井润，交叶覆庭秊。
历代频更主，盘空渐变龙。昼风圆影乱，宵雨细声重。
盖密胜丹桂，层危类远峰。嫩条悬野鼠，枯节叫秋蛩。

翠老霜难蚀，皴多藓乍封。几家遥共玩，何寺不堪容。
客对忘离榻，僧看误过钟。顷因陪预作，终夕绕枝筇。

卷 702_80 【十五夜与友人对月】

张蠡

每到月圆思共醉，不宜同醉不成欢。
一千二百如轮夜，浮世谁能得尽看。

卷 702_81 【青冢】

张蠡

倾国可能胜效国，无劳冥寞更思回。
太真虽是承恩死，只作飞尘向马嵬。

卷 702_82 【古战场】

张蠡

荒骨潜销垒已平，汉家曾说此交兵。
如何万古冤魂在，风雨时间有战声。

卷 702_83 【赠段逸人】

张蠙

长筇自担药兼琴，话著名山即拟寻。
从听世人权似火，不能烧得卧云心。

卷 702_84 【赠郑司业】

张蠙

晚学更求来世达，正怀非与百邪侵。
古人名在今人口，不合于名不苦心。

卷 702_85 【上所知】

张蠙

初向众中留姓氏，敢期言下致时名。
而今马亦知人意，每到门前不肯行。

卷 702_86 【别郑仁表】

张蠡

春雷醉别镜湖边，官显才狂正少年。
红烛满汀歌舞散，美人迎上木兰船。

卷 702_87 【言怀】

张蠡

不将高盖竟烟尘，自向蓬茅认此身。
唐祖本来成大业，岂非姚宋是平人。

卷 702_88 【叙怀】

张蠡

月里路从何处上，江边身合几时归。
十年九陌寒风夜，梦扫芦花絮客衣。

卷 702_89 【抒怀】

张蠡

几出东堂谢不才，便甘闲望故山回。
翻思未是离家久，更有人从外国来。

卷 702_90 【自讽】

张蠡

鹿鸣筵上强称贤，一送离家十四年。
同隐海山烧药伴，不求丹桂却登仙。

卷 702_91 【伤贾岛】

张蠡

生为明代苦吟身，死作长江一逐臣。
可是当时少知己，不知知己是何人？

卷 702_92 【再游西山赠许尊师】

张蟠

别后已闻师得道，不期犹在此山头。
昔时霜鬓今如漆，疑是年光却倒流。

卷 702_93 【宫词】

张蟠

日透珠帘见冕旒，六宫争逐百花球。
回看不觉君王去，已听笙歌在远楼。

卷 702_94 【经范蠡旧居】

张蟠

一变姓名离百越，越城犹在范家无。
他人不见扁舟意，却笑轻生泛五湖。

卷 702_95 【题嘉陵驿】

张蠡

嘉陵路恶石和泥，行到长亭日已西。
独倚阑干正惆怅，海棠花里鹧鸪啼。

卷 702_96 【龟山寺晚望】

张蠡

四面湖光绝路岐，鸂鶒飞起暮钟时。
渔舟不用悬帆席，归去乘风插柳枝。

卷 702_97 【华山孤松】

张蠡

石罅引根非土力，冒寒犹助岳莲光。
绿槐生在膏腴地，何得无心拒雪霜。

卷 702_98 【吊万人冢】

张蠡

兵罢淮边客路通，乱鸦来去噪寒空。
可怜白骨攒孤冢，尽为将军觅战功。

卷 702_99 【送友尉蜀中】

张蠡

故友汉中尉，请为西蜀吟。人家多种橘，风土爱弹琴。
水向昆明阔，山通大夏深。理闲无别事，时寄一登临。

卷 702_100 【长安寓怀】

张蠡

九衢秋雨掩闲扉，不似干名似息机。
贫病却惭墙上土，年来犹自换新衣。

卷 702_101 【费征君旧居】

张蠙

浮世抛身外，栖踪入九华。遗篇补乐府，旧籍隶仙家。
池静龟升树，庭荒鹤隐花。古来天子命，还少到烟霞。

卷七百零三

卷 703_1 【晨兴】

翁承赞

晨起竹轩外，逍遥清兴多。早凉生户牖，孤月照关河。
旅食甘藜藿，归心忆薜萝。一尊如有地，放意且狂歌。

卷 703_2 【题莒潭安闽院】

翁承赞

祧宗营祀舍，幽异胜珠林。名士穿云访，飞禽傍竹吟。
窗含孤岫影，牧卧断霞阴。景福滋闽壤，芳名亘古今。

卷 703_3 【华下霁后晓眺】

翁承赞

结茅幽寂近禅林，霁景烟光著柳阴。千嶂华山云外秀，
万重乡思望中深。老嫌白发还偷镊，贫对春风亦强吟。

花畔水边人不会，腾腾闲步一披襟。

卷 703_4 【喜弟承检登科】

翁承赞

两篇佳句敌琼瑰，怜我三清道路开。荆璞献多还得售，
桂堂恩在敢轻回。花繁不怕寻香客，榜到应倾贺喜杯。
知尔苦心功业就，早携长策出山来。

卷 703_5 【蒙闽王改赐乡里】

翁承赞

乡名文秀里光贤，别向钧台造化权。阙阅便因今日贵，
德音兼与后人传。自从受赐身无力，向未酬恩骨肯镌。
归阙路遥心更切，不嫌扶病倚旌旃。

卷 703_6 【访建阳马驿僧亚齐】

翁承赞

萧萧风雨建阳溪，溪畔维舟访亚齐。一轴新诗剑潭北，
十年旧识华山西。吟魂惜向江村老，空性元知世路迷。
应笑乘轺青琐客，此时无暇听猿啼。

卷 703_7 【题景祥院】

翁承赞

一溪拖碧绕崔嵬，瓶钵偏宜向此隈。农罢树阴黄犊卧，
斋时山下白衣来。松多往日门人种，路是前朝释子开。
三卷贝多金粟语，可能心炼得成灰。

卷 703_8 【寄舍弟承裕员外】

翁承赞

江花岸草晚萋萋，公子王孙思合迷。无主园林饶采伐，
忘情鸥鸟恣高低。长江月上鱼翻鬣，荒圃人稀獭印蹄。
何事斜阳再回首，休愁离别岷山西。

卷 703_9 【文明殿受册封闽王】

翁承赞

龙墀班听漏声长，竹帛昭勋扑御香。鸣佩洞庭辞帝主，
登车故里册闽王。一千年改江山瑞，十万军蒙雨露光。
吟寄短篇追往事，留文功业不寻常。

卷 703_10 【御命归乡，蒙赐锦衣】

翁承赞

九重宣旨下丹墀，面对天颜赐锦衣。中使擎来三殿晓，
宝箱开处五云飞。德音耳聆君恩重，金印腰悬己力微。
更待临轩陈鼓吹，星轺便指故乡归。

卷 703_11 【奉使封闽王归京洛】

翁承赞

泥缄紫诰御恩光，信马嘶风出洛阳。此去愿言归梓里，
预凭魂梦展维桑。客程回首瞻文陛，驿路乘轺忆故乡。
指日还家堪自重，恩荣昼锦贺封王。

卷 703_12 【奉使封王，次宜春驿】

翁承赞

微宦淹留鬓已斑，此心长忆旧林泉。不因列土封千乘，
争得衔恩拜二天。云断自宜乡树出，月高犹伴客心悬。
夜来梦到南台上，遍看江山胜往年。

卷 703_13 【甲子岁衔命到家，至榕城册封。次日，闽王降旌旗于新丰市堤饯别】

翁承赞

登庸楼上方停乐，新市堤边又举杯。正是离情伤远别，
忽闻台旨许重来。此时暂与交亲好，今日还将简册回。
争得长房犹在世，缩教地近钓鱼台。

卷 703_14 【寄示儿孙】

翁承赞

力学烧丹二十年，辛勤方得遇真仙。便随羽客归三岛，
旋听霓裳适九天。得路自能酬造化，立身何必恋林泉。
予家药鼎分明在，好把仙方次第传。

卷 703_15 【天祐元年以右拾遗使册闽王而作】

翁承赞

蓬莱宫阙晓光匀，红案舁麻降紫宸。鸾奏八音谐律吕，
凤衔五色显丝纶。萧何相印钧衡重，韩信斋坛雨露新。
得侍丹墀官异宠，此身何幸沐恩频。

卷 703_16 【汉上登舟忆闽】

翁承赞

汉皋亭畔起西风，半挂征帆立向东。久客自怜归路近，
算程不怕酒觞空。参差雁阵天初碧，零落渔家蓼欲红。
一片归心随去棹，愿言指日拜文翁。

卷 703_17 【对雨述怀示弟承检】

翁承赞

淋淋霎霎结秋霖，欲使秦城叹陆沈。晓势遮回朝客马，
夜声滴破旅人心。青苔重叠封颜巷，白发萧疏引越吟。
不有惠连同此景，江南归思几般深。

卷 703_18 【题壶山】

翁承赞

井邑斜连北，蓬瀛直倚东。秋高岩溜白，日上海波红。

卷 703_19 【题故居】

翁承赞

一为鹅子二连花，三望青湖四石斜。
惟有岭湖居第五，山前却是宰臣家。

卷 703_20 【题槐】

翁承赞

雨中妆点望中黄，句引蝉声送夕阳。
忆昔当年随计吏，马蹄终日为君忙。

卷 703_21 【擢进士】

翁承赞

霓旌引上大罗天，别领新衔意自怜。
蝴蝶流莺莫先去，满城春色属群仙。

卷 703_22 【擢探花使三首】

翁承赞

洪崖差遣探花来，检点芳丛饮数杯。
深紫浓香三百朵，明朝为我一时开。

九重烟暖折槐芽，自是升平好物华。
今日始知春气味，长安虚过四年花。

探花时节日偏长，恬淡春风称意忙。
每到黄昏醉归去，纔衣惹得牡丹香。

卷 703_23 【书斋谩兴二首】

翁承赞

池塘四五尺深水，篱落两三般样花。
过客不须频问姓，读书声里是吾家。

官事归来衣雪埋，儿童灯火小茅斋。
人家不必论贫富，惟有读书声最佳。

卷 703_24 【辞闽王归朝寄倪先辈】

翁承赞

时人莫讶再还乡，简册分明剑佩光。
驷马高车太常乐，登庸门下忆贤良。

卷 703_25 【晓望】

翁承赞

清霜散漫似轻岚，玉阙参差万象涵。
独上秦台最高处，旧山依约在东南。

卷 703_26 【万寿寺牡丹】

翁承赞

烂熳香风引贵游，高僧移步亦迟留。
可怜殿角长松色，不得王孙一举头。

卷 703_27 【松】

翁承赞

倚涧临溪自屈蟠，雪花销尽藓花干。
幽枝好折为谈柄，入手方知有岁寒。

卷 703_28 【柳】

翁承赞

斜拂中桥远映楼，翠光骀荡晓烟收。
洛阳才子多情思，横把金鞭约马头。

高出营门远出墙，朱阑门闭绿成行。
将军宴罢东风急，闲衬旌旗簇画堂。

彭泽先生酒满船，五株栽向九江边。
长条细叶无穷尽，管领春风不计年。

炀帝东游意绪多，宫娃眉翠两相和。
一声水调春风暮，千里交阴锁汴河。

缠绕春情卒未休，秦娥萧史两相求。
玉句阑内朱帘卷，瑟瑟丝笼十二楼。

卷 703_29 【隋堤柳】

翁承赞

春半烟深汴水东，黄金丝软不胜风。
轻笼行殿迷天子，抛掷长安似梦中。

卷 703_30 【句】

翁承赞

烟萝况逼神仙窟，丹灶还应许独寻。

卷七零零四

卷 704_1 【送僧归北岩寺】

黄滔

北岩泉石清，本自高僧住。新松五十年，藤萝成古树。
题诗昔佳士，清风二林喻。上智失扣关，多被浮名误。
莲局压月润，空美黄金布。江翻岛屿沈，木落楼台露。
伊余东还际，每起烟霞慕。旋为俭府招，未得穷野步。
西轩白云阁，师辞洞庭寓。越城今送归，心到焚香处。

卷 704_2 【寓言】

黄滔

流年五十前，朝朝倚少年。流年五十后，日日侵皓首。
非通非介人，谁论四十九？贤哉蘧伯玉，清风独不朽。

卷 704_3 【长安书事】

黄滔

终不离青山，谁道云无心？却是白云士，有时出中林。
昨日擎紫泥，明日要黄金。炎夏群木死，北海惊波深。
伏蒲无一言，草疏贺德音。

卷 704_4 【贾客】

黄滔

大舟有深利，沧海无浅波。利深波也深，君意竟如何。
鲸鲵齿上路，何如少经过。

卷 704_5 【寄友人】

黄滔

君爱桃李花，桃李花易飘。妾怜松柏色，松柏色难凋。
当年识君初，指期非一朝。今辰见君意，日暮何萧条。
入门有势利，孰能无嚣嚣。

卷 704_6 【落花】

黄滔

落花辞高树，最是愁人处。一一旋成泥，日暮有风雨。
不如沙上蓬，根断随长风。飘然与道俱，无情任西东。

卷 704_7 【寄徐正字夔】

黄滔

八月月如冰，登楼见姑射。美人隔千里，相思无羽驾。
红兰裊露衰，谁以流光讶。何当诗一句，同吟祝玄化。

卷 704_8 【秋夕贫居】

黄滔

听歌桂席阑，下马槐烟里。豪门腐粱肉，穷巷思糠粃。
孤灯照独吟，半壁秋花死。迟明亦如晦，鸡唱徒为尔。

卷 704_9 【书怀寄友人】

黄滔

此生如孤灯，素心挑易尽。不及如顽石，非与磨砢近。
常思扬子云，五藏曾离身。寂寞一生中，千载空清芬。

卷 704_10 【闺怨】

黄滔

妾家五岭南，君戍三城北。雁来虽有书，衡阳越不得。
别久情易料，岂在窥翰墨。塞上无烟花，宁思妾颜色。

卷 704_11 【喜翁文尧员外病起】

黄滔

卫玠羊车悬，长卿驷马姿。天嫌太端正，神乃减风仪。
饮冰俾消渴，断谷皆清羸。越僧夸艾炷，秦女隔花枝。
自能论苦器，不假求良医。惊杀漳滨鬼，错与刘生随。
昨日已如虎，今朝谒荀池。扬鞭入王门，四面人熙熙。
青桂任霜霰，尺璧无瑕疵。回尘却惆怅，归阙难迟迟。

卷 704_12 【寄郑县李侍御】

黄滔

古县新烟火，东西入客诗。静长如假日，贫更甚闲时。
僧借松萝住，人将雨雪期。三年一官罢，岳石看成碑。

卷 704_13 【上李补阙】

黄滔

十洲非暂别，龙尾肯慵登。谏草封山药，朝衣施衲僧。
月留江客待，句历钓船征。终恐林栖去，餐霞叶上升。

卷 704_14 【送李山人往湘中】

黄滔

汉渚往湘川，乘流入远天。新秋无岸水，明月有琴船。
露坐应通晓，萍居恐隔年。岳峰千万仞，知上啸猿巅。

卷 704_15 【书崔少府居（一作赠李补阙）】

黄滔

鲁史蜀琴旁，陶然举一觴。夕阳明岛屿，秋水浅池塘。
世乱怜官替，家贫值岁荒。前峰亦曾宿，知有辟寒方。

卷 704_16 【敷水卢校书】

黄滔

九霄无诏下，何事近清尘。宅带松萝僻，日唯猿鸟亲。
吟高仙掌月，期有洞庭人。莫问烟霞句，悬知见岳神。

卷 704_17 【寄汉上友人】

黄滔

襄汉多清景，东游已不能。蒹葭照流水，风雨扑孤灯。
献赋闻新雁，思山见去僧。知君北来日，惆怅亦难胜。

卷 704_18 【贻林铎】

黄滔

终被春闱屈，低回至白头。寄家僧许岳，钓浦雨移洲。
战士曾怜善，豪门不信愁。王孙草还绿，何处拟羁游。

卷 704_19 【书怀】

黄滔

退耕逢歉岁，逐贡愧行朝。道在愁虽浅，吟劳鬓欲凋。
破村虹入井，孤馆客投魑。谁怕秋风起，听蝉度渭桥。

卷 704_20 【送陈明府归衡阳】

黄滔

雏鹤兼留下，单车出柳烟。三年两殊考，一日数离筵。
久别湖波绿，相思岳月圆。翠萝曾隐处，定恐却求仙。

卷 704_21 【秋辞江南】

黄滔

灞陵桥上路，难负一年期。积雨鸿来夜，重江客去时。
劳生多故疾，渐老少新知。惆怅都堂内，无门雪滞遗。

卷 704_22 【入关旅次言怀】

黄滔

寸心唯自切，上国与谁期。月晦时风雨，秋深日别离。
便休终未肯，已苦不能疑。独愧商山路，千年四皓祠。

卷 704_23 【贻李山人】

黄滔

野步爱江滨，江僧得见频。新文无古集，往事有清尘。
松竹寒时雨，池塘胜处春。定应云雨内，陶谢是前身。

卷 704_24 【寄边上从事】

黄滔

斜日下孤城，长吟出点兵。羽书和客卷，边思杂诗情。
朔雪定鸿翼，西风严角声。吟余多独坐，沙月对楼生。

卷 704_25 【题东林寺元祐上人院】

黄滔

庐阜东林寺，良游耻未曾。半生随计吏，一日对禅僧。
泉远携茶看，峰高结伴登。迷津出门是，子细问三乘。

卷 704_26 【送陈樵下第东归】

黄滔

青山烹茗石，沧海寄家船。虽得重吟历，终难任意眠。
砧疏连寺柳，风爽彻城泉。送目红蕉外，来期已杳然。

卷 704_27 【寄陈礪隐居】

黄滔

道经前辈许，名拔后时喧。虚左中兴榜，无先北海尊。
新文汉氏史，别墅谢公村。须到三征处，堂堂谒帝阍。

卷 704_28 【寄林宽】

黄滔

相知四十年，故国与长安。俱喜今辰在，休论往岁难。
海鸣秋日黑，山直夏风寒。终始前儒道，升沈尽一般。

卷 704_29 【退居】

黄滔

老归江上村，孤寂欲何言。世乱时人物，家贫后子孙。
青山寒带雨，古木夜啼猿。惆怅西川举，戎装度剑门。

卷 704_30 【送友人边游】

黄滔

衔杯国门外，分手见残阳。何日还南越，今朝往北荒。
砂城经雨坏，虏骑入秋狂。亲咏关山月，归吟鬓的霜。

卷 704_31 【下第出京】

黄滔

还失礼官求，花时出雍州。一生为远客，几处未曾游。
故疾江南雨，单衣蓟北秋。茫茫数年事，今日泪俱流。

卷 704_32 【游东林寺】

黄滔

平生爱山水，下马虎溪时。已到终嫌晚，重游预作期。
寺寒三伏雨，松偃数朝枝。翻译如曾见，白莲开旧池。

卷 704_33 【赠怀光上人】

黄滔

谢城还拥入，师以接人劳。过午休斋惯，离经吐论高。
顶寒拳素发，珠锐走红绦。终忆泉山寺，听猿看海涛。

卷 704_34 【忆庐山旧游】

黄滔

前年入庐岳，数宿在灵溪。残烛松堂掩，孤峰月狖啼。
平生为客老，胜境失云栖。纵有重游日，烟霞会恐迷。

卷 704_35 【别友人】

黄滔

莫恨东墙下，频伤命不通。苦心如有感，他日自推公。
雨夜扁舟发，花时别酒空。越山烟翠在，终愧卧云翁。

卷 704_36 【陈侍御新居】

黄滔

幕客开新第，词人遍有诗。山怜九仙近，石买太湖奇。
树势想高日，地形夸得时。自然成避俗，休与白云期。

卷 704_37 【寄从兄璞】

黄滔

纵征终不起，相与避烟尘。待到中兴日，同看上国春。
新诗说人尽，旧宅落花频。移觅深山住，啼猿作四邻。

卷 704_38 【寄李校书游简寂观】

黄滔

古观云溪上，孤怀永夜中。梧桐四更雨，山水一庭风。
诗得如何句，仙游最胜宫。却愁逢羽客，相与入烟空。

卷 704_39 【寄友人山居】

黄滔

断峤沧江上，相思恨阻寻。高斋秋不掩，几夜月当吟。
落石有泉滴，盈庭无树阴。茫茫名利内，何以拂尘襟。

卷 704_40 【上（一作寄）刑部卢员外】

黄滔

谁识在官意，开门树色间。寻幽频宿寺，乞假拟归山。
半白侵吟鬓，微红见药颜。不知琴月夜，几客得同闲。

卷 704_41 【送友人游边】

黄滔

虏酒不能浓，纵倾愁亦重。关河初落日，霜雪下穷冬。
野烧枯蓬旋，沙风匹马冲。蓟门无易过，千里断人踪。

卷 704_42 【和友人酬寄】

黄滔

新发烟霞咏，高人得以传。吟销松际雨，冷咽石间泉。
大国兵戈日，故乡饥馑年。相逢江海上，宁免一潸然。

卷 704_43 【下第】

黄滔

昨夜孤灯下，阑干泣数行。辞家从早岁，落第在初场。
青草湖田改，单车客路忙。何人立功业，新命到封王。

卷 704_44 【过商山】

黄滔

燕雁一来后，人人尽到关。如何冲腊雪，独自过商山。
羸马高坡下，哀猿绝壁间。此心无处说，鬓向少年斑。

卷 704_45 【旅怀】

黄滔

萧飒闻风叶，惊时不自堪。宦名中夜切，人事长年谙。
古画僧留与，新知客遇谈。乡心随去雁，一一到江南。

卷 704_46 【冬暮山舍喜标上人见访】

黄滔

寂寞三冬杪，深居业尽抛。径松开雪后，砌竹忽僧敲。
茗汲冰销溜，炉烧鹊去巢。共谈慵僻意，微日下林梢。

卷 704_47 【关中言怀】

黄滔

三秦五岭意，不得不依然。迹寓枯槐曲，业芜芳草川。
花当落第眼，雨暗出城天。层阁浮云外，何人动管弦。

卷 704_48 【题友人山居】

黄滔

到君栖迹所，竹径与衡门。亦在乾坤内，独无尘俗喧。
新泉浮石藓，崩壁露松根。更说寻僧处，孤峰上啸猿。

卷 704_49 【寄敷水卢校书】

黄滔

谏省垂清论，仙曹岂久临。虽专良史业，未畏直臣心。
路入丹青近，家藏华岳深。还如韩吏部，谁不望知音。

卷 704_50 【赠明州霍员外】

黄滔

惠化如施雨，邻州亦可依。正衙无吏近，高会觉人稀。
海日旗边出，沙禽角外归。四明多隐客，闲约到岩扉。

卷 704_51 【题友人山斋】

黄滔

疏竹漏斜晖，庭间阴复遗。句成苔石茗，吟弄雪窗棋。
沙草泉经涩，林斋客集迟。西风虚见逼，未拟问京师。

卷 704_52 【书事】

黄滔

望岁心空切，耕夫尽把弓。千家数人在，一税十年空。
没阵风沙黑，烧城水陆红。飞章奏西蜀，明诏与殊功。

卷 704_53 【题山居逸人】

黄滔

十亩余芦苇，新秋看雪霜。世人谁到此，尘念自应忘。
斜日风收钓，深秋雨信梁。不知双阙下，何以谓轩裳。

卷 704_54 【题郑山人居】

黄滔

履迹遍莓苔，幽枝间药栽。枯杉擎雪朵，破牖触风开。
泉自孤峰落，人从诸洞来。终期宿清夜，斟茗说天台。

卷 704_55 【秋晚山居】

黄滔

爽气遍搜空，难堪倚望中。孤烟愁落日，高木病西风。
山寂樵声出，露凉蝉思穷。此时尘外事，幽默几人同。

卷 704_56 【游山】

黄滔

洞门穿瀑布，尘世岂能通。曾有游山客，来逢采药翁。
异花寻复失，幽径蹑还穷。拟作经宵计，风雷立满空。

卷 704_57 【题王侍御宅内亭子】

黄滔

俗间尘外境，郭内宅中亭。或有人家创，还无莲幕馨。
石曾湖岸见，琴误岳楼听。来客频频说，终须作画屏。

卷 704_58 【题道成上人院】

黄滔

花宫城郭内，师住亦清凉。何必天台寺，幽禅瀑布房。
簟舒湘竹滑，茗煮蜀芽香。更看道高处，君侯题翠梁。

卷 704_59 【贫居冬杪】

黄滔

数塞未求通，吾非学养蒙。穷居岁杪雨，孤坐夜深风。
年长惭昭代，才微辱至公。还愁把春酒，双泪污杯中。

卷 704_60 【贻张蠙（一本题下有同年二字）】

黄滔

梦思非一日，携手却凄凉。诗见江南雹，游经塞北霜。
驱车先五漏，把菊后重阳。惆怅天边桂，谁教岁岁香。

卷 704_61 【晚春关中】

黄滔

忍历通庄出，东风舞酒旗。百花无看处，三月到残时。
游塞闻兵起，还吴值岁饥。定唯荒寺里，坐与噪蝉期。

卷 704_62 【河梁】

黄滔

五原人走马，昨夜到京师。绣户新夫妇，河梁生别离。
陇花开不艳，羌笛静犹悲。惆怅良哉辅，锵锵立凤池。

卷 704_63 【送翁拾遗】

黄滔

还家俄赴阙，别思肯凄凄。山坐轺车看，诗持谏笔题。
天开中国大，地设四维低。拜舞吾君后，青云更有梯。

卷 704_64 【逢友人】

黄滔

彼此若飘蓬，二年何所从。帝都秋未入，江馆夜相逢。
瘴岭行冲夏，边沙住隔冬。旅愁论未尽，古寺扣晨钟。

卷 704_65 【寄湘中郑明府】

黄滔

县与白云连，沧洲况县前。岳僧同夜坐，江月看秋圆。
琴拂莎庭石，茶担乳洞泉。莫耽云水兴，疲俗待君痊。

卷 704_66 【寄少常卢同年】

黄滔

官拜少常休，青綈换鹿裘。狂歌离乐府，醉梦到瀛洲。
古器岩耕得，神方客谜留。清溪莫沈钓，王者或畋游。

卷 704_67 【伤翁外甥】

黄滔

江头去时路，归客几纷纷。独在异乡歿，若为慈母闻。
青春成大夜，新雨坏孤坟。应作芝兰出，泉台月桂分。

卷 704_68 【东山之游未遂，渐逼行期，作四十字奉寄翁文尧员外】

黄滔

轺车难久驻，须到别离时。北阙定归去，东山空作期。
绿苔劳扫径，丹凤欲衔词。杨柳开帆岸，今朝泪已垂。

卷七零零五

卷 705_1 【送林宽下第东归】

黄滔

为君惆怅惜离京，年少无人有屈名。积雪未开移发日，
鸣蝉初急说来程。楚天去路过飞雁，灞岸归尘触锁城。
又得新诗几章别，烟村竹径海涛声。

卷 705_2 【商山赠隐者】

黄滔

谁不相逢话息机，九重城里自依依。蓬莱水浅有人说，
商洛山高无客归。数只珍禽寒月在，千株古木热时稀。
西窗昨夜鸣蛩尽，知梦芝翁起扣扉。

卷 705_3 【送二友游湘中】

黄滔

千里楚江新雨晴，同征肯恨迹如萍。孤舟泊处联诗句，

八月中旬宿洞庭。为客早悲烟草绿，移家晚失岳峰青。
今来无计相从去，归日汀洲乞画屏。

卷 705_4 【塞下】

黄滔

匹马萧萧去不前，平芜千里见穷边。关山色死秋深日，
鼓角声沈霜重天。荒骨或衔残铁露，惊风时掠暮沙旋。
陇头冤气无归处，化作阴云飞杳然。

卷 705_5 【下第东归，留辞刑部郑郎中諫】

黄滔

去违知己住违亲，欲发羸蹄进退频。万里家山归养志，
数年门馆受恩身。莺声历历秦城晓，柳色依依灞水春。
明日蓝田关外路，连天风雨一行人。

卷 705_6 【寄怀南北故人】

黄滔

秋风昨夜落芙蓉，一片离心到外区。南海浪高书堕水，

北州城破客降胡。玉窗挑凤佳人老，绮陌啼莺碧树枯。
岭上青岚陇头月，时通魂梦出来无。

卷 705_7 【关中言怀】

黄滔

事事朝朝委一尊，自知无复解趋奔。试期交后犹为客，
公道开时敢说冤。穷巷住来经积雨，故山归去见荒村。
举头尽到断肠处，何必秋风江上猿。

卷 705_8 【闺怨】

黄滔

寸心杳与马蹄随，如蜕形容在锦帷。江上月明船发后，
花间日暮信回时。五陵夜作酬恩计，四塞秋为破虏期。
待到乘轺入门处，泪珠流尽玉颜衰。

卷 705_9 【旅怀】

黄滔

未吃金丹看十洲，乃将身世作仇雠。羈游数地值兵乱，

宿在孤城闻雨秋。东越云山却思隐，西秦霜霰苦频留。
他人折尽月中桂，惆怅当年江上鸥。

卷 705_10 【别友人】

黄滔

已喜相逢又怨嗟，十年飘泊在京华。大朝多事还停举，
故国经荒未有家。鸟带夕阳投远树，人冲腊雪往边沙。
梦魂空系潇湘岸，烟水茫茫芦苇花。

卷 705_11 【寄罗浮山道者二首】

黄滔

天际双山压海滨，天漫绝顶海漫根。时闻雷雨惊樵客，
长有龙蛇护洞门。泉石暮含朱槿昼，烟霞冬闭木绵温。
林间学道如容我，今便辞他宠辱喧。

有人曾见洞中仙，才到人间便越年。金鼎药成龙入海，
玉函书发鹤归天。楼开石脉千寻直，山拆鳌鳞一半膺。
谁到月明朝礼处，翠岩深锁荔枝烟。

卷 705_12 【喜侯舍人蜀中新命三首】

黄滔

八都词客漫喧然，谁解飞扬诤誓间。五色彩毫裁凤诏，
九重天子豁龙颜。巴山月在趋朝去，锦水烟生入阁还。
谋及中兴多少事，莫愁明月不收关。

却搜文学起吾唐，暂失都城亦未妨。锦里幸为丹凤阙，
幕宾征出紫微郎。来时走马随中使，到日援毫定外方。
若以掌言看谏猎，相如从此病辉光。

贾谊才承宣室召，左思唯预秘书流。赋家达者无过此，
翰苑今朝是独游。立被御炉烟气逼，吟经栈阁雨声秋。
内人未识江淹笔，竟问当时不早求。

卷 705_13 【经安州感故郑郎中二首】

黄滔

云梦江头见故城，人间四十载垂名。马蹄践处东风急，
鸡舌销时北阙惊。岳客出来寻古剑，野猿相聚叫孤莹。
腾身飞上凤凰阁，惆怅终乖吾党情。

锦帐先生作牧州，干戈缺后见荒丘。兼无姓贾儿童在，

空有还珠烟水流。江句行人吟刻石，月肠是处象登楼。
旅魂频此归来否，千载云山属一游。

卷 705_14 【出京别崔学士】

黄滔

一从门馆遍投文，旋忝恩知骤出群。不道鹤鸡殊羽翼，
许依龙虎借风云。命奇未便乘东律，言重终期雪北军。
欲逐飘蓬向岐路，数宵垂泪恋清芬。

卷 705_15 【雁】

黄滔

楚岸花晴塞柳衰，年年南北去来期。江城日暮见飞处，
旅馆月明闻过时。万里风霜休更恨，满川烟草且须疑。
洞庭云水潇湘雨，好把寒更一一知。

卷 705_16 【寄越从事林嵩侍御】

黄滔

子虚词赋动君王，谁不期君入对扬。莫恋兔园留看雪，

已乘骢马合凌霜。路归天上行方别，道在人间久便香。
应念都城旧吟客，十年踪迹委沧浪。

卷 705_17 【长安书事】

黄滔

一年年课数千言，口祝心祠挈出门。孤进难时谁肯荐。
主司通处不须论。频秋入自边城雪，昨日听来岭树猿。
若有水田过十亩，早应归去狄江村。

卷 705_18 【旅怀寄友人】

黄滔

重叠愁肠只自知，苦于吞蘂乱于丝。一船风雨分襟处，
千里烟波回首时。故国田园经战后，穷荒日月逼秋期。
鸣蝉似会悠扬意，陌上声声怨柳衰。

卷 705_19 【寄蒋先辈（在苏州）】

黄滔

夫差宫苑悉苍苔，携客朝游夜未回。冢上题诗苏小见，

江头酌酒伍员来。秋风急处烟花落，明月中时水寺开。
千载三吴有高迹，虎丘山翠益崔嵬。

卷 705_20 【旅怀】

黄滔

雪貌潜凋雪发生，故园魂断弟兼兄。十年除夜在孤馆，
万里一身求大名。空有新诗高华岳，已无丹恳出秦城。
侯门莫问曾游处，槐柳影中肝胆倾。

卷 705_21 【放榜日】

黄滔

吾唐取士最堪夸，仙榜标名出曙霞。白马嘶风三十辔，
朱门秉烛一千家。郾城联臂升天路，宣圣飞章奏日华。
岁岁人人来不得，曲江烟水杏园花。

卷 705_22 【二月二日宴中贻同年封先辈渭】

黄滔

帝尧城里日衔杯，每倚嵇康到玉颓。桂苑五更听榜后，

蓬山二月看花开。垂名入甲成龙去，列姓如丁作鹤来。
同戴大恩何处报，永言交道契陈雷。

卷 705_23 【新野道中】

黄滔

野堂如雪草如茵，光武城边一水滨。越客归遥春有雨，
杜鹃啼苦夜无人。东堂岁去衔杯懒，南浦期来落泪频。
莫道还家不惆怅，苏秦羁旅长卿贫。

卷 705_24 【酬俞钧】

黄滔

乡书一忝荐延恩，二纪三朝泣省门。虽忝立名经圣鉴，
敢期兴咏叠嘉言。莫论蟾月无梯接，大底龙津有浪翻。
今日朝廷推草泽，伫君承诏出云根。

卷 705_25 【寄同年崔学士】

黄滔

半因同醉杏花园，尘忝鸿炉与铸颜。已脱素衣酬素发，

敢持青桂爱青山。虽知珠树悬天上，终赖银河接世间。
毕使海涯能拔宅，三秦二十四畿寰。

卷 705_26 【御试二首】

黄滔

已表隋珠各自携，更从琼殿立丹梯。九华灯作三条烛，
万乘君悬四首题。灵凤敢期翻雪羽，洞箫应或讽金闺。
明朝莫惜场场醉，青桂新香有紫泥。

六曹三省列簪裾，丹诏宣来试士初。不是玉皇疑羽客，
要教金榜带天书。词臣假寐题黄绢，宫女敲铜奏子虚。
御目四篇酬九百，敢从灯下略踟躇。

卷 705_27 【寄陈侍御】

黄滔

千年二相未全夸，犹阙闽城贺降麻。何必锦衣须太守，
别无莲幕胜王家。醴泉涌处休论水，黄菊开时独是花。
九级燕金满尊酒，却愁随诏谒承华。

卷 705_28 【酬徐正字夔】

黄滔

已免蹉跎负岁华，敢辞霜鬓雪呈花。名从两榜考升第，
官自三台追起家。匹马有期归辇毂，故山无计恋桑麻。
莫言蓬阁从容久，披处终知金在砂。

卷 705_29 【辞相府（时蒙堂帖追赴阙）】

黄滔

从汉至唐分五州，谁为将相作诸侯。闽江似镜正堪恋，
秦客如蓬难久留。匹马忍辞藩屏去，小才宁副庙堂求。
今朝拜别幡幢下，双泪如珠滴不休。

卷 705_30 【寄罗郎中隐】

黄滔

休向中兴雪至冤，钱塘江上看涛翻。三征不起时贤议，
九转终成道者言。绿酒千杯肠已烂，新诗数首骨犹存。
瑶蟾若使知人事，仙桂应遭蠹却根。

卷 705_31 【江行遇王侍御】

黄滔

数年分散秦吴隔，暂泊官船浦柳中。新草军书名更重，
久辞山径业应空。渡头潮落将行客，天际风高未宿鸿。
此日相逢魂合断，赖君身事渐飞冲。

卷 705_32 【客舍秋晚夜怀故山】

黄滔

寥寥深巷客中居，况值穷秋百事疏。孤枕忆山千里外，
破窗闻雨五更初。经年荒草侵幽径，几树西风锁弊庐。
长系寸心归未得，起挑残烛独踟躇。

卷 705_33 【绛州郑尚书】

黄滔

旌旗日日展东风，云稼连山雪刃空。剖竹已知垂凤食，
摘珠何必到龙宫。谏垣虚位期飞步，翰苑含毫待纪公。
谁谓唐城诸父老，今时得见蜀文翁。

卷 705_34 【喜陈先辈及第（峽）】

黄滔

今年春已到京华，天与吾曹雪怨嗟。甲乙中时公道复，
朝廷看处主司夸。飞离海浪从烧尾，咽却金丹定易牙。
不是驾前偏落羽，锦城争得杏园花。

卷 705_35 【延福里居，和林宽、何绍余酬寄】

黄滔

长说愁吟逆旅中，一庭深雪一窗风。眼前道路无心觅，
象外烟霞有句通。几度相留侵鼓散，频闻会宿著僧同。
高情未以干时废，属和因知兴不穷。

卷 705_36 【赠宿松杨明府】

黄滔

溪上家家礼乐新，始知为政异常伦。若非似水清无底，
争得如冰凛拂人。月狔声和琴调咽，烟村景接柳条春。
宦游兼得逍遥趣，休忆三吴旧钓津。

卷 705_37 【送僧】

黄滔

才年七岁便从师，犹说辞家学佛迟。新劓松萝还不住，
爱寻云水拟何之。孤溪雪满维舟夜，叠嶂猿啼过寺时。
鸟道泷湫悉行后，岂将翻译负心期。

卷 705_38 【赠郑明府】

黄滔

庭罗衙吏眼看山，真恐风流是谪仙。垂柳五株春娅姓，
鸣琴一弄水潺湲。援毫断狱登殊考，驻乐题诗得出联。
莫起陶潜折腰叹，才高位下始称贤。

卷 705_39 【江州夜宴献陈员外】

黄滔

多少欢娱簇眼前，浔阳江上夜开筵。数枝红蜡啼香泪，
两面青娥拆瑞莲。清管彻时斟玉醕，碧筹回处掷金船。
因知往岁楼中月，占得风流是偶然。

卷 705_40 【湘中赠张逸人】

黄滔

羽衣零落帽欹斜，不自孤峰即海沙。曾为蜀山成寓迹，
又因湘水拟营家。鸣琴坐见燕鸿没，曳履吟忘野径赊。
更爱扁舟宿寒夜，独听风雨过芦花。

卷 705_41 【寓题】

黄滔

纷纷墨敕除官日，处处红旗打贼时。竿底得璜犹未用，
梦中吞鸟拟何为。损生莫若攀丹桂，免俗无过咏紫芝。
两岸芦花一江水，依前且把钓鱼丝。

卷 705_42 【题陈山人居】

黄滔

犹自莓苔马迹重，石嵌泉冷懒移峰。空垂凤食檐前竹，
漫拔龙形涧底松。隔岸青山秋见寺，半床明月夜闻钟。
谁能惆怅磻溪事，今古悠悠不再逢。

卷 705_43 【宿李少府园林】

黄滔

一壶浊酒百家诗，住此园林守选期。深院月凉留客夜，
古杉风细似泉时。尝频异茗尘心净，议罢名山竹影移。
明日绿苔浑扫后，石庭吟坐复容谁。

卷 705_44 【送人明经及第东归】

黄滔

十问九通离义床，今时登第信非常。亦从南院看新榜，
旋束春关归故乡。水到吴门方见海，树侵闽岭渐无霜。
知君已塞平生愿，日与交亲醉几场。

卷 705_45 【断酒】

黄滔

未老先为百病仍，醉杯无计接宾朋。免遭拽盏郎君谑，
还被簪花录事憎。丝管合时思索马，池塘晴后独留僧。
何因浇得离肠烂，南浦东门恨不胜。

卷 705_46 【南海幕和段先辈送韦侍御赴阙】

黄滔

树色川光入暮秋，使车西发不胜愁。璧连标格惊分散，
雪课篇章互唱酬。魏阙别当飞羽翼，燕台独且占风流。
满园歌管凉宵月，此后相思几上楼。

卷 705_47 【寄南海黄尚书】

黄滔

五羊城下驻行车，此事如今八载余。燕颌已知飞食肉，
龙门犹自退为鱼。红楼入夜笙歌合，白社惊秋草木疏。
西望清光寄消息，万重烟水一封书。

卷 705_48 【送人往苏州覲其兄】

黄滔

阖闾城外越江头，两地烟涛一叶舟。到日荆枝应便茂，
别时珠泪不须流。迎欢酒醒山当枕，咏古诗成月在楼。
明日尊前若相问，为言今访赤松游。

卷 705_49 【游东林寺】

黄滔

长生犹自重无生，言让仙祠佛寺成。碑折谁忘康乐制，
山灵表得远公名。松形入汉藤萝短，僧语离经耳目清。
莫怪迟迟不归去，童年已梦绕林行。

卷 705_50 【赠旌德吕明府】

黄滔

渥洼步数太阿姿，争遣王侯不奉知。花作城池入官处，
锦随刀尺少年时。两衙断狱兼留客，三考论功合树碑。
须信隔帘看刺史，锦章朱绂已葳蕤。

卷 705_51 【贺清源仆射新命】

黄滔

虽言嵩岳秀崔嵬，少降连枝命世才。南史两荣唯百揆，
东闽双拜有三台。二天在顶家家咏，丹凤衔书岁岁来。
虚说古贤龙虎盛，谁攀荆树上金台。

卷 705_52 【浙幕李端公泛建溪】

黄滔

越城吴国结良姻，交发芙蓉幕内宾。自顾幽沈槐省迹，
得陪清显谏垣臣。分题晓并兰舟远，对坐宵听月狔频。
更爱延平津上过，一双神剑是龙鳞。

卷 705_53 【贻宋评事】

黄滔

河阳城里谢城中，入曳长裾出佩铜。燕国金台无别客，
陶家柳下有清风。数踪篆隶书新得，一灶屯蒙火细红。
时说三吴欲归处，绿波洲渚紫蒲丛。

卷 705_54 【催妆】

黄滔

北府迎尘南郡来，莫将芳意更迟回。虽言天上光阴别，
且被人间更漏催。烟树迥垂连蒂杏，彩童交捧合欢杯。
吹箫不是神仙曲，争引秦娥下凤台。

卷 705_55 【寓题】

黄滔

每忆家山即涕零，定须归老旧云扃。银河水到人间浊，
丹桂枝垂月里馨。霜雪不飞无翠竹，鲸鲵犹在有青萍。
三千九万平生事，却恨南华说北溟。

卷 705_56 【伤蒋校书德山】

黄滔

谁到双溪溪岸傍，与招魂魄上苍苍。世间无树胜青桂，
陇上有花唯白杨。秦苑火然新赋在，越城山秀故居荒。
如何万古雕龙手，独是相如识汉皇。

卷 705_57 【寄杨赞图学士（学士与元昆俱以龙脑登选）】

黄滔

东堂第一领春风，时怪关西小骥慵。华表柱头还有鹤，
华歆名下别无龙。君恩凤阁含毫数，诗景珠宫列肆供。
今日江南驻舟处，莫言归计为云峰。

卷 705_58 【酬杨学士】

黄滔

神仙簿上愧非夫，诏作疑丹两入炉。诗里几曾吟芍药，
花中方得见菖蒲。阳春唱后应无曲，明月圆来别是珠。
莫下蓬山不回首，东风犹待重抟扶。

卷 705_59 【寄同年李侍郎龟正】

黄滔

石门南面泪浪浪，自此东西失帝乡。昆璞要疑方卓绝，
大鹏须息始开张。已归天上趋双阙，忽喜人间捧八行。
莫道秋霜不滋物，菊花还借后时黄。

卷 705_60 【钟陵故人】

黄滔

滕王阁下昔相逢，此地今难访所从。唯爱金笼贮鹦鹉，
谁论铁柱锁蛟龙。荆榛翠是钱神染，河岳期须国士钟，
一箸鲈鱼千古美，后人终少继前踪。

卷 705_61 【故山】

黄滔

支颐默省旧林泉，石径茅堂到目前。衰碧鸣蛩莎有露，
浓阴歇鹿竹无烟。水从井底通沧海，山在窗中倚远天。
何事苍髯不归去，燕昭台上一年年。

卷 705_62 【塞上】

黄滔

塞门关外日光微，角怨单于雁驻飞。冲水路从冰解断，
逾城人到月明归。燕山腊雪销金甲，秦苑秋风脆锦衣。
欲吊昭君倍惆怅，汉家甥舅竟相违。

卷 705_63 【乌石村（即林希刘故居）】

黄滔

往日江村今物华，一回登览一悲嗟。故人殁后城头月，
新鸟啼来垄上花。卖剑钱销知绝俗，闻蝉诗苦即思家。
谢公古郡青山在，三尺孤坟扑海沙。

卷 705_64 【寄同年卢员外】

黄滔

听尽莺声出雍州，秦吴烟月十经秋。龙门在地从人上，
郎省连天须鹤游。休恋一台惟妙绝，已经三字入精求。
当年甲乙皆华显，应念槐宫今雪头。

卷 705_65 【寄同年封舍人渭】

黄滔

唐城接轸赴秦川，忧合欢离骤十年。龙颔摘珠同泳海，
凤衔辉翰别升天。八行真迹虽收拾，四户高扃奈隔悬。
能使丘门终始雪，莫教华发独潸然。

卷 705_66 【遇罗员外衮】

黄滔

灞陵桥外驻征辕，此一分飞十六年。豸角戴时垂素发，
鸡香含处隔青天。绮园难贮林栖意，班马须持笔削权。
可忘自初相识地，秋风明月客鄜延。

卷 705_67 【送翁员外承赞】

黄滔

谁言吾党命多奇，荣美如君历数稀。衣锦还乡翻是客，
回车谒帝却为归。凤旋北阙虚丹穴，星复南宫逼紫微。
已分十旬无急诏，天涯相送只沾衣。

卷 705_68 【奉和翁文尧十九员外中谢日蒙恩赐金紫之什】

黄滔

面蒙君赐自龙墀，谁是还乡一袭衣。三品易悬鳞鬣赫，
八丝展起彩章飞。复为胜事垂千古，题作新诗后七微。
严助买臣精魄在，定应羞著昔年归。

卷 705_69 【翁文尧员外捧金紫还乡之命雅发篇章，将原交情远为嘉祝。泊燕鸿陆犬，楚水荆山，又吐琼瑶，逮之幽鄙。虽涌泉思触，逸兴皆虚，而强韵押难，非才颇愧。辄兹酬和，以质奖私】

黄滔

抔将盛事更无余，还向桥边看旧书。东越独推生竹箭，

北溟喜足贮鲲鱼。两回谁解归华表，午夜兼能荐子虚。
须把头冠弹尽日，怜君不与故人疏。

卷 705_70 【奉和翁文尧员外经过七林书堂见寄之什】

黄滔

朱旗引入昔茆堂，半日从容尽日忙。驷马宝车行锡礼，
金章紫绶带天香。山从南国添烟翠，龙起东溟认夜光。
定恐故园留不住，竹风松韵漫凄锵。

卷 705_71 【奉酬翁文尧员外驻南台见寄之什】

黄滔

人指南台山与川，大惊喜气异当年。花迎金册非时拆，
月对琼杯此夜圆。我爱藏冰从夏结，君怜修竹到冬鲜。
殷勤更抱鸣琴抚，为忆秦儿识断弦。

卷 705_72 【翁文尧员外拥册礼之归，一路有诗名《昼锦集》，
先将寄示，因书五十六字】

黄滔

六窠只佩诸侯印，争比从天拥册归。一轴郢人歌处雪，

两重朱氏著来衣。闽山秀已钟君尽，洛水波应溅我稀。
明日陪尘迎驷马，定淮斋沐看光辉。

卷 705_73 【奉和翁文尧员外文秀、光贤、昼锦之什】

黄滔

乡名里号一朝新，乃觉台恩重万钧。建水闽山无故事，
长卿严助是前身。清泉引入旁添润，嘉树移来别带春。
莫凭栏干剩留驻，内庭虚位待才臣。

虽言闽越系生贤，谁是还家宠自天。山简槐兼诸郡命，
郑玄惭秉六经权。鸟行去没孤烟树，渔唱还从碧岛川。
休说迟回未能去，夜来新梦禁中泉。

君王面赐紫还乡，金紫中推是甲裳。华构便将垂美号，
故山重更发清光。水澄此日兰宫镜，树忆当年柏署霜。
珍重朱栏兼翠拱，来来皆自读书堂。

卷 705_74 【奉酬翁文尧员外神泉之游见寄嘉什】

黄滔

含鸡假豸喜同游，野外嘶风并紫骝。松竹迥寻青障寺，
姓名题向白云楼。泉源出石清消暑，僧语离经妙破愁。

争奈爱山尤恋阙，古来能有几人休。

卷 705_75 【辄吟七言四韵，攀寄翁文尧拾遗】

黄滔

唐设高科表用文，吾曹谁作谏垣臣。甄山秀气旷千古，
凤阙华恩钟二人。起草便论天上事，如君不是世间身。
龙头龙尾前年梦，今日须怜应若神。

卷七百零六

卷 706_1 【塞上】

黄滔

掘地破重城，烧山搜伏兵。金徽互呜咽，玉笛自凄清。
使发西都耸，尘空北岳横。长河涉有路，旷野宿无程。
沙雨黄莺啭，辕门青草生。马归秦苑牧，人在虏云耕。
落日牛羊聚，秋风鼓角鸣。如何汉天子，青冢查含情。

卷 706_2 【寄献梓潼山侯侍御（时常拾遗谏诤）】

黄滔

汉宫行庙略，簪笏落民间。直道三湘水，高情四皓山。
赐衣僧脱去，奏表主批还。地得松萝坞，泉通雨雪湾。
东门添故事，南省缺新班。片石秋从露，幽窗夜不关。
梦余蟾隐映，吟次鸟绵蛮。可惜相如作，当时事悉闲。

卷 706_3 【壬癸岁书情】

黄滔

故园招隐客，应便笑无成。谒帝逢移国，投文值用兵。
孤松怜鹤在，疏柳恶蝉鸣。匹马迷归处，青云失曩情。
江头寒夜宿，垄上歉年耕。冠盖新人物，渔樵旧弟兄。
易生唯白发，难立是浮名。惆怅灞桥路，秋风谁入行。

卷 706_4 【河南府试秋夕闻新雁】

黄滔

湘南飞去日，蓟北乍惊秋。叫出陇云夜，闻为客子愁。
一声初触梦，半白已侵头。旅馆移欹枕，江城起倚楼。
余灯依古壁，片月下沧洲。寂听良宵彻，踌躇感岁流。

卷 706_5 【省试奉诏涨曲江池（以春字为韵。时乾符二年）】

黄滔

地脉寒来浅，恩波住后新。引将诸派水，别贮大都春。
幽咽疏通处，清冷进入辰。渐平连杏岸，旋阔映楼津。
沙没迷行径，洲宽恣跃鳞。愿当舟楫便，一附济川人。

卷 706_6 【题宣一僧正院】

黄滔

五级凌虚塔，三生落发师。都僧须有托，孤峤遂无期。
井邑焚香待，君侯减俸资。山衣随叠破，菜骨逐年羸。
茶取寒泉试，松于远涧移。吾曹来顶手，不合不题诗。

卷 706_7 【和吴学士对春雪献韦令公次韵】

黄滔

春雪下盈空，翻疑腊未穷。连天宁认月，堕地屡兼风。
忽误边沙上，应平火岭中。林间妨走兽，云际落飞鸿。
梁苑还吟客，齐都省创宫。掩扉皆堦北，移律愧居东。
书幌飘全湿，茶铛入旋融。奔川半留滞，叠树互玲珑。
出户行瑶砌，开园见粉丛。高才兴咏处，真宰答殊功。

卷 706_8 【省试——吹竽（乾符二年）】

黄滔

齐竽今历试，真伪不难知。欲使声声别，须令个个吹。
后先无错杂，能否立参差。次第教单进，宫商乃异宜。

凡音皆窅迹，至艺始呈奇。以此论文学，终凭一一窥。

卷 706_9 【明月照高楼】

黄滔

月满长空朗，楼侵碧落横。波文流藻井，桂魄拂雕楹。
深鉴罗纨薄，寒搜户牖清。冰铺梁燕噤，霜覆瓦松倾。
卓午收全影，斜悬转半明。佳人当此夕，多少别离情。

卷 706_10 【广州试越台怀古】

黄滔

南越千年事，兴怀一旦来。歌钟非旧俗，烟月有层台。
北望人何在，东流水不回。吹窗风杂瘴，沾槛雨经梅。
壮气曾难揖，空名信可哀。不堪登览处，花落与花开。

卷 706_11 【襄州试白云归帝乡】

黄滔

杳杳复霏霏，应缘有所依。不言天路远，终望帝乡归。
高岳和霜过，遥关带月飞。渐怜双阙近，宁恨众山违。

阵触银河乱，光连粉署微。旅人随计日，自笑比麻衣。

卷 706_12 【省试内出白鹿宣示百官（乾宁二年）】

黄滔

上瑞何曾乏，毛群表色难。推于五灵少，宣示百寮观。
形夺场驹洁，光交月兔寒。已驯瑶草别，孤立雪花团。
戴豸惭端士，抽毫跃史官。贵臣歌咏日，皆作白麟看。

卷 706_13 【出关言怀】

黄滔

又乞书题出，关西谒列侯。寄家僧许岳，钓浦雨移洲。
卖马登长陆，沾衣逐胜游。菜肠终日馁，霜鬓度年秋。
诗苦无人爱，言公是世仇。却怜庭际草，中有号忘忧。

卷 706_14 【壶公山（古老相传，右仙姓陈名壶公，于此山成道，因而名焉）】

黄滔

八面峰峦秀，孤高可偶然。数人游顶上，沧海见东边。

不信无灵洞，相传有古仙。橘如珠夏在，池象月垂穿。
仿佛尝闻乐，峒峒半插天。山寒彻三伏，松偃出千年。
樵牧时迷所，仓箱岁叠川。严祠风雨管，怪木薜萝缠。
青草方中药，苍苔石里钱。琼津流乳窦，春色驻芝田。
乌兔中时近，龙蛇蛰处臙。嘉名光列土，秀气产群贤。
瀑锁瑶台路，溪升钓浦船。鳌头擎恐没，地轴压应旋。
蠲疾寒甘露，藏珍起瑞烟。画工飞梦寐，诗客寄林泉。
掘地多云母，缘霜欠木绵。井通鳅吐脉，僧隔虎栖禅。
危磴千寻拔，奇花四季鲜。鹤归悬圃少，凤下碧梧偏。
桃易炎凉熟，茶推醉醒煎。村家蒙枣栗，俗骨爽猿蝉。
谷语升乔鸟，陂开共蒂莲。落枫丹叶舞，新蕨紫芽拳。
翠竹雕羌笛，悬藤煮蜀笺。白云长掩映，流水别潺湲。
作赋前儒阙，冲虚南国先。省郎求牧看，野老葺斋眠。
寺立兴衰创，碑须一二镌。清吟思却隐，簪绂奈萦牵。

卷 706_15 【和王舍人、崔补阙题天王寺】

黄滔

郭内青山寺，难论此崛奇。白云生院落，流水下城池。
石像雷霆后，江沙鼎鼐期。岳僧来坐夏，秦客会题诗。
冈转泉根滑，门升藓级危。紫微今日句，黄绢昔年碑。
歇鹤松低阁，鸣蛩径出篱。粉垣千堵束，金塔九层支。
啼鸟笙簧韵，开花锦绣姿。清斋奔井邑，玄发剃熊羆。
极浦征帆小，平芜落日迟。风篁清却暑，烟草绿无时。
信士三公作，灵踪四绝推。良游如不宿，明月拟何之。

卷 706_16 【投翰长赵侍郎】

黄滔

禹门西面逐飘蓬，忽喜仙都得入踪。贾氏许频趋季虎，
荀家因敢谒头龙。手扶日月重轮起，数是乾坤正气钟。
五色笔驱神出没，八花砖接帝从容。诗酬御制风骚古，
论似人情鼎鼐浓。岂有地能先凤掖，别无山更胜鳌峰。
攀鸿日浅魂飞越，为鲤年深势险峻。泽国雨荒三径草，
秦关雪折一枝筇。吹成暖景犹葭律，引上纤萝在岳松。
愿向明朝荐幽滞，免教号泣触登庸。

卷 706_17 【廊下李相公】

黄滔

秦城择日发征辕，斋戒来投节制尊。分虎名高初命相，
攀龙迹下愧登门。夜听讴咏销尘梦，晓拜旌幢战旅魂。
华舍未开宁有碍，彩毫虽乏敢无言。生兼文武为人杰，
出应乾坤静帝阍。计吐六奇谁敢敌，学穷三略不须论。
功高马卸黄金甲，台迥宾欢白玉樽。九穗嘉禾垂绮陌，
四时甘雨带雕轩。推恩每觉东溟浅，吹律能令北陆暄。
青草连沙无血溅，黄榆锁塞有莺翻。笙歌合沓春风郭，
鸡犬连延碧岫村。游子不缘贪献赋，永依棠树托蓬根。

卷 706_18 【成名后呈同年】

黄滔

业诗攻赋荐乡书，二纪如鸿历九衢。待得至公搜草泽，
如从平陆到蓬壶。虽惭锦鲤成穿额，忝获骊龙不寐珠。
蒙楚数疑休下泣，师刘大喝已为卢。人间灰管供红杏，
天上烟花应白榆。一字连镳巡甲族，千般唱罚赏皇都。
名推颜柳题金塔，饮自燕秦索玉姝。退愧单寒终预此，
敢将恩岳怠斯须。

卷 706_19 【投刑部裴郎中】

黄滔

两榜驱牵别海沱，佗门不合觅知音。瞻恩虽隔云雷赐，
向主终知犬马心。礼闱后人窥作镜，庙堂前席待为霖。
已齐日月悬千古，肯误风尘使陆沉。拜首敢将诚吐血，
蜕形唯待诺如金。愁闻南院看期到，恐被东墙旧恨侵。
缁化衣空难抵雪，黑销头尽不胜簪。数行泪里依投志，
直比沧溟未是深。

卷 706_20 【辇下寓题】

黄滔

对酒何曾醉，寻僧未觉闲。无人不惆怅，终日见南山。

卷 706_21 【寄题崔校书郊舍】

黄滔

一片寒塘水，寻常立鹭鸶。主人贫爱客，沽酒往吟诗。

卷 706_22 【秋思】

黄滔

碧嶂猿啼夜，新秋雨霁天。谁人爱明月，露坐洞庭船。

卷 706_23 【芳草】

黄滔

泽国多芳草，年年长自春。应从屈平后，更苦不归人。

卷 706_24 【辇下书事】

黄滔

北阙新王业，东城入羽书。秋风满林起，谁道有鲈鱼。

卷 706_25 【入关言怀】

黄滔

背将踪迹向京师，出在先春入后时。
落日灞桥飞雪里，已闻南院有看期。

卷 706_26 【过长江】

黄滔

曾搜景象恐通神，地下还应有主人。
若把长江比湘浦，离骚不合自灵均。

卷 706_27 【题灵峰僧院】

黄滔

系马松间不忍归，数巡香茗一枰棋。
拟登绝顶留人宿，犹待沧溟月满时。

卷 706_28 【司马长卿】

黄滔

一自梁园失意回，无人知有掞天才。
汉宫不锁陈皇后，谁肯量金买赋来。

卷 706_29 【归思】

黄滔

蓟北风烟空汉月，湘南云水半蛮边。
寒为旅雁暖还去，秦越离家可十年。

卷 706_30 【东林寺贯休上人篆隶题诗】

黄滔

师名自越彻秦中，秦越难寻师所从。
墨迹两般诗一首，香炉峰下似相逢。

卷 706_31 【寓江州李使君】

黄滔

使君曾被蝉声苦，每见词文即为愁。
况是楚江鸿到后，可堪西望发孤舟。

卷 706_32 【游南寓题】

黄滔

江山节被雪霜遗，毒草过秋未拟衰。
天不当时命邹衍，亦将寒律入南吹。

卷 706_33 【和同年赵先辈观文】

黄滔

玉兔轮中方是树，金鳌顶上别无山。
虽然回首见烟水，事主酬恩难便闲。

卷 706_34 【出京别同年】

黄滔

一枝仙桂已攀援，归去烟涛浦口村。
虽恨别离还有意，槐花黄日出青门。

卷 706_35 【木芙蓉三首】

黄滔

黄鸟啼烟二月朝，若教开即牡丹饶。
天嫌青帝恩光盛，留与秋风雪寂寥。

却假青腰女剪成，绿罗囊绽彩霞呈。
谁怜不及黄花菊，只遇陶潜便得名。

须到露寒方有态，为经霜裊稍无香。
移根若在秦宫里，多少佳人泣晓妆。

卷 706_36 【九日】

黄滔

阳数重时阴数残，露浓风硬欲成寒。
莫言黄菊花开晚，独占樽前一日欢。

卷 706_37 【夏州道中】

黄滔

陇雁南飞河水流，秦城千里忍回头。
征行浑与求名背，九月中旬往夏州。

卷 706_38 【经慈州感谢郎中】

黄滔

金声乃是古诗流，况有池塘春草俦。
莫遣宣城独垂号，云山彼此谢公游。

卷 706_39 【寓题】

黄滔

吴中烟水越中山，莫把渔樵谩自宽。
归泛扁舟可容易，五湖高士是抛官。

卷 706_40 【寄宋明府】

黄滔

北阙秋期南国身，重关烟月五溪云。
风蝉已有数声急，赖在陶家柳下闻。

卷 706_41 【灵均】

黄滔

莫问灵均昔日游，江篱春尽岸枫秋。
至今此事何人雪，月照楚山湘水流。

卷 706_42 【马嵬】

黄滔

锦江晴碧剑锋奇，合有千年降圣时。
天意从来知幸蜀，不关胎祸自蛾眉。

卷 706_43 【和陈先辈陪陆舍人春日游曲江】

黄滔

刘超游召郾谿陪，为忆池亭旧赏来。
红杏花旁见山色，诗成因触鼓声回。

卷 706_44 【花】

黄滔

莫道颜色如渥丹，莫道馨香过蕙兰。
东风吹绽还吹落，明日谁为今日看。

卷 706_45 【卷帘】

黄滔

绿鬟侍女手纤纤，新捧嫦娥出素蟾。
卫玠官高难久立，莫辞双卷水精帘。

卷 706_46 【启帐】

黄滔

得人憎定绣芙蓉，爱锁嫦娥出月踪。
侍女莫嫌抬素手，拨开珠翠待相逢。

卷 706_47 【去扇】

黄滔

城上风生蜡炬寒，锦帷开处露翔鸾。
已知秦女升仙态，休把圆轻隔牡丹。

卷 706_48 【别后】

黄滔

梦里相逢无后期，烟中解珮杳何之。
亏蟾便是陈宫镜，莫吐清光照别离。

卷 706_49 【严陵钓台】

黄滔

终向烟霞作野夫，一竿竹不换簪裾。
直钩犹逐熊羆起，独是先生真钓鱼。

卷 706_50 【马嵬二首】

黄滔

铁马嘶风一渡河，泪珠零便作惊波。
鸣泉亦感上皇意，流下陇头呜咽多。

龙脑移香凤辇留，可能千古永悠悠。
夜台若使香魂在，应作烟花出陇头。

卷 706_51 【闰八月】

黄滔

无人不爱今年闰，月看中秋两度圆。
唯恐雨师风伯意，至时还夺上楼天。

卷 706_52 【奉和翁文尧戏寄】

黄滔

掘兰宫里数名郎，好是乘轺出帝乡。
两度还家还未有，别论光彩向冠裳。

卷 706_53 【奉和文尧对庭前千叶石榴】

黄滔

一朵千英绽晓枝，彩霞堪与别为期。
移根若在芙蓉苑，岂向当年有醒时。

卷 706_54 【翁文尧以美疹暂滞，令公大王，益得异礼。观今日宠待之盛，辄成一章】

黄滔

滋赋誠文侯李盛，终求一袭锦衣难。
如何两度还州里，兼借乡人更剩观。

卷 706_55 【赠友人】

黄滔

超达陶子性，留琴不设弦。觅句朝忘食，倾杯夜废眠。
爱月影为伴，吟风声自连。听此莺飞谷，心怀迷远川。

卷七百零七

卷 707_1 【八月十五夜】

殷文圭

万里无云镜九州，最团圆夜是中秋。满衣冰彩拂不落，
遍地水光凝欲流。华岳影寒清露掌，海门风急白潮头。
因君照我丹心事，减得愁人一夕愁。

卷 707_2 【省试夜投献座主】

殷文圭

辟开公道选时英，神镜高悬鉴百灵。混沌分来融间气，
欃枪灭处炫文星。烛然兰省三条白，山束龙门万仞青。
圣教中兴周礼在，不劳干羽舞明庭。

卷 707_3 【观贺皇太子册命】

殷文圭

嗣册储皇帝命行，万方臣妾跃欢声。鸾旂再立星辰正，

雉扇双开日月明。自有汉元争翊戴，不劳商皓定欹倾。
春宫保傅皆周召，致主何忧不太平。

卷 707_4 【行朝早春侍师门宴西溪席上作】

殷文圭

西溪水色净于苔，画鹢横风绛帐开。弦管旋飘蓬岛去，
公卿皆是蕊宫来。金鳞掷浪钱翻荇，玉爵粘香雪泛梅。
三榜生徒逾七十，岂期龙坂纳非才。

卷 707_5 【贺同年第三人刘先辈咸辟命】

殷文圭

甲门才子鼎科人，拂地蓝衫榜下新。脱俗文章笑鹦鹉，
凌云头角压麒麟。金壶藉草溪亭晚，玉勒穿花野寺春。
多愧受恩同阙里，不嫌师僻与颜贫。

卷 707_6 【寄广南刘仆射】

殷文圭

战国从今却尚文，品流才子作将军。画船清宴蛮溪雨，

粉阁闲吟瘴峤云。暴客卸戈归惠政，史官调笔待儒勋。
汉仪一化南人后，牧马无因更夜闻。

卷 707_7 【题吴中陆龟蒙山斋】

殷文圭

万卷图书千户贵，十洲烟景四时和。花心露洗猩猩血，
水面风披瑟瑟罗。庄叟静眠清梦永，客儿芳意小诗多。
天麟不触人间网，拟把公卿换得么。

卷 707_8 【经李翰林墓】

殷文圭

诗中日月酒中仙，平地雄飞上九天。身谪蓬莱金籍外，
宝装方丈玉堂前。虎靴醉索将军脱，鸿笔悲无令子传。
十字遗碑三尺墓，只应吟客吊秋烟。

卷 707_9 【鹦鹉】

殷文圭

丹觜如簧翠羽轻，随人呼物旋知名。金笼夜黯山西梦，

玉枕晓憎帘外声。才子爱奇吟不足，美人怜尔绣初成。
应缘是我邯郸客，相顾咬咬别有情。

卷 707_10 【边将别】

殷文圭

地角天涯倍苦辛，十年铅槩未酬身。朱门泣别同蛟客，
紫塞旅游随雁臣。汉将出师冲晓雪，胡儿奔马扑征尘。
行行独止干戈域，毳帐望谁为主人。

卷 707_11 【江南秋日】

殷文圭

水国由来称道情，野人经此顿神清。一篷秋雨睡初起，
半砚冷云吟未成。青笠渔儿筒钓没，蓑衣菱女画桡轻。
冰绡写上江南景，寄与金銮马长卿。

卷 707_12 【题友人庭竹】

殷文圭

丛篁萧瑟拂清阴，贵地栽成碧玉林。尽待花开添凤食，

可怜风击状龙吟。钿竿离立霜文静，锦箨飘零粉节深。
何事子猷偏寄赏，此君心似古人心。

卷 707_13 【览陆龟蒙旧集】

殷文圭

先生文价沸三吴，白雪千编酒一壶。吟去星辰笔下动，
醉来嵩华眼中无。峭如谢桧虬蟠活，清似缙山凤路孤。
身后独遗封禅草，何人寻得佐鸿图。

卷 707_14 【玉仙道中】

殷文圭

莼鲈方美别吴江，笔阵诗魔两未降。山势北蟠龙偃蹇，
泉声东漱玉琤琮。古陂狐兔穿蛮冢，破寺荆榛拥佛幢。
信马冷吟迷路处，隔溪烟雨吠村厖。

卷 707_15 【赵侍郎看红白牡丹，因寄杨状头赞图】

殷文圭

迟开都为让群芳，贵地栽成对玉堂。红艳袅烟疑欲语，

素华映月只闻香。剪裁偏得东风意，淡薄似矜西子妆。
雅称花中为首冠，年年长占断春光。

卷 707_16 【题胡州太学丘光庭博士幽居】

殷文圭

舜轨尧文混九垓，明堂宏构集良材。江边云卧如龙稳，
天外泥书遣鹤来。五夜药苗滋沆漑，四时花影荫莓苔。
草玄门似山中静，不是公卿到不开。

卷 707_17 【初秋留别越中幕客】

殷文圭

魂梦飘零落叶洲，北辕南柁几时休。月中青桂渐看老，
星畔白榆还报秋。鹤禁有知须强进，稽峰无事莫相留。
吴花越柳饶君醉，直待功成始举头。

卷 707_18 【送道者朝见后归山】

殷文圭

暂随蒲帛谒金銮，萧洒风仪傲汉官。天马难将朱索绊，

海鳌宁觉碧涛宽。松坛月作尊前伴，竹篋书为教外欢。
神鼎已乾龙虎伏，一条真气出云端。

卷 707_19 【赠战将】

殷文圭

绿沈枪利雪峰尖，犀甲军装称紫髯。威慑万人长凛凛，
礼延群客每谦谦。阵前战马黄金勒，架上兵书白玉签。
不为已为儒弟子，好依门下学韬钤。

卷 707_20 【九华贺雨吟】

殷文圭

陶公焦思念生灵，变旱为丰合杳冥。雷劈老松疑虎怒，
雨冲阴洞觉龙腥。万畦香稻蓬葱绿，九朵奇峰扑亚青。
吟贺西成饶旅兴，散丝飞洒满长亭。

卷 707_21 【赠池州张太守】

殷文圭

神珠无颣玉无瑕，七叶簪貂汉相家。阵面奔星破犀象，

笔头飞电跃龙蛇。绛帙夜坐穷三史，红旆春行到九华。
只怕池人留不住，别迁征镇拥高牙。

卷 707_22 【中秋自宛陵寄池阳太守】

殷文圭

出山三见月如眉，蝶梦终宵绕戟枝。旅客思归鸿去日，
贤侯行化子来时。郡楼遐想刘琨啸，相阁方窥谢傅棋。
按部况闻秋稼熟，马前迎拜羨并儿。

卷 707_23 【次韵九华杜先辈重阳寄投宛陵丞相】

殷文圭

日下飞声彻不毛，酒醒时得广离骚。先生鬓为吟诗白，
上相心因治国劳。千乘信回鱼榼重，九华秋迥凤巢高。
强酬小谢重阳句，沙恨无金尽日淘。

卷 707_24 【寄贺杜荀鹤及第】

殷文圭

一战平畴五字劳，昼归乡去锦为袍。大鹏出海翎犹湿，

骏马辞天气正豪。九子旧山增秀绝，二南新格变风骚。
由来稽古符公道，平地丹梯甲乙高。

卷 707_25 【春草碧色】

殷文圭

细草含愁碧，芊绵南浦滨。萋萋如恨别，苒苒共伤春。
疏雨烟华润，斜阳细彩匀。花粘繁斗锦，人藉软胜茵。
浅映宫池水，轻遮辇路尘。杜回如可结，誓作报恩身。

卷 707_26 【和友人送衡尚书赴池阳副车】

殷文圭

淮王上将例分忧，玉帐参承半列侯。次第选材如创厦，
别离排宴向藏舟。鲲鹏变化知难测，龙蠖升沈各有由。
躔蹀行牵金铍重，婵娟立唱翠娥愁。筑头勋业谐三阵，
满腹诗书究九流。金海珠韬乘月读，肉芝牙茗拨云收。
赤鳞旆卷鸥汀晚，青雀船横雁阵秋。十字细波澄镜面，
九华残雪露峰头。醉沈北海千尊酒，吟上南荆百尺楼。
况是昭明食鱼郡，不妨闲掷钓璜钩。

卷 707_27 【贻李南平（文圭为内翰时，草司空李德诚麻。润笔久不至，为诗督之）】

殷文圭

紫殿西头月欲斜，曾草临淮上相麻。
润笔已曾经奏谢，更飞章句问张华。

卷 707_28 【句】

殷文圭

龙舒太守人中杰，风韵堂中心似月。
众口声光夸汉将，筑头勋业佐淮王。

卷七百零八

卷 708_1 【钓台】

徐夔

金门谁奉诏，碧岸独垂钩。旧友只樵叟，新交惟野鸥。
嘉名悬日月，深谷化陵丘。便可招巢父，长川好饮牛。

卷 708_2 【旅次寓题】

徐夔

胡为名利役，来往老关河。白发随梳少，青山入梦多。
途穷怜抱疾，世乱耻登科。却起渔舟念，春风钓绿波。

卷 708_3 【赠严司直】

徐夔

承家居阙下，避世出关东。有酒刘伶醉，无儿伯道穷。
新诗吟阁赏，旧业钓台空。雨雪还相访，心怀与我同。

卷 708_4 【赠东方道士】

徐夔

葫芦窗畔挂，是物在其间。雪色老人鬓，桃花童子颜。
祭星秋卜日，采药晓登山。旧放长生鹿，时衔瑞草还。

卷 708_5 【题僧壁】

徐夔

香厨流瀑布，独院锁孤峰。绀发青螺长，文茵紫豹重。
卵枯皆化燕，蜜老却成蜂。明月留人宿，秋声夜著松。

卷 708_6 【和人经隋唐间战处】

徐夔

孤军前度战，一败一成功。卷旆早归国，卧尸犹臂弓。
草间腥半在，沙上血残红。伤魄何为者，五湖垂钓翁。

卷 708_7 【追和常建叹王昭君】

徐夤

红颜如朔雪，日烁忽成空。泪尽黄云雨，尘消白草风。
君心争不悔，恨思竟何穷。愿化南飞燕，年年入汉宫。

卷 708_8 【赠董先生】

徐夤

寿岁过于百，时闲到上京。餐松双鬓嫩，绝粒四支轻。
雨雪思中岳，云霞梦赤城。来年期寿筭，何处待先生。

卷 708_9 【河流】

徐夤

洪流盘砥柱，淮济不同波。莫讶清时少，都缘曲处多。
远能通玉塞，高复接银河。大禹成门嶮，为龙始得过。

卷 708_10 【题南寺】

徐夔

久别猿啼寺，流年劫逝波。旧僧归塔尽，古瓦长松多。
壁藓昏题记，窗萤散薜萝。平生英壮节，何故旋消磨。

卷 708_11 【北山秋晚】

徐夔

十载衣裘尽，临寒隐薜萝。心闲缘事少，身老爱山多。
玉露催收菊，金风促剪禾。燕秦正戎马，林下好婆娑。

卷 708_12 【昔游】

徐夔

昔游红杏苑，今隐刺桐村。岁计悬僧债，科名负国恩。
不书胝渐稳，频镊鬓无根。惟有经邦事，年年志尚存。

卷 708_13 【酒胡子】

徐夤

红筵丝竹合，用尔作欢娱。直指宁偏党，无私绝觊觎。
当歌谁擢袖，应节渐轻躯。恰与真相似，毡裘满颌须。

卷 708_14 【吊崔补阙】

徐夤

近来吾道少，恸哭博陵君。直节岩前竹，孤魂岭上云。
缙绅传确论，丞相取遗文。废却中兴策，何由免用军。

卷 708_15 【吊赤水李先生】

徐夤

三年悲过隙，一室类销冰。妻病入仙观，子穷随岳僧。
荒丘寒有雨，古屋夜无灯。往日清猷著，金门几欲征。

708_16 【香鸭】

徐夔

不假陶熔妙，谁教羽翼全。五金池畔质，百和口中烟。
觜钝鱼难啄，心空火自燃。御炉如有阙，须进圣君前。

卷 708_17 【鸡】

徐夔

名参十二属，花入羽毛深。守信催朝日，能鸣送晓阴。
峨冠装瑞璧，利爪削黄金。徒有稻粱感，何由报德音。

卷 708_18 【白鸽】

徐夔

举翼凌空碧，依人到大邦。粉翎栖画阁，雪影拂琼窗。
振鹭堪为侣，鸣鸠好作双。狎鸥归未得，睹尔忆晴江。

卷 708_19 【龟】

徐夔

行止竟何从，深溪与古峰。青荷巢瑞质，绿水返灵踪。
钻骨神明应，酬恩感激重。仙翁求一卦，何日脱龙钟。

卷 708_20 【银结条冠子】

徐夔

日下征良匠，宫中赠阿娇。瑞莲开二孕，琼缕织千条。
蝉翼轻轻结，花纹细细挑。舞时红袖举，纤影透龙绡。

卷 708_21 【蜀葵】

徐夔

剑门南面树，移向会仙亭。锦水饶花艳，岷山带叶青。
文君惭婉婉，神女让娉婷。烂漫红兼紫，飘香入绣扃。

卷 708_22 【华清宫】

徐夔

十二琼楼锁翠微，暮霞遗却六铢衣。桐枯丹穴凤何去，
天在鼎湖龙不归。帘影罢添新翡翠，露华犹湿旧珠玑。
君王魂断骊山路，且向蓬瀛伴贵妃。

卷 708_23 【再幸华清宫】

徐夔

肠断将军改葬归，锦囊香在忆当时。年来却恨相思树，
春至不生连理枝。雪女冢头瑶草合，贵妃池里玉莲衰。
霓裳旧曲飞霜殿，梦破魂惊绝后期。

卷 708_24 【喜雨上主人尚书】

徐夔

天皇攘袂敕神龙，雨我公田兆岁丰。几日淋漓侵暮角，
数宵滂沛彻晨钟。细如春雾笼平野，猛似秋风击古松。
门下十年耕稼者，坐来偏忆翠微峰。

卷 708_25 【回文诗二首】

徐夔

飞书一幅锦文回，恨写深情寄雁来。机上月残香阁掩，
树梢烟澹绿窗开。霏霏雨罢歌终曲，漠漠云深酒满杯。
归日几人行问卜，徽音想望倚高台。

轻帆数点千峰碧，水接云山四望遥。晴日海霞红霭霭，
晓天江树绿迢迢。清波石眼泉当槛，小径松门寺对桥。
明月钓舟渔浦远，倾山雪浪暗随潮。

卷 708_26 【不把渔竿】

徐夔

不把渔竿不灌园，策筇吟绕绿芜村。得争野老眠云乐，
倍感闽王与善恩。鸟趁竹风穿静户，鱼吹烟浪喷晴轩。
何人买我安贫趣，百万黄金未可论。

卷 708_27 【古往今来】

徐夔

古往今来恨莫穷，不如沈醉卧春风。雀儿无角长穿屋，

鸚鵡能言却入籠。柳惠豈嫌居下位，朱云直去指三公。
閑思郭令長安宅，草沒匡牆舊事空。

卷 708_28 【十里烟籠】

徐夔

十里烟籠一徑分，故人迢遞久離群。白雲明月皆由我，
碧水青山忽贈君。浮世宦名渾似夢，半生勤苦謾為文。
北邙坡上青松下，盡是鏘金佩玉墳。

卷 708_29 【偶書】

徐夔

巧者多為拙者資，良籌第一在乘時。市門逐利終身飽，
谷口躬耕盡日飢。琮玖鬻來燕石貴，蓬蒿芳處楚蘭衰。
高皇冷笑重瞳客，蓋世拔山何所為。

卷 708_30 【潤屋】

徐夔

潤屋豐家莫妄求，眼看多是與身讎。百禽羅得皆黃口，

四皓山居始白头。玉炼火光争肯变，草芳崎岸不曾秋。
朱门粉署何由到，空寄新诗谢列侯。

卷 708_31 【退居】

徐夔

鹤性松心合在山，五侯门馆怯趋攀。三年卧病不能免，
一日受恩方得还。明月送人沿驿路，白云随马入柴关。
笑他范蠡贪婪甚，相罢金多始退闲。

卷 708_32 【闭门】

徐夔

闭却闲门卧小窗。更何人与疗膏肓。一生有酒唯知醉，
四大无根可预量。骨冷欲针先觉痛，肉顽频灸不成疮。
漳滨伏枕文园渴，盗跖纵横似虎狼。

卷 708_33 【开窗】

徐夔

闭户开窗寝又兴，三更时节也如冰。长闲便是忘机者，

不出真如过夏僧。环堵岂惭蜗作舍，布衣宁假鹤为翎。
蔷薇花尽薰风起，绿叶空随满架藤。

卷 708_34 【灯花】

徐夤

点蜡烧银却胜栽，九华红艳吐玫瑰。独含冬夜寒光拆，
不傍春风暖处开。难见只因能送喜，莫挑唯恐堕成灰。
贪膏附热多相误，为报飞蛾罢拂来。

卷 708_35 【东归出城留别知己】

徐夤

韦蒙屈指许非才，三载长安共酒杯。欲别未攀杨柳赠，
相留拟待牡丹开。寒随御水波光散，暖逐衡阳雁影来。
他日因书问衰飒，东溪须访子陵台。

卷 708_36 【咏怀】

徐夤

愁花变出白髭须，半世辛勤一事无。道在或期君梦想，

贫来争奈鬼揶揄。马卿自愧长婴疾，颜子谁怜不是愚。
借取秦宫台上镜，为时开照汉妖狐。

卷 708_37 【郊村独游】

徐夔

岁闰堪怜历候迟，出门惟与野云期。惊鱼掷上绿荷芰，
栖鸟啄余红荔枝。末路可能长薄命，修途应合有良时。
市头相者休相戏，蹙膝先生半自知。

卷 708_38 【经故（一作过）翰林杨左丞池亭】

徐夔

八角红亭荫绿池，一朝青草盖遗基。蔷薇藤老开花浅，
翡翠巢空落羽奇。春榜几深门下客，乐章多取集中诗。
平生德义人间诵，身后何劳更立碑。

卷 708_39 【经故（一作过）广平员外旧宅】

徐夔

门巷萧条引涕洟，遗孤三岁著麻衣。绿杨树老垂丝短，

翠竹林荒著笋稀。结社僧因秋朔吊，买书船近葬时归。
平生欲献匡君策，抱病犹言未息机。

卷 708_40 【潘丞相旧宅】

徐夤

绿树垂枝荫四邻，春风还似旧时春。年年燕是雕梁主，
处处花随落月尘。七贵竟为长逝客，五侯寻作不归人。
秋槐影薄蝉声尽，休谓龙门待化鳞。

卷 708_41 【门外闲田数亩长有泉源因筑直堤分为两沼】

徐夤

左右澄漪小槛前，直堤高筑古平川。十分春水双檐影，
一片秋空两月悬。前岸好山摇细浪，夹门嘉树合晴烟。
坐来暗起江湖思，速问溪翁买钓船。

卷 708_42 【北园】

徐夤

北园干叶旋空枝，兰蕙还将众草衰。笼鸟上天犹有待，

病龙兴雨岂无期。身闲不厌频来客，年老偏怜最小儿。
生事罢求名与利，一窗书策是年支。

卷 708_43 【溪上要一只白簟扇盖头垂钓，去年就节推侍御请之，蒙惠一柄紫花纹者。虽则鳞华具甚（一作在），纸薄不及清源所出，因就南郡陈常侍请之，遂成拙句】

徐夔

难求珍簟过炎天，远就金貂乞月圆。直在引风欹角枕，
且图遮日上渔船。但令织取无花簟，不用挑为饮露蝉。
莫道如今时较晚，也应留得到明年。

卷 708_44 【招隐】

徐夔

齿发那能敌岁华，早知休去避尘沙。鬼神只阨高明里，
倚伏不干栖隐家。陶景岂全轻组绶，留侯非独爱烟霞。
赠君吉语堪铭座，看取朝开暮落花。

卷 708_45 【忆山中友人】

徐夔

忆得当年接善邻，苦将闲事强夫君。斗开碧沼分明月，
各领青山占白云。近日药方多缮写，旧来诗草半烧焚。
金门几欲言西上，惆怅关河正用军。

卷 708_46 【溪隐】

徐夔

将名将利已无缘，深隐清溪拟学仙。绝却腥膻胜服药，
断除杯酒合延年。蜗牛壳漏宁同舍，榆荚花开不是钱。
鸾鹤久从笼槛闭，春风却放纸为鸢。

卷 708_47 【酒醒】

徐夔

酒醒欲得适闲情，骑马那胜策杖行。天暖天寒三月暮，
溪南溪北两村名。沙澄浅水鱼知钓，花落平田鹤见耕。
望断长安故交远，来书未说九河清。

卷 708_48 【梦断】

徐夔

梦断纱窗半夜雷，别君花落又花开。渔阳路远书难寄，
衡岳山高月不来。玄燕有情穿绣户，灵龟无应祝金杯。
人生若得长相对，萤火生烟草化灰。

卷 708_49 【人事】

徐夔

人事飘如一炷烟，且须求佛与求仙。丰年甲子春无雨，
良夜庚申夏足眠。颜氏岂嫌瓢里饮，孟光非取镜中妍。
平生生计何为者，三径苍苔十亩田。

卷 708_50 【休说】

徐夔

休说人间有陆沈，一樽闲待月明斟。时来不怕沧溟阔，
道大却忧潢潦深。白首钓鱼应是分，青云干禄已无心。
梓桐赋罢相如隐，谁为君前永夜吟。

卷 708_51 【嘉运】

徐夤

嘉运良时两阻修，钓竿蓑笠乐林丘。家无寸帛浑闲事，
身似浮云且自由。庭际鸟啼花旋落，潭心月在水空流。
晨炊一箸红银粒，忆著长安索米秋。

卷 708_52 【绿鬓】

徐夤

绿鬓先生自出林，孟光同乐野云深。躬耕为食古人操，
非织不衣贤者心。眼众岂能分瑞璧，舌多须信烁良金。
君看黄阁南迁客，一过泷州绝好音。

卷 708_53 【骄侈】

徐夤

骄侈阉危俭素牢，镜中形影岂能逃。石家恃富身还灭，
颜子非贫道不遭。蝙蝠亦能知日月，鸾凤那肯啄腥臊。
古今人事惟堪醉，好脱霜裘换绿醪。

卷 708_54 【龙蛰二首】

徐夔

龙蛰蛇蟠却待伸，和光何惜且同尘。伍员岂是吹箫者，
冀缺非同执耒人。神剑触星当变化，良金成器在陶钧。
穰侯休忌关东客，张禄先生竟相秦。

休说雄才间代生，到头难与运相争。时通有诏征枚乘，
世乱无人荐祢衡。逐日莫矜驽马步，司晨谁要牝鸡鸣。
中林且作烟霞侣，尘满关河未可行。

卷 708_55 【逐臭苍蝇】

徐夔

逐臭苍蝇岂有为，清蝉吟露最高奇。多藏苟得何名富，
饱食嗟来未胜饥。穷寂不妨延寿考，贪狂总待算毫厘。
首阳山翠千年在，好奠冰壶吊伯夷。

卷 708_56 【牡丹花二首】

徐夔

看遍花无胜此花，剪云披雪蘸丹砂。开当青律二三月，

破却长安千万家。天纵秾华割鄙吝，春教妖艳毒豪奢。
不随寒令同时放，倍种双松与辟邪。

万万花中第一流，浅霞轻染嫩银瓯。能狂绮陌千金子，
也惑朱门万户侯。朝日照开携酒看，暮风吹落绕栏收。
诗书满架尘埃扑，尽日无人略举头。

卷 708_57 【尚书座上赋牡丹花得轻字韵（一本无韵字）其花
自越中移植】

徐夤

流苏凝作瑞华精，仙阁开时丽日晴。霜月冷销银烛焰，
宝瓯圆印彩云英。娇含嫩脸春妆薄，红薰香绡艳色轻。
早晚有人天上去，寄他将赠董双成。

卷 708_58 【依韵和尚书再赠牡丹花】

徐夤

烂银基地薄红妆，羞杀千花百卉芳。紫陌昔曾游寺看，
朱门今在绕栏望。龙分夜雨资娇态，天与春风发好香。
多著黄金何处买，轻桡挑过镜湖光。

卷 708_59 【郡庭（一作伯）惜牡丹】

徐夔

肠断东风落牡丹，为祥为瑞久留难。青春不驻堪垂泪，
红艳已空犹倚栏。积藓下销香蕊尽，晴阳高照露华干。
明年万叶千枝长，倍发芳菲借客看。

卷 708_60 【追和白舍人咏白牡丹】

徐夔

蓓蕾抽开素练囊，琼葩薰出白龙香。裁分楚女朝云片，
剪破姮娥夜月光。雪句岂须征柳絮，粉腮应恨帖梅妆。
槛边几笑东篱菊，冷折金风待降霜。

卷 708_61 【忆牡丹】

徐夔

绿树多和雪霰栽，长安一别十年来。王侯买得价偏重，
桃李落残花始开。宋玉邻边腮正嫩，文君机上锦初裁。
沧洲春暮空肠断，画看犹将劝酒杯。

卷 708_62 【惜牡丹】

徐夤

今日狂风揭锦筵，预愁吹落夕阳天。闲看红艳只须醉，
谩惜黄金岂是贤。南国好偷夸粉黛，汉宫宜摘赠神仙。
良时虽作莺花主，白马王孙恰少年。

卷 708_63 【览柳浑汀洲采白蘋之什，因成一章】

徐夤

采尽汀蘋恨别离，鸳鸯鸂鶒总双飞。月明南浦梦初断，
花落洞庭人未归。天远有书随驿使，夜长无烛照寒机。
年来泣泪知多少，重叠成痕在绣衣。

卷 708_64 【司直巡官无诸移到玫瑰花】

徐夤

芳菲移自越王台，最似蔷薇好并栽。秾艳尽怜胜彩绘，
嘉名谁赠作玫瑰。春藏锦绣风吹拆，天染琼瑶日照开。
为报朱衣早邀客，莫教零落委苍苔。

卷 708_65 【梅花】

徐夔

琼瑶初绽岭头葩，蕊粉新妆姹女家。举世更谁怜洁白，
痴心皆尽爱繁华。玄冥借与三冬景，谢氏输他六出花。
结实和羹知有日，肯随羌笛落天涯。

卷 708_66 【荔枝二首】

徐夔

朱弹星丸粲日光，绿琼枝散小香囊。龙绡壳绽红纹粟，
鱼目珠涵白膜浆。梅熟已过南岭雨，橘酸空待洞庭霜。
蛮山蹋晓和烟摘，拜捧金盘奉越王。

日日熏风卷瘴烟，南园珍果荔枝先。灵鸦啄破琼津滴，
宝器盛来蚌腹圆。锦里只闻销醉客，蕊宫惟合赠神仙。
何人刺出猩猩血，深染罗纹遍壳鲜。

卷 708_67 【菊花】

徐夔

桓景登高事可寻，黄花开处绿畦深。消灾辟恶君须采，

冷露寒霜我自禁。篱物早荣还早谢，涧松同德复同心。
陶公岂是居贫者，剩有东篱万朵金。

卷 708_68 【画松】

徐夤

涧底阴森验笔精，笔闲开展觉神清。曾当月照还无影，
若许风吹合有声。枝偃只应玄鹤识，根深且与茯苓生。
天台道士频来见，说似株株倚赤城。

卷 708_69 【草木】

徐夤

草木无情亦可嗟，重开明镜照无涯。菊英空折罗含宅，
榆荚不生原宪家。天命岂凭医药石，世途还要辟虫沙。
仙翁乞取金盘露，洗却苍苍两鬓华。

卷 708_70 【松】

徐夤

涧底青松不染尘，未逢良匠竞谁分。龙盘劲节岩前见，

鹤唳翠梢天上闻。大厦可营谁择木，女萝相附欲凌云。
皇王自有增封日，修竹徒劳号此君。

卷 708_71 【竹】

徐夔

翠染琅玕粉渐开，东南移得会稽栽。游丝挂处渔竿去，
绿水夹时龙影来。风触有声含六律，露沾如洗绝浮埃。
王猷旧宅无人到，抱却清阴盖绿苔。

卷 708_72 【尚书打球，小骢步骤最奇，因有所赠】

徐夔

善价千金未可论，燕王新寄小龙孙。逐将白日驰青汉，
衔得流星入画门。步骤最能随手转，性灵多恐会人言。
桃花雪点多虽贵，全假当场一顾恩。

卷 708_73 【尚书惠蜡面茶】

徐夔

武夷春暖月初圆，采摘新芽献地仙。飞鹊印成香蜡片，

啼猿溪走木兰船。金槽和碾沈香末，冰碗轻涵翠缕烟。
分赠恩深知最异，晚铛宜煮北山泉。

卷 708_74 【劝酒】

徐夤

休向尊前诉羽觞，百壶清酌与君倾。身同绿树年年老，
事比红尘日日生。六国英雄徒反覆，九原松柏甚分明。
醉乡路与乾坤隔，岂信人间有利名。

卷 708_75 【断酒】

徐夤

因论沈湎觉前非，便碎金罍与羽卮。采茗早驰三蜀使，
看花甘负五侯期。窗间近火刘伶传，座右新铭管仲辞。
此事十年前已说，匡庐山下老僧知。

卷 708_76 【忆旧山】

徐夤

涧竹岩云有旧期，二年频长鬓边丝。游鱼不爱金杯水，

· 全唐诗 ·

栖鸟敢求琼树枝。陶景恋深松桧影，留侯抛却帝王师。
龙争虎攫皆闲事，数叠山光在梦思。

卷七零零九

卷 709_1 【西华】

徐夔

五千仞有余神秀，一一排云上沆寥。叠嶂出关分二陕，
残冈过水作中条。巨灵庙破生春草，毛女峰高入绛霄。
拜祝金天乞阴德，为民求主降神尧。

卷 709_2 【岚似屏风】

徐夔

岚似屏风草似茵，草边时脍锦花鳞。山中宰相陶弘景，
谷口耕夫郑子真。宦达到头思野逸，才多未必笑清贫。
君看东洛平泉宅，只有年年百卉春。

卷 709_3 【忆潼关】

徐夔

洞壑双扉入到初，似从深阱睹高墟。天开白日临军国，

山夹黄河护帝居。隋炀远游宜不反，奉春长策竟何如。
须知皇汉能肩鏹，延得年过四百余。

卷 709_4 【忆潼关早行】

徐夔

行客起看仙掌月，落星斜照浊河泥。故山远处高飞雁，
去马鸣时先早鸡。关柳不知谁氏种，岳碑犹见圣君题。
蒹葭十轴僮三尺，岂谓青云便有梯。

卷 709_5 【鸿门】

徐夔

耨月耕烟水国春，薄徒应笑作农人。皇王尚法三推礼，
白社宁忘四体勤。雨洒蓑衣芳草暗，鸟啼云树小村贫。
犹胜堕力求飧者，五斗低腰走世尘。

卷 709_6 【忆长安行】

徐夔

旧历关中忆废兴，僭奢须戒俭须凭。火光只是烧秦冢，

贼眼何曾视灞陵。钟鼓煎催人自急，侯王更换恨难胜。
不如坐钓清溪月，心共寒潭一片澄。

卷 709_7 【忆长安上省年】

徐夔

忽忆关中逐计车，历坊骑马信空虚。三秋病起见新雁，
八月夜长思旧居。宗伯帐前曾献赋，相君门下再投书。
如今说著犹堪泣，两宿都堂过岁除。

卷 709_8 【长安述怀】

徐夔

黄河冰合尚来游，知命知时肯躁求。词赋有名堪自负，
春风落第不曾羞。风尘色里凋双鬓，鼙鼓声中历几州。
十载公卿早言屈，何须课夏更冥搜。

卷 709_9 【长安即事三首】

徐夔

抛掷清溪旧钓钩，长安寒暑再环周。便随莺羽三春化，

只说蝉声一度愁。扫雪自怜窗纸照，上天宁愧海槎流？
明时则待金门诏，肯羨班超万户侯。

无酒穷愁结自舒，饮河求满不求余。身登霄汉平时第，
家得干戈定后书。富贵敢期苏季子，清贫方见马相如。
明时用即匡君去，不用何妨却钓鱼。

拖紫腰金不要论，便堪归隐白云村。更无名籍强金榜，
岂有花枝胜杏园。绮席促时皆国器，羽觞飞处尽王孙。
高眠亦是前贤事，争报春闱莫大恩。

卷 709_10 【东京次新安道中】

徐夤

贼去兵来岁月长，野蒿空满坏墙匡。旋从古辙成深谷，
几见金舆过上阳。洛水送年催代谢，嵩山擎日拂穹苍。
殊时异世为儒者，不见文皇与武皇。

卷 709_11 【山阴故事】

徐夤

坦腹夫君不可逢，千年犹在播英风。红鹅化鹤青天远，
彩笔成龙绿水空。爱竹只应怜直节，书裙多是为奇童。

吹笙缑岭登山后，东注清流岂有穷。

卷 709_12 【温陵即事】

徐夤

早年师友教为文，卖却鱼舟网典坟。国有安危期日谏，
家无担石暂从军。非才岂合攀丹桂，多病犹堪伴白云。
争得千钟季孙粟，沧洲归与故人分。

卷 709_13 【温陵残腊书怀寄崔尚书】

徐夤

济川无楫拟何为，三杰还从汉祖推。心学庭槐空发火，
鬓同门柳即垂丝。中兴未遇先怀策，除夜相催也课诗。
江上年年接君子，一杯春酒一枰棋。

卷 709_14 【义通里寓居即事】

徐夤

家住寒梅翠岭东，长安时节咏途穷。牡丹窠小春余雨，
杨柳丝疏夏足风。愁鬓已还年纪白，衰容宁藉酒杯红。

长卿甚有凌云作，谁与清吟绕帝宫？

卷 709_15 【上阳宫词】

徐夤

点点苔钱上玉墀，日斜空望六龙西。妆台尘暗青鸾掩，
宫树月明黄鸟啼。庭草可怜分雨露，君恩深恨隔云泥。
银蟾借与金波路，得入重轮伴羿妻。

卷 709_16 【西寨寓居】

徐夤

闲读南华对酒杯，醉携筇竹画苍苔。豪门有利人争去，
陋巷无权客不来。解报可能医病雀，重燃谁肯照寒灰。
严陵万古清风在，好棹东溪咏钓台。

功智争驰淡薄空，犹怀忠信拟何从。鸱鸢啄腐疑雏凤，
神鬼欺贫笑伯龙。烈日不融双鬓雪，病身全仰竹枝筇。
崇侯入辅严陵退，堪忆啼猿万仞峰。

卷 709_17 【题福州天王阁】

徐夔

绝境宜栖独角仙，金张到此亦忘还。三门里面千层阁，
万井中心一朵山。江拗碧湾盘洞府，石排青壁护禅关。
有时海上看明月，辗出冰轮叠浪间。

卷 709_18 【忆荐福寺南院】

徐夔

忆昔长安落第春，佛宫南院独游频。灯前不动惟金像，
壁上曾题尽古人。鶗鴂声中双阙雨，牡丹花际六街尘。
啼猿溪上将归去，合问升平诣秉钧。

卷 709_19 【塔院小屋，四壁皆是卿相题名，因成四韵】

徐夔

雁塔搀空映九衢，每看华宇每踟蹰。题名尽是台衡迹，
满壁堪为宰辅图。鸾凤岂巢荆棘树，虬龙多蛰帝王都。
谁知远客思归梦，夜夜无船自过湖。

卷 709_20 【题名琉璃院（今改名景祥院）】

徐夤

一条溪绕翠岩隈，行脚僧言胜五台。农罢树阴黄犊卧，
斋时山下白衣来。松因往日门人种，路是前生长老开。
三卷贝多金粟语，可能长诵免轮回。

卷 709_21 【寺中偶题】

徐夤

听话金仙眉相毫，每来皆得解尘劳。鹤栖云路看方贵，
僧倚松门见始高。名利罢烧心内火，雪霜偏垢鬓边毛。
银蟾未出金乌在，更上层楼眺海涛。

卷 709_22 【山寺（一作中）寓居】

徐夤

高卧东林最上方，水声山翠别愁肠。白云送雨笼僧阁，
黄叶随风入客堂。终去四明成大道，暂从双鬓许秋霜。
披缁学佛应无分，鹤氅谈空亦不妨。

卷 709_23 【寄僧寓题】

徐夤

佛顶抄经忆惠休，众人皆谓我悠悠。浮生真个醉中梦，
闲事莫添身外愁。百岁付于花暗落，四时随却水奔流。
安眠静笑思何报，日夜焚修祝郡侯。

卷 709_24 【游灵隐天竺二寺】

徐夤

丹井冷泉虚易到，两山真界实难名。石和云雾莲华气，
月过楼台桂子清。腾踏回桥巡像设，罗穿曲洞出龙城。
更怜童子呼猿去，飒飒萧萧下树行。

卷 709_25 【醉题邑宰南塘屋壁】

徐夤

万古清淮照远天，黄河浊浪不相关。县留东道三千客，
宅锁南塘一片山。草色净经秋雨绿，烧痕寒入晓窗斑。
闽王美锦求贤制，未许陶公解印还。

卷 709_26 【题泗洲塔】

徐夤

十年前事已悠哉，旋被钟声早暮催。明月似师生又没，
白云如客去还来。烟笼瑞阁僧经静，风打虚窗佛幌开。
惟有南边山色在，重重依旧上高台。

卷 709_27 【东归题屋壁】

徐夤

尘埃归去五湖东，还是衡门一亩宫。旧业旋从征赋失，
故人多逐乱离空。因悲尽室如悬磬，却拟携家学转蓬。
见说武王天上梦，无情曾与傅岩通。

卷 709_28 【寓题】

徐夤

酒壶棋局似闲人，竹笏蓝衫老此身。托客买书重得卷，
爱山移宅近为邻。鸣蛩阁上风吹病，落叶庭中月照贫。
见说天池波浪阔，也应涓滴溅穷鳞。

卷 709_29 【偶题】

徐夔

闲补亡书见废兴，偶然前古也填膺。秦宫犹自拜张祿，
楚幕不知留范增。大道岂全关历数，雄图强半属贤能。
燕台财力知多少，谁筑黄金到九层。

卷 709_30 【寓题述怀】

徐夔

大道真风早晚还，妖讹成俗污乾坤。宣尼既没苏张起，
凤鸟不来鸡雀喧。刍豢可能供骥子，草多谁复访兰荪。
尧廷忘却征元凯，天阙重关十二门。

卷 709_31 【将入城灵口道中作】

徐夔

路上长安惟咫尺，灞陵西望接秦源。依稀日下分天阙，
隐映云边是国门。锦袖臂鹰河北客，青桑鸣雉渭南村。
高风九万程途近，与报沧洲欲化鲲。

卷 709_32 【新屋】

徐夔

耳顺何为土木勤，叔孙墙屋有前闻。纵然一世如红叶，
犹得十年吟白云。性逸且图称野客，才难非敢傲明君。
清甜数尺沙泉井，平与邻家昼夜分。

卷 709_33 【新葺茆堂】

徐夔

剪竹诛茆就水滨，静中还得保天真。只闻神鬼害盈满，
不见古今争贱贫。树影便为廊庑屋，草香权当绮罗茵。
阶前一片泓澄水，借与汀禽活紫鳞。

耨水耕山息故林，壮图嘉话负前心。素丝鬓上分愁色，
络纬床头和苦吟。笔研不才当付火，方书多诳罢烧金。
同年二十八君子，游楚游秦断好音。

卷 709_34 【茆亭】

徐夔

鸳瓦虹梁计已疏，织茅编竹称贫居。剪平恰似山僧笠，

扫静真同道者庐。秋晚卷帘看过雁，月明凭槛数跳鱼。
重门公子应相笑，四壁风霜老读书。

卷 709_35 【客厅】

徐夔

移却松筠致客堂，净泥环堵贮荷香。衡茅只要免风雨，
藻泮不须高栋梁。丰蔀仲尼明演易，作歌五子恨雕墙。
燕台汉阁王侯事，青史千年播耿光。

卷 709_36 【咏写真】

徐夔

写得衰容似十全，闲开僧舍静时悬。瘦于南国从军日，
老却东堂射策年。潭底看身宁有异，镜中引影更无偏。
借将前辈真仪比，未愧金銮李谪仙。

卷 709_37 【放榜日】

徐夔

喧喧车马欲朝天，人探东堂榜已悬。万里便随金鸂鶒，

三台仍借玉连钱。花浮酒影彤霞烂，日照衫光瑞色鲜。
十二街前楼阁上，卷帘谁不看神仙。

卷 709_38 【曲江宴日呈诸同年】

徐夔

鸛鷖惊与凤凰同，忽向中兴遇至公。金榜连名升碧落，
紫花封敕出琼宫。天知惜日迟迟暮，春为催花旋旋红。
好是慈恩题了望，白云飞尽塔连空。

卷 709_39 【渤海宾贡高元固先辈闽中相访，云本国人写得夔
斩蛇剑、御沟水、人生几何赋，家（一本无家字）以金书，列
为屏障，因而有赠】

徐夔

折桂何年下月中，闽山来问我雕虫。肯销金翠书屏上，
谁把乌菱过日东。郗子昔时遭孔圣，繇余往代讽秦宫。
嗟嗟大国金门士，几个人能振素风。

卷 709_40 【偶吟】

徐夔

千卷长书万首诗，朝蒸藜藿暮烹葵。清时名立难皆我，
晚岁途穷亦问谁。碧岸钓归惟独笑，青山耕遍亦何为。
寻常抖擞怀中策，可便降他两鬓丝。

卷 709_41 【赠表弟黄校书轺（一作较。昔居临溪，今居近市。入市五里）】

徐夔

产破身穷为学儒，我家诸表爱诗书。严陵虽说临溪隐，
晏子还闻近市居。佳句丽偷红菡萏，吟窗冷落白蟾蜍。
闲来共话无生理，今古悠悠事总虚。

卷 709_42 【辇下赠屯田何员外】

徐夔

封章频得帝咨嗟，报国唯将直破邪。身到西山书几达，
官登南省鬓初华。厨非寒食还无火，菊待重阳拟泛茶。
内翰好才兼好古，秋来应数到君家。

卷 709_43 【赠月君（山妻字月君，伏见《文选》中顾彦先亦有赠妇，因抒此咏）】

徐夔

出水莲花比性灵，三生尘梦一时醒。神传尊胜陀罗咒，
佛授金刚般若经。懿德好书添女诫，素容堪画在银屏。
鸣梭轧轧纤纤手，窗户流光织女星。

卷 709_44 【赠垂光同年】

徐夔

丹桂攀来十七春，如今始见茜袍新。须知红杏园中客，
终作金銮殿里臣。逸少家风惟笔札，玄成世业是陶钧。
他时黄阁朝元处，莫忘同年射策人。

卷 709_45 【赠杨著（一作著作）】

徐夔

藻丽荧煌冠士林，白华荣养有曾参。十年去里荆门改，
八岁能诗相座吟。李广不侯身渐老，子山操赋恨何深。
钓鱼台上频相访，共说长安泪满襟。

卷 709_46 【赠黄校书先辈璞闲居】

徐夔

驭得骊龙第四珠，退依僧寺卜贫居。青山入眼不干禄，
白发满头犹著书。东涧野香添碧沼，南园夜雨长秋蔬。
月明扫石吟诗坐，讳却全无儋石储。

卷 709_47 【尚书荣拜恩命夔疾中辄课恶诗二首以申攀赞】

徐夔

明公家凿凤凰池，弱冠封侯四海推。富贵有期天授早，
关河多难敕来迟。昴星人杰当王佐，黄石仙翁识帝师。
昨日诏书犹漏缺，未言商也最能诗。

东郊迎入紫泥封，此日天仙下九重。三五月明临阊泽，
百千人众看王恭。旗傍绿树遥分影，马蹋浮云不见踪。
借问乘轺何处客，相庭雄幕卷芙蓉。

卷 709_48 【府主仆射王抃生日（昭宗光化三年己未八月献）】

徐夔

熊罴先兆庆垂休，天地氤氲瑞气浮。李树影笼周柱史，

昂星光照汉鄼侯。数钟龟鹤千年算，律正乾坤八月秋。
勋业定应归鼎鼐，生灵岂独化东瓯。

卷 709_49 【献内翰杨侍郎】

徐夤

窗开青琐见瑶台，冷拂星辰逼上台。丹凤诏成中使取，
白龙香近圣君来。欲言温暑三缄口，闲赋宫词八斗才。
莫拟吟云避荣贵，庙堂玉铉待盐梅。

卷 709_50 【送刘常侍】

徐夤

怀君何计更留连，忍送文星上碧天。杜预注通三十卷，
汉皇枝绍几千年。言端信义如明月，笔下篇章似涌泉。
他日有书随雁足，东溪无令访渔船。

卷 709_51 【送卢拾遗归华山】

徐夤

紫殿谏多防佞口，清秋假满别明君。惟忧急诏归青琐，

不得经时卧白云。千载茯苓携鹤鬻，一峰仙掌与僧分。
门前旧客期相荐，犹望飞书及主文。

卷 709_52 【春末送陈先辈之清源】

徐夤

贫中惟是长年华，每羡君行自叹嗟。归日捧持明月宝，
去时期刻刺桐花。春风避酒多游寺，晓骑听鸡早入衙。
千乘侯王若相问，飞书与报白云家。

卷 709_53 【上卢三拾遗以言见黜】

徐夤

骨鯁如君道尚存，近来人事不须论。疾危必厌神明药，
心惑多嫌正直言。冷眼静看真好笑，倾怀与说却为冤。
因思周庙当时诫，金口三缄示后昆。

卷 709_54 【送王校书往清源】

徐夤

南国贤侯待德风，长途仍借九花骢。清歌早贯骊龙颌，

丹桂曾攀玉兔宫。杨柳堤边梅雨熟，鹧鸪声里麦田空。
吟诗台上如相问，与说蟠溪直钓翁。

卷 709_55 【岳州端午日送人游郴连】

徐夔

五月巴陵值积阴，送君千里客于郴。北风吹雨黄梅落，
西日过湖青草深。竞渡岸傍人挂锦，采芳城上女遗簪。
九疑云阔苍梧暗，与说重华旧德音。

卷 709_56 【贺清源太保王延彬】

徐夔

蕊珠宫里谪神仙，八载温陵万户闲。心地阔于云梦泽，
官资高却太行山。姜牙兆寄熊罴内，陶侃文成掌握间。
应笑清溪旧门吏，年年扶病掩柴关。

武荣江畔荫祥云，宠拜天人庆郡人。五色鹤绫花上敕，
九霄龙尾道边臣。英雄达处谁言命，富贵来时自逼身。
更待春风飞吉语，紫泥分付与陶钧。

卷 709_57 【病中春日即事寄主人尚书二首】

徐夔

身比秋荷觉渐枯，致君经国堕前图。层冰照日犹能暖，
病骨逢春却未苏。镜里白须擗又长，枝头黄鸟静还呼。
庾楼恩化通神圣，何计能教掷得卢？

风拍衰肌久未蠲，破窗频见月团圆。更无旧日同人问，
只有多情太守怜。腊内送将三折股，岁阴分与五铢钱。
玄穹若假年龄在，愿捧铜盘为国贤。

卷 709_58 【寄华山司空侍郎（一作表圣）二首】

徐夔

金阙争权竞献功，独逃征诏卧三峰。鸡群未必容于鹤，
蛛网何繇捕得龙。清论尽应书国史，静筹皆可息边烽。
风霜落满千林木，不近青青涧底松。

非云非鹤不从容，谁敢轻量傲世踪。紫殿几征王佐业，
青山未拆诏书封。闲吟每待秋空月，早起长先野寺钟。
前古负材多为国，满怀经济欲何从。

卷 709_59 【寄卢端公同年仁炯，时迁都洛阳，新立幼主】

徐夤

上阳宫阙翠华归，百辟伤心序汉仪。昆岳有炎琼玉碎，
洛川无竹凤凰饥。须簪白笔匡明主，莫许黄鹄博少师。
惆怅宸居远于日，长吁空摘鬓边丝。

卷 709_60 【寄天台陈希叟】

徐夤

阴山冰冻尝迎夏，蛰户云雷只待春。吕望岂嫌垂钓老，
西施不恨浣纱贫。坐为羽猎车中相，飞作君王掌上身。
拍手相思惟大笑，我曹宁比等闲人。

卷 709_61 【寄两浙罗书记】

徐夤

进即湮沈退却升，钱塘风月过金陵。鸿才入贡无人换，
白首从军有诏征。博籀集成时辈骂，谗书编就薄徒憎。
怜君道在名长在，不到慈恩最上层。

卷 709_62 【邑宰相访，翼日有寄】

徐夔

渊明深念郗诜贫，踏破莓苔看甌尘。碧沼共攀红菡萏，
金鞍不卸紫麒麟。残阳妒害催归客，薄酒甘尝罚主人。
夜半梦醒追复想，欲长攀接有何因。

卷 709_63 【白酒两瓶送崔侍御】

徐夔

雪化霜融好泼醅，满壶冰冻向春开。求从白石洞中得，
携向百花岩畔来。几夕露珠寒贝齿，一泓银水冷琼杯。
湖边送与崔夫子，谁见嵇山尽日颓。

卷 709_64 【依韵酬常循州】

徐夔

早年花县拜潘郎，寻忝飞鸣出桂堂。日走登天长似箭，
人同红树岂经霜。帆分南浦知离别，驾在东州更可伤。
公论一麾将塞诏，且随征令过潇湘。

卷 709_65 【谢主人惠绿酒白鱼】

徐夔

早起雀声送喜频，白鱼芳酒寄来珍。
馨香乍揭春风瓮，拨刺初辞夜雨津。
樽阔最宜澄桂液，网疏殊未损霜鳞。
不曾垂钓兼亲酝，堪愧金台醉饱身。

卷七百一十

卷 710_1 【蜀】

徐夔

虽倚关张敌万夫，岂胜恩信作良图。能均汉祚三分业，
不负荆州六尺孤。绿水有鱼贤已得，青桑如盖瑞先符。
君王幸是中山后，建国如何号蜀都。

卷 710_2 【魏】

徐夔

伐罪书勋令不常，争教为帝与为王。十年小怨诛桓邵，
一檄深雠怨孔璋。在井蛰龙如屈伏，食槽骄马忽腾骧。
奸雄事过分明见，英识空怀许子将。

卷 710_3 【吴】

徐夔

一主参差六十年，父兄犹庆授孙权。不迎曹操真长策，

终谢张昭见硕贤。建业龙盘虽可贵，武昌鱼味亦何偏。
秦嬴谩作东游计，紫气黄旗岂偶然。

卷 710_4 【两晋】

徐夤

三世深谋启帝基，可怜孀妇与孤儿。罪归成济皇天恨，
戈犯明君万古悲。巴蜀削平轻似纸，勾吴吞却美如飴。
谁知高鼻能知数，竞向中原簸战旗。

卷 710_5 【宋二首】

徐夤

天爵休将儋石论，一身恭俭万邦尊。赌将金带惊寰海，
留得耕衣诫子孙。缔构不应饶汉祖，奸雄何足数王敦。
草中求活非吾事，岂啻横身向庙门。

百万人甘一掷输，玄穹惟与道相符。岂知紫殿新天子，
只是丹徒旧嗇夫。五色龙章身早见，六终鸿业数难逾。
三年未得分明梦，却为兰陵起霸图。

卷 710_6 【陈】

徐夤

三惑昏昏中紫宸，万机抛却醉临春。书中不礼隋文帝，
井底常携张贵嫔。玉树歌声移入哭，金陵天子化为臣。
兵戈半渡前江水，狎客犹闻争酒巡。

卷 710_7 【读史】

徐夤

亚父凄凉别楚营，天留三杰翼龙争。高才无主不能用，
直道有时方始平。喜愠子文何颖悟，卷藏蘧瑗甚分明。
须知饮啄繇天命，休问黄河早晚清。

卷 710_8 【汉宫新宠】

徐夤

位在嫔妃最上头，笑他长信女悲秋。日中月满可能久，
花落色衰殊未忧。公主镜中争翠羽，君王袖底夺金钩。
妾家兄弟知多少，恰要同时拜列侯。

卷 710_9 【开元即事】

徐夔

曲江真宰国中讹，寻奏渔阳忽荷戈。堂上有兵天不用，
幄中无策印空多。尘惊骑透潼关锁，云护龙游渭水波。
未必蛾眉能破国，千秋休恨马嵬坡。

卷 710_10 【李翰林】

徐夔

谪下三清列八仙，获调羹鼎侍龙颜。吟开锁闼窥天近，
醉卧金銮待诏闲。旧隐不归刘备国，旅魂长寄谢公山。
遗编往简应飞去，散入祥云瑞日间。

卷 710_11 【闻长安庚子岁事】

徐夔

羽檄交驰触冕旒，函关飞入铁兜鍪。皇王去国未为恨，
寰海失君方是忧。五色大云凝蜀郡，几般妖气扑神州。
唐尧纵禅乾坤位，不是重华莫谩求。

卷 710_12 【公子行】

徐夤

十五辕门学控弦，六街骑马去如烟。金多倍著牡丹价，
发白未知章甫贤。有耳不闻经国事，拜官方买谢恩笺。
相如漫说凌云赋，四壁何曾有一钱。

卷 710_13 【依韵赠严司直】

徐夤

曾转双蓬到玉京，宣尼恩奏乐卿名。歌残白石扣牛角，
赋换黄金爱马卿。沧海二隅身渐老，太行千叠路难行。
夫君才大官何小，堪恨人间事不平。

卷 710_14 【伤前翰林杨左丞（一本有赞图二字）】

徐夤

飞上鳌头侍玉皇，三台遗耀换余光。人间擿管穷苍颉，
地上修文待卜商。真魄肯随金石化，真风留伴蕙兰香。
皇天未启升平运，不使伊皋相禹汤。

卷 710_15 【日月无情】

徐夔

日月无情也有情，朝升夕没照均平。虽催前代英雄死，
还促后来贤圣生。三尺灵乌金借耀，一轮飞镜水饶清。
凭谁筑断东溟路，龙影蟾光免运行。

卷 710_16 【新月】

徐夔

云际婵娟出又藏，美人肠断拜金方。姮娥一只眉先扫，
织女三分镜未光。珠箔寄钩悬杳霭，白龙遗爪印穹苍。
更期十五圆明夜，与破阴霾照八荒。

卷 710_17 【和尚书咏烟】

徐夔

无根无蒂结还融，曾触岚光彻底空。不散几知离毕雨，
欲飞须待落花风。玲珑薄展蛟绡片，幂历轻含凤竹丛。
琼什捧来思旧隐，扑窗穿户晓溟濛。

卷 710_18 【宫莺】

徐夔

领得春光在帝家，早从深谷出烟霞。闲栖仙禁日边柳，
饥啄御园天上花。睨睨只宜陪阁凤，间关多是问宫娃。
可怜鹦鹉矜言语，长闭雕笼岁月赊。

卷 710_19 【鬓发】

徐夔

鬓添华发数茎新，罗雀门前绝故人。减食为缘疏五味，
不眠非是守庚申。深园竹绿齐抽笋，古木蛇青自脱鳞。
天地有炉长铸物，浊泥遗块待陶钧。

卷 710_20 【春入鲤湖】

徐夔

到来峭壁白云齐，载酒春游渡九溪。铁嶂有楼霾欲堕，
石门无锁路还迷。湖头鲤去轰雷在，树杪猿啼落日低。
回首浮生真幻梦，何如斯地傍幽栖。

卷 710_21 【双鹭】

徐夔

双鹭雕笼昨夜开，月明飞出立庭隈。但教绿水池塘在，
自有碧天鸿雁来。清韵叫霜归岛树，素翎遗雪落渔台。
何人为我追寻得，重劝溪翁酒一杯。

卷 710_22 【鸬鸕】

徐夔

绣仆梅兼羽翼全，楚鸡非瑞莫争先。啼归明月落边树，
飞入百花深处烟。避烧几曾遗远岫，引雏时见饮晴川。
荔枝初熟无人际，啄破红苞坠野田。

卷 710_23 【鹰】

徐夔

害物伤生性岂驯，且宜笼罩待知人。惟擒燕雀啖腥血，
却笑鸾皇啄翠筠。狡兔穴多非尔识，鸣鸠脰短罚君身。
豪门不读诗书者，走马平原放玩频。

卷 710_24 【蝴蝶二首】

徐夔

缥缈青虫脱壳微，不堪烟重雨霏霏。一枝秾艳留教住，
几处春风借与飞。防患每忧鸡雀口，怜香偏绕绮罗衣。
无情岂解关魂梦，莫信庄周说是非。

拂绿穿红丽日长，一生心事住春光。最嫌神女来行雨，
爱伴西施去采香。风定只应攒蕊粉，夜寒长是宿花房。
鸣蝉性分殊迂阔，空解三秋噪夕阳。

卷 710_25 【郡侯坐上观琉璃瓶中游鱼】

徐夔

宝器一泓银汉水，锦鳞才动即先知。似涵明月波宁隔，
欲上轻冰律未移。薄雾罩来分咫尺，碧绡笼处较毫厘。
文翁未得沈香饵，拟置金盘召左慈。

卷 710_26 【剪刀】

徐夔

宝持多用绣为囊，双日交加两鬓霜。金匣掠平花翡翠，

绿窗裁破锦鸳鸯。初裁连理枝犹短，误绾同心带不长。
欲制缁袍先把看，质非纨绮愧铍铗。

卷 710_27 【纸被】

徐夤

文采鸳鸯罢合欢，细柔轻缀好鱼笺。一床明月盖归梦，
数尺白云笼冷眠。披对劲风温胜酒，拥听寒雨暖于绵。
赤眉豪客见皆笑，却问儒生直几钱。

卷 710_28 【纸帐】

徐夤

几笑文园四壁空，避寒深入剡藤中。误悬谢守澄江练，
自宿嫦娥白兔宫。几叠玉山开洞壑，半岩春雾结房栊。
针罗截锦饶君侈，争及蒙茸暖避风。

卷 710_29 【贡余秘色茶盏】

徐夤

振翠融青瑞色新，陶成先得贡吾君。功剏明月染春水，

轻旋薄冰盛绿云。古镜破苔当席上，嫩荷涵露别江滨。
中山竹叶醅初发，多病那堪中十分。

卷 710_30 【笋鞭】

徐夤

筍竹岩边剔翠苔，锦江波冷洗琼瑰。累累节转苍龙骨，
寸寸珠联巨蚌胎。须向广场驱驷骏，莫从闲处挹骅骝。
宁同晋帝环营日，抛赚中途后骑来。

卷 710_31 【咏帘】

徐夤

素节轻盈珠影匀，何人巧思间成文。闲垂别殿风应度，
半掩行宫麝欲薰。绣户远笼寒焰重，玉楼高挂曙光分。
无情几恨黄昏月，才到如钩便堕云。

卷 710_32 【咏灯】

徐夤

分影由来恨不同，绿窗孤馆两何穷。荧煌短焰长疑暗，

零落残花旋委空。几处隔帘愁夜雨，谁家当户怯秋风。
莫言明灭无多事，曾比人生一世中。

卷 710_33 【咏扇】

徐夤

为发凉飙满玉堂，每亲襟袖便难忘。霜浓雪暗知何在，
道契时来忽自扬。曾伴一樽临小槛，几遮残日过回廊。
汉宫如有秋风起，谁信班姬泪数行。

卷 710_34 【咏笔二首】

徐夤

秦代将军欲建功，截龙搜兔助英雄。用多谁念毛皆拔，
抛却更嫌心不中。史氏只应归道直，江淹何独偶灵通。
班超握管不成事，投掷翻从万里戎。

君子三归擅一名，秋毫虽细握非轻。军书羽檄教谁录，
帝命王言待我成。势健岂饶淝水阵，锋铓还学历山耕。
毛干时有何人润，尽把烧焚恨始平。

卷 710_35 【咏钱】

徐夤

多蓄多藏岂足论，有谁还议济王孙。能于祸处翻为福，
解向饥家买得恩。几怪邓通难免饿，须知夷甫不曾言。
朝争暮竞归何处，尽入权门与幸门。

卷 710_36 【尚书筵中咏红手帕】

徐夤

鹤绫三尺晓霞浓，送与东家二八容。罗带绣裙轻好系，
藕丝红缕细初缝。别来拭泪遮桃脸，行去包香坠粉胸。
无事把将缠皓腕，为君池上折芙蓉。

卷 710_37 【尚书新造花笺】

徐夤

浓染红桃二月花，只宜神笔纵龙蛇。浅澄秋水看云母，
碎擘轻苔间粉霞。写赋好追陈后宠，题诗堪送窦滔家。
使君即入金銮殿，夜直无非草白麻。

卷 710_38 【钓车】

徐夔

荻湾渔客巧妆成，
碓铸银星一点轻。
抛过碧江鸂鶒岸，
轧残金井辘轳声。
轴磨骀角冰光滑，
轮卷春丝水面平。
把向严滩寻辙迹，
渔台基在辗难倾。

卷 710_39 【柳】

徐夔

漠漠金条引线微，
年年先翠报春归。
解笼飞霭延芳景，
不逐乱花飘夕晖。
啼鸟噪蝉堪怅望，
舞烟摇水自因依。
五株名显陶家后，
见说辞荣种者稀。

卷 710_40 【愁】

徐夔

夜长偏觉漏声迟，
往往随歌惨翠眉。
黄叶落催砧杵日，
子规啼破梦魂时。
明妃去泣千行泪，
蔡琰归梳两鬓丝。
四皓入山招不得，
无家归客最堪欺。

卷 710_41 【草】

徐夔

废苑荒阶伴绿苔，恩疏长信恨难开。姑苏麋鹿食思食，
楚泽王孙来不来。色嫩似将蓝汁染，叶齐如把剪刀裁。
燕昭没后多卿士，千载流芳郭隗台。

卷 710_42 【萤】

徐夔

月坠西楼夜影空，透帘穿幕达房栊。流光堪在珠玑列，
为火不生榆柳中。一一照通黄卷字，轻轻化出绿芜丛。
欲知应候何时节，六月初迎大暑风。

卷 710_43 【水】

徐夔

火性何如水性柔，西来东出几时休。莫言通海能通汉，
虽解浮舟也覆舟。湘浦暮沈尧女怨，汾河秋泛汉皇愁。
洪波激湍归何处，二月桃花满眼流。

卷 710_44 【苔】

徐夔

印留麋鹿野禽踪，岩壁渔矶几处逢。金谷晓凝花影重，
章华春映柳阴浓。石桥羽客遗前迹，陈阁才人没旧容。
归去扫除阶砌下，藓痕残绿一重重。

卷 710_45 【晓】

徐夔

水尽铜龙滴渐微，景阳钟动梦魂飞。潼关鸡唱促归骑，
金殿烛残求御衣。窗下寒机犹自织，梁间栖燕欲双飞。
羲和晴耸扶桑辔，借与寰瀛看早晖。

卷 710_46 【别】

徐夔

酒尽歌终问后期，泛萍浮梗不胜悲。东门匹马夜归处，
南浦片帆飞去时。赋罢江淹吟更苦，诗成苏武思何迟。
可怜范陆分襟后，空折梅花寄所思。

卷 710_47 【夜】

徐夤

日坠虞渊烛影开，沈沈烟雾压浮埃。剡川雪满子猷去，
汉殿月生王母来。檐挂蛛丝应渐织，风吹萤火不成灰。
愁人莫道何时旦，自有钟鸣漏滴催。

卷 710_48 【雨】

徐夤

引电随龙密又轻，酒杯闲噉得嘉名。千山草木如云暗，
陆地波澜接海平。洒竹几添春睡重，滴檐偏遣夜愁生。
阴妖冷孽成何怪，敢蔽高天日月明。

卷 710_49 【萍】

徐夤

为实随流瑞色新，泛风菰草护游鳞。密行碧水澄涵月，
涩滞轻桡去采蘋。比物何名腰下剑，无根堪并镜中身。
平湖春渚知何限，拨破闲投独茧纶。

卷 710_50 【恨】

徐夔

事与时违不自由，如烧如刺寸心头。乌江项籍忍归去，
雁塞李陵长系留。燕国飞霜将破夏，汉宫纨扇岂禁秋。
须知入骨难销处，莫比人间取次愁。

卷 710_51 【鸿】

徐夔

行如兄弟影连空，春去秋来燕不同。紫塞别当秋露白，
碧山飞入暮霞红。宣王德美周诗内，苏武书传汉苑中。
况解衔芦避弓箭，一声归唳楚天风。

卷 710_52 【鹤】

徐夔

阆苑瑶台岁月长，一归华表好增伤。新声乍警初零露，
折羽闲飞几片霜。要伴神仙归碧落，岂随龟雁住方塘。
三山顶上无人处，琼树堪巢不死乡。

卷 710_53 【鹊】

徐夔

神化难源瑞即开，雕陵毛羽出尘埃。香闺报喜行人至，
碧汉填河织女回。明月解随乌绕树，青铜宁愧雀为台。
琼枝翠叶庭前植，从待翩翩去又来。

卷 710_54 【霜】

徐夔

应节谁穷造化端，菊黄豺祭问应难。红窗透出鸳衾冷，
白草飞时雁塞寒。露结芝兰琼屑厚，日干葵藿粉痕残。
世间无比催摇落，松竹何人肯更看。

卷 710_55 【风】

徐夔

城上寒来思莫穷，土囊萍末两难同。飘成远浪江湖际，
吹起暮尘京洛中。飞雪萧条残腊节，落花狼藉古行宫。
春能和煦秋摇落，生杀还同造化功。

卷 710_56 【帆】

徐夔

岂劳孤棹送行舟，轻过天涯势未休。断岸晓看残月挂，
远湾寒背夕阳收。川平直可追飞箭，风健还能溯急流。
幸遇济川恩不浅，北溟东海更何愁。

卷 710_57 【梦】

徐夔

月落灯前闭北堂，神魂交入杳冥乡。文通毫管醒来异，
武帝蘅芜觉后香。传说已征贤可辅，周公不见恨何长。
生松十八年方应，通塞人间岂合忙。

卷 710_58 【东】

徐夔

紫气天元出故关，大明先照九垓间。鳌山海上秦娥去，
鲈脍江边齐掾还。青帝郊垌平似砥，主人阶级峻如山。
蟠桃树在烟涛水，解冻风高未得攀。

卷 710_59 【西】

徐夔

密云郊外已回秋，日下崦嵫景懒收。秦帝城高坚似铁，
李斯书上曲如钩。宁惟东岳凌天秀，更有长庚瞰曙流。
见说山傍偏出将，犬戎降尽复何愁。

卷 710_60 【南】

徐夔

罩罩嘉鱼忆此方，送君前浦恨难量。火山远照苍梧郡，
铜柱高标碧海乡。陆贾几时来越岛，三闾何日濯沧浪。
钟仪冠带归心阻，蝴蝶飞园万草芳。

卷 710_61 【北】

徐夔

雪满湖天日影微，李君降虏失良时。穷溟驾浪鹍鹏化，
极海寄书鸿雁迟。□□□来犹未后，残兵奔去杳难追。
可怜燕谷花间晚，邹律如何为一吹。

卷 710_62 【云】

徐夔

漠漠沈沈向夕晖，苍梧巫峡两相依。天心白日休空蔽，
海上故山应自归。似盖好临千乘载，如罗堪剪六铢衣。
为霖须救苍生旱，莫向西郊作雨稀。

卷 710_63 【燕】

徐夔

从待衔泥溅客衣，百禽灵性比他稀。何嫌何恨秋须去，
无约无期春自归。雕鹗不容应不怪，栋梁相庇愿相依。
吴王宫女娇相袭，合整双毛预奋飞。

卷 710_64 【蝉】

徐夔

寒鸣宁与众虫同，翼鬓纓冠岂道穷。壳蜕已从今日化，
声愁何似去年中。朝催篱菊花开露，暮促庭槐叶坠风。
从此最能惊赋客，计居何处转飞蓬。

卷 710_65 【露】

徐夔

鹤鸣先警雁来天，洗竹沾花处处鲜。散彩几当蝉饮际，
凝光宜对蚌胎前。朝垂苑草烟犹重，夜滴宫槐月正圆。
忧惕与霜同降日，蘋蘩思荐独凄然。

卷 710_66 【霞】

徐夔

天际何人濯锦归，偏宜残照与晨晖。流为洞府千年酒，
化作灵山几袭衣。野烧焰连殊赫奕，愁云阴隔乍依稀。
劳生愿学长生术，餐尽红桃上汉飞。

卷 710_67 【蒲】

徐夔

濯秀盘根在碧流，紫茵含露向晴抽。编为细履随君步，
织作轻帆送客愁。疏叶稍为投饵钓，密丛还碍采莲舟。
鸳鸯鸂鶒多情甚，日日双双绕傍游。

卷 710_68 【泉】

徐夔

非凿非疏出洞门，源深流峻合还分。高成瀑布漱逋客，
清入御沟朝圣君。迸滴几山穿破石，迅飞层峤喷开云。
旧斋一带连松竹，明月窗前枕上闻。

卷 710_69 【烟】

徐夔

燎野焚林见所从，惹空横水展形容。能滋甘雨随车润，
不并行云逐梦踪。晴鸟回笼嘉树薄，春亭娇幕好花浓。
有时片片风吹去，海碧山清过几重。

卷 710_70 【闲】

徐夔

不管人间是与非，白云流水自相依。一瓢挂树傲时代，
五柳种门吟落晖。江上翠蛾遗佩去，岸边红袖采莲归。
客星辞得汉光武，却坐东江旧藓矶。

卷 710_71 【忙】

徐夔

双竞龙舟疾似风，一星球子两明同。平吴破蜀三除里，
灭楚图秦百战中。春近杜鹃啼不断，寒催归雁去何穷。
兵还失路旌旗乱，惊起红尘似转蓬。

卷 710_72 【泪】

徐夔

发事牵情不自由，偶然惆怅即难收。已闻抱玉沾衣湿，
见说迷途满泪流。滴尽绮筵红烛暗，坠残妆阁晓花羞。
世间何处偏留得，万点分明湘水头。

卷 710_73 【月】

徐夔

碧落谁分造化权，结霜凝雪作婵娟。寒蝉若不开三穴，
狡兔何从上九天。莫见团圆明处远，须看湾曲鉴时偏。
郄诜树老尧莫换，惆怅今年似去年。

卷七百一十一

卷 711_1 【依御史（一本无御史二字）温飞卿华清宫二十二韵】

徐夤

地灵蒸水暖，天气待宸游。岳拱莲花秀，峰高玉蕊秋。
朝元雕翠阁，乞巧绣琼楼。碧海供骊岭，黄金络马头。
五王更入帐，七贵迭封侯。夕雨鸣鸳瓦，朝阳暎柘裘。
伊皋争负鼎，舜禹让垂旒。堕珥闲应拾，遗钗醉不收。
飞烟笼剑戟，残月照旂旒。履朔求衣早，临阳解佩羞。
宫词裁锦段，御笔落银钩。帝里新丰县，长安旧雍州。
雪衣传贝叶，蟬鬓插山榴。对景瞻瑶兔，升天驾彩虬。
丹书陈北虏，玄甲擐犀牛。圣诰多屯否，生灵少怨尤。
穹旻当有辅，帷幄岂无筹。凤态伤红艳，鸾舆缓紫骝。
树名端正在，人欲梦魂休。讖语山旁鬼，尘销陇畔丘。
重来芳草恨，往事落花愁。五十年鸿业，东凭渭水流。

卷 711_2 【尚书命题瓦砚】

徐夤

远向端溪得，皆因郢匠成。凿山青霭断，琢石紫花轻。
散墨松香起，濡毫藻句清。入台知价重，著匣恐尘生。

守黑还全器，临池早著名。春闱携就处，军幕载将行。
不独雄文阵，兼能助笔耕。莫嫌涓滴润，深染古今情。
洗处无瑕玷，添时识满盈。兰亭如见用，敲戛有金声。

卷 711_3 【东风解冻省试】

徐夔

暖气飘蘋末，冻痕销水中。扇冰初觉泮，吹海旋成空。
入律三春照，朝宗万里通。岸分天影阔，色照日光融。
波起轻摇绿，鳞游乍跃红。殷勤排弱羽，飞翥趁和风。

卷 711_4 【和仆射二十四丈牡丹八韵】

徐夔

帝王城里看，无故亦无新。忍摘都缘借，移栽未有因。
光阴嫌太促，开落一何频。羞杀登墙女，饶将解佩人。
蕊堪灵凤啄，香许白龙亲。素练笼霞晓，红妆带脸春。
莫辞终夕醉，易老少年身。買取归天上，宁教逐世尘。

卷 711_5 【钓丝竹】

徐夔

藿藿拂清流，堪维舴艋舟。野虫悬作饵，溪月曲为钩。
雨润摇阶长，风吹绕指柔。若将诸树比，还使绿杨羞。
蚕妇非尧女，渔人是子猷。湖边旧栽处，长映读书楼。

卷 711_6 【尚书会仙亭咏蔷薇夔坐中联四韵晚归补缉所联因成一篇】

徐夔

结绿根株翡翠茎，句芒中夜刺猩猩。景阳妆赴严钟出，
楚峡神教暮雨晴。踟躅岂能同日语，玫瑰方可一时呈。
风吹嫩带香苞展，露洒啼思泪点轻。阿母蕊宫期索去，
昭君榆塞阙赍行。丛高恐碍含泥燕，架隐宜栖报曙莺。
斗日只忧烧密叶，映阶疑欲让双旌。含烟散缬佳人惜，
落地遗钿少妓争。丹渥不因输绣段，钱圆谁把买花声。
海棠若要分流品，秋菊春兰两恰平。

卷 711_7 【和尚书咏泉山瀑布十二韵】

徐夔

名齐火浣溢山椒，谁把惊虹挂一条。天外倚来秋水刃，

海心飞上白龙绡。民田凿断云根引，僧圃穿通竹影浇。
喷石似烟轻漠漠，溅崖如雨冷潇潇。水中蚕绪缠苍壁，
日里虹精挂绛霄。寒漱绿阴仙桂老，碎流红艳野桃夭。
千寻练写长年在，六出花开夏日消。急恐划分青嶂骨，
久应绷裂翠微腰。濯缨便可讥渔父，洗耳还宜傲帝尧。
林际猿猱偏得饭，岸边乌鹊拟为桥。赤城未到诗先寄，
庐阜曾游梦已遥。数夜积霖声更远，郡楼欹枕听良宵。

卷 711_8 【自咏十韵】

徐夔

只合沧洲钓与耕，忽依萤烛愧功成。未游宦路叨卑宦，
才到名场得大名。梁苑二年陪众客，温陵十载佐双旌。
钱财尽是侯王惠，骨肉偕承里巷荣。拙赋偏闻镌印卖，
恶诗亲见画图呈。多栽桃李期春色，阔凿池塘许月明。
寒益轻裯饶美寝，出乘车马免徒行。粗支菽粟防饥歉，
薄有杯盘备送迎。僧俗共邻栖隐乐，妻孥同爱水云清。
如今便死还甘分，莫更嫌他白发生。

卷 711_9 【镜中览怀（一作览镜书怀）】

徐夔

晨起梳头忽自悲，镜中亲见数茎丝。

从今休说龙泉剑，世上恩讎报已迟。

卷 711_10 【楚国史】

徐夔

六国商於恨最多，良弓休绾剑休磨。
君王不剪如簧舌，再得张仪欲奈何。

卷 711_11 【张仪】

徐夔

荆楚南来又北归，分明舌在不应违。
怀王本是无心者，笼得苍蝇却放飞。

卷 711_12 【蔷薇】

徐夔

朝露洒时如濯锦，晚风飘处似遗钿。
重门剩著黄金锁，莫被飞琼摘上天。

卷 711_13 【大夫松】

徐夔

五树旌封许岁寒，
挽柯攀叶也无端。
争如涧底凌霜节，
不受秦皇乱世官。

卷 711_14 【杏园】

徐夔

杏苑箫声好醉乡，
春风嘉宴更无双。
凭谁为谑穆天子，
莫把瑶池并曲江。

卷 711_15 【蕉叶】

徐夔

绿绮新裁织女机，
摆风摇日影离披。
只应青帝行春罢，
闲倚东墙卓翠旗。

卷 711_16 【路旁草】

徐夔

楚甸秦原万里平，谁教根向路傍生。
轻蹄绣毂长相蹋，合是荣时不得荣。

卷 711_17 【读汉纪】

徐夔

布衣空手取中原，劲卒雄师不足论。
楚国八千秦百万，豁开胸臆一时吞。

卷 711_18 【李夫人二首】

徐夔

不望金舆到锦帷，人间乐极即须悲。
若言要识愁中貌，也似君恩日日衰。

招得香魂爵少翁，九华灯烛晓还空。
汉王不及吴王乐，且与西施死处同。

卷 711_19 【明妃】

徐夔

不用牵心恨画工，帝家无策及边戎。
香魂若得升明月，夜夜还应照汉宫。

卷 711_20 【马嵬】

徐夔

二百年来事远闻，从龙谁解尽如云。
张均兄弟皆何在，却是杨妃死报君。

卷 711_21 【依韵赠南安方处士五首】

徐夔

七贵五侯生肯退，利尘名网死当抛。
黔娄寂寞严陵卧，借问何人与结交。

休把羸蹄蹋霜雪，书成何处献君王。
嵩山好与浮丘约，三十六峰云外乡。

百万僧中不为僧，比君知道仅谁能。
无家寄泊南安县，六月门前也似冰。

两鬓当春却似秋，僻居夸近野僧楼。
落花明月皆临水，明月不流花自流。

晋楚忙忙起战尘，龚黄门外有高人。
一畦云薤三株竹，席上先生未是贫。

卷 711_22 【依韵答黄校书】

徐夔

慈恩雁塔参差榜，杏苑莺花次第游。
白日有愁犹可散，青山高卧况无愁。

卷 711_23 【伤进士谢庭皓（大顺中以词赋著名，与夔不相上下，时号锦绣帷）】

徐夔

献书犹未达明君，何事先游岱岳云。
惟有春风护冤魄，与生青草盖孤坟。

卷 711_24 【闻司空侍郎讣音】

徐夤

园绮生虽逢汉室，巢由死不谒尧阶。
夫君殁去何人葬，合取夷齐隐处埋。

卷 711_25 【偶题二首】

徐夤

买骨须求骐骥骨，爱毛宜采凤凰毛。
驽骀燕雀堪何用，仍向人前价例高。

赋就长安振大名，斩蛇功与乐天争。
归来延寿溪头坐，终日无人问一声。

卷 711_26 【猿】

徐夤

宿有乔林饮有溪，生来踪迹远尘泥。
不知心更愁何事，每向深山夜夜啼。

卷 711_27 【追和贾浪仙古镜】

徐夤

谁开黄帝桥山冢，明月飞光出九泉。
狼藉藓痕磨不尽，黑云残点污秋天。

卷 711_28 【蝴蝶三首】

徐夤

不并难飞蛭里蛾，有花芳处定经过。
天风相送轻飘去，却笑蜘蛛谩织罗。

苒苒双双拂画栏，佳人偷眼再三看。
莫欺翼短飞长近，试就花间扑已难。

栩栩无因系得他，野园荒径一何多。
不闻丝竹谁教舞，应仗流莺为唱歌。

卷 711_29 【新刺袜】

徐夤

素手春溪罢浣纱，巧裁明月半弯斜。

齐宫合赠东昏宠，好步黄金菡萏花。

卷 711_30 【寄华山司空侍郎】

徐夔

山掌林中第一人，鹤书时或问眠云。
莫言疏野全无事，明月清风肯放君。

卷 711_31 【初夏戏题】

徐夔

长养薰风拂晓吹，渐开荷芰落蔷薇。
青虫也学庄周梦，化作南园蛱蝶飞。

.

卷七百一十二

卷 712_1 【客舍寓怀】

钱珣

洒洒滩声晚霁时，客亭风袖半披垂。野云行止谁相待，
明月襟怀只自知。无伴偶吟溪上路，有花偷笑腊前枝。
牵情景物潜惆怅，忽似伤春远别离。

卷 712_2 【送王郎中】

钱珣

惜别远相送，却成惆怅多。独归回首处，争那暮山何。

卷 712_3 【江行无题一百首】

钱珣

倾酒向涟漪，乘流欲去时。寸心同尺璧，投此报冯夷。
江曲全萦楚，云飞半自秦。岷山回首望，如别故乡人。

浦烟含夜色，冷日转秋旻。自有沈碑在，清光不照人。
楚岸云空合，楚城人不来。只今谁善舞，莫恨废章台。
行背青山郭，吟当白露秋。风流无屈宋，空咏古荆州。
晚来渔父喜，网重欲收迟。恐有长江使，金钱愿赎龟。
去指龙沙路，徒悬象阙心。夜凉无远梦，不为偶闻砧。
雾云疏有叶，雨浪细无花。稳放扁舟去，江天自有涯。
好日当秋半，层波动旅肠。已行千里外，谁与共秋光。
润色非东里，官曹更建章。宦游难自定，来唤棹船郎。
夜江清未晓，徒惜月光沉。不是因行乐，堪伤老大心。
翳日多乔木，维舟取束薪。静听江叟语，尽是厌兵人。
箭漏日初短，汀烟草未衰。雨馀虽更绿，不是采蘋时。
山雨夜来涨，喜鱼跳满江。岸沙平欲尽，垂蓼入船窗。
渚边新雁下，舟上独凄凉。俱是南来客，怜君缀一行。
云密连江暗，风斜著物鸣。一杯真战将，笑尔作愁兵。

柳拂斜开路，篱边数户村。可能还有意，不掩向江门。

不识相如渴，徒吟子美诗。江清惟独看，心外更谁知。

牵路沿江狭，沙崩岸不平。尽知行处险，谁肯载时轻。

憔悴异灵均，非谗作逐臣。如逢渔父问，未是独醒人。

水含秋夜静，云带夕阳高。诗癖非吾病，何妨吮短豪。

带舟维古岸，还似阻西陵。箕伯无多怒，回头讵不能。

秋云久无雨，江燕社犹飞。却笑舟中客，今年未得归。

帆翅初张处，云鹏怒翼同。莫愁千里路，自有到来风。

佳节虽逢菊，浮生正似萍。故山何处望，荒岸小长亭。

月下江流静，村荒人语稀。鹭鸳虽有伴，仍共影双飞。

斗转月未落，舟行夜已深。有村知不远，风便数声砧。

棹惊沙鸟迅，飞溅夕阳波。不顾鱼多处，应防一目罗。

行到楚江岸，苍茫人正迷。只如秦塞远，格磔鹧鸪啼。

渐觉江天远，难逢故国书。可能无往事，空食鼎中鱼。

岸草连荒色，村声乐稔年。晚晴贪获稻，闲却彩菱船。
滩浅多游鹭，江清易见鱼。怪来吟未足，秋物欠红蕖。
蛩响依沙草，萤飞透水烟。夜凉谁咏史，空泊运租船。
睡稳叶舟轻，风微浪不惊。人居芦苇岸，终夜动秋声。
自念平生意，曾期一郡符。可知因谪宦，斑鬓入江湖。
水天凉夜月，不是少清光。好景随人物，秦淮忆建康。
古来多思客，摇落恨江潭。今日秋风至，萧疏过沔南。
映竹疑村好，穿芦觉渚幽。渐安无旷土，姜芋当农收。
烟渚复烟渚，画屏休画屏。引愁天末去，数点暮山青。
秋风动客心，寂寂不成吟。飞上危樯立，莺啼报好音。
见底高秋水，开怀万里天。旅吟还有伴，沙柳数枝蝉。
九日自佳节，扁舟无一杯。曹园旧樽酒，戏马忆高台。
兵火有馀烬，贫村才数家。无人争晓渡，残月下寒沙。
渚禽菱芡足，不向稻粱争。静宿凉湾月，应无失侣声。

轻云未扑霜，树杪橘初黄。行是知名物，过风过水香。
土旷深耕少，江平远钓多。平生皆弃本，金革竟如何。
海月非常物，等闲不可寻。披沙应有地，浅处定无金。
风晚冷飕飕，芦花已白头。旧来红叶寺，堪忆玉京秋。
渺渺望天涯，清涟浸赤霞。难逢星汉使，乌鹊日乘槎。
风好来无阵，云开去有踪。钓歌无远近，应喜罢艨艟。
吴疆连楚甸，楚俗异吴乡。谩把樽中物，无人啄蟹黄。
岸绿野烟远，江红斜照微。撑开小渔艇，应到月明归。
雨馀江始涨，漾漾见流薪。曾叹河中木，斯言忆古人。
垂露晚犹浓，清风不易逢。涉江虽已晚，高树蹙芙蓉。
乘舟维夏口，烟野独行时。不见头陀寺，空怀幼妇碑。
晚泊武昌岸，津亭疏柳风。数株曾手植，好事忆陶公。
舟航依浦定，星斗满江寒。若比阴霾日，何妨夜未阑。
近戍离金落，孤岑望火门。惟将知命意，潇洒向乾坤。

丛菊生堤上，此花长后时。有人还采掇，何必在春期。
景夕残霞落，秋寒细雨晴。短缨何用濯，舟在月中行。
堤坏漏江水，地坳成野塘。晚荷人不折，留取作秋香。
左宦终何路，摅怀亦自宽。襞笺嘲白鹭，无意喻臬鸾。
楼空人不归，云白去时衣。黄鹤无心下，长应笑令威。
白帝朝惊浪，阳台暮映云。等闲生险易，世路只如君。
橹慢生轻浪，帆虚带白云。客船虽狭小，容得瘦将军。
静看秋江水，风渐浪微平。人间驰竞处，尘土自波成。
风借帆方疾，风回棹却迟。较量人世事，不校一毫厘。
咫尺愁风雨，匡庐不可登。只疑云雾窟，犹有六朝僧。
江草何多思，冬青尚满洲。谁能惊鵬鸟，作赋为沙鸥。
幸有烟波兴，宁辞笔砚劳。缘情无怨刺，却似反离骚。
沙上独行时，高吟到楚词。难将垂岸蓼，盈把当江蓠。
秋寒鹰隼健，逐雀下云空。知是江湖客，无心击塞鸿。

幽怀念烟水，长恨隔龙沙。今日滕王阁，分明见落霞。
江流何渺渺，怀古独依依。渔父非贤者，芦中但有矶。
风雨正甘寝，云霓忽晓晴。放歌虽自遣，一岁又峥嵘。
幽思正迟迟，沙边濯弄时。自怜非博物，犹未识尧葵。
曾有烟波客，能歌西塞山。落花惟待月，一钓紫菱湾。
千顷水纹细，一拳岚影孤。君山寒树绿，曾过洞庭湖。
光阔重湖水，低斜远雁行。未曾无兴咏，多谢沈东阳。
晚菊绕江垒，忽如开古屏。莫言时节过，白日有馀馨。
日落长亭晚，山门步障青。可怜无酒分，处处有旗亭。
远岸无行树，经霜有伴红。停船搜好句，题叶赠江枫。
身世比行舟，无风亦暂休。敢言终破浪，惟愿稳乘流。
数亩苍苔石，烟濛鹤卵洲。定因词客遇，名字始风流。
兴闲停桂楫，路好过松门。不负佳山水，还开酒一樽。
短楫休敲桂，孤根自驻萍。自怜非剑气，空向斗牛星。

高浪如银屋，江风一发时。笔端降太白，才大语终奇。
细竹渔家路，晴阳看结罾。喜来邀客坐，分与折腰菱。
平湖五百里，江水想通波。不奈扁舟去，其如决计何。
数逢云断处，去岸映高山。身到章江日，应犹未得闲。
一湾斜照水，三版顺风船。未敢相邀钓，劳生只自怜。
江雨正霏微，江村晚渡稀。何曾妨钓艇，更待得鱼归。
新野旧楼名，浔阳胜赏情。照人长一色，江月共凄清。
愿饮西江水，那吟北渚愁。莫教留滞迹，远比蔡昭侯。
湖口分江水，东流独有情。常时好风物，谁伴谢宣城。
浔阳江畔菊，应似古来秋。为问幽栖客，吟时得酒不。
高峰有佳号，千尺倚寒风。若使炉烟在，犹应为上公。
万木已清霜，江边村事忙。故溪黄稻熟，一夜梦中香。
楚水苦萦回，征帆落又开。可缘非直路，却有好风来。
远谪岁时晏，暮江风雨寒。仍愁系舟处，惊梦近长滩。

卷 712_4 【春恨三首】

钱珣

负罪将军在北朝，秦淮芳草绿迢迢。
高台爱妾魂销尽，始得丘迟为一招。

久戍临洮报未归，篋香销尽别时衣。
身轻愿比兰阶蝶，万里还寻塞草飞。

永巷频闻小苑游，旧恩如泪亦难收。
君前愿报新颜色，团扇须防白露秋。

卷 712_5 【蜀国偶题】

钱珣

忽忆明皇西幸时，暗伤潜恨竟谁知。
佩兰应语宫臣道，莫向金盘进荔枝。

卷 712_6 【未展芭蕉】

钱珣

冷烛无烟绿蜡干，芳心犹卷怯春寒。

一缄书札藏何事，会被东风暗拆看。

卷 712_7 【同程九早入中书（一作钱起诗）】

钱翊

汉家贤相重英奇，蟠木何材也见知。不意云霄能自致，
空惊鹓鹭忽相随。腊雪初明柏子殿，春光欲上万年枝。
独惭皇鉴明如日，未厌春光向玉墀。

卷七百一十三

卷 713_1 【陈情献中丞】

喻坦之

孤拙竟何营，徒希折桂名。始终谁肯荐，得失自难明。
贡乏雄文献，归无瘠土耕。沧江长发梦，紫陌久惭行。
意纵求知切，才惟惧鉴精。五言非琢玉，十载看迁莺。
取进心甘钝，伤嗟骨每惊。尘襟痕积泪，客鬓白新茎。
顾盼身堪教，吹嘘羽觉生。依门情转切，荷德力须倾。
奖善犹怜贡，垂恩必不轻。从兹便提挈，云路自生荣。

卷 713_2 【长安雪后】

喻坦之

碧落云收尽，天涯雪霁时。草开当井地，树折带巢枝。
野渡滋寒麦，高泉涨禁池。遥分丹阙出，迥对上林宜。
宿片攀檐取，凝花就砌窥。气凌禽翅束，冻入马蹄危。
北想连沙漠，南思极海涯。冷光兼素彩，向暮朔风吹。

卷 713_3 【送友人游东川】

喻坦之

食尽须分散，将行几愿留。春兼三月闰，人拟半年游。
风俗同吴地，山川拥梓州。思君登栈道，猿啸始应愁。

卷 713_4 【题樟亭驿楼】

喻坦之

危槛倚山城，风帆槛外行。日生沧海赤，潮落浙江清。
秋晚遥峰出，沙干细草平。西陵烟树色，长见伍员情。

卷 713_5 【大梁送友人东游】

喻坦之

自古东西路，舟车此地分。河声梁苑夜，草色楚田曛。
雁已多南去，蝉犹在此闻。圣朝无谏猎，何计谒明君。

卷 713_6 【送友人游蜀】

喻坦之

为儒早得名，为客不忧程。春尽离丹阙，花繁到锦城。
雪消巴水涨，日上剑关明。预想回来树，秋蝉已数声。

卷 713_7 【留别友人书斋】

喻坦之

相见不相睽，一留日已西。轩凉庭木大，巷僻鸟巢低。
背俗修琴谱，思家话药畦。卜邻期太华，同上上方梯。

卷 713_8 【题耿处士林亭】

喻坦之

身向闲中老，生涯本豁然。草堂山水下，渔艇鸟花边。
窥井猿兼鹿，啼林鸟杂蝉。何时人事了，依此亦高眠。

卷 713_9 【商于逢友人】

喻坦之

行役何时了，年年骨肉分。春风来汉棹，雪路入商云。
水险溪难定，林寒鸟异群。相逢聊坐石，啼狖语中间。

卷 713_10 【灞上逢故人】

喻坦之

花落杏园枝，驱车问路岐。人情谁可会，身事自堪疑。
岳雨狂雷送，溪槎涨水吹。家山如此景，几处不相随。

卷 713_11 【发浙江】

喻坦之

岛屿遍含烟，烟中济大川。山城犹转漏，沙浦已摇船。
海曙霞浮日，江遥水合天。此时空阔思，翻想涉穷边。

卷 713_12 【晚泊盱眙】

喻坦之

广苇夹深流，萧萧到海秋。宿船横月浦，惊鸟绕霜洲。
云湿淮南树，笳清泗水楼。徒悬乡国思，羈迹尚东游。

卷 713_13 【归江南】

喻坦之

归日值江春，看花过楚津。草晴虫网遍，沙晓浪痕新。
莲叶初浮水，鸥雏已狎人。渔心惭未遂，空厌路岐尘。

卷 713_14 【代北言怀】

喻坦之

困马榆关北，那堪落景催。路行沙不绝，风与雪兼来。
草得春犹白，鸿侵夏始回。行人莫远入，戍角有馀哀。

卷 713_15 【春游曲江】

喻坦之

误入杏花尘，晴江一看春。菰蒲虽似越，骨肉且非秦。
曲岸藏翘鹭，垂杨拂跃鳞。徒怜汀草色，未是醉眠人。

卷 713_16 【和范秘书宿省中作】

喻坦之

清省宜寒夜，仙才称独吟。钟来宫转漏，月过阁移阴。
鹤避灯前尽，芸高幄外深。想知因此兴，暂动忆山心。

卷 713_17 【寄华阴姚少府】

喻坦之

泰华当公署，为官兴可知。砚和青霭冻，帘对白云垂。
峻掌光浮日，危莲影入池。料于三考内，应惜德音移。

卷 713_18 【晚泊富春寄友人】

喻坦之

江钟寒夕微，江鸟望巢飞。木落山城出，潮生海棹归。
独吟霜岛月，谁寄雪天衣。此别三千里，关西信更稀。

卷七百一十四

卷 714_1 【梅花】

崔道融

数萼初含雪，孤标画本难。香中别有韵，清极不知寒。
横笛和愁听，斜枝倚病看。朔风如解意，容易莫摧残。

卷 714_2 【铜雀妓二首】

崔道融

严妆垂玉箸，妙舞对清风。无复君王顾，春来起渐慵。
歌咽新翻曲，香销旧赐衣。陵园春雨暗，不见六龙归。

卷 714_3 【春闺二首】

崔道融

寒食月明雨，落花香满泥。佳人持锦字，无雁寄辽西。
欲剪宜春字，春寒入剪刀。辽阳在何处，莫望寄征袍。

卷 714_4 【访僧不遇】

崔道融

寻僧已寂寞，林下锁山房。松竹虽无语，牵衣借晚凉。

卷 714_5 【田上】

崔道融

雨足高田白，披蓑半夜耕。人牛力俱尽，东方殊未明。

卷 714_6 【月夕】

崔道融

月上随人意，人闲月更清。朱楼高百尺，不见到天明。

卷 714_7 【槿花】

崔道融

槿花不见夕，一日一回新。东风吹桃李，须到明年春。

卷 714_8 【西施滩】

崔道融

宰嚭亡吴国，西施陷恶名。浣纱春水急，似有不平声。

卷 714_9 【江上逢故人】

崔道融

故里琴樽侣，相逢近腊梅。江村买一醉，破泪却成咍。

卷 714_10 【牧竖】

崔道融

牧竖持蓑笠，逢人气傲然。卧牛吹短笛，耕却傍溪田。

卷 714_11 【过农家】

崔道融

欲羨农家子，秋新看刈禾。苏秦无负郭，六印又如何。

卷 714_12 【江夕】

崔道融

江心秋月白，起柁信潮行。蛟龙化为人，半夜吹笛声。

卷 714_13 【春墅】

崔道融

蛙声近过社，农事忽已忙。邻妇饷田归，不见百花芳。

卷 714_14 【江村】

崔道融

日暮片帆落，江村如有情。独对沙上月，满船人睡声。

卷 714_15 【拟乐府子夜四时歌四首】

崔道融

吴子爱桃李，月色不到地。明朝欲看花，六宫人不睡。

凉轩待月生，暗里萤飞出。低回不称意，蛙鸣乱清瑟。
月色明如昼，虫声入户多。狂夫自不归，满地无天河。
银缸照残梦，零泪沾粉臆。洞房犹自寒，何况关山北。

卷 714_16 【寄人二首】

崔道融

花上断续雨，江头来去风。相思春欲尽，未遣酒尊空。
澹澹长江水，悠悠远客情。落花相与恨，到地一无声。

卷 714_17 【江鸥】

崔道融

白鸟波上栖，见人懒飞起。为有求鱼心，不是恋江水。

卷 714_18 【春晚】

崔道融

三月寒食时，日色浓于酒。落尽墙头花，莺声隔原柳。

卷 714_19 【汉宫词】

崔道融

独诏胡衣出，天花落殿堂。他人不敢妒，垂泪向君王。

卷 714_20 【旅行】

崔道融

少壮经勤苦，衰年始浪游。谁怜不龟手，他处却封侯。

卷 714_21 【班婕妤】

崔道融

宠极辞同辇，恩深弃后宫。自题秋扇后，不敢怨春风。

卷 714_22 【元日有题】

崔道融

十载元正酒，相欢意转深。自量麋鹿分，只合在山林。

卷 714_23 【古树】

崔道融

古树春风入，阳和力太迟。莫言生意尽，更引万年枝。

卷 714_24 【春题二首】

崔道融

青春未得意，见花却如讎。路逢白面郎，醉插花满头。
满眼桃李花，愁人如不见。别有惜花人，东风莫吹散。

卷 714_25 【长安春】

崔道融

长安牡丹开，绣毂辗晴雷。若使花长在，人应看不回。

卷 714_26 【病起二首】

崔道融

病起春已晚，曳筇伤绿苔。强攀庭树枝，唤作花未开。

病起绕庭除，春泥粘屐齿。如从万里来，骨肉满面喜。

卷 714_27 【峡路】

崔道融

清猿啼不住，白水下来新。八月莫为客，夜长愁杀人。

卷 714_28 【长门怨】

崔道融

长门春欲尽，明月照花枝。买得相如赋，君恩不可移。

卷 714_29 【月夕有怀】

崔道融

圆光照一海，远客在孤舟。相忆无期见，中宵独上楼。

卷 714_30 【夜泊九江】

崔道融

夜泊江门外，欢声月里楼。明朝归去路，犹隔洞庭秋。

卷 714_31 【寒食夜】

崔道融

满地梨花白，风吹碎月明。大家寒食夜，独贮望乡情。

卷 714_32 【归燕】

崔道融

海燕频来去，西人独滞留。天边又相送，肠断故园秋。

卷 714_33 【长安春】

崔道融

珠箔映高柳，美人红袖垂。忽闻半天语，不见上楼时。

卷 714_34 【銮驾东回】

崔道融

两川花捧御衣香，万岁山呼辇路长。
天子还从马嵬过，别无惆怅似明皇。

卷 714_35 【钓鱼】

崔道融

闲钓江鱼不钓名，瓦瓯斟酒暮山青。
醉头倒向芦花里，却笑无端犯客星。

卷 714_36 【西施】

崔道融

苎萝山下如花女，占得姑苏台上春。
一笑不能忘敌国，五湖何处有功臣。

卷 714_37 【马嵬】

崔道融

万乘凄凉蜀路归，眼前朱翠与心违。
重华不是风流主，湘水犹传泣二妃。

卷 714_38 【羯鼓】

崔道融

华清宫里打撩声，供奉丝簧束手听。
寂寞銮舆斜谷里，是谁翻得雨淋铃。

卷 714_39 【寄李左司（一本下有五季在台四字）】

崔道融

柏台兰省共清风，鸣玉朝联夜被同。
肯信人间有兄弟，一生长在别离中。

卷 714_40 【梅】

崔道融

溪上寒梅初满枝，夜来霜月透芳菲。
清光寂寞思无尽，应待琴尊与解围。

卷 714_41 【天台陈逸人】

崔道融

绝粒空山秋复春，欲看沧海化成尘。
近抛三井更深去，不怕虎狼唯怕人。

卷 714_42 【雪窦禅师】

崔道融

雪窦峰前一派悬，雪窦五月无炎天。
客尘半日洗欲尽，师到白头林下禅。

卷 714_43 【溪上遇雨二首】

崔道融

回塘雨脚如缣丝，野禽不起沈鱼飞。
耕蓑钓笠取未暇，秋田有望从淋漓。

坐看黑云衔猛雨，喷洒前山此独晴。
忽惊云雨在头上，却是山前晚照明。

卷 714_44 【长门怨】

崔道融

长门花泣一枝春，争奈君恩别处新。
错把黄金买词赋，相如自是薄情人。

卷 714_45 【秋夕】

崔道融

自怜三十未西游，傍水寻山过却秋。
一夜雨声多少事，不思量尽到心头。

卷 714_46 【过隆中】

崔道融

玄德苍黄起卧龙，鼎分天下一言中。
可怜蜀国关张后，不见商量徐庶功。

卷 714_47 【关下】

崔道融

百二山河壮帝畿，关门何事更开迟。
应从漏却田文后，每度闻鸡不免疑。

卷 714_48 【寒食客中有怀】

崔道融

江上闻莺禁火时，百花开尽柳依依。
故园兄弟别来久，应到清明犹望归。

卷 714_49 【溪夜】

崔道融

积雪消来溪水宽，满楼明月碎琅玕。
渔人抛得钓筒尽，却放轻舟下急滩。

卷 714_50 【山居卧疾，广利大师见访】

崔道融

桐谷孙枝已上弦，野人犹卧白云边。
九天飞锡应相诮，三到行朝二十年。

卷 714_51 【村墅】

崔道融

正月二月村墅闲，馀粮未乏人心宽。
南邻雨中揭屋笑，酒熟数家来相看。

卷 714_52 【悲李拾遗二首】

崔道融

故友从来匪石心，谏多难得主恩深。
行朝半夜烟尘起，晓殿吁嗟一镜沈。

天涯时有北来尘，因话它人及故人。
也是先皇能罪己，殿前频得触龙鳞。

卷 714_53 【题《李将军传》】

崔道融

猿臂将军去似飞，弯弓百步虏无遗。
汉文自与封侯得，何必伤嗟不遇时。

卷 714_54 【酒醒】

崔道融

酒醒拨剔残灰火，多少凄凉在此中。
炉畔自斟还自醉，打窗深夜雪兼风。

卷 714_55 【郊居友人相访】

崔道融

柴门深掩古城秋，背郭缘溪一径幽。
不有小园新竹色，君来那肯暂淹留。

卷 714_56 【镜湖雪霁贻方干】

崔道融

天外晓岚和雪望，月中归棹带冰行。
相逢半醉吟诗苦，应抵寒猿袅树声。

卷 714_57 【秋霁】

崔道融

雨霁长空荡涤清，远山初出未知名。
夜来江上如钩月，时有惊鱼掷浪声。

卷 714_58 【谢朱常侍寄贶蜀茶、剡纸二首】

崔道融

瑟瑟香尘瑟瑟泉，惊风骤雨起炉烟。
一瓯解却山中醉，便觉身轻欲上天。

百幅轻明雪未融，薛家凡纸漫深红。
不应点染闲言语，留记将军盖世功。

卷 714_59 【读杜紫微集】

崔道融

紫微才调复知兵，长觉风雷笔下生。
还有枉抛心力处，多于五柳赋闲情。

卷 714_60 【寓题】

崔道融

海上乘查便合仙，若无仙骨未如船。
人间亦有支机石，虚被声名到洞天。

卷 714_61 【寓吟集】

崔道融

陶集篇篇皆有酒，崔诗句句不无杯。
醉来已共身安约，让却诗人作酒魁。

卷 714_62 【溪居即事】

崔道融

篱外谁家不系船，春风吹入钓鱼湾。
小童疑是有村客，急向柴门去却关。

卷 714_63 【鸡】

崔道融

买得晨鸡共鸡语，常时不用等闲鸣。
深山月黑风雨夜，欲近晓天啼一声。

卷 714_64 【献浙东柳大夫】

崔道融

属城甘雨几经春，圣主全分付越人。
俗眼不知青琐贵，江头争看碧油新。

卷 714_65 【杨柳枝词】

崔道融

雾撚烟搓一索春，年年长似染来新。
应须唤作风流线，系得东西南北人。

卷 714_66 【楚怀王】

崔道融

宫花一朵掌中开，缓急翻为敌国媒。
六里江山天下笑，张仪容易去还来。

卷 714_67 【对早梅寄友人二首】

崔道融

忆得前年君寄诗，海边三见早梅词。
与君犹是海边客，又见早梅花发时。

忆得去年有遗恨，花前未醉到无花。
清芳一夜月通白，先脱寒衣送酒家。

卷 714_68 【句】

崔道融

万里一点白，长空鸟不飞。

如今却羨相如富，犹有人间四壁居。

卷七百一十五

卷 715_1 【苦吟】

卢延让

莫话诗中事，诗中难更无。吟安一个字，撚断数茎须。
险觅天应闷，狂搜海亦枯。不同文赋易，为著者之乎。

卷 715_2 【雪】

卢延让

瑞雪落纷华，随风一向斜。地平铺作月，天迥撒成花。
客满烧烟舍，牛牵卖炭车。吾皇忧挟纊，犹自问君家。

卷 715_3 【松寺】

卢延让

山寺取凉当夏夜，共僧蹲坐石阶前。两三条电欲为雨，
七八个星犹在天。衣汗稍停床上扇，茶香时拨涧中泉。

通宵听论莲华义，不藉松窗一觉眠。

卷 715_4 【赠僧】

卢延让

浮世浮华一断空，偶抛烦恼到莲宫。高僧解语牙无水，
老鹤能飞骨有风。野色吟馀生竹外，山阴坐久入池中。
禅师莫问求名苦，滋味过于食蓼虫。

卷 715_5 【逢友人赴阙】

卢延让

正当天下待雍熙，丹诏征来早为迟。倚马才高犹爱艺，
问牛心在肯容私。吏开黄阁排班处，民拥青门看入时。
却笑郡人留不得，感恩唯拟立生祠。

卷 715_6 【哭李郢端公】

卢延让

军门半掩槐花宅，每过犹闻哭临声。北固暴亡兼在路，
东都权葬未归茔。渐穷老仆慵看马，著惨佳人暗理箜。

诗侣酒徒消散尽，一场春梦越王城。

卷 715_7 【谢杨尚书惠樱桃】

卢延让

满合虚红怕动摇，尚书知重赐樱桃。揉蓝尚带新鲜叶，
泼血犹残旧折条。万颗真珠轻触破，一团甘露软含消。
春来老病尤珍荷，并食中肠似火烧。

卷 715_8 【寒食日戏赠李侍御】

卢延让

十二街如市，红尘咽不开。洒蹄骢马汗，没处看花来。

卷 715_9 【樊川寒食二首】

卢延让

寒食权豪尽出行，一川如画雨初晴。
谁家络络游春盛，担入花间轧轧声。

鞍马和花总是尘，歌声处处有佳人。

五陵年少粗于事，栲栳量金买断春。

卷 715_10 【句】

卢延让

只讹些子缘，应耗没多光。

臂鹰健卒悬毡帽，骑马佳人卷画衫。

每过私第邀看鹤，长著公裳送上驴。

名纸毛生五门下，家僮骨立六街中。

云间闹铎骡驼至，雪里残骸虎拽来。

树上咨嗟批颊鸟，窗间壁驳叩头虫。

莫欺零落残牙齿，曾吃红绫饼餤来。

渡水蹇驴双耳直，避风羸仆一肩高。

高据襄阳播盛名，问人人道是诗星。

凉雨打低残菡萏，急风吹散小蜻蜓。

卷 715_11 【示门生马侍郎胤孙】

裴崱

宦途最重是文衡，天与愚夫著盛名。
三主礼闈年八十，门生门下见门生。

卷 715_12 【赠杜荀鹤】

王希羽

金榜晓悬生世日，玉书潜记上升时。
九华山色高千尺，未必高于第八枝。

卷 715_13 【宫怨二首】

柯崇

尘满金炉不炷香，黄昏独自立重廊。
笙歌何处承恩宠，一一随风入上阳。

长门槐柳半萧疏，玉辇沈思恨有馀。
红泪渐消倾国态，黄金谁为达相如。

卷 715_14 【早春池亭独游三首】

刘象

春意送残腊，春晴融小洲。蒲茸才簇岸，柳颊已遮楼。
便有杯觞兴，可据羁旅愁。凫鹭亦相狎，尽日戏清流。

清流环绿筱，清景媚虹桥。莺刷初迁羽，莎拳拟拆苗。
细沙擢暖岸，淑景动和飙。倍忆同袍侣，相欢倒一瓢。

一瓢欢自足，一日兴偏多。幽意人先赏，疏丛蝶未过。
知音新句苦，窥沼醉颜酡。万虑从相拟，今朝欲奈何。

卷 715_15 【鹭鸶】

刘象

洁白孤高生不同，顶丝清软冷摇风。窥鱼翘立荷香里，
慕侣低翻柳影中。几日下巢辞紫阁，多时凝目向晴空。
摩霄志在潜修羽，会接鸾凰别苇丛。

卷 715_16 【春夜二首】

刘象

几处兵戈阻路岐，忆山心切与山违。

时难何处披怀抱，日日斜空醉归。

一别杜陵归未期，只凭魂梦接亲知。
近来欲睡兼难睡，夜夜夜深闻子规。

卷 715_17 【晓登迎春阁】

刘象

未栉凭栏眺锦城，烟笼万井二江明。
香风满阁花盈户，树树树梢啼晓莺。

卷 715_18 【咏仙掌】

刘象

万古亭亭倚碧霄，不成擎亦不成招。
何如掬取天池水，洒向人间救旱苗。

卷 715_19 【鄆中感旧】

刘象

顷年曾住此中来，今日重游事可哀。

忆得几家欢宴处，家家家业尽成灰。

卷 715_20 【白髭】

刘象

到处逢人求至药，几回染了又成丝。
素丝易染髭难染，墨翟当时合泣髭。

卷 715_21 【题县令范传真化洽亭】

沈颜

前有浅山，屹然如屏。后有卑岭，繚然如城。
跨池左右，足以建亭。斯亭何名，化洽而成。

卷 715_22 【书怀寄友人】

沈颜

江湖劳遍寻，只自长愁襟。到处慵开口，何人可话心。
登楼得句远，望月抒情深。却忆山斋后，猿声相伴吟。

卷 715_23 【题壁】

杨凝式

院似禅心静，花如觉性圆。自然知了义，争肯学神仙。

卷 715_24 【赠张全义】

杨凝式

洛阳风景实堪哀，昔日曾为瓦子堆。
不是我公重葺理，至今犹是一堆灰。

卷 715_25 【题怀素酒狂帖后】

杨凝式

十年挥素学临池，始识王公学卫非。
草圣未须因酒发，笔端应解化龙飞。

卷 715_26 【句】

杨凝式

押引蝗虫到洛京，合消郡守远相迎。

到此今经三纪春。

卷 715_27 【奉试诏用拓拔思恭为京北收复都统（一作闻诏作）】

李琪

飞骑经巴栈，鸿恩及夏台。将从天上去，人自日边来。
此处金门远，何时玉辇回。早平关右贼，莫待诏书催。

卷 715_28 【题广爱寺楞伽山】

李琪

善高天外远，方丈海中遥。自有山神护，应无劫火烧。
坏文侵古壁，飞剑出寒霄。何似苍苍色，严妆十七朝。

卷 715_29 【句】

李琪

哀痛不下诏，登封谁上书。

卷 715_30 【寄桂帅】

刘崇龟

碧幢仁施合洪钧，桂树林前倍得春。
莫恋此时好风景，磻溪不是钓鱼人。

卷 715_31 【席上吟】

刘崇鲁

南行忽见李深之，手舞如蜚令不疑。
任有风流兼蕴藉，天生不似郑都知。

卷 715_32 【寄孙储（一作下第醉中寄储）】

孙定

行行血泪洒尘襟，事逐东流渭水深。秋跨蹇驴风尚紧，
静投孤店日初沈。一枝犹挂东堂梦，千里空驰北巷心。
明月悲歌又前去，满城烟树噪春禽。

卷 715_33 【江南行】

许昼

江南萧洒地，本自与君宜。固节还同我，虚心欲待谁。
涧泉傍借响，山木共含滋。粉腻虫难篆，丛疏鸟易窥。
尽应逢野渡，中忽见村祠。叶扫秋空静，根横古堑危。
影迷寒霭里，声出夜风时。客棹深深过，人家远远移。
游边曾结念，到此数题诗。莫恨成龙晚，成龙会有期。

卷 715_34 【中秋月】

许昼

应是蟾宫别有情，每逢秋半倍澄清。清光不向此中见，
白发争教何处生。闲地占将真可惜，幽窗分得始为明。
殷勤好长来年桂，莫遣平人道不平。

卷 715_35 【临终诗】

薛准

旧国深恩不易酬，又离继母出他州。
谁知天怒无因息，积愧终身乞速休。

卷 715_36 【观修处士画桃花图歌】

裴谐

一从天宝王维死，于今始遇修夫子。能向蛟绡四幅中，
丹青暗与春争工。勾芒若见应羞杀，晕绿匀红渐分别。
堪怜彩笔似东风，一朵一枝随手发。燕支乍湿如含露，
引得娇莺痴不去。多少游蜂尽日飞，看遍花心求入处。
工夫妙丽实奇绝，似对韶光好时节。偏宜留著待深冬，
铺向楼前殢霜雪。

卷 715_37 【句】

裴谐

风回山火断，朝落岸冰高。

名终埋不得，骨任朽何妨。

卷七百一十六

卷 716_1 【长安春日】

曹松

浩浩看花晨，六街扬远尘。尘中一丈日，谁是晏眠人。
御柳舞着水，野莺啼破春。徒云多失意，犹自惜离秦。

卷 716_2 【慈恩寺贻楚霄上人】

曹松

在秦生楚思，波浪接禅关。塔碍高林鸟，窗开白日山。
树阴移草上，岸色透庭间。入内谈经彻，空携讲疏还。

卷 716_3 【崇义里言怀】

曹松

马蹄京洛岐，复此少闲时。老积沧洲梦，秋乖白阁期。
平生五字句，一夕满头丝。把向侯门去，侯门未可知。

卷 716_4 【僧院松】

曹松

此木韵弥全，秋霄学瑟弦。空知百馀尺，未定几多年。
古甲磨云拆，孤根捉地坚。何当抛一干，作盖道场前。

卷 716_5 【贻世】

曹松

富者非义取，朴风争肯还。红尘不待晓，白首有谁闲。
浅度四溟水，平看诸国山。只消年作劫，俱到总无间。

卷 716_6 【南游】

曹松

直到南箕下，方谙涨海头。君恩过铜柱，戎节限交州。
犀占花阴卧，波冲瘴色流。远夷非不乐，自是北人愁。

卷 716_7 【送胡（一作王）中丞使日东】

曹松

辞天理玉簪，指日使鸡林。犹有中华恋，方同积浪深。
张帆度鲸口，衔命见臣心。渥泽遐宣后，归期抵万金。

卷 716_8 【哭陈陶处士】

曹松

园里先生冢，鸟啼春更伤。空馀八封树，尚对一茅堂。
白日埋杜甫，皇天无耒阳。如何稽古力，报答甚茫茫。

卷 716_9 【言怀】

曹松

冥心坐似痴，寝食亦如遗。为觅出人句，只求当路知。
岂能穷到老，未信达无时。此道须天付，三光幸不私。

卷 716_10 【月】

曹松

寥寥天地内，夜魄爽何轻。频见此轮满，即应华发生。
不圆争得破，才正又须倾。人事还如此，因知倚伏情。

卷 716_11 【答匡山僧赠槲栗杖】

曹松

栗杖出匡顶，百中无一枝。虽因野僧得，犹畏岳神知。
画月冷光在，指云秋片移。宜留引蹇步，他日访峨嵋。

卷 716_12 【商山夜闻泉】

曹松

泻月声不断，坐来心益闲。无人知落处，万木冷空山。
远忆云容外，幽疑石缝间。那辞通曙听，明日度蓝关。

卷 716_13 【书怀】

曹松

默默守吾道，望荣来替愁。吟诗应有罪，当路却如雠。
陆海傥难溺，九霄争便休。敢言名誉出，天未白吾头。

卷 716_14 【道中】

曹松

出门嗟世路，何日朴风归。是处太行险，□□应解飞。
主人厚薄礼，客子新故衣。所以浇浮态，多令行者违。

卷 716_15 【夏云】

曹松

势能成岳仞，顷刻长崔嵬。暝鸟飞不到，野风吹得开。
一天分万态，立地看忘回。欲结暑宵雨，先闻江上雷。

卷 716_16 【塞上行】

曹松

上将拥黄须，安西逐指呼。离乡俱少壮，到碛减肌肤。
风雪夜防塞，腥膻朝系胡。为君乐战死，谁喜作征夫。

卷 716_17 【晨起】

曹松

晓色教不睡，卷帘清气中。林残数枝月，发冷一梳风。
并鸟含钟语，欹荷隔雾空。莫疑营白日，道路本无穷。

卷 716_18 【感世】

曹松

触目尽如幻，幻中能几时。愁来舍行乐，事去莫吞悲。
白发不由己，黄金留待谁。耕烟得铭志，翻为古人思。

卷 716_19 【观华夷图】

曹松

落笔胜缩地，展图当晏宁。中华属贵分，远裔占何星。
分寸辨诸岳，斗升观四溟。长疑未到处，一一似曾经。

卷 716_20 【山中寒夜呈进士许棠】

曹松

山寒草堂暖，寂夜有良朋。读易分高烛，煎茶取折冰。
庭垂河半角，窗露月微棱。俱入论心地，争无俗者憎。

卷 716_21 【滕王阁春日晚眺】

曹松

凌春帝子阁，偶眺日移西。浪势平花坞，帆阴上柳堤。
凝岚藏宿翼，叠鼓碎归蹄。只此长吟咏，因高思不迷。

卷 716_22 【钟陵野步】

曹松

冈扉聊自后，信步出波边。野火风吹阔，春冰鹤啄穿。
渚檣齐驿树，山鸟入公田。未创孤云势，空思白阁年。

卷 716_23 【哭胡处士】

曹松

故人江阁在，重到事悠悠。无尔向潭上，为吾倾瓮头。
空馀赤枫叶，堕落钓鱼舟。疑是冲虚去，不为天地囚。

卷 716_24 【青龙寺赠云颢法师】

曹松

紫檀衣且香，春殿日尤长。此地开新讲，何山锁旧房。
僧名喧北阙，师印续南方。莫惜青莲喻，秦人听未忘。

卷 716_25 【荐福寺赠应制白公（一作栖白太师）】

曹松

才子紫檀衣，明君宠顾时。讲升高座懒，书答重臣迟。
瓶势倾圆顶，刀声落碎髭。还闻穿内去，随驾进新诗。

卷 716_26 【观山寺僧穿井（重礼石霜长者）】

曹松

云僧凿山井，寒碧在中庭。况是分岩眼，同来下石瓶。
旁痕终变藓，圆影即澄星。异夜天龙蛰，应闻说叶经。

卷 716_27 【送德光禅师】

曹松

天涯缘事了，又造石霜微。不以千峰险，唯将独影归。
有为嫌假佛，无境是真机。到后流沙锡，何时更有飞。

卷 716_28 【赠南陵李主簿】

曹松

外邑官同隐，宁劳短吏趋。看云情自足，爱酒逸应无。
簟席弹棋子，衣裳惹印朱。仍闻陂水近，亦拟掉菰蒲。

卷 716_29 【慈恩寺东楼】

曹松

寺楼凉出竹，非与曲江赊。野火流穿苑，秦山叠入巴。
风梢离众叶，岸角积虚沙。此地钟声近，令人思未涯。

卷 716_30 【古冢】

曹松

代远已难问，累累次古城。民田侵不尽，客路踏还平。
作穴蛇分蛰，依冈鹿绕行。唯应风雨夕，鬼火出林明。

卷 716_31 【访山友】

曹松

一径通高屋，重云翳两原。山寒初宿顶，泉落未知根。
急雨洗荒壁，惊风开静门。听君吟废夜，苦却建溪猿。

卷 716_32 【林下书怀寄建州李频员外】

曹松

一从诸事懒，海上迹宜沉。吾道不当路，鄙人甘入林。
云垂方觅鹤，月湿始收琴。水石南州好，谁陪刻骨吟。

卷 716_33 【猿】

曹松

曾宿三巴路，今来不愿听。云根啼片白，峰顶掷尖青。
护果憎禽啄，栖霞觑叶零。唯应卧岚客，怜尔傍岩扃。

卷 716_34 【秋日送方干游上元】

曹松

天高淮泗白，料子趋修程。汲水疑山动，扬帆觉岸行。
云离京口树，雁入石头城。后夜分遥念，诸峰霜露生。

卷 716_35 【哭李频员外（时在建川）】

曹松

出麾临建水，下世在公堂。苦集休开箧，清资罢转郎。
瘴中无子奠，岭外一妻孀。定是浮香骨，东归就故乡。

卷 716_36 【山中言事】

曹松

岚霭润窗棂，吟诗得冷症。教餐有效药，多愧独行僧。
云湿煎茶火，冰封汲井绳。片扉深著掩，经国自无能。

卷 716_37 【送左协律京西从事】

曹松

辟书来几日，遂喜就嘉招。犹向风沙浅，非于甸服遥。
时平无探骑，秋静见盘雕。若遣关中使，烦君问寂寥。

卷 716_38 【望九华寄池阳太守】

曹松

造华峰峰异，宜教岳德谦。灵踪载籍古，怪刃刺云尖。
盘蹙陵阳壮，孤标建邺瞻。霁馀堪洗目，青出谢家檐。

卷 716_39 【上广州支使王拾遗】

曹松

明时应不谏，天幕称仙才。聘入关中去，人从帝侧来。
诗窗盛岛屿，檄盾照风雷。几度陪旄节，营巡海色回。

卷 716_40 【题僧松禅（一作题僧院松）】

曹松

空山涧畔枯松树，禅老堂头甲乙身。
传是昔朝僧种著，下头应有茯苓神。

卷 716_41 【赠华阴李明府】

曹松

佩墨县兼清，约关西近城。三峰岂不重，厚地戴犹轻。
雪筱欹难直，风泉喷易横。须知高枕外，长是劝民耕。

卷 716_42 【送人庭鹤】

曹松

度岁休笼闭，身轻好羽仪。白云□是伴，沧海得因谁。
喉起遗残食，盘馀在迥枝。条风频雨去，只恐更相随。

卷 716_43 【信州闻通寺题僧砌下泉】

曹松

细声从峤足，幽淡浸香墀。此境未开日，何人初见时。
耗痕延黑藓，净罅吐微澌。应有乔梢鹤，下来当饮之。

卷 716_44 【山中】

曹松

此地似商岭，云霞空往还。衰条难定鸟，缺月易依山。
野色耕不尽，溪容钓自闲。分因多卧退，百计少相关。

卷 716_45 【寄崇圣寺僧（一作关山寄诗赠清越）】

曹松

不醉长安酒，冥心只似师。望山吟过日，伴鹤立多时。
沟远流声细，林寒绿色迟。庵西萝月夕，重约语空期。

卷 716_46 【金陵道中寄】

曹松

忍苦待知音，无时省废吟。始为分路客，莫问向隅心。
峤翠藏幽瀑，枝风下晓禽。忆君秋欲尽，马上秣陵砧。

卷 716_47 【都门送许棠东归（一作送进士张乔）】

曹松

旧客东归远，长安诗少朋。去愁分碛雁，行计逐乡僧。
华岳无时雪，黄河漫处冰。知辞国门路，片席认西陵。

卷 716_48 【送进士喻坦之游太原】

曹松

北鄙征难尽，诗愁满去程。废巢侵烧色，荒冢入锄声。
逗野河流浊，离云碛日明。并州戎垒地，角动引风生。

卷 716_49 【九江暮春书事】

曹松

杨柳城初锁，轮蹄息去踪。春流无旧岸，夜色失诸峰。
影动渔边火，声迟话后钟。明朝回去雁，谁向北郊逢。

卷 716_50 【再到洪州望西山（松常栖此山）】

曹松

洪州向西顾，不忍暂忘君。记得瀑泉落，省同幽鸟闻。
一回经雨雹，长有剩风云。未定却栖息，前头江海分。

卷 716_51 【与胡汾坐月期贯休上人不至】

曹松

扫庭秋漏滴，接话贵忘眠。静夜人相语，低枝鸟暗迁。
星围南极定，月照断河连。后会花宫子，应开石上禅。

卷 716_52 【赠胡处士】

曹松

年光离岳色，带疾卧南原。白日与无事，俗人嗔闭门。
樵鱼临片水，野鹿入荒园。莫问荣华事，清霜点发根。

卷 716_53 【铅山写怀】

曹松

天涯兵火后，风景畏临门。骨肉到时节，团圆因梦魂。
池塘营水眼，岭峤结花根。耳纵听歌吹，中心不可论。

卷 716_54 【书翠岩寺壁】

曹松

何年话尊宿，瞻礼此堂中。入郭非无路，归林自学空。
溅瓶云峤水，逆磬雪川风。时说南庐事，知师用意同。

卷 716_55 【江西题东湖】

曹松

凿出江湖思，凉多□□间。无风触微浪，半日□秋山。
客袖沙光满，船窗荻影闲。时人见黄绶，应笑狎鸥还。

卷 716_56 【题湖南岳麓寺】

曹松

海云山上寺，每到每开襟。万木长不住，细泉听更深。
蛸沾高雨断，鸟遇夕岚沈。此地良宵月，秋怀隔楚砧。

卷 716_57 【赠衡山麋明府】

曹松

为县潇湘水，门前树配苔。晚吟公籍少，春醉积林开。
涤砚松香起，擎茶岳影来。任官当此境，更莫梦天台。

卷 716_58 【塞上】

曹松

边寒来所阔，今日复明朝。河凌坚通马，胡云缺见雕。
砂中程独泣，乡外隐谁招。回首若经岁，灵州生柳条。

卷 716_59 【送邵安石及第（一作选隼）归连州覲省】

曹松

及第兼归覲，宜忘涉驿劳。青云重庆少，白日一飞高。
转楚闻啼狖，临湘见叠涛。海阳沈饮罢，何地佐旌旄。

卷 716_60 【边上送友人归宁】

曹松

乡路穿京过，宁心去少同。日斜寻阔磧，春尽逐归鸿。
独树河声外，凝笳塞色中。怜君到此处，却背老莱风。

卷 716_61 【除夜】

曹松

残腊即又尽，东风应渐闻。一宵犹几许，两岁欲平分。
燎暗倾时斗，春通绽处芬。明朝遥捧酒，先合祝尧君。

卷 716_62 【题甘露寺】

曹松

香门接巨壑，画角间清钟。北固一何峭，西僧多此逢。
天垂无际海，云白久晴峰。旦暮然灯外，涛头振蛰龙。

卷 716_63 【贻住山僧】

曹松

罢讲巡岩坞，无穷得野情。腊高犹伴鹿，夏满不归城。
云朵缘崖发，峰阴截水清。自然双洗耳，唯任白毫生。

卷 716_64 【题鹤鸣泉】

曹松

仙鹤曾鸣处，泉兼半井苔。直峰抛影入，片月泻光来。
潋滟侵颜冷，深沉慰眼开。何因值舟顶，满汲石瓶回。

卷 716_65 【吊贾岛二首】

曹松

先生不折桂，谪去抱何冤。已葬离燕骨，难招入剑魂。
旅坟低却草，稚子哭胜猿。冥寞如搜句，宜邀贺监论。

青旆低寒水，清笳出晓风。鸟为伤贾傅，马立葬滕公。
松柏青山上，城池白日中。一朝今古隔，惟有月明同。

卷 716_66 【忆江西（一作南）并悼亡友】

曹松

前心奈兵阻，悔作豫章分。芳草未归日，故人多是坟。
帆行出岫雨，马践过江云。此地一樽酒，当时皆以文。

·

卷七百一十七

卷 717_1 【九江送方干归镜湖】

曹松

一橈悬五两，此日动归风。客路抛湓口，家林入镜中。
谭馀云出峤，咏苦月欹空。更若看鵷鹄，何人夜坐同。

卷 717_2 【庐山访贾匡】

曹松

西城疾病日，此地少寻君。古迹春犹在，遥泉夜尽闻。
片时三处雨，九叠几重云。到者皆忘寐，神精与俗分。

卷 717_3 【顾少府池上（一作顾少府池亭苇）】

曹松

池上分行种，公庭觉少尘。根离潮水岸，韵爽判曹人。
正午回鱼影，方昏息鹭身。无时不动咏，沧岛思方频。

卷 717_4 【喜友人归上元别业】

曹松

一棹千里外，隐者兴宜孤。落日长边海，秋风满故都。
掩关苔色老，盘径叶声枯。匡岳来时过，迟回绝顶无。

卷 717_5 【曲江暮春雪霁】

曹松

霁动江池色，春残一去游。菰风生马足，槐雪滴人头。
北阙尘未起，南山青欲流。如何多别地，却得醉汀洲。

卷 717_6 【立春日】

曹松

春饮一杯酒，便吟春日诗。木梢寒未觉，地脉暖先知。
鸟啭星沈后，山分雪薄时。赏心无处说，怅望曲江池。

卷 717_7 【宿溪僧院】

曹松

少年云溪里，禅心夜更闲。
煎茶留静者，靠月坐苍山。
露白钟寻定，萤多户未关。
嵩阳大石室，何日译经还。

卷 717_8 【石头怀古】

曹松

日月出又没，台城空白云。
虽宽百姓土，渐缺六朝坟。
禾黍是亡国，山河归圣君。
松声骤雨足，几寺晚钟闻。

卷 717_9 【浙右赠陆处士】

曹松

静节灌园馀，得非成隐居。
长当庚子日，独拜五经书。
白浪吹亡国，秋霜洗大虚。
门前是京口，身外不营储。

卷 717_10 【哭胡处士】

曹松

丘中久不起，将谓诏书来。及见凌云说，方知掩夜台。
白衣归北路，玄造亦遗才。世上亡君后，诗声更大哉。

卷 717_11 【赠馀干袁明府】

曹松

一雨西城色，陶家心自清。山衔中郭分，云卷下湖程。
公署闻流木，人烟入废城。难忘楚尽处，新有越吟生。

卷 717_12 【赠雷乡张明府】

曹松

任官征战后，度日寄闲身。封卷还高客，飞书问野人。
废田教种谷，生路遣寻薪。若起柴桑兴，无先漉酒巾。

卷 717_13 【岳阳晚泊】

曹松

轻帆下阔流，便泊此沙洲。湖影撼山朵，日阳烧野愁。
白波争起倒，青屿或沈浮。是际船中望，东南仞仞秋。

卷 717_14 【览春榜喜孙郾成名】

曹松

门外报春榜，喜君天子知。旧愁浑似雪，见日总消时。
塔下牡丹气，江头杨柳丝。风光若有分，无处不相宜。

卷 717_15 【己亥岁二首（僖宗广明元年）】

曹松

泽国江山入战图，生民何计乐樵苏。
凭君莫话封侯事，一将功成万骨枯。

传闻一战百神愁，两岸强兵过未休。
谁道沧江总无事，近来长共血争流。

卷 717_16 【乱后入洪州西山】

曹松

寂寂阴溪水漱苔，尘中将得苦吟来。
东峰道士如相问，县令而今不姓梅。

卷 717_17 【送僧入庐山】

曹松

若到江州二林寺，遍游应未出云霞。
庐山瀑布三千仞，画破青霄始落斜。

卷 717_18 【送僧入蜀过夏】

曹松

师言结夏入巴峰，云水回头几万重。
五月峨眉须近火，木皮领重只如冬。

卷 717_19 【江西逢僧省文】

曹松

闽地高僧楚地逢，僧游蛮锡挂垂松。
白云逸性都无定，才出双峰爱五峰。

高僧不负雪峰期，却伴青霞入翠微。百叶岩前霜欲降，
九枝松上鹤初归。风生碧涧鱼龙跃，威振金楼燕雀飞。
想得白莲花上月，满山犹带旧光辉。

卷 717_20 【水精念珠】

曹松

等量红缕贯晶荧，尽道匀圆别未胜。凿断玉潭盈尺水，
琢成金地两条冰。轮时只恐星侵佛，挂处常疑露滴僧。
几度夜深寻不著，琉璃为殿月为灯。

卷 717_21 【南海旅次】

曹松

忆归休上越王台，归思临高不易裁。为客正当无雁处，

故园谁道有书来。城头早角吹霜尽，郭里残潮荡月回。
心似百花开未得，年年争发被春催。

卷 717_22 【春草】

曹松

不独满池塘，梦中佳句香。春风有馀力，引上古城墙。

卷 717_23 【金谷园】

曹松

当年歌舞时，不说草离离。今日歌舞尽，满园秋露垂。

卷 717_24 【夏日东斋】

曹松

三庚到秋伏，偶来松槛立。热少清风多，开门放山入。

卷 717_25 【南朝】

曹松

三篱盖驰道，风烈一无取。时见牧牛童，嗔牛吃禾黍。

卷 717_26 【言怀】

曹松

出山不得意，谒帝值戈鋌。岂料为文日，翻成用武年。

卷 717_27 【寒食日题杜鹃花】

曹松

一朵又一朵，并开寒食时。谁家不禁火，总在此花枝。

卷 717_28 【钟陵寒食日郊外闲游】

曹松

可怜时节足风情，杏子粥香如冷饧。

无奈春风输旧火，遍教人唤作山樱。

卷 717_29 【中秋对月】

曹松

无云世界秋三五，共看蟾盘上海涯。
直到天头天尽处，不曾私照一人家。

卷 717_30 【陪湖南李中丞宴隐溪（璋）】

曹松

竹林啼鸟不知休，罗列飞桥水乱流。
触散柳丝回玉勒，约开莲叶上兰舟。
酒边旧侣真何逊，云里新声是莫愁。
若值主人嫌昼短，应陪秉烛夜深游。

卷 717_31 【别湖上主人】

曹松

门系钓舟云满岸，借君幽致坐移旬。
湖村夜叫白芜雁，菱市晓喧深浦人。
远水日边重作雪，寒林烧后别生春。
不辞更住醒还醉，太一东峰归梦频。

卷 717_32 【赠广宣大师】

曹松

忆昔同游紫阁云，别来三十二回春。
白头相见双林下，犹是清朝未退人。

卷 717_33 【钟陵寒食日与同年裴颜李先辈、郑校书郊外闲游】

曹松

寒节钟陵香骑随，同年相命楚江湄。云间影过秋千女，
地上声喧蹴鞠儿。何处寄烟归草色，谁家送火在花枝。
银瓶冷酒皆倾尽，半卧垂杨自不知。

卷 717_34 【江外除夜】

曹松

千门庭燎照楼台，总为年光急急催。半夜腊因风卷去，

五更春被角吹来。宁无好鸟思花发，应有游鱼待冻开。
不是多岐渐平稳，谁能呼酒祝昭回。

卷 717_35 【七夕】

曹松

牛女相期七夕秋，相逢俱喜鹊横流。彤云缥缈回金辂，
明月婵娟挂玉钩。燕羽几曾添别恨，花容终不更含羞。
更残便是分襟处，晓箭东来射翠楼。

卷 717_36 【罗浮山下书逸人壁】

曹松

海上亭台山下烟，买时幽邃不争钱。莫言白日催华发，
自有丹砂驻少年。渔钓未归深竹里，琴壶犹恋落花边。
可中更践无人境，知是罗浮第几天。

卷 717_37 【天台瀑布】

曹松

万仞得名云瀑布，远看如织挂天台。休疑宝尺难量度，

直恐金刀易剪裁。喷向林梢成夏雪，倾来石上作春雷。
欲知便是银河水，堕落人间合却回。

卷 717_38 【桂江】

曹松

未识佳人寻桂水，水云先解傍壶觞。笋林次第添斑竹，
雏鸟参差护锦囊。乳洞此时连越井，石楼何日到仙乡。
如飞似堕皆青壁，画手不强元化强。

卷 717_39 【南海】

曹松

倾腾界汉沃诸蛮，立望何如画此看。无地不同方觉远，
共天无别始知宽。文魃隔雾朝含碧，老蚌凌波夜吐丹。
万状千形皆得意，长鲸独自转身难。

卷 717_40 【洞庭湖】

曹松

东西南北各连空，波上唯留小朵峰。长与岳阳翻鼓角，

不离云梦转鱼龙。吸回日月过千顷，铺尽星河剩一重。
直到劫馀还作陆，是时应有羽人逢。

卷 717_41 【霍山（在龙川县）】

曹松

七千七百七十丈，丈丈藤萝势入天。未必展来空似翅，
不妨开去也成莲。月将河汉分岩转，僧与龙蛇共窟眠。
直是画工须阁笔，况无名画可流传。

卷 717_42 【巫峡】

曹松

巫山苍翠峡通津，下有仙宫楚女真。不逐彩云归碧落，
却为暮雨扑行人。年年旧事音容在，日日谁家梦想频。
应是荆山留不住，至今犹得睹芳尘。

卷 717_43 【送陈樵校书归泉州】

曹松

巨塔列名题，诗心亦罕齐。除官京下阙，乞假海门西。

别席侵残漏，归程避战輦。关遥秦雁断，家近瘴云低。
候马春风馆，迎船晓月溪。帝京须早入，莫被刺桐迷。

卷 717_44 【赠镜湖处士方干二首】

曹松

包含教化剩搜罗，句出东瓯奈峭何。世路不妨平处少，
才人唯是屈声多。云来岛上便幽石，月到湖心忌白波。
后辈难为措机杼，先生织字得龙梭。

只拟应星眠越绝，唯将丽什当高勋。磨砢清浊人难会，
织络虚无帝亦闻。鸟道未知山足雨，渔家已没镜中云。
他时莫为三征起，门外沙鸥解笑君。

卷 717_45 【拜访陆处士】

曹松

万卷书边人半白，再来惟恐降玄纁。性灵比鹤争多少，
气力登山较几分。吟鬓渐无前度漆，寝衣犹有昨宵云。
将知谷口耕烟者，低视齐梁楚赵君。

卷 717_46 【岭南道中】

曹松

百花成实未成归，未必归心与志违。但有壶觞资逸咏，
尽交风景入清机。半川阴雾藏高木，一道晴蜺杂落晖。
游子马前芳草合，鹧鸪啼歇又南飞。

卷 717_47 【春日自吴门之阳羨道中书事】

曹松

胜异恣游应未遍，路岐犹去几时还。浪花湖阔虹蜺断，
柳线村深鸟雀闲。千室绮罗浮画楫，两州丝竹会茶山。
眼前便是神仙事，何必须言洞府间。

卷 717_48 【将入关行次湘阴】

曹松

背顾秦城在何处，图书作伴过湘东。神鸦乱噪黄陵近，
候雁斜沉梦泽空。打桨天连晴水白，烧田云隔夜山红。
也知渐老岩栖稳，争奈文闱有至公。

卷 717_49 【题昭州山寺常寂上人水阁】

曹松

常寂常居常寂里，年年月月是空空。阶前未放岩根断，
屋下长教海眼通。本为入来寻佛窟，不期行处踏龙宫。
他时忆著堪图画，一朵云山二水中。

卷 717_50 【广州贻匡绪法师】

曹松

口宣微密不思议，不是除贪即诫痴。只待外方缘了日，
争看内殿诏来时。周回海树侵阶疾，迢递江潮应井迟。
必竟懒过高坐寺，未能全让法云师。

卷 717_51 【赠道人】

曹松

住山因以福为庭，便向山中隐姓名。阆苑驾将雕羽去，
洞天赢得绿毛生。日边肠胃餐霞火，月里肌肤饮露英。
顾我从来断浮浊，拟驱鸡犬上三清。

卷 717_52 【送乞雨禅师临遇南游】

曹松

活得枯樵耕者知，巡方又欲向天涯。珠穿闽国菩提子，
杖把灵峰榔栗枝。春藓任封降虎石，夜雷从傍养龙池。
生缘在地南浮去，自此孤云不可期。

卷 717_53 【南海陪郑司空游荔园】

曹松

荔枝时节出旌旂，南国名园尽兴游。乱结罗纹照襟袖，
别含琼露爽咽喉。叶中新火欺寒食，树上丹砂胜锦州。
他日为霖不将去，也须图画取风流。

卷 717_54 【李郎中林亭】

曹松

只向砌边流野水，樽前上下看鱼儿。笋蹊已长过人竹，
藤径从添拂面丝。若许白猿垂近户，即无红果压低枝。
大才必拟逍遥去，更遣何人佐盛时。

卷 717_55 【夜饮】

曹松

良宵公子宴兰堂，浓麝薰人兽吐香。云带金龙衔画烛，
星罗银凤泻琼浆。满屏珠树开春景，一曲歌声绕翠梁。
席上未知帘幕晓，青娥低语指东方。

卷 717_56 【驸马宅宴罢】

曹松

粉墙残月照宫祠，宴阁银瓶一半欹。
学语莺儿飞未稳，放身斜坠绿杨枝。

卷 717_57 【吊建州李员外】

曹松

铭旌归故里，猿鸟亦凄然。已葬桐江月，空回建水船。
客传为郡日，僧说读书年。恐有吟魂在，深山古木边。

卷 717_58 【吊李翰林】

曹松

李白虽然成异物，逸名犹与万方传。昔朝曾侍玄宗侧，
大夜应归贺监边。山木易高迷故垄，国风长在见遗篇。
投金渚畔春杨柳，自此何人系酒船。

卷 717_59 【山中】

曹松

要路豪家非往还，岩门先有不曾关。众心惟恐地无剩，
吾意亦忧天惜闲。白练曳泉窗下石，绛罗垂果枕前山。
樵夫岂解营生业，贵欲自安麋鹿间。

卷 717_60 【山寺引泉】

曹松

劈碎琅玕意有馀，细泉高引入香厨。
山僧未肯言根本，莫是银河漏泄无。

卷 717_61 【友人池上咏芦】

曹松

秋声谁种得，萧瑟在池栏。叶涩栖蝉稳，丛疏宿鹭难。
敛烟宜下□，飒吹省先寒。此物生苍岛，令人忆钓竿。

卷 717_62 【商山】

曹松

垂白商於原下住，儿孙共死一身忙。
木弓未得长离手，犹与官家射麝香。

卷 717_63 【荆南道中】

曹松

十月荒郊雪气催，依稀愁色认阳台。游秦分系三条烛，
出楚心殊一寸灰。高柳莫遮寒月落，空桑不放夜风回。
如何住在猿声里，却被蝉吟引下来。

卷 717_64 【武德殿朝退望九衢春色】

曹松

玉殿朝初退，天街一看春。南山初过雨，北阙净无尘。
夹道夭桃满，连沟御柳新。苏舒同舜泽，煦妪并尧仁。
佳气浮轩盖，和风袭缙绅。自兹怜万物，同入发生辰。

卷 717_65 【吊北邙】

曹松

山下望山上，夕阳看又曛。无人医白发，少地著新坟。
岁代殊相远，贤愚旋不分。东归聊一吊，乱木倚寒云。

卷 717_66 【及第敕下，宴中献座主杜侍郎】

曹松

得召丘墙泪却频，若无公道也无因。门前送敕朱衣吏，
席上衔杯碧落人。半夜笙歌教泥月，平明桃杏放烧春。
南山虽有归溪路，争那酬恩未杀身。

卷 717_67 【梢云】

曹松

殊质资灵贶，陵空发瑞云。稍稍含树影，郁郁动霞文。
不比因风起，全非触石分。叶光闲泛滟，枝彩静氛氲。
隐见心无宰，裴回庆自君。翻飞如可托，长愿在横汾。

卷 717_68 【白角簟】

曹松

角簟工夫已到头，夏来全占满床秋。若言保惜归华屋，
只合封题寄列侯。学卷晓冰长怕绽，解铺寒水不教流。
蒲桃锦是潇湘底，曾得王孙价倍酬。

卷 717_69 【碧角簟】

曹松

细皮重叠织霜纹，滑腻铺床胜锦茵。八尺碧天无点翳，
一方青玉绝纤尘。蝇行只恐烟粘足，客卧浑疑水浸身。
五月不教炎气入，满堂秋色冷龙鳞。

卷 717_70 【滕王阁春日晚望】

曹松

凌春帝子阁，偶眺日移西。浪势平花坞，帆阴上柳堤。

卷 717_71 【句】

曹松

追游若遇三清乐，行从应妨一日春。

石脉水流泉滴沙，鬼灯然点松柏花。

鹿眠荒圃寒芜白，鸦噪残阳败叶飞。

华岳影寒清露掌，海门风急白潮头。

卷七百一十八

卷 718_1 【颂鲁】

苏拯

天推鲁仲尼，周游布典坟。游遍七十国，不令遇一君。
一国如一遇，单车不转轮。良由至化力，为国不为身。
礼乐行未足，遭回厄于陈。礼乐今有馀，袞旒当圣人。
伤哉绝粮议，千载误云云。

卷 718_2 【医人】

苏拯

古人医在心，心正药自真。今人医在手，手滥药不神。
我愿天地炉，多衔扁鹊身。遍行君臣药，先从冻馁均。
自然六合内，少闻贫病人。

卷 718_3 【西施】

苏拯

吴王从骄佚，天产西施出。岂徒伐一人，所希救群物。

良由上天意，恶盈戒奢侈。不独破吴国，不独生越水。
在周名褒姒，在纣名妲己。变化本多涂，生杀亦如此。
君王政不修，立地生西子。

卷 718_4 【金谷园】

苏拯

积金累作山，山高小于址。栽花比绿珠，花落还相似。
徒有敌国富，不能买东市。徒有绝世容，不能楼上死。
只此上高楼，何如在平地。

卷 718_5 【巫山】

苏拯

昔时亦云雨，今时亦云雨。自是荒淫多，梦得巫山女。
从来圣明君，可听妖魅语。只今峰上云，徒自生容与。

卷 718_6 【贾客】

苏拯

长帆挂短舟，所愿疾如箭。得丧一惊飘，生死无良贱。

不谓天不祐，自是人苟患。尝言海利深，利深不如浅。

卷 718_7 【狡兔行】

苏拯

秋来无骨肥，鹰犬遍原野。草中三穴无处藏，
何况平田无穴者。

卷 718_8 【长城】

苏拯

嬴氏设防胡，烝沙筑冤垒。蒙公取勋名，岂算生民死。
运畚力不禁，碎身砂碛里。黔黎欲半空，长城春未已。
皇天潜鼓怒，力化一女子。遂使万雉崩，不尽数行泪。
自古进身者，本非陷物致。当时文德修，不到三世地。

卷 718_9 【织妇女】

苏拯

伊余尽少女，一种饰螭首。徒能事机杼，与之作歌舞。
歌舞片时间，黄金翻袖取。只看舞者乐，岂念织者苦。

感此尝忆古人言，一妇不织天下寒。

卷 718_10 【古塞下】

苏拯

百战已休兵，寒云愁未歇。血染长城沙，马踏征人骨。
早得用蛾眉，免陷边戍卒。始知髦头星，不在弯弓没。

卷 718_11 【水旱祷】

苏拯

祷祈勿告天，酒浆勿浇地。阴阳和也无妖气，
阴阳愆期乃人致。病生心腹不自医，古屋澄潭何神祟。

卷 718_12 【邹律】

苏拯

邹律暖燕谷，青史徒编录。人心不变迁，空吹闲草木。
世患有三惑，尔律莫能抑。边苦有长征，尔律莫能息。
斯术未济时，斯律亦何益。争如至公一开口，
吹起贤良霸邦国。

卷 718_13 【蜘蛛谕】

苏拯

春蚕吐出丝，济世功不绝。蜘蛛吐出丝，飞虫成聚血。
蚕丝何专利，尔丝何专孽。映日张网罗，遮天亦何别。
僥居要地门，害物可堪说。网成虽福己，网败还祸尔。
小人与君子，利害一如此。

卷 718_14 【猎犬行】

苏拯

猎犬未成行，狐兔无奈何。猎犬今盈群，狐兔依旧多。
自尔初跳跃，人言多擎蹻。常指天外狼，立可口中嚼。
骨长毛衣重，烧残烟草薄。狡兔何曾擒，时把家鸡捉。
食尽者饭翻，增养者恶壮。可嗟猎犬壮复壮，
不堪兔绝良弓丧。

卷 718_15 【断火谣】

苏拯

谁谓之推贤，于世何功果。绝尔晋侯交，禁我唐虞火。

国闭檀榆烟，大礼成隳堕。暗室枯槁饭，冷面相看坐。
阳升既非佑，阴伏若为佐。焉冻群生腹，将止天下祸。
但冤冤滥刑，天道无不可。鄙哉前朝翊赞臣，
訐谗之规何琐琐。

卷 718_16 【思妇吟】

苏拯

秋风雁又归，边信一何早。揽衣出门望，落叶满长道。
一从秉箕帚，十载孤怀抱。可堪日日醉宠荣，
不说思君令人老。

卷 718_17 【雉兔者】

苏拯

所猎一何酷，终年耗林麓。飞走如未空，贪残岂知足。
尝闻猎书史，可以鉴荣辱。尝闻猎贤良，可以霸邦国。
如何纵网罗，空成肥骨肉。和济俱不闻，曷所禳颠覆。
谁能为扣天地炉，铸此伤生其可乎！

卷 718_18 【药草】

苏拯

天子恤疲癯，坤灵奉其职。年年济世功，贵贱相兼植。
因产众草中，所希采者识。一枝当若神，千金亦何直。
生草不生药，无以彰士德。生药不生草，无以彰奇特。
国忠在臣贤，民患凭药力。灵草犹如此，贤人岂多得。

卷 718_19 【凡草诫】

苏拯

野草凡不凡，亦应生和出。锄夫耘药栏，根不留其一。
良田本芜秽，著地成弃物。人生行不修，何门可容膝。
不唯不尔容，得无凡草嫉。贤愚偃仰间，鉴之宜日日。

卷 718_20 【明禁忌】

苏拯

阴阳家有书，卜筑多禁忌。土中若有神，穴处何无祟。
我识先贤意，本诫骄侈地。恣欲创楼台，率情染朱翠。
四面兴土功，四时妨农事。可以没凶灾，四隅通一二。

一年省修营，万民停困蹶。动若契于理，福匪神之遗。
动若越于常，祸乃身之致。神在虚无间，土中非神位。

卷 718_21 【伤彩饰】

苏拯

朝见亦光彩，暮见亦光彩。一旦风雨飘，十分无一在。
尔形才似削，尔貌不如昨。本为是凡姿，谁教染丹雘。
虚饰片时间，天意以为恶。物假犹如此，人假争堪作。

卷 718_22 【世迷】

苏拯

乌兔日夜行，与人运枯荣。为善不常缺，为恶不常盈。
天道无阿党，人心自覆倾。所以多迁变，宁合天地情。
我愿造化手，莫放狐兔走。恣海产珍奇，纵地生花柳。
美者一齐美，丑者一齐丑。民心归大朴，战争亦何有。

卷 718_23 【鸱梟】

苏拯

为害未为害，其如污物类。斯言之一玷，流传极天地。

良木不得栖，清波不得戏。曾戏水堪疑，曾栖树终弃。
天不殀尔族，与夫恶相济。地若默尔声，与夫妖为讳。
一时怀害心，千古不能替。伤哉丑行人，兹禽亦为譬。

卷 718_24 【山中道者】

苏拯

筇杖六尺许，坐石流泉所。举头看古松，似对仙鹤语。
是时天气清，四迥无尘侣。顾我笑相迎，知有丹砂异。

卷 718_25 【渔人】

苏拯

垂竿朝与暮，披蓑卧横楫。不问清平时，自乐沧波业。
长畏不得闲，几度避游畋。当笑钓台上，逃名名却传。

卷 718_26 【闻猿】

苏拯

秋风飒飒猿声起，客恨猿哀一相似。
漫向孤危惊客心，何曾解入笙歌耳。

卷 718_27 【经马嵬坡】

苏拯

一从杀贵妃，春来花无意。此地纵千年，土香犹破鼻。
宠既出常理，辱岂同常死。一等异于众，倾覆皆如此。

卷 718_28 【经鹤台】

苏拯

筑台非谓贤，独聚乘轩鹤。六马不能驭，九皋欲何托。
一旦敌兵来，万民同陨馘。如何警露禽，不似衔环雀。
一物欲误时，众类皆成恶。至今台基上，飞鸟不至泊。

卷 718_29 【寄远】

苏拯

游子虽惜别，一去何时见。飞鸟犹恋巢，万里亦何远。
妾愿化为霜，日日下河梁。若能侵鬓色，先染薄情郎。

卷七百一十九

卷 719_1 【芭蕉】

路德延

一种灵苗异，天然体性虚。叶如斜界纸，心似倒抽书。

卷 719_2 【感旧诗】

路德延

初骑竹马咏芭蕉，尝忝名卿诵满朝。五字便容趋绛帐，
一枝寻许折丹霄。岂知流落萍蓬远，不觉推迁岁月遥。
国境未安身未立，至今颜巷守箪瓢。

卷 719_3 【小儿诗】

路德延

情态任天然，桃红两颊鲜。乍行人共看，初语客多怜。
臂膊肥如瓠，肌肤软胜绵。长头才覆额，分角渐垂肩。

散诞无尘虑，逍遥占地仙。排衙朱阁上，喝道画堂前。
合调歌杨柳，齐声踏采莲。走堤行细雨，奔巷趁轻烟。

嫩竹乘为马，新蒲折作鞭。莺雏金铎系，猫子彩丝牵。
拥鹤归晴岛，驱鹅入暖泉。杨花争弄雪，榆叶共收钱。
锡镜当胸挂，银珠对耳悬。头依苍鹞裹，袖学柘枝揎。
酒滯丹砂暖，茶催小玉煎。频邀筹箸掙，时乞绣针穿。

宝筐擎红豆，妆奁拾翠钿。戏袍披按褥，劣帽戴靴毡。
展画趋三圣，开屏笑七贤。贮怀青杏小，垂额绿荷圆。
惊滴沾罗泪，娇流污锦涎。倦书饶娅姹，憎药巧迁延。
弄帐鸾绡映，藏衾凤绮缠。指敲迎使鼓，筋拨赛神弦。

帘拂鱼钩动，筝推雁柱偏。棋图添路画，笛管欠声镌。
恼客初酣睡，惊僧半入禅。寻蛛穷屋瓦，探雀遍楼椽。
抛果忙开口，藏钩乱出拳。夜分围棊枰，聚朝打秋千。
折竹装泥燕，添丝放纸鸢。互夸轮水碓，相教放风旋。

旗小裁红绢，书幽截碧笺。远铺张鸽网，低控射蝇弦。
詵语时时道，谣歌处处传。匡窗眉乍曲，遮路臂相连。
斗草当春径，争球出晚田。柳傍慵独坐，花底困横眠。
等鹊前篱畔，听蛩伏砌边。傍枝粘舞蝶，隈树捉鸣蝉。
平岛夸馿上，层崖逞捷缘。嫩苔车迹小，深雪履痕全。
竞指云生岫，齐呼月上天。蚁窠寻径劓，蜂穴绕阶填。
樵唱回深岭，牛歌下远川。垒柴为屋木，和土作盘筵。
险砌高台石，危跳峻塔砖。忽升邻舍树，偷上后池船。
项橐称师日，甘罗作相年。明时方任德，劝尔减狂颠。

卷 719_4 【句】

路德延

不是上台知姓字，五花宾馆敢从容。

卷 719_5 【及第后呈朝中知己】

李旭

凌晨晓鼓奏嘉音，雷拥龙迎出陆沈。金榜高悬当玉阙，
锦衣即著到家林。真珠每被尘泥陷，病鹤多遭蝼蚁侵。
今日始知天有意，还教雪得一生心。

卷 719_6 【题惠严寺】

崔庸

人莫嫌山小，僧还爱寺灵。殿高神气力，龙活客丹青。

卷 719_7 【经费拾遗旧隐】

胡骈

林下茅斋已半倾，九华幽径少人行。不将冠剑为荣事，

只向烟萝寄此生。松竹渐荒池上色，琴书徒立世间名。
白杨风起秋山暮，时复哀猿啼一声。

卷 719_8 【失题】

周祚

莫道春花独照人，秋花未必怯青春。
四时风雨没时节，共保松筠根底尘。

卷 719_9 【蛱蝶行】

卢频

东园宫草绿，上下飞相逐。君恩不禁春，昨夜花中宿。

卷 719_10 【东西行】

卢频

种荷玉盆里，不及沟中水。养雉黄金笼，见草心先喜。

卷 719_11 【失题】

卢频

春泪烂罗绮，泣声抽恨多。莫滴芙蓉池，愁伤连蒂荷。

一朵花叶飞，一枝花光彩。美人惜花心，但愿春长在。

卷 719_12 【晚泊汉江渡】

刘敞

末秋云木轻，莲折晚香清。雨下侵苔色，云凉出浪声。
叠帆依岸尽，微照夹堤明。渡吏已头白，遥知客姓名。

卷 719_13 【句】

刘敞

残阳来霁岫，独兴起沧洲。

.

卷七百二十

卷 720_1 【游洞庭湖】

裴说

楚云团翠八百里，澧兰吹香堕春水。白头渔子摇苍烟，
鸂鶒眠沙晓惊起。沙头龙叟夜叹忧，铁笛未响春风羞。
露寒紫藟结新愁，城角泣断关河秋。谪仙欲识雷斧手，
划却古今愁共丑。鲸游碧落杳无踪，作诗三叹君知否。
瀛洲一棹何时还，满江宫锦看湖山。

卷 720_2 【怀素台歌（一作题怀素台）】

裴说

我呼古人名，鬼神侧耳听：杜甫李白与怀素，
文星酒星草书星。永州东郭有奇怪，笔冢墨池遗迹在。
笔冢低低高如山，墨池浅浅深如海。我来恨不已，
争得青天化为一张纸，高声唤起怀素书，
搦管研朱点湘水。欲归家，重叹嗟。眼前有，三个字：
枯树槎。乌梢蛇，墨老鸦。

卷 720_3 【闻砧（一作寄边衣）】

裴说

深闺乍冷鉴开篲，玉箸微微湿红颊。一阵霜风杀柳条，
浓烟半夜成黄叶。垂垂白练明如雪，独下闲阶转凄切。
只知抱杵捣秋砧，不觉高楼已无月。时闻寒雁声相唤，
纱窗只有灯相伴。几展齐纨又懒裁，离肠恐逐金刀断。
细想仪形执牙尺，回刀剪破澄江色。愁捻银针信手缝，
惆怅无人试宽窄。时时举袖匀红泪，红笺谩有千行字。
书中不尽心事中，一片殷勤寄边使。

卷 720_4 【春早寄华下同人】

裴说

正是花时节，思君寝复兴。市沽终不醉，春梦亦无凭。
岳面悬青雨，河心走浊冰。东门一条路，离恨镇相仍。

卷 720_5 【赠衡山令】

裴说

君吟十二载，辛苦必能官。造化犹难隐，生灵岂易谩。

猿跳高岳静，鱼摆大江宽。与我为同道，相留夜话阑。

卷 720_6 【南中县令】

裴说

寂寥虽下邑，良宰有清威。苦节长如病，为官岂肯肥。
山多村地狭，水浅客舟稀。上国搜贤急，陶公早晚归。

卷 720_7 【寄曹松（一作洛中作）】

裴说

莫怪苦吟迟，诗成鬓亦丝。鬓丝犹可染，诗病却难医。
山暝云横处，星沈月侧时。冥搜不可得，一句至公知。

卷 720_8 【赠宾贡】

裴说

惟君怀至业，万里信悠悠。路向东溟出，枝来北阙求。
家无一夜梦，帆挂隔年秋。鬓发争禁得，孤舟往复愁。

卷 720_9 【汉南邮亭】

裴说

高阁水风清，开门日送迎。帆张独鸟起，乐奏大鱼惊。
骤雨拖山过，微风拂面生。闲吟虽得句，留此谢多情。

卷 720_10 【棋】

裴说

十九条平路，言平又嶮巇。人心无算处，国手有输时。
势迴流星远，声干下雹迟。临轩才一局，寒日又西垂。

卷 720_11 【夏日即事】

裴说

僻居门巷静，竟日坐阶墀。鹊喜虽传信，蛩吟不见诗。
笋抽通旧竹，梅落立闲枝。此际无尘挠，僧来称所宜。

卷 720_12 【送人宰邑】

裴说

官小任还重，命官难偶然。皇恩轻一邑，赤子病三年。
瘦马稀餐粟，羸童不识钱。如君清苦节，到处有人传。

卷 720_13 【春暖送人下第】

裴说

相送短亭前，知君愚复贤。事多凭夜梦，老为待明年。
春树添山脊，晴云学晓烟。雄文有公道，此别莫潸然。

卷 720_14 【湖外送何崇入阁】

裴说

因诗相识久，忽此告临途。便是有船发，也须容市沽。
精吟五个字，稳泛两重湖。长短逢公道，清名振帝都。

卷 720_15 【送进士苏瞻乱后出家】

裴说

因乱事空王，孤心亦不伤。梵僧为骨肉，柏寺作家乡。
眼闭千行泪，头梳一把霜。诗书不得力，谁与问苍苍。

卷 720_16 【秋日送河北从事】

裴说

北风沙漠地，吾子远从军。官路虽非远，诗名要且闻。
蝉悲欲落日，雕下拟阴云。此去难相恋，前山掺袂分。

卷 720_17 【喜友人再面】

裴说

一别几寒暄，迢迢隔塞垣。相思长有事，及见却无言。
静坐将茶试，闲书把叶翻。依依又留宿，圆月上东轩。

卷 720_18 【对雪】

裴说

大片向空舞，出门肌骨寒。路岐平即易，沟壑满应难。
兔穴归时失，禽枝宿处干。豪家宁肯厌，五月画图看。

卷 720_19 【冬日后作】

裴说

寂寞掩荆扉，昏昏坐欲痴。事无前定处，愁有并来时。
日影才添线，鬓根已半丝。明庭正公道，应许苦心诗。

卷 720_20 【冬日作】

裴说

粝食拥败絮，苦吟吟过冬。稍寒人却健，太饱事多慵。
树老生烟薄，墙阴贮雪重。安能只如此，公道会相容。

卷 720_21 【中秋月】

裴说

一岁几盈亏，当轩重此期。幸无偏照处，刚有不明时。
色静云归早，光寒鹤睡迟。相看吟未足，皎皎下疏篱。

卷 720_22 【塞上曲】

裴说

极目望空阔，马羸程又赊。月生方见树，风定始无沙。
楚水辞鱼窟，燕山到雁家。如斯名利役，争不老天涯。

卷 720_23 【终南山】

裴说

九衢南面色，苍翠绝纤尘。寸步有闲处，百年无到人。
禁林寒对望，太华净相邻。谁与群峰并，祥云瑞露频。

卷 720_24 【访道士】

裴说

高冈微雨后，木脱草堂新。惟有疏慵者，来看淡薄人。
竹牙生碍路，松子落敲巾。粗得玄中趣，当期宿话频。

卷 720_25 【道林寺】

裴说

独立凭危阑，高低落照间。寺分一派水，僧锁半房山。
对面浮世隔，垂帘到老闲。烟云与尘土，寸步不相关。

卷 720_26 【般若寺】

裴说

南岳古般若，自来天下知。翠笼无价寺，光射有名诗。
一水涵兽迹，五峰排凤仪。高僧引闲步，昼出夕阳归。

卷 720_27 【兜率寺】

裴说

一片无尘地，高连梦泽南。僧居跨鸟道，佛影照鱼潭。
朽枿云斜映，平芜日半涵。行行不得住，回首望烟岚。

卷 720_28 【鹿门寺】

裴说

鹿门山上寺，突兀尽无尘。到此修行者，应非取次人。
鸟过惊石磬，日出碍金身。何计生烦恼，虚空是四邻。

卷 720_29 【题岳州僧舍】

裴说

喜到重湖北，孤州横晚烟。鹭衔鱼入寺，鸦接饭随船。
松桧君山迥，菰蒲梦泽连。与师吟论处，秋水浸遥天。

卷 720_30 【过洞庭湖】

裴说

浪高风力大，挂席亦言迟。及到堪忧处，争如未济时。
鱼龙侵莫测，雷雨动须疑。此际情无赖，何门寄所思。

卷 720_31 【旅行闻寇】

裴说

动步忧多事，将行问四邻。深山不畏虎，当路却防人。
豪富田园废，疲羸屋舍新。自惭为旅客，无计避烟尘。

卷 720_32 【旅中作】

裴说

妄动远抛山，其如馁与寒。投人言去易，开口说贫难。
泽国云千片，湘江竹一竿。时明未忍别，犹待计穷看。

卷 720_33 【旅次衡阳】

裴说

欲往几经年，今来意豁然。江风长借客，岳雨不因天。
戏鹭飞轻雪，惊鸿叫乱烟。晚秋红藕里，十宿寄渔船。

卷 720_34 【不出院僧】

裴说

四远参寻遍，修行却不行。耳边无俗语，门外是前生。
塔见移来影，钟闻过去声。一斋唯默坐，应笑我营营。

卷 720_35 【湖外寄处宾上人】

裴说

怪得意相亲，高携一轴新。能搜大雅句，不似小乘人。
岳麓擎枯桧，潇湘吐白蘋。他年遇同道，为我话风尘。

卷 720_36 【寄贯休】

裴说

忆昔与吾师，山中静论时。总无方是法，难得始为诗。
冻犬眠干叶，饥禽啄病梨。他年白莲社，犹许重相期。

卷 720_37 【寄僧尚颜】

裴说

曾居五老峰，所得共谁同。才大天全与，吟精楚欲空。
客来庭减日，鸟过竹生风。早晚摇轻拂，重归瀑布中。

卷 720_38 【哭处默上人】

裴说

凄凉總幕下，香吐一灯分。斗老输寒衾，留闲与白云。
挈盂曾几度，传衲不教焚。泣罢重回首，暮山钟半闻。

卷 720_39 【庐山瀑布】

裴说

静景凭高望，光分翠嶂开。嶮飞千尺雪，寒扑一声雷。
过去云冲断，旁来烧隔回。何当住峰下，终岁绝尘埃。

卷 720_40 【华山上方】

裴说

独上上方上，立高聊称心。气冲云易黑，影落县多阴。
有云草不死，无风松自吟。会当求大药，他日复追寻。

卷 720_41 【咏鹦鹉】

裴说

常贵西山鸟，衔恩在玉堂。语传明主意，衣拂美人香。
缓步寻珠网，高飞上画梁。长安频道乐，何日从君王。

卷 720_42 【鹭鸶】

裴说

秋江清浅时，鱼过亦频窥。却为分明极，翻成所得迟。
浴偎红日色，栖压碧芦枝。会共鹈同侣，翱翔应可期。

卷 720_43 【牡丹】

裴说

数朵欲倾城，安同桃李荣。未尝贫处见，不似地中生。
此物疑无价，当春独有名。游蜂与蝴蝶，来往自多情。

卷 720_44 【见王贞白】

裴说

共贺登科后，明宣入紫宸。又看重试榜，还见苦吟人。
此得名浑别，归来话亦新。分明一枝桂，堪动楚江滨。

卷 720_45 【经杜工部坟】

裴说

骚人久不出，安得国风清。拟掘孤坟破，重教大雅生。
皇天高莫问，白酒恨难平。悵快寒江上，谁人知此情？

卷 720_46 【寄僧知乾】

裴说

貌高清入骨，帝里旧临坛。出语经相似，行心佛证安。

卷 720_47 【乱中偷路入故乡】

裴说

愁看贼火起诸烽，偷得馀程怅望中。
一国半为亡国烬，数城俱作古城空。

卷 720_48 【蔷薇】

裴说

一架长条万朵春，嫩红深绿小窠匀。
只应根下千年土，曾葬西川织锦人。

卷 720_49 【春日山中竹】

裴说

数竿苍翠拟龙形，峭拔须教此地生。
无限野花开不得，半山寒色与春争。

卷 720_50 【柳】

裴说

高拂危楼低拂尘，灞桥攀折一何频。
思量却是无情树，不解迎人只送人。

卷 720_51 【岳阳兵火后题僧舍】

裴说

十年兵火真多事，再到禅扉却破颜。
唯有两般烧不得，洞庭湖水老僧闲。

卷 720_52 【句】

裴说

读书贫里乐，搜句静中忙。
苦吟僧入定，得句将成功。
是事精皆易，唯诗会却难。
因携一家住，赢得半年吟。
吟馀潮入浦，坐久烧移山。
三年清似水，六月冷如冰。
一通红锦重，三事紫罗轻。

· 全唐诗 ·

瘦肌寒带粟，病眼馁生花。

避乱一生多。

雪留寒竹寺舍冷，风撼早梅城郭香。

画球轻蹴壶中地，彩索高飞掌上身。